

ಮತ್ತಾಯನು ಬರೆದ ಯೇಸುವಿನ ಸುವಾರ್ತೆ ಮತ್ತಾಯನೆ ಲೀಖ್ಯೋತೆ ಯೇಸುನಿ ಅಲ್ಫಿ ಸಮಾಚಾರ್ ಮಾಲುಮ್ ಕರಾನು

ಮತ್ತಾಯನೆ ಲೀಖ್ಯೋತೆ ಅಲ್ಫಿ ಸಮಾಚಾರ್‌ನು ಪುಸ್ತಕ್ ನವಿ ಒಪ್ಪಂದನು ಚಾರ್‌ಮ ಏಕ್ ಭಾಗ್ ಹುಯಿರ್ದ್ವಾಸ್. ಆ ಪುಸ್ತಕ್ ಯೇಸುನಿ ಬಾರೇಮ ಖೇಣಿಧಿ ಬೊಲೈರ್ದ್ವಾಸ್. ಆ ಪುಸ್ತಕ್ ಖ್ಹಾರು ಅಲ್ಫಿ ಸಮಾಚಾರ್‌ಕರಿ ಯೇಸುನಿ ಬಾರೇಮ ಬೊಲೈರ್ದ್ವಾಸ್ ಆ ಅಲ್ಫಿಸಮಾಚಾರ್ ಕತೊ ಅಲ್ಫಿಸಂದೇಶ್, ಆ ಪುಸ್ತಕ್‌ಖ್ಹಾರು ಯೇಸುನು ಮರಣ್ಣಿ ಬಾದ್‌ಮ ಮತ್ತಾಯ, ಮಾರ್ಕ್, ಲೂಕ, ಬಿಜು ಯೋಹಾನಧಿ ಲೀಖೈರ್ದ್ವಾಸ್, ಪಂಡಿತ್‌ನ ಆ ಮತ್ತಾಯನೆ ಲೀಖ್ಯೋತೆ ಅಲ್ಫಿ ಸಮಾಚಾರ್‌ನ್ ಪುಸ್ತಕ್ ಬರೊಬರ್‌ನು ಪಕ್ಕಾ ತಾರಿಕ್ ಬಿಜು ವರಖ್‌ಅಖ್ಖು ಮಾಲುಮ್‌ಕೊಯ್ಚಿ ತೋಬಿ ಯೇಸು ಪೈದಹುಯಿನ್ ತೀನಿಖ್ತ್ ವರಖ್‌ನ ಬಾದ್‌ಮ ಲೀಖಿರಾಖ್ಯುಲಾಷೆ, ಬಿಜು ಆ ಪುಸ್ತಕ್ ಲೀಖಿಹುಯು ಝಗೋಬಿ ಜಿನುಕು ಮಾಲುಮ್‌ಕೊಯ್ಚಿ ಕತೋಬಿ ಘಣು ಅದ್ಮಿಖ್ಹಾರು ಆ ಪುಸ್ತಕ್ ಪ್ಯಾಲೆಸ್ತೇನ್‌ಮ ಲೀಖೈರ್ದ್ವಾಸ್‌ಕರಿ ಲಾರ್ಪಿರಾಖ್ಯುಸ್. ಆ ಪುಸ್ತಕನ ಲೀಖ್ಯೋತೆ ಮತ್ತಾಯ ಕರಿ, ಯೋಬಿಜಿನು ಯೇರೂಸಲೇಮ್ ಖ್ಹಯೇರ್‌ಮ ಥೊ. ಯೋ ಶುಂಕ ವಶೂಲಿ ಕರಾವಾಳನ ಯೇಸುನೆ ಇನೊ ಶಿಷ್ಯ ಹುವಾನ ಬುಲಾಯೊ ಇನ ಲೇವಿ ಕರಿ ನಾಮ್‌ಧಿಬಿ ಖ್ಹಣೇದ್ ಹುಯೊ. ಮತ್ತಾಯ ಭಾರಝಣ ಅಪೊಸ್ತಲರ್‌ಮ ಏಕ್ ಜಣೊ. ಯೋ ಯೆಹೂದ್ಯಾರ್‌ನ ಪಠಾವಳಾನ ಲೀಖ್ಯೊ ಆ ಜೂನು ಒಪ್ಪಂದಾನು ತಿನಿಖ್ತ್‌ಧೀಬಿ ಜಾಖ್ತ್ ಸಂಬಂದ್‌ನ ಅಲ್ಫಿನಿತರ ದೆಖೈಗೈ ಇನಿ ಖ್ಹಾಜ್ ಯೇಸುನ ಕ್ರಿಸ್ತಕರಿ ಬಿಜು ದೇವ್ಚೆ ಚೂಣಿರಾಖ್ಯೋತೆ ರಕ್ಷಕ್ ಕರಿ. ಇನಿ ಪ್ರವಾದ್‌ನೆನಾ

ವತಾಳನಖ್ವಾಜಿ. ಮತ್ತಾಯನೆ ದೇವ್ನಿ ರಾಜ್ಯನಿ ಬಾರೇಮ ಘಣು ಲೀಖ್ನಿ, ಕ್ರಿಸ್ತ ರಾಜಕೀಯಾನೊ ರಾಜ್ ಬಣೀನ್ ಹುಕುಮ್ ಚಲಾವನ ದೇಖುಕರಸ್ ಕರಿ ಯೆಹೂದ್ಯರಾನಿ ಖ್ವಾಜ್ ಥಿ. ಮತ್ತಾಯನೆ ಘಣು ಆಖ್ವಾಧಿ ಸವಾಲ್ ನಾಖಿನ್. ವಿಶ್ವಾಸ್‌ಥಿ ಆತ್ಮೀಕ್ ಹುಯಿರಾಂತೆ ದೇವ್ನಿ ರಾಜ್‌ನ ಬೋಲಿವತಾಳ್ಯೊ ಮತ್ತಾಯನೆ ಲೀಖ್ನಿಂತೆ ನವಿ ಒಪ್ಪಂದಾನ ಶುರುವಾತ್ ಕರಾನ ಅಲ್ಫು ಪುಸ್ತಕ್ ಶನಕತೊ ಆ ಪುಸ್ತಕ್ ಜೂನು ಒಪ್ಪಂದಾನ ಮಳಿರಾಂತೆ ಆ ಬೇ ಒಪ್ಪಂದಾನನ ಮಳಾವಸ್. ಯೋ ಖೆವುಕತೊ ಮೋಶೆನೆ ಲೀಖ್ನಿಂತೆ ಪಹಿಲೆನು ಜೂನು ಒಪ್ಪಂದಾನು 5 ಪುಸ್ತಕ್ ಘೋಣಿ, ಮತ್ತಾಯಬಿ ಪುಸ್ತಕ್ ಲೀಖಾನ ಮ್ಹಿನತ್ ಕರಾಂತೆಕರಿ ಪಂಡಿತ್ ಖ್ವಾರು ಸೋಚ್ಚು ಮೋಶೆನೆ ಘೋಣಿ ಯೇಸುನು ಪಹಡ್‌ನು ಬೋಧನೆ ಮತ್ತಾಯ 5—7 ಮೋಶೆನ ದೇವ್ನಿ ದಿದೋತೆ ದಖ್ವಾ ಹುಕುಮ್‌ನ ಬರೊಬರ್ ಕರೆಜಾಯ್ ಧರ್ಮೊ 19:3—23:25

ಕಾಡಿದೇಖೊ

1. ಯೇಸು ಪೈದಹುಯೊತೆ ಅಜ್ಜು ಇನಿ ಸೇವೆನಿ ಬಾರೇಮ ಶುರುವಾತ್ ಕರಾಂತೆ. 1—4
2. ಯೇಸುನಿ ಸೇವೆ ಅಜ್ಜು ಇನಿ ಘಣಿ ಶಿಕಾಡನು ಬಾರೇಮ ಬೋಲಿವತಾಳಾಸ್. 5—25
3. ಇನಿ ಆಖಿ ಭಾಗ್‌ಮ ಯೇಸುನಿ ಮ್ಹಿನತ್‌ನಿ ಸೇವೆ ಮರಣ್ ಅಜ್ಜು ಜಿವಿನ್‌ಉರೊಂತೆ ಕಿಮ್ ಪೂರಹುಯು ಇನಿ ಬಾರೇಮ. 26—28

ಯೇಸು ಕ್ರಿಸ್ತನಿ ಗುರುಗುರಬ್‌ಲ್ಯಾನಿ ಪಟ್ಟಿ

(ಲೂಕ 3:23-38)

¹ ಹೈರಿತೆ ಯೇಸು ಕ್ರಿಸ್ತನಿ ಗುರುಗುರಬ್‌ಲ್ಯಾನಿ ಪಟ್ಟಿ: ಯೇಸು ದಾವೀದನೊ ಖಾಂದಾನ್‌ವಾಳೊ, ದಾವೀದ ಅಬ್ರಹಾಮನೊ ಖಾಂದಾನ್‌ವಾಳೊ.

² ಅಬ್ರಹಾಮ್ ಇಸಾಕನೊ ಬಾ, ಇಸಾಕ್ ಯಾಕೋಬನೊ ಬಾ, ಯಾಕೋಬನ ಯೆಹೂದ ಅಜ್ಜು ಇನ ಬೈಯೇ ಪೈದಹುಯ.

3 ಯೆಹೂದ ಪೆರೆಚ ಅಜ್ಜು ಜೆರಹಾನೊ ಬಾ (ಅವ್ವಿ ಆಯ ತಾಮರ), ಪೆರೆಚ ಹೆಚ್ಚೋನನೊ ಬಾ, ಹೆಚ್ಚೋನ ಅರಾಮನೊ ಬಾ.

4 ಅರಾಮ ಅಮ್ಮಿನಾದಾಬನೊ ಬಾ, ಅಮ್ಮಿನಾದಾಬ ನಹಶೋನನೊ ಬಾ, ನಹಶೋನ ಸಲ್ಮೋನನೊ ಬಾ.

5 ಸಲ್ಮೋನಬಿ ರಾಹಾಬನೊ ಛಿಯ್ಯೊ ಬೋವಜ, ಬೋವಜಬಿ ರೂತ್‌ನೊ ಛಿಯ್ಯೊ ಓಬೇದ, ಓಬೇದ ಇಷಯನೊ ಬಾ.

6 ಇಷಯ ದಾವೀದ್ ರಾಜಾನೊ ಬಾ, ದಾವೀದ ಸೊಲೊಮೋನನೊ ಬಾ (ಸೊಲೊಮೋನ್ನಿ ಆಯ ಪಹಿಲೆ ಉರಿಯಾನಿ ಬಾವಣ್ ಹುಯಿರ್ದೀಡಿ),

7 ಸೊಲೊಮೋನ ರೆಹಬ್ಬಾಮೊ ಬಾ, ರೆಹಬ್ಬಾಮ ಅಬೀಯನೊ ಬಾ, ಅಬೀಯ ಆಸನೊ ಬಾ.

8 ಆಸನ ಯೆಹೋಷಾಫಾಟನೊ ಬಾ, ಯೆಹೋಷಾಫಾಟ ಯೆಹೋರಾಮನೊ ಬಾ, ಯೆಹೋರಾಮ ಉಜ್ಜೀಯಾನೊ ಬಾ.

9 ಉಜ್ಜೀಯ ಯೋತಾಮನೊ ಬಾ, ಯೋತಾಮ ಆಹಾಜನೊ ಬಾ, ಆಹಾಜ ಹಿಜ್ಕೀಯಾನೊ ಬಾ.

10 ಹಿಜ್ಕೀಯ ಮನಸ್ಸೆನೊ ಬಾ, ಮನಸ್ಸೆ ಆಮೋನನೊ ಬಾ, ಆಮೋನ ಯೋಷೀಯಾನೊ ಬಾ.

11 ಯೋಷೀಯಾನ ಯೆಕೊನ್ಯ ಅಜ್ಜು ಇನ ಬೈಯೇ ಪೈದಹುಯ. ಯೆಹೂದ್ಯರ್‌ನ ಅದ್ಮಿನ ಬಾಬೇಲ್‌ನ ಧರ್‌ಲಿಗಯೂತೆ ಯೋ ಎಖ್ವತ್‌ಮ ಅವ್ವೆ ಪೈದಹುಯುತೆ.

12 ಯೆಹೂದ್ಯರ್‌ನ ಅದ್ಮಿನ ಬಾಬೇಲ್‌ನ ಧರಿಲೀನ್ ಜಾವಾನ ಬಾದ್‌ಮ, ಪೈದಹುಯುತೆ ಇವ್ವಿ ಖೇಣಿ, ಯೆಕೊನ್ಯ ಶೆಯಲ್ಲಿಯೇಲ್‌ನೊ ಬಾ, ಶೆಯಲ್ಲಿಯೇಲ್ ಜೆರುಬ್ಬಾಬೆಲ್‌ನೊ ಬಾ.

13 ಜೆರುಬ್ಬಾಬೆಲ್ ಅಬಿಹೂದನೊ ಬಾ, ಅಬಿಹೂದ ಎಲ್ಯಕೀಮ್‌ನೊ ಬಾ, ಎಲ್ಯಕೀಮ್ ಅಜೋರನೊ ಬಾ.

14 ಅಜೋರ ಸದೋಕನೊ ಬಾ, ಸದೋಕ ಅಖೀಮನೊ ಬಾ, ಅಖೀಮ ಎಲಿಹೂದನೊ ಬಾ.

15 ಎಲಿಹೂದ ಎಲಿಯಾಜರನೊ ಬಾ, ಎಲಿಯಾಜರ ಮತ್ತಾನನೊ ಬಾ, ಮತ್ತಾನ ಯಾಕೋಬನೊ ಬಾ.

16 ಯಾಕೋಬ ಯೋಸೇಫನೊ ಬಾ, ಯೋಸೇಫ ಮರಿಯನೊ ಬಾವ್ತಿ. ಮರಿಯ ಯೇಸುನಿ ಆಯ, ಯೇಸುನ, ಬಘಾಡವಾಳೊ ಕ್ರಿಸ್ತ ಕರಿ ಚಿಕರ್ತುಡು.

17 ಅಬ್ರಹಾಮ್‌ಡು ಧರಿನ್ ದಾವೀದತೋಡಿ ಚೌಧ ಮುಂಡಿ, ದಾವೀದ್‌ಡು ಧರಿನ್ ಬಾಬೇಲ್‌ನ ಧರಿಲಿಗಯೂತೆ ಇವ್ವಾತೋಡಿ ಚೌಧ ಮುಂಡಿ, ಬಾಬೇಲ್‌ನ ಧರಿಲಿಗಯೂತೆ ಹಿಜ್ಜಾಡು ಧರಿನ್ ಕ್ರಿಸ್ತಲಗು ಚೌಧ ಮುಂಡಿ.

ಯೇಸು ಕ್ರಿಸ್ತ ಪೈದಹುಯೊತೆ

(ಲೂಕ 2:1-7)

18 ಯೇಸು ಕ್ರಿಸ್ತ ಪೈದಹುಯೊತೆ ಕಿಮ್‌ಕತೊ; ಇನಿ ಆಯ ಮರಿಯನ ಯೋಸೇಫ್‌ಡಿ ಖ್ವಿಗೈನಾಖಿರಾಖ್ವಿಡು, ಕತೋಬಿ ಇವ್ವೊವ್ಯಹಾ ಹುವಾನ ಅಗಾಡಿಸ್, ಯೋ ಪವಿತ್ರಾತ್ಮಾಡಿ ಬೇಜೂನಿ ಹುಯಿರ್ದೇಥೀತೆ ಇನ ಮಾಲುಮ್‌ಪಡ್ವು.

19 ಯೋಸೇಫ ಏಕ್ ನೀತಿವಾಳೊ ಅದ್ವಿ ಹುಯಿರ್ದೇಥೊ, ಇನಖ್ವಾಜಿ ಯೋಸೇಫ ಅದ್ವಿನ ಖ್ವಾಪ್ಪೆ ಮರಿಯನಿ ಖ್ವರಮ್ ನಾ ಕಾಡ್ವು ಕರಿ, ಕಿನಾಬಿ ಮಾಲುಮ್‌ಪಡ್ವುನಾತೆ ಇಮ್, ಖ್ವಿಗೈನ ತೋಡಿನಾಕ್‌ಣು ಕರಿ ಥೊ.

20 ಯೋ ಇಮ್ ಸೋಚುಕರಾನಿ ವಖ್ವತ್‌ಮ, ದೇವ್ವದೂತನೆ ಇನ ಖ್ವೊಣ್ಯಮ ದೆಖೈನ್, “ದಾವೀದನೊ ಖಾಂದಾನ್‌ವಾಳ ಯೋಸೇಫ, ಮರಿಯನ ತಾರಿ ಬಾವಣ್ ಕರಿಲ್ಯವಾನ ಡರ್‌ನಕೊ. ಯೋ ಪವಿತ್ರಾತ್ಮಾಡೀಸ್ ಬೇಜೂನಿ ಹುಯಿರ್ದೇಸ್ತೆ.

21 ಯೋ ಏಕ್ ಪಖ್ವೊ ಲಡ್ಕಾನ ಭಣ್‌ಶೆ, ತೊ ಇನ ಯೇಸುಕರಿ ನಾಮ್ ಮ್ವೊಲ್ವು. ಶನಕತೊ, ಯೋ ಇನ ಅದ್ವಿಯೇವ್ವ ಪಾಪ್‌ಮಾಡು ಬಘಾವ್‌ಶೆ” ಕರಿ ಬೋಲ್ಯೊ.

22 ಪ್ರಭುನೆ ಪ್ರವಾದಿಯೇನ ಮ್ವೊಡವಾಟೆ ಬೋಲಾಯೊತೆ ವಾತೆ ಖ್ವಾರು ಚಾಲಾನಟೇಕೆ, ಆ ಖ್ವಾರು ಚಾಲ್ಯುತೆ.

23 ಯೋ ವಾತೆ ಶಾತ್‌ಕತೊ, “ಹಂದೇಖೊ, ಏಕ್ ಕವಾರಿ ಬೇಜೂನಿ ಹುಯಿನ್, ಏಕ್ ಛಿಯ್ಯಾನ ಭಣ್‌ಶೆ. ಅಜು ಇನ, ‘ಇಮ್ಮಾನುವೇಲ್’ ಕರಿ

ನಾಮ್ ಮ್ಹೇಲಾಶೆ!” *ಇಮ್ಮಾನುವೇಲ್ ಕತೊ, “ದೇವ್ ಅಪ್ಪ ಜೋಡೆ ಲ್ಲಾ” ಕರಿ.

²⁴ ಯೋಸೇಫ ನಿಂದರ್‌ಮಾಥು ಹೊಷಾರಿ ಹುಯಿನ್ ಉತಾನ ಬಾದ್‌ಮ, ದೇವ್‌ದೂತನೆ ಬೋಲ್ಯೋತೆ ಇಮ್ಮಸ್, ಮರಿಯನ ವ್ಯಹಾ ಕರಿಲಿದೊ.

²⁵ ಕತೋಬಿ ಮರಿಯ ಛಿಯೊ ಪೈದಾಕರಾತೋಡಿ, ಯೋಸೇಫ ಇನಜೋಡೆ ಖುತೊಕೊಯ್ನಿ. ಯೋಸೇಫ್‌ನೆ ಯೋ ಲಡ್ಕಾನ ಯೇಸು ಕರಿ ನಾಮ್ ಮ್ಹೇಲ್ಯೊ.

2

ಗ್ಯಾನಿ ಖ್ವಾರು ಪೂರಬ್‌ಮಾಥು ಯೇಸುನ ದೇಖಾನ ಆಯೊತೆ

¹ ಹೆರೋದ ರಾಜ್ ಹುಯಿರೊಡ್ಲೋತೆ ವಖ್ತ್‌ಮ, ಯೂದಾಯ ತಬರ್‌ಖಾನು ಬೇತ್ಲೆಹೇಮ್ ಕರಿ ಗಾಮ್ ಯೇಸು ಪೈದಹುಯೊ. ಅನಬಾದ್‌ಮ, ಥೋಡು ಗ್ಯಾನಿ ಅದ್ಮಿಖ್ವಾರು, ಪೂರಬ್ ದಿಕ್ನ ದೇಖ್ವಾಡು ಯೆರೂಸಲೇಮ್‌ನ ಆಯಿನ್,

² “ಯೆಹೂದ್ಯರ್‌ನೊ ರಾಜ್‌ನಾ ಹುಯಿನ್ ಪೈದಹುಯುತೆ ಲಡ್ಕು ಕಿಜ್ಜಾ ಲ್ಲಾ? ಯೋ ಪೈದಾಹುಯು ಕರಿ ಖ್ವಣೇದ್ ವತಾಳಸ್ತೆ ಶುಕ್ಕರ್‌ನ, ಹಮೆ ಪೂರಬ್ ದಿಕ್‌ಥು ದೇಖಿನ್, ಇನ ಆಡ್‌ಪಡೆನ್ ಖ್ವಲಾಮ್ ಕರಾನ್* ಐರ್ದ್ವಾಸ್” ಕರಿ ಬೋಲ್ಯು.

³ ಅನಖ್ವಮ್‌ಜಿನ್, ರಾಜ್ ಹೆರೋದನ ಅಜ್ಜು ಇನಜೋಡೆ ಯೆರೂಸಲೇಮ್‌ನು ತಮಾಮ್ ಅದ್ಮಿನ ದಿಲ್ಮಿಘಣು ಕಲಾಫ್ಲಿ ಹುಯು.

⁴ ತದೆ ಹೆರೋದನೆ ಯೆಹೂದ್ಯರ್‌ನ ಖ್ವಾರ್‌ಸ್ ಗಲ್‌ಡಯಾಜಕರ್‌ನ ಅಜ್ಜು ವಚನ್ ಶಿಕಾಡವಾಳ ಪೊಂಡಿತನ ಎಕ್ಚು ಕರೀನ್, “ಕ್ರಿಸ್ತ ಪೈದಾ ಹೋಣುತೆ ಕಿಜ್ಜ?” ಕರಿ ಪುಲ್ಲಾಯೊ.

⁵ ಇವ್ಣೆ ಇನ, “ಯೂದಾಯ ತಬರ್‌ಖಾನು ಬೇತ್ಲೆಹೇಮ್‌ಸ್, ಶನಕತೊ-ಪ್ರವಾದಿವ್‌ನೆ ಅಮ್‌ಬೋಲ್ಯುಕಿ;

⁶ ಯೆಹೂದ ತಬರ್‌ಖಾನು ಬೇತ್ಲೆಹೇಮ್,

* 1:23 1:23 ಯೆಶಾಯ 7:14 * 2:2 2:2 ಆರಾದನೆ ಕರಾನ ಕರಿ ಮತ್‌ಲಬ್.

ಯೆಹೂದನು ಮುಖ್ಯ ಖ್ವಯೇರೇಥಿ, ತೂ ಎತ್ರೇಬಿ ಶಾತ್ ನ್ವಾನು
ಕಾಹೆ.
ಶನಕತೊ ತಾರ ಮಹಿಧು ಏಕ್ ಅದಿಕಾರಿ ಆವ್‌ಶೆ,
ಯೋ ಮಾರು ಅದ್ಮಿ ಹುಯಿರ್ದೊತೆ ಇಸ್ರಾಯೇಲ್‌ನ
ಚಲಾವವಾಳೊ! ಕರಿ ಪ್ರವಾದಿನ ಹಾತೆ ಲಿಖೈರ್ದ್ವಸ್”†
ಕರಿ ಬೋಲ್ಯೊ

7 ತದೆ ಹೆರೋದನೆ ಕಿನಾಬಿ ಮಾಲುಮಾಕೊಂತೆ ಇಮ್, ಯೋ ಗ್ಯಾನಿ
ಅದ್ಮಿಖ್ವಾರಾನ ಬುಲೈನ್, ಯೋ ಶುಕ್ಕ್ರ್ ದೆಖಾಯೂತೆ ಬರೋಬರ್‌ನಿ
ವಖ್ವತ್‌ನ ಪುಟ್ಟಿಲಿದೊ.

8 ಅಜು ಇವ್ಣನ, “ತುಮೆ ಜೈನ್ ಬರೋಬರ್‌ಥಿ ಯೋ ಲಡ್ಕಾನ
ಡೂಂಡೊ, ಅಜು ಯೋ ಮಳಾನ ಬಾದ್‌ಮ ಮನ ಬೋಲೊ,
ಮೇಬಿ ಆಯಿನ್ ಯೋ ಲಡ್ಕಾನ ಆಡ್‌ಪಡನ್ ಖ್ವಿಲಾಮಾಕರುನ್” ಕರಿ
ಬೋಲಿನ್ ಇವ್ಣನ ಬೇಕ್ಲೆಹೇಮ್‌ನ ಮೋಕ್ಲಿದಿದೊ.

9-10 ಇವ್ಣೆ ರಾಜಾನಿ ವಾತೆ ಖ್ವಿಮ್‌ಜಿನ್, ವಳ್ಳುಜಾತುಧೂತೆ ತದೆ
ಪೂರಬ್ ದೇಖ್‌ಮ್ ಇವ್ಣನ ದೆಖಾಯುಧೂತೆ ಯೋ ಶುಕ್ಕ್ರ್ ಇವ್ಣನ
ಪಾಳ್ತು ದೆಖಾಯು. ಇವ್ಣೆ ಯೋ ಶುಕ್ಕ್ರ್‌ನ ದೇಖಿನ್, ಘಣು
ಖ್ವಿಶಿಖಾದು! ಯೋ ಶುಕ್ಕ್ರ್ ಇವ್ಣ ಖ್ವಿಮ್‌ಜಿ-ಖ್ವಿಮ್‌ಜಿ ಚಾಲ್ತುಹುಯಿನ್,
ಲಡ್ಕು ಧೂತೆ ಝಗೋಕನ ಆಯಿನ್ ಭೀರಿಗಯು.

11 ತದೆ ಇವ್ಣೆ ಯೋ ಘರ್‌ಮ ಜೈನ್, ಯೋ ಲಡ್ಕಾನ ಇನಿ ಆಯ
ಮರಿಯನ ದೇಖಿನ್, ಇನ ಆಡ್‌ಪಡನ್ ಆರಾದನೆ ಕರ್ದ್ಯ ಅಜು
ಇವ್ಣೆ ಲೈರಾಖ್ಯುಧೂತೆ ಇನಾಮ್ನ ಬುತ್ತಾವ್‌ನ ಛೋಡಿನ್ ಇನಾಮಾಥು
ಖ್ವಿಂನ್ನು, ಖ್ವಿಲರ್ದ್ಯೊ ಅಜು ರಕ್ತಬೋಳನ ಕಾಡಿನ್ ಇನ ಕಾಣ್ಣೆ ದಿದು.

12 ಅನಬಾದ್‌ಮ ದೇವ್ ಇವ್ಣ ಖ್ವಿಂಣ್ಯಮ ದೆಖೈನ್, “ತುಮೆ
ಹೆರೋದಕನ ಪಾಳ್ತು ಫರಿ ನಾ ಜಾವ್ಣು” ಕರಿ ರೈತಾವಖ್ವಿತ್ತರ್, ಇವ್ಣೆ
ಬಿಜೇಕ್ ವಾಟೆಕರಿ ಇವ್ಣ ದೇಖ್‌ವ್‌ನ ಪಾಳ್ತುಫರಿ ಚಲ್ಕುಗಯು.

ಈಜಿಫ್ಸ್ ದೇಖ್‌ವ್‌ನ ಮಿಲೈಗಯೂತೆ

† 2:6 2:6 ಮೀಕ 5:2-4

13 ಇವ್ವೆ ಜಾವಾನ ಬಾದ್‌ಮ, ದೇವ್ವದೂತ ಯೋಸೇಫ್‌ನ ಖೋಣ್ಣಮ ದೆಖ್ವಿನ್, “ಹೆರೋದ ಆ ಲಡ್ಕಾನ ಮಾರಿನಾಕ್ಕು ಕರಿ ಥೂಂಡುಕರಾಸ್, ಇನಖ್ವಾಜೆ ತೂ ಉರೀನ್, ಲಡ್ಕಾನ ಅಜ್ಜು ಇನಿ ಆಯನ ಬುಲೈಲಿನ್, ಈಜಿಪ್ಟ್ ದೇಖ್ವಿನ್ ಮಿಲೈ ಜಾ. ಅಜ್ಜು ಮೇ ಬೋಲಾತೋಡಿ ಹಿಜ್ಲಾಸ್ ರ್ಲೈ” ಕರಿ ಬೋಲ್ಯೊ.

14 ತದೆ ಯೋಸೇಫ ಉರೀನ್, ರಾತ್ರಿ ವಖ್ವತ್‌ಮಾಸ್, ಯೋ ಲಡ್ಕಾನ ಅಜ್ಜು ಇನಿ ಆಯನ ಬುಲೈಲಿನ್, ಈಜಿಪ್ಟ್‌ನ ನಿಕ್ಕಿಗಯೊ.

15 ಹೆರೋದ ಮರಾತೋಡಿ ಯೋ ಹಿಜ್ಲಾಸ್ ಥೊ. “ಮಾರ ಲಿಯ್ಯಾನ ಮೇ ಈಜಿಪ್ಟ್ ದೇಖ್ವಿನ್‌ಮಾಡು ಬುಲಾಯೊ”‡ ಕರಿ ಪ್ರಭುನ ಪ್ರವಾದಿನ ಮೋಡಧಿ ಬೋಲಾಯೋತೆ ವಾತೆ ಅಮ್ ಪೂರಹುಯು.

ಲಡ್ಕಾವ್‌ನ ಮಾರ್ಯೊತೆ ಬಾರೇಮ

16 ಯೋ ಗ್ಯಾನಿ ಅದ್ವಿಖ್ವಾರು ಇನ ರಗೈನಾಖ್ವು ಕರಿ ಹೆರೋದನೆ ಘಣು ಖೀರ್ಜ್ ಕರೀನ್, ಇವ್ವೆಧಿ ಪುಲ್ಲಾಯೊಥೋತೆ ವಖ್ವತ್‌ನ ಬರೋಬರ್‌ಧಿ ಮಾಲುಮ್ ಕರೈನ್, ಆಳ್‌ನ ಖ್ವಾರು ಮೋಕ್ಲಿನ್, ಬೇಕ್ಲೆಹೇಮ್ ಅಜ್ಜು ಇನ ಅಶ್‌ಪಿಶ್ ಖ್ವಾರುಸ್ ಗಾಮ್‌ನು, ಬೇ ವರಖ್ವಿನ್ ಮಹಿನು ಖ್ವಾರುಸ್ ಪಖ್ವಾ ಲಡ್ಕಾನ ಮಾರಿನಾಖಿದೆವ್ವು ಕರಿ ಹುಕುಮ್ ದಿದೊ.

17 ಯೆರೆಮೀಯ ಕರಿ ಪ್ರವಾದೀನೆ ಬೋಲ್ಯೊತೆ ವಾತೆ ಯೋ ಹಗಾಮ್ ಪೂರಹುಯು ಯೋ ಶಾತ್‌ಕತೊ,

18 “ರಾಮಾಮ ಬಳೆಳ್ವಾಟ್ ಖ್ವಮ್‌ಜಾಯು,
ರೊವಣ್-ರೊವಣ್ಣ ಅವಾಜ್ ಹುಯು;
ರಾಹೇಲ್ ಇನ ಲಡ್ಕಾವ್‌ನಖ್ವಾಜೆ ರದನ್ಯಕರಿನ್,
ಇವ್ವೆ ಮರಿಗಯೊತೆ ಇನಖ್ವಾಜೆ,
ಸಮಾಧಾನ್ ಕೋಹುಯಿನಿ”§ ಕರಿ ಬೋಲಾನುಸ್.

ಈಜಿಪ್ಟ್‌ನ ಪಾಲ್ತುಫರಿ ಆಯೊತೆ

‡ 2:15 2:15 ಹೋಶೆಯ 11:1 § 2:18 2:18 ಯೆರೆಮೀಯ 31:15

19 ಹೆರೋದ ಮರಿಭಾವಾನ ಬಾದ್‌ಮ, ಈಜಿಪ್ಟ್‌ಮ ದೇವ್ವದೂತ ಯೋಸೇಫ್‌ನ ಖೋಣ್ಣಮ ದೆಖೈನ್,

20 “ತೂ ಉಠೀನ್, ಲಡ್ಕಾನ ಅಜು ಇನಿ ಆಯನ ಬುಲೈಲಿನ್, ಪಾಠುಫರಿನ್ ಇಸ್ರಾಯೇಲ್ ದೇಖ್ವೆನ್ ಜಾ, ಶನಕತೊ ಲಡ್ಕಾನು ಜಾನ್ ಕಾಡ್ಜುಕರಿ ಥೋತೆ ಯೋ ಮರಿಗಯೊ” ಕರಿ ಬೋಲ್ಯೊ.

21 ತದೆ ಯೋಸೇಫ್‌ನೆ ಉಠೀನ್, ಲಡ್ಕಾನ ಅಜು ಇನಿ ಆಯನ ಬುಲೈಲಿನ್, ಪಾಠುಫರಿ ಇಸ್ರಾಯೇಲ್ ದೇಖ್ವೆನ್ ಗಯೊ.

22 ಕತೋಬಿ ಆರ್ಖಿಲಾಯನೆ ಇನೊ ಬಾ ಹೆರೋದಾನ ಬದಲ್ ಯೂದಾಯನ ಚಲವ್‌ಕರಾಸ್ ಕರಿ ಖ್ವಮ್‌ಜಿನ್, ಹಿಜ್ಜಾ ಭಾವಾನ ಡರ್ರೊ. ತದೆ ಯೋಸೇಫ್‌ನೆ ಖೋಣ್ಣಮ ದೇವ್ವಿ ಹುಕುಮ್‌ನ ಲೀನ್, ಗಲಿಲಾಯ ತಬರ್‌ಖಾನ ಗಯೊ.

23 ಅಜು ನಜರೆತ್ ಕರಿ ಗಾಮ್ ಆಯಿನ್ ಹಿಜ್ಜಾ ಘರ್ ಕರಿನ್ ಥೊ. ಅನೇಥಿ ಇನ, “ನಜರೆತ್‌ವಾಳೊ ಕರಿ ನಾಮ್ ಆವ್‌ಶೆ” ಕರಿ ಪ್ರವಾದಿಯೆನೆ ಬೋಲ್ಯೊತೆವಾತೆ ಪೂರಹುಯು.

3

ಬ್ಯಾಪ್ತಿಸ್ಮ ದೈವಾಳೊ ಯೋಹಾನ್ನಿ ಬೋಧನೆ

(ಮಾರ್ಕ 1:1-8; ಲೂಕ 3:1-18; ಯೋಹಾನ 1:19-28)

1 ಯೋ ದನೂಮ ಬ್ಯಾಪ್ತಿಸ್ಮ ದೈವಾಳೊ ಯೋಹಾನ ಯೂದಾಯಾನಿ ಉಜ್ಜಾಡಿ ಝಗೋಮ ಬೋಧನೆನ ಬೋಲ್ಯೊಹುಯಿನ್,

2 “ಪಾಪ್‌ಥಿ ಫರಿನ್ ನಿಕ್ಕೊ, ಶನಕತೊ ಸೊರ್ಗ ರಾಜ್ಯ ಖನ್ನೆ ಐಗೈ!” ಕರಿ ಬೋಲ್ಯೊನಿಕ್‌ಳೊ.

3 “ಪ್ರಭುನಿ ವಾಟ್ನ ಖ್ವವಾರೊ;

ಇನಿ ವಾಟ್ನ ಖ್ವದುಕರೊ!

ಕರಿ ಉಜ್ಜಾಡಿ ಝಗೋಮ ಚಿಕ್ರಾವಾಳಾನಿ ಅವಾಜ್ ಲ್ಹಾ”* ಕರಿ ಪ್ರವಾದಿ ಯೆಶಾಯನೆ ಬೋಲ್ಯೊತೆ ಅನಿಸ್ ಬಾರೇಮ.

* 3:3 3:3 ಯೆಶಾಯ 40:3

4 ಯೋಹಾನನು ಲುಂಗ್ಡ ಊಟ್ಟು ಕೇಖ್ವೊಧಿ ಬಣಿರೊಡ್ಡು; ಇನಿ ಕಂಬರ್‌ನ ಚಾಂಬ್ಡಾನು ಕಂಬರ್‌ಪಟೊ ಭಾಂದಿರಾಕೊತೋಥೊ, ಚಿಡ್ಡೋಬಿ ಜಂಗಳ್ಳಿ ಶೇತ್ ಇನು ಖಾಣು ಹುಯಿರೊಡ್ಡು.

5 ಅದ್ಮಿಖ್ವಾರು ಯೆರೊಸಲೇಮ್‌ಥುಬಿ, ಹಿಡಿ ಯೂದಾಯ ತಬರ್‌ಖಾಥುಬಿ, ಅಜು ಯೊರ್ದನ್ ನದ್ದಿನು ಅಶ್‌ಪಿಶ್ ಥೂತೆ ಖ್ವಾರ ತಬರ್‌ಖಾಥುಬಿ ಇನಾಕನ ಆಯಿನ್;

6 ಇವ್ವು-ಇವ್ವು ಪಾಪ್ಪ ಕಬೂಲಿಲೀನ್, ಯೊರ್ದನ್ ನದ್ದಿಮ ಯೋಹಾನಧಿ ಬ್ಯಾಪ್ತಿಸ್ಮ ಕರೈಲೆವ್‌ಕರ್ತುಫು.

7 ಕತೋಬಿ ಫರಿಸಾಯರ್‌ವಾಳಮ ಅಜು ಸದ್ದುಕಾಯವಾಳಮ ಕೈಯೆಕ್ಕಿ ಜಣು ಇನಾಕನ ಬ್ಯಾಪ್ತಿಸ್ಮ ಕರೈಲೆವಾನ್ ಆವ್‌ಕರಾತೆ ದೇಖಿನ್, ಯೋಹಾನನೆ ಇವ್ವುನ, “ಅಲಾ ಖ್ವಾಪ್‌ನಿ ಪಿಳ್ಳೆವಾಳವೊ! ಖ್ವಾಪ್ಪೆ ಉಳ್ಳಾವತೆ ದೇವ್ವ ಇರಾದೇಧಿ ತುಮೆ ಬಚಿಜಾಶು ಕರಿ, ತುಮೂನ ಬೋಲ್ಕುತೆ ಕೋಣ್?

8 ಇಮ್‌ಕತೊ, ತುಮೆ ಪಾಪ್ಪ ಮ್ವೇಲಿನ್ ಫರಿಗಯಕರಿ ವತಾಳನಖ್ವಾಜೆ ಬರೋಬರ್‌ಧಿ ಚಾಲ್‌ಮ ವತಾಳೊ.

9 ಅಬ್ರಹಾಮ್ ಹಮಾರೊ ಗುರು ಕರಿ ಬೋಲಾಧಿ ತುಮೆ ದೇವ್ವ ನಿಶಧಿ ಬಚಿಜಾಶು ಕರಿ ನಕೊ ಸೋಚೊ, ಮೇ ತುಮೂನ ಬೋಲುಸ್ಕಿ, ದೇವ್ ಅಬ್ರಹಾಮ್‌ನಖ್ವಾಜೆ ಆ ಬಂಡೇವ್‌ಧಿಬಿ ಲಡ್ಕಾವ್ವ ಉಬ್‌ಜಾವ್‌ಶೆ ಕರಿ ತುಮೂನ ಬೋಲುಸ್.

10 ಹಮ್ಕೇಸ್ ಝಾಡಾವ್‌ನಿ ಜಡ್‌ಪರ್ ಕುರೊಡ್ಡಿ ಮ್ವೇಲೈರೊಸ್; ಇನಖ್ವಾಜೆ ಅಲ್ಪು ಪಂಡು ದೇಯಿಕೊಂತೆ ಹರೇಕ್ ಝಾಡಾವ್‌ನ ಕತ್ರಿನ್ ಆಗ್‌ಮ ನಾಕೊಶೆ.

11 ಮೇತೊ ಮನ್ ಫರಾವನ ತುಮೂನ ಪಾಣಿಧಿ ಬ್ಯಾಪ್ತಿಸ್ಮ ಕರವ್‌ಕರುಸ್. ಕತೋಬಿ ಮಾರ ಬಾದ್ಮ ಆವವಾಳೊ ಮಾರೇಧಿಬಿ ಶಕತ್‌ವಾಳೊ. ಇನಿ ಖೋಖ್ವೊಡಾನ ಡೋವಾನಾಬಿ ಮೇ ಲ್ತಾಯೇಕ್‌ಕೊಯ್ಕಿ; ಯೊ ಪವಿತ್ರಾತ್ಮಧಿಬಿ ಆಗ್‌ಧಿಬಿ ತುಮೂನ ಬ್ಯಾಪ್ತಿಸ್ಮ ಕರಾವ್‌ಶೆ.

12 “ಇನ ಹಾತ್‌ಮ ಖ್ವುಪ್‌ಡು ಧರಿರಾಖ್ಯೋಸ್, ಇನ ಖಳಾಮಾನು

ರಾಶ್‌ನ ತೂರಿನ್, ಅಟ್ಟ ಕರೀನ್, ಘವ್‌ನ ಕಣ್ಣಿಮ ಭರಿಲೀನ್ ಪೊಟ್ಟಾನ ಉಝಾವಕೊಂತೆ ಆಗ್‌ಮ ಬಾಳಿನಾಕ್‌ಷೆ” ಕರಿ ಬೋಲ್ಯೊ.

ಯೇಸುನೆ ಬ್ಯಾಪ್ತಿಸ್ಮ ಲಿದೋತೆ

(ಮಾರ್ಕ 1:9-11; ಲೂಕ 3:21-22)

13 ಯೋ ದನೂಮ ಯೇಸು ಯೋಹಾನಧಿ ಬ್ಯಾಪ್ತಿಸ್ಮ ಕರೈಲೇವ್ಣು ಕರಿ ಗಲಿಲಾಯ ತಬರ್‌ಖಾಥು ಯೊರ್ದನ್ ನದ್ವಿಕನ ಆಯೊ.

14 ತದೆ ಯೋಹಾನನೆ, “ಮೇ ತಾರೇಧಿ ಬ್ಯಾಪ್ತಿಸ್ಮ ಕರೈಲೇವ್ಣುತೆ, ಕತೋಬಿ ತೂ ಮಾರಕನ ಐರ್ಟ್ವೊಸ್ತೆ ಕಿಮ್?” ಕರಿ ಬೋಲ್ಯೊ.

15 ಕತೋಬಿ ಯೇಸುನೆ ಇನ, “ಹಮ್ಮೆ ಆ ಕರಾನ ಮಾನಿಙಾ. ಅಮ್ ಕರಾಧಿ ಅಪ್ಲೆ ದೇವ್ನಿ ಖ್ವಾರಿಸ್ ಮರ್ಜಿನ ಪೂರಕರಾನಿತರ ಉಶೆ” ಕರಿ ಬೋಲ್ತಾನ, ಯೋಹಾನನೆ ಮಾನಿಗಯೊ.

16 ಯೇಸು ಬ್ಯಾಪ್ತಿಸ್ಮ ಕರೈಲೀನ್, ಭಾರ್ ನಿಕಳ್‌ತಾಸ್ನ ಆಬ್‌ಫಾಟೀನ್, ದೇವ್‌ನು ಆತ್ಮ ಪರೈವಾನಿಫೋಣಿ ಇನಾಪರ್ ಉತ್ರೀನ್ ಆಯೂತೆ ಯೇಸುನೆ ದೇಖ್ಲೊ.

17 ತದೆ ಪರಲೋಕ್‌ಮಾಥು ಏಕ್ ಅವಾಜ್ ಹುಯು, “ಆ ಮಾರೊ ಪ್ಯಾರ್‌ನೊ ಛಿಯ್ಲೊ ಅನೇಧಿ ಮೇ ಘಣು ಖ್ವುಶಿ ಛೊ” ಕರಿ ರವ್‌ಕೊ ಖ್ವಮಜ್‌ಪಡ್ತು.

4

ಶೈತಾನ್ನೆ ಯೇಸುನ ಖ್ವತಾಪ್ಪಿ ದಿದೂತೆ

(ಮಾರ್ಕ 1:12-13; ಲೂಕ 4:1-13)

1 ತದೆ ಯೇಸುನ ಶೈತಾನ್‌ಧಿ ಶೋದನೆ ಹುವಾನಟೇಕೆ, ದೇವ್‌ನು ಆತ್ಮಾನೆ ಇನ ಉಜ್ವಾಡಿ ಝಗೋಮ ಚಲಾಯೊ.

2 ಯೇಸು ಚಾಳಿಖ್ವೊ ರೋಜ್ ರಾತ್-ದನ್ ಉಪವಾಸ್ ರ್ವವಾನ ಬಾದ್‌ಮ, ಇನ ಭುಕ್‌ಲಾಗ್ತು.

3 ತದೆ ಶೈತಾನ್ ಯೇಸುಕನ ಆಯಿನ್, “ತೂ ದೇವ್‌ನೊ ಛಿಯ್ಯೊ ಉಶೇತೊ, ಆ ಬಂಡಾವ್‌ನ ರೋಟೊ ಹುವಾನಿಫೊಣಿ ಹುಕುಮ್ ದೇ” ಕರಿ ಬೋಲ್ಯೊ.

4 ಕತೋಬಿ ಯೇಸುನೆ, “ಅದ್ಮಿ ಖಲಿ ರೋಟೊ ಖಾವಾಥೀಸ್ ಕೋ ಬಫಾನಿ, ದೇವ್ ಮೋಡವಾಟೆ ನಿಕ್ಕಾಸ್ತೆ ಹರೇಕ್ ವಾತೆಥೀಸ್ ಬಫಾಸ್ತೆ” ಕರಿ ವಚನ್‌ಮ ಲೀಖ್ಪಿರ್ದೊಸ್‌ನಿ”* ಕರಿ ಬೋಲ್ಯೊ.

5 ತದೆ ಶೈತಾನ್ ಯೇಸುನ ಪವಿತ್ರ ನಂಗರ್ ಯೆರೂಸಲೇಮ್‌ನ ಬುಲೈಲಿಜೈನ್ ಮಂದಿರ್‌ನ ಉಪ್ಪರ್‌ಲಿ ಟೇಕ್‌ಡಿನ್ ಝಗೋಪರ್ ಭೀರಾಖಿನ್,

6 “ತೂ ದೇವ್‌ನೊ ಛಿಯ್ಯೊ ಉಶೇತೊ, ಹಜ್ಜಾಥೊ ಹೇಟ್ ಕೂದ್, ‘ದೇವ್ ತಾರಿ ಬಾರೇಮ ಇನ ದೂತರ್‌ನ ಹುಕುಮ್ ದಿಶೆ; ತಾರ ಗೋಡೊ ಬಂಡಾನ ಲೋಕರ್ ನಾಲಗ್ನುತೆ ತಿಮ್ ಯೋ ತುನ ಹಾತ್‌ಮ ಪಾಡಿಲಿಶೆ. ಕರೀಬಿ ಪವಿತ್ರ ದಪ್ತರ್‌ಮ ಲೀಖ್ಪಿರ್ದೊಸ್‌ನಿ”† ಕರಿ ಬೋಲ್ಯೊ.

7 ತದೆ ಯೇಸುನೆ, “ತಾರೊ ದೇವ್ ಹುಯಿರ್ದೋತೆ ಪ್ರಭುನ ತರೀಪ್‌ಶ ನಾ ಕರನ್” ಕರೀಬಿ ವಚನ್‌ಮ ಲೀಖ್ಪಿರ್ದೊಸ್‌ನಿ” ‡ಕರಿ ಬೋಲ್ಯೊ.

8 ಅನಬಾದ್‌ಮ, ಶೈತಾನ್ ಯೇಸುನ ಘಣ ಊಚಾ ಪಹಾಡ್‌ಪರ್ ಬುಲೈಲಿಜೈನ್, ಜಗತ್‌ನು ಖ್ವಾರಸ್ ರಾಜ್ಯನ, ಅಙ್ಕು ಇನಿ ಖ್ವಾರಸ್ ರಾಜ್ಯನ ವೈಭವನ ಇನ ವತಾಳಿನ್.

9 “ತೂ ಮನ, ಆಡ್‌ಪಡೆನ್ ಆರಾದನೆ ಕರ್ದೋತೊ, ಆ ಖ್ವಾರಸ್ ಮೇ ತುನ ದೆವುಸ್” ಕರಿ ಬೋಲ್ಯೊ.

10 ತದೆ ಯೇಸುನೆ, “ಇನ, ಶೈತಾನ್ ತೂ ಹಟಿಙಾ! ‘ತಾರೊ ದೇವ್ ಹುಯಿರ್ದೋತೆ ಪ್ರಭುನ ಎಕ್ಕ್‌ಸ್ ಜಣಾನ ಆರಾದನೆ ಕರನ್ ಅಙ್ಕು ಸೇವೆ ಕರನ್ ಕರಿ ವಚನ್‌ಮ ಲೀಖ್ಪಿರ್ದೊಸ್‌ನಿ” ಕರಿ ಬೋಲ್ಯೊ.

* 4:4 4:4 ಧರ್ಮಪದೇಶಕಾಂಡ 8.3 † 4:6 4:6 ಕೀರ್ತನೆ 91.11-12 ‡ 4:7 4:7 ಧರ್ಮಪದೇಶಕಾಂಡ 6.16

11 ತದೆ ಶೈತಾನ್ನೆ ಇನ ಮ್ಹಂದಿನ್ ಚಲೆಗಯೊ. ಅಜ್ಜು ದೇವ್‌ನು ದೂತರ್ ಆಯಿನ್, ಇನಿ ಸೇವಾ-ಚ್ಛಾತ್ರಿ ಕರಯ್ಚೊ.

ಯೇಸುನೆ ಗಲಿಲಾಯಾಮ ಇನಿ ಸೇವೇನ ಶುರು ಕರಯ್ಚೊ

(ಮಾರ್ಕ 1:14-15; ಲೂಕ 4:14-15)

12 ಯೋಹಾನನ ಜೇಲ್‌ಮ ಕೋಂಡಿನ್ ಘಾಲಿದಿದು ಕರಿ ಯೇಸುನೆ ಖ್ವಮ್‌ಜಿನ್, ಯೋ ಝಗೋನ ಮ್ಹಂದಿನ್, ಗಲಿಲಾಯ ತಬರ್‌ಖಾನ ಚಲೆಗಯೊ.

13 ತದೆ ಯೇಸು ನಜರೆತ್ ಕರಿ ಗಾಮ್‌ನ ಮ್ಹಂದಿನ್, ಹಿಜ್ಜಾಥೊ ನಿಕ್ಕಿನ್ ಗಲಿಲಾಯ ದರ್ಯಾವ್‌ನ ಖನ್ನೆ ಥೂತೆ ಕಪೆರ್ನೊಮ್ ಕರಿ ಗಾಮ್ ಆಯಿನ್ ರಯ್ಚೊ. ಆ ಗಾಮ್ ಜೆಬಲೋನ್ ಅಜ್ಜು ನಫ್ತಾಲಿ ಕರಿ ತಬರ್‌ಖಾಮ ಥೂ.

14 ಅನೇಥಿ ಪ್ರವಾದಿ ಯೆಶಾಯಥಿ ಬೋಲಾಯೋತೆ ವಾತೆ ಚಾಲ್ಯು ಯೋ ಶಾತ್‌ಕತೊ,

15 “ಜೆಬಲೋನ್ ತಬರ್‌ಖೊ, ಅಜ್ಜು ನಫ್ತಾಲಿ ತಬರ್‌ಖೊ,
ಯೊರ್ದನ್ ನದ್ವಿನು ಪಾರ್ಲಿ ಬಾಜ್ಲೂಮ, ದರ್ಯಾವ್‌ಭಣಿ ಛಾತೆ
ತಬರ್‌ಖೊ,
ಯೆಹೂದ್ಯರ್‌ಕಾಹೆತೆ ಅದ್ಮಿಖ್ತಾರು ಛಾತೆ ಗಲಿಲಾಯ ತಬರ್‌ಖೊ,

16 ಅಮ್ ಅಂಧಾರಾಮ ಜಿವ್‌ಕರ್ತುಫೂತೆ ಆ ತಬರ್‌ಖಾನು
ಅದ್ಮಿಖ್ತಾರು
ಮೋಟು ಉಚ್ಚಾಖ್ತಾದೆಖಾಯು.

ಮರಣ್ಣಿ ಛಾಳೊ ಡಪೈರ್‌ಪ್ಪಡ್ತುತೆ ತಬರ್‌ಖಾಮ ಜಿವ್‌ಕರ್ತುಫೂತೆ
ಇವ್ಜಾಪರ್
ಉಚ್ಚಾಳು ಘೈಗೈಗು.”

17 ತಪ್‌ಥೊ ಯೇಸು, ಪಾಪ್‌ಥಿ ಫರಿನ್ ನಿಕ್ಲೊ, ಶನಕತೊ ಸೊರ್ಗ
ರಾಜ್ಯ ಖನ್ನೆ ಐಗು!” ಕರಿ ಖಬರ್‌ನ ಬೋಲ್ತೊನಿಕ್‌ಳೊ.

ಯೇಸುನೆ ಮಾಲ್ಟ ಖ್ವಾವಾಳ ಚಾರ್ ಜ್ಞಾನ ಬುಲಾಯೋತೆ

(ಮಾರ್ಕ 1:16-20; ಲೂಕ 5:1-11)

18 ಯೇಸು ಗಲಿಲಾಯ ದರೞ್ಯವ್ವ ಕನಾರೆಕರಿ ವಳ್ಳೊಜ್ಜಾತೊಥೊ. ತದೆ, ಬೇ ಬೈಯೇ ಜಾಳು ನಾಋಕರ್ತಥಾತೆ ದೇಖ್ಲೊ. ಇವ್ಣೆ ಕೋಣ್ಕತೊ, ಪೇತ್ರ ಕರಿ ಬೋಲೈಲಿದೋತೆ ಸೀಮೋನ, ಅಜು ಇನೊ ಬೈಅಂದ್ರೆಯನ ದೇಖ್ಲೊ. ಅವ್ಣೆ ಮಾಲ್ಲ ಖ್ವಾವಾಳ ಹುಯಿರೞ್ಥ.

19 ಯೇಸುನೆ ಇವ್ಣುನ, “ಮಾರ ಕೇಡೆ ಆವೊ, ಮೇ ತುಮೂನ ಮಾಲ್ಲ ಖ್ವಾವಾಳಾನಿತರ ಕಾಹೆ ಅದ್ವಿನ ಖ್ವಾವಾಳಾನಿತರ ಬಣವುಸ್. ಕರಿ ಬೋಲೊ.

20 ಇಮ್ ಬೋಲ್ತಾಸ್ ಇವ್ಣೆ ಇವ್ಣು ಜಾಳುಖ್ವಾರು ಮ್ಹಂದಿನ್, ಇನ ಕೇಡೆ ಗಯ.

21 ಯೇಸು ಹಿಜ್ಜಾಥೊ ನಿಕ್ಕಿನ್, ಬಿಜೂ ಬೇ ಬೈಯೇನ ದೇಖ್ಲೊ. ಇವ್ಣೆ ಕೋಣ್ಕತೊ, ಜೆಬೆದಾಯನೊ ಲಿಯೊ ಯಾಕೋಬನಾಬಿ ಅಜು ಇನೊ ನ್ಹಾನೊ ಬೈಯೋಹಾನ್ ದೇಖ್ಲೊ. ಇವ್ಣೆ ಡೋಣ್ಕಮ ಜಾಳಾನ ಬರೋಬರ್ ಕರುಕರ್ತಥ. ಯೇಸುನೆ ಇವ್ಣುನಾಬಿ ಬುಲಾಯೊ.

22 ತದ್‌ನು-ತದೇಸ್ ಇವ್ಣೆ ಡೋಣ್ಣಾ ಅಜು ಇವ್ಣ ಬಾನ ಮ್ಹಂದಿನ್, ಯೇಸುನ ಕೇಡೆ ಗಯ.

ಯೇಸುನೆ ಸುವಾರ್ತೆನ ಬೋಲ್ತೊಹುಯಿನ್, ಬೋಧನೆ ಕರ್ತೊಹುಯಿನ್ ರೋಗ್ ಅಲ್ಫು ಕರೞ್ಯೆತೆ

(ಲೂಕ 6:17-19)

23 ಬಾದ್‌ಮ ಯೇಸು ಗಲಿಲಾಯ ಅಖ್ವಿಸ್ ಫರೀನ್, ಹಿಜ್ಜಾನು ಯೆಹೂದ್ಯರ್‌ನ ಸಬೆ ಭರಾವಾನು ಮಂದಿರ್‌ಮ ಬೋಲಿದೇತೊಹುಯಿನ್, ದೇವ್ವಿರಾಜ್ಯನಿ ಬಾರೇಮನು ಅಲ್ಫಿಖಬರ್‌ನ ಬೋಲ್ತೊಹುಯಿನ್, ಅದ್ವಿಮ ಥೂತೆ ಖ್ವಾರೀಸ್ ತರೞ್ವಾನು ರೋಗ್-ರಾಯನ ಅಲ್ಫು ಕರ್ತೊ ಆಯೊ.

24 ಇನಿ ಬಾರೇಮಾನಿ ಖಬರ್ ಸಿರಿಯ ದೇಖ್ಲೊ ಅಖ್ವಿಸ್ ಫೈಲಿಗಯು. ತದೆ ಆದ್ವಿಖ್ವಾರು ರೋಗ್‌ಮ ರೞ್ವಾಳನ ಯೇಸುಕನ ಲಾಯು, ಇವ್ಣಾಮ ಕೈಯೆಕ್ಕಿ ತರೞ್ವಾನು ರೋಗ್-ರಾಯಧಿ ತರಪ್‌ಡುಕರ್ತುಥೂತೆ ಅಜು ಭೂತ್ ಧರಿರಾಋಥೂತೆ, ಮಿರ್‌ಫಿ ಥೂತೆ ಅಜು ಲಕ್‌ವೊ

ಮಾರಿರಾಖ್ಯುಧೂತೆ ಇವ್ವ ಅಖ್ವಾನ ಇನಕನ ಲಾಯು. ಯೇಸುನೆ ಇವ್ವ ಖ್ವಾರಸ್ಸ ಅಱ್ಱು ಕರೈಯ್ಯ.

25 ಗಲಿಲಾಯ, ದೆಕಪೊಲಿ, ಯೆರೂಸಲೇಮ್, ಯೂದಾಯ ತಬರ್‌ಖಾಥು, ಅಙ್ಗು ಯೊರ್ದನ್ ನದ್ದಿನು ಪಾರ್ಲಿ ಬಾಙ್ಗುಥು, ಆದ್ಮಿಖ್ವಾರು ಝೂಂಡೆ-ಝೂಂಡೆ ಹುಯಿನ್, ಯೇಸುನ ಪೀರೆ ಗಯು.

5

ಪರ್ಬತ್‌ನಿ ಉಪದೇಶ್

1 ಯೇಸುನೆ ಅದ್ಮಿನಿ ಝೂಂಡೆನ ದೇಖಿನ್, ಪಹಾಡ್‌ಪರ್ ಚ್ಚಡೀನ್ ಬೆತಿಗಯೊ. ತದೆ ಇನ ಶಿಷ್ಯರ್ ಆಯಿನ್, ಇನ ಅಶ್‌ಪಿಶ್ ಭರಾಯ,

2 ತದೆ ಯೇಸುನೆ ಇವ್ವುನ ಶಾತ್ ಬೋಲಿಶಿಕಾಡ್ಯೊಕತೊ,

ಖ್ವಾಚಿ ಖ್ವುಶಿ

(ಲೂಕ 6:20-23)

3 “ಕೋಣ್ ಆತ್ಮಮ ಗರೀಬ್ ಹುಯಿರ್ದವಾಳ, ಇವ್ವೆ ಖ್ವುಶಾಲಿವಾಳು ಹುಯಿರ್ದ್ವಸ್;

ಸೊರ್ಗ ರಾಜ್ಯ ಇವ್ವುಸ್ ಹುಯಿರ್ದ್ವಸ್!

4 ಕೋಣ್ ದುಖ್‌ಮ ಛಾಕಿ, ಇವ್ವೆ ಧನ್ಯ ಹುಯಿರ್ದ್ವಸ್ ದೇವ್ ಇವ್ವುನ ಸಮಾಧಾನ್ ದಿಶೆ.

5 ಖ್ವಮಾಳಿಲ್ಯವಾಳು ಧನ್ಯ ಇವ್ವೆ ಧರ್ತಿಪರ್ ಖ್ವುಶಾಲಿವಾಳು ಹುಯಿರ್ದ್ವಸ್.

ದೇವ್ ಶಾತ್ ವಾತೆ ದೀರಾಖ್ಯೊಸ್ಕಿ, ಯೋ ಇವ್ವುನ ಮಳ್‌ಶೆ.

6 ಕೋಣ್ ದೇವ್ ಮರ್ಜಿನಿಘೋಣಿ ಕರಾನ ಘಣು ಆಖ್ವೊ ಕರಾಸ್ಕಿ, ಇವ್ವೆ ಧನ್ಯ ಹುಯಿರ್ದ್ವಸ್;

ದೇವ್ ಇವ್ವುನ ಹಕ್ಲಾಲ್ ಹುವಾನಿತರ ಕರ್ಶೆ.

7 ಕೋಣ್ ಬಿಙ್ಗಾನ ಗೋರ್ ಕರಾಸ್ಕಿ, ಇವ್ವೆ ಖ್ವುಶಾಲಿವಾಳು ಹುಯಿರ್ದ್ವಸ್.

ದೇವ್ ಇವ್ವಾಪರ್ ಗೋರ್ ಕರ್ಶೆ!

8 ಕೋಣ್ ದಿಲ್ಮ ಪಾಕ್ ರ್ಲೊಸ್ಕಿ, ಇವ್ವೆ ಖ್ವುಶಾಲಿವಾಳು ಹುಯಿರ್ದ್ವಸ್.

ಇವ್ವೆ ದೇವ್ವ ದೇಹ್‌ಶೆ;

9 ಕೋಣ್ ಸಮಾಧಾನ್ ಕರಾನ್ ಮ್ಹಿನತ್ ಕರಸ್ಚಿ, ಇವ್ವೆ ಖುಶಾಲಿವಾಳು
ಹುಯಿರ್ಲ್ವಾಸ್,
ಇವ್ವೆ ದೇವ್ವ ಲಡ್ಡಕರಿ ಬೋಲೈಲಿಶೆ.

10 ಕೋಣ್ ದೇವ್ವಿ ಮರ್ಜಿನಿಘೋಣಿ ರ್ಹವಾನಖ್ವಾಜೆ ಖುತಾಪ್ಪಿನ
ಖುಮಾಳಿಲೇಸ್ಚಿ, ಇವ್ವೆ ಖುಶಾಲಿವಾಳು ಹುಯಿರ್ಲ್ವಾಸ್.
ಸೋರ್ಗ ರಾಜ್ಯ ಇವ್ವುಸ್ ಹುಯಿರ್ಲ್ವಾಸ್!

11 “ಮಾರ ಖ್ವಾಜೇಥಿ ಅದ್ವಿಖ್ವಾರು ತುಮೂನ ಖ್ವರಮ್ ಕಾಡಿನ್,
ಖ್ವಿತ್ಯೆನ್, ತುಮಾರಪರ್ ಖ್ವಾರಿಸ್ ತರಲ್ವಾನು ಖರಾಬ್‌ನ ಬೋಲಿನ್,
ಝೂಟಿ ಲಗಾಡ್ಯತೊ, ತುಮೆ ಧನ್ಯ ಹುಯಿರ್ಲ್ವಾಸ್.

12 ಖ್ವಿಶಿ ಕರೊ ಅಜು ಖೇಲ್‌ಕೂದ್ ಕರೊ, ಶನಕತೊ ಸೋರ್ಗಾಮ್
ತುಮೂನ ಘಣು ಇನಾಮ್ ಮಳ್‌ಶೆ. ತುಮಾರೇಥೀಬಿ ಅಗಾಡಿ ಥೂತೆ
ಪ್ರವಾದಿಯೆನಾಬಿ ಅಮ್ವುಸ್ ಖುತಾಯುನಿ.

ಮೀಟ್ ಅಜು ಉಜ್ವಾಳು
(ಮಾರ್ಕ 9:50; ಲೂಕ 14:34-35)

13 ತುಮೆ ಧರ್ತಿನ* ಮೀಟ್ ಹುಯಿರ್ಲ್ವಾಸ್. ಮೀಟಸ್ ಫಿಕ್ಕು
ಹುಯಿಗುತೊ, ಇನ ಬಿಜು ಶನೇಥಿ ರುಚ್ಚ್ ದೈವಾನ ಉಶೆ? ಅದ್ವಿಖ್ವಾರು
ಇನ ಭಾರ್ ನಾಖಿನ್ ವಾಟ್‌ಪರ್ ಚಾಲವಾಳು ಇನ ಮುಂದ್ಲಾನ
ಲ್ಹಾಯಕ್ ಪಣ್ಣಿ ಬಿಜು ಖೆವ ಕಾಮ್ನಾಬಿ ಕೋಆವಾನಿ.

14 “ತುಮೆ ಹಿಡಿ ಜಗತ್ವ ಉಜ್ವಾಳು ಹುಯಿರ್ಲ್ವಾಸ್. ಪಹಾಡ್‌ಪರ್
ಭಂದೈರ್ಲ್ವತೆ ಗಾಮ್ ಲಪಿರ್ಲ್ವಿಯೆಕೊಯ್ಚಿ.

15 ಅಜು ಕೋಣ್‌ಬಿ ದೀವೊ ಲಗಾಡಿನ್, ಕೋಳ್ಗಾನಹೇಟ್
ಮ್ವೇಲಾಕೊಯ್ಚಿ; ಅನಬದಲ್ ಘರಮ್ ಛಾತೆ ಹರೇಕ್ಷ ಉಜ್ವಾಳು
ದೈವಾನಿತರ ದೀವೊ ಮ್ವೇಲಾನಿ ಖಂಬಾಪರ್ ಮ್ವೇಲಾಸ್.

* 5:13 5:13 ಇಮೀನ್‌ಪರ್ ಛಾತೆ ಹರೇಕ್ ಅದ್ವಿಕರಿ ಮತ್‌ಲಬ್.

16 ಅಮ್ಮಸ್ ತುಮಾರು ಉಜ್ಜಾಳು ಅದ್ವಿನ ಖ್ವಾಪ್ಪೆ ಉಜ್ಜಾಪ್ಪೆ ಹುವಾದೆ, ಅನೇಥಿ ತುಮೆ ಕರಾತೆ ಅಟ್ಟುಕಾಮ್ ಇವ್ವೆ ದೇಖನ್, ಸೋರ್ಗಾಮ ಛಾತೆ ತುಮಾರ ಬಾನ ಖ್ವಾರಾವ್ಶೆ.

ಖಾನುಲ್‌ನಿ ಬಾರೇಮ ಬೋಧನೆ

17 ಮೋಶೇನು ಧರ್ಮಶಾಸ್ತ್ರನ ರ್ವವೊ, ಪ್ರವಾದಿನು ಬೋಧನೆನ ರ್ವವೊ, ಕಾಡಿನಾಖನಖ್ವಾಜೆ ಮೇ ಆಯೋಕರಿ ನಕೊ ಸೋಚೊ. ಕಾಡಾನಖ್ವಾಜೆ ಕಾಹೆ, ಇನ ಪೂರ ಕರಾನಖ್ವಾಜೆ ಆಯೊ.

18 ಮೇ ತುಮೂನ ಖ್ವಾಚಮಾಬಿ ಬೋಲುಸ್ಕಿ, ಆಬ್ಬಿ ಧರ್ತಿ ಮಟಿಜಾಶೆ, ಧರ್ಮಶಾಸ್ತ್ರಮ ಛಾತೆ ಖ್ವಾರುಸ್ ಚಾಲಾಲಗುಬಿ ಇನಮಾನು ಏಕ್ ನ್ಹಾನು ಲಿಖ್ಯುಬಿ ರ್ವವೊ, ನಾತೊ ಏಕ್ ಟಿಪ್‌ಕ್ಯುಬಿ ಮಟ್‌ಶೆ ಕೊಯ್ತೆ.

19 ಇನಖ್ವಾಜೇಸ್, ಆ ಹುಕುಮ್‌ನಿ ನ್ಹಾನಿಶಿ ಏಕ್ ವಾತ್ಸಬಿ ಮ್ಹೇಲಿನ್ ಚಾಲವಾಳೊ ಅಜ್ಜು ಬಿಜಾನಾಬಿ ಇಮ್ಮಸ್ ಚಾಲಾನ ಶಿಕಾಡವಾಳೊ, ಸೋರ್ಗ ರಾಜ್ಯಮ ಖ್ವಾರೇಥಿ ನ್ಹಾನೊ ಕರಿ ಬೋಲೈಲಿಶೆ. ಕತೋಬಿ ಯೋಸ್ ಯೋ ಹುಕುಮ್ಮಿಮತ್ ಚಾಲಿನ್, ಬಿಜಾನಾಬಿ ಇಮ್ಮಸ್ ಚಾಲಾನ ಶಿಕಾಡವಾಳೊ, ಸೋರ್ಗ ರಾಜ್ಯಮ ಮಹಾನ್ ಕರಿ ಬೋಲೈಲಿಶೆ.

20 ಮೇ ತುಮೂನ ಶಾತ್ ಬೋಲುಸ್‌ಕತೊ, ಮೋಶೆನಿ ಧರ್ಮಶಾಸ್ತ್ರ ಶಿಕಾಡವಾಳು ಪಂಡಿಡ್ಲಿಬಿ ಅಜ್ಜು ಫರಿಸಾಯರ್‌ನಿ ನೀತಿಥೀಬಿ ತುಮಾರಿ ನೀತಿ ಜಾಖ್ತಾ ನಾ ಹುಯಿರ್ದಿಕತೊ, ತುಮೆ ಸೋರ್ಗ ರಾಜ್ಯಮ ಜಾಶುಕೊಯ್ತೆ.

ಖೀಜ್‌ನಿ ಬಾರೇಮ

(ಲೂಕ 12:57-59)

21 “ಅದ್ವಿನ ಖೂನಿ ನಾ ಕರ್ನು, ಇಮ್ ಖೂನಿಕರವಾಳನ ನ್ಯಾವ್‌ನಿ ತೀರ್ಪೊನ ಭೀರಾಕ್‌ಶೆ’ ಕರಿ ತುಮಾರು ಶಾಣುಖ್ವಾರು ಬೋಲಿರಾಖ್ತೆ ತುಮೆ ಖ್ವಮ್‌ಜಿರಾಖ್ಯಾಸ್.

22 ಕತೋಬಿ ಮೇ ತುಮೂನ ಶಾತ್ ಬೋಲಸ್‌ಕತೊ, ತುಮೆ ತುಮಾರ ಭೈಪರ್ ಖೀಜ್ ಖಾವಾಳೊ ಹರೇಕ್ ಜಣೋಬಿ ತುಮೆ

ನ್ಯಾವ್‌ನಿ ತೀರ್ಪ್‌ಮ ಪಡ್‌ಶು, ಅಜ್ಜು ತುಮೆ ತುಮಾರ ಭೈನ, ‘ಏ ಬಿಣ್‌ಅಕ್ಲಿ’ ಕರಿ ಬೋಲ್ಯಾತೊ, ತುಮೂನ ನ್ಯಾವ್‌ನಿ ಸಭೆನಖ್ವಾಪ್ಪೆ ಭೀರಾಕ್‌ಶೆ, ಅಜ್ಜು, ‘ಏ ಫಾಲ್ತು’ ಕರಿ ಬೋಲವಾಳೊ, ನರಕ್‌ನಿ ಆಗ್‌ಮ ಪಡ್‌ಶೆ.

23 ಇನಖ್ವಾಜೇಸ್ ತೂ ತಾರಿ ಕಾಣ್ಕೆನ ಭಾಚರ್‌ನ ಖ್ವಾಪ್ಪೆ ಲಾಯೊತೆ, ತಾರ ಭೈನ ದಿಲ್ಮತಾರಪರ್ ಶಾತ್‌ತೋಬಿ ವಹೇರ್ ಲ್ಹಾ ಕರಿ ತಾರಿ ಯಾದ್ತ ಆಯುತೊ,

24 ತು ತಾರಿ ಕಾಣ್ಕೆನ ಭಾಚರ್‌ನ ಖ್ವಾಪ್ಪೆಸ್ ಮ್ಹಂದಿನ್, ಪಹಿಲೆ ಜೈನ್, ತಾರ ಭೈನ ಜೋಡೆ ಏಕ್‌ಹೂ. ಇನ ಬಾದ್‌ಮ ಐನ್, ತಾರಿ ಕಾಣ್ಕೆನ ದೇವ್‌ದೇ.

25 “ತಾರೊ ವಿರೋದಿ ತುನ ನ್ಯಾವ್‌ಖ್ವಾಜೆ ನ್ಯಾಯದೀಶಕನ ಖೇಚಿಲೀಜಾವನ ಅಗಾಡಿಸ್ ತೂ ವಾಟ್‌ಪರಸ್ ಹೇಳ್‌ಮೇಳ್ ಹುಯಿಜ್ಜಾ. ನತರ್‌ಕಿ ತಾರೊ ವಿರೋದಿ ತುನ ನೈಯಾಕನ ಖೇಚಿಲಿಜಾಶೆ. ಯೋ ನಯ್ಕೊ ಜೇಲ್‌ನ ಶಿಪಾಯಿನ ಹಾತ್ಮ ದಿಶೆ ಅಜ್ಜು ತೂ ಜೇಲ್‌ಮ ಫೆಕ್ಲೆಜೀಶ್.

26 ತೂ ಏಕ್ ಕಾಖ್ವೊಬಿ ಬಚೈಶ್‌ಕೊಂತೆ ತಾರಾಮ ಲ್ಹಾತೆ ಅಖ್ವು ಪೈಶು ಫೇಡಾವಲಗೂಬಿ ಹಿಜ್ಜಾಧೊ ಆವಾನ ಉಶೇಸ್ ಕೊಯ್ನಿ ಕರಿ ಮೇ ಖ್ವಾಚಮಾಬಿ ಬೋಲುಸ್.

ವ್ಯಬಿಚಾರ್‌ ಬಾರೇಮ

27 “ವ್ಯಬಿಚಾರ್ ನಾ ಕರ್ನ್” ಕರಿ ಬೋಲಾಸ್ತೆ ಇನ ತುಮೆ ಖ್ವಿಮ್‌ಜಿರಾಖ್ಯಾಸ್.

28 ಕತೋಬಿ ಮೇ ತುಮೂನ ಬೋಲುಸ್ಕಿ, ಕೋಣ್‌ತೋಬಿ ಬಿಜಿ ತಯೇಡಾನ ದೇಖಿನ್, ಇನಾಪರ್ ಆಖ್ವೊಕರ್‌ಪ್ಪೊತೊ, ಯೋ ತದ್ದೇಸ್ ಇನ ಮನ್‌ಮ ಯೋ ತಯೇಡಾನಿ ಜೋಡೆ ವ್ಯಬಿಚಾರ್ ಕರಾವಾಳೊ ಹುಯಿರಪ್ಪೊಸ್.

29 ತಾರೊ ಖಾವೊ ಡೋಳೊ ತುನ ಪಾಪ್‌ಮ ಖ್ವಿಪ್‌ಡವಾನು ಉಶೇತೊ, ಇನ ಕಚ್‌ಕೋರಿ ಫೇಕಿದೆ, ತಾರು ಹಿಡೀ ಶರೀರ್ ನರಕ್

ಪಡಾಥೀಬಿ, ತಾರು ಶರೀರನ್ ಎಕ್ ಭಾಗ್ ನಾ ರ್ಹಯುತೋಬಿ ತುನ ಅಲ್ಫು ಕಾಹೆಕಿ ಶು.

30 ತಾರೊ ಖಾವೊ ಹಾತ್ ತುನ ಪಾಪ್‌ಮ ಖ್ವಪ್‌ಡವಾನು ರ್ಹಿಯುತೊ, ಇನ ಕತ್ರೀನ್ ಫೇಕಿದೆ! ತಾರು ಹಿಡಿ ಶರೀರ್ ನರಕ್ ಪಡಾಥೀಬಿ, ತಾರು ಶರೀರ್‌ನು ಎಕ್ ಭಾಗ್ ನಿಕ್ಕಿಜ್ಞಾವಾನುಸ್ ತುನ ಅಲ್ಫು ಕಾಹೆಕಿ ಶು.

ತಲಾಕ್‌ನಿ ಬಾರೇಮ

(ಮತ್ತಾಯ 19:9; ಮಾರ್ಕ 10:11-12; ಲೂಕ 16:18)

31 ಇನಿ ಬಾವಣ್ಣ ಮ್ಹೇಲಿದ್ಯವಾಳೊ, ಇನ ತಲಾಕ್‌ನು ಕಾಗತ್ ಲೀಖಿದೀನ್ ಮ್ಹೇಲ್ನು ಕರಿ ಬೋಲ್ಯೆರ್‌ವ್ಸ್ ಎತ್ರೇಸ್.

32 ಕತೋಬಿ ಮೇ ತುಮೂನ ಬೋಲುಸ್ತಿ, ವ್ಯಬಿಚಾರ್‌ನಿ ಕಾರಣ್ ಕೊಂತೆಸ್ ಇನಿ ಬಾವಣ್ಣ ಮ್ಹೇಲಿದ್ಯವಾಳೊ ಯೋಸ್ ಇನಿ ಬಾವಣ್ಣ ವ್ಯಬಿಚಾರ್‌ಮ ಪಡಾನ ಜಿಮ್ಮೇದಾರಿ ಉಶೆ. ನಾಹುಯಿನ್ ಬಾವಿ ಮ್ಹೇಲಿಹುಯಿನ ವ್ಯಹಾ ಕರಿಲ್ಯವಳೋಬಿ ವ್ಯಬಿಚಾರಿ ಹುಯಿಜ್ಞಾಸ್.

ಆಣ್‌ನಿ ಬಾರೇಮ

33 “ಝೂಟಿ ಆಣ್ ನಾ ಲೇವ್ಣು; ಕತೋಬಿ ತುಮೆ ಪ್ರಭುಕನ ಬೋಲಿಲಿದೋತೆ ತಿಮ್ಮಸ್ ಚಾಲಿಲೇವ್ಣು ಕರಿ ಗಯೋತೆ ಜಮಾನಾನ ಅದ್ತಿಯೇವ್ ಬೋಲ್ಯುತೆ ತುಮೂನ ಮಾಲುಮಸ್ ಛಾನಿ.

34 ಕತೋಬಿ ಮೇ ತುಮೂನ ಬೋಲಾನು ಶಾತ್‌ಕತೊ, ಆಣೆಸ್ ನಾಲೇವ್ಣು ಆಬ್‌ಪರ್ ಆಣ್ ನಕೊ ಲೇವೊ; ಯೋ ದೇವ್‌ನು ಸಿಂಹಾಸನ್.

35 ಧರ್ತಿಪರ್ ಆಣ್ ಕರೋನಕೊ ಯೋ ದೇವ್‌ನು ಗೋಡಾಮ್ಹೇಲಾನು ಕುಡ್‌ಶಿ’ ಯೆರೂಸಲೇಮ್‌ಪರ್ ಆಣ್ ನಾ ಕರ್ನ್, ಶನಕತೊ ಯೆರೂಸಲೇಮ್ ಯೋ ಮಹಾನ್ ರಾಜ್ಞಾನು ನಂಗರ್ ಹುಯಿರ್‌ವ್ಸ್.

36 ತಾರ ಮಾಥಪರ್‌ಬಿ ಆಣ್ ನಾ ಲೇವ್ಣು; ಶನಕತೊ, ಎಕ್ ಕೇಖ್‌ವ್ ಜಿನ್‌ಕುಬಿ ಧೋಳು ರ್ಹವೊ, ನತರ್‌ಕಿ ಕಾಳು ರ್ಹವೊ ಕರಾನ ತುನ ಕೊವುಶೇನಿ.

37 ಕತೋಬಿ ತುಮಾರಿ ವಾತೆ ಹೋ ಕತೊ ಹೋ, ಕೊಯ್ನಿಕತೊ, ಕೊಯ್ನಿ ಕರಿ ರಟ್ಟೆವಾದೆ. ಅನೇಥಿ ಜಾಖ್ವತ್ ಬೋಲ್ಯಾತೊ, ಯೋ ಶೈತಾನ್‌ಥಿ ಆಯುಹುಯು ಕರಿ.

ಬದಲಾ ಲ್ಯಾವಾನಿ ಬಾರೇಮ

(ಲೂಕ 6:29-30)

38 “ಡೋಳಾನ ಬದಲ್ ಡೋಳೊ, ದಾತ್ವ ಬದಲ್ ದಾತ್’ ಕಡಾವ್ಣು ಕರಿ ಬೋಲಿರಾಖ್ಪುಸ್ತೆ ಇನ ತುಮೆ ಖ್ವಮ್‌ಜಿರಾಖ್ಯಾಸ್ ಎತ್ರೇಸ್.

39 ಕತೋಬಿ ಮೇ ತುಮೂನ ಬೋಲಾನು ಶಾತ್‌ಕತೊ, ಕೋಣ್‌ತೋಬಿ ತುನ ಖರಾಬ್ ಕರ್ಯ್ತೊ, ಯೋ ಅದ್ವಿನ ಬದಲಾ ನಕೊ ಲೀಶ್. ಕೋಣ್‌ತೋಬಿ ಏಕ್‌ಜಣು ತಾರ ಖಾವಕಲ್ಲಪರ್ ಮಾರ್ಯತೊ, ಇನ ಬಿಜೇಕ್ ಕಲ್ಲು ವತಾಳ್.

40 ಅಜು ಕೋಣ್‌ತೋಬಿ ತಾರ ಜೋಡೆ ಝಂಝಟ್ ಕರೀನ್, ತಾರ ಮಹಿನಲುಂಗ್ಡಾನ ಛೀನೈಲೇವ್ಣು ಕರಿ ತೀರ್ಮಾನ್ ಕರವಾಳಾನ, ಉಪ್ಪರ್ ಪೇರ್ಟಿರಾಖ್ವೊತೆ ಝಗ್ಗಾನಾಬಿ ಮ್ಹೆಂದೆ.

41 ಏಕ್ ಜಣೊ ತುನ ಏಕ್ ಮೈಲ್ ದೂರ್ ಆವ್‌ಕರಿ ಜುಲಮ್ ಕರ್ಯ್ತೊ ಇನಜೋಡೆ ಬೇ ಮೈಲ್ ದೂರ್ ಜಾ.

42 ಕೋಣ್‌ತೋಬಿ ತಾರಕನ ಶಾತ್ವೊಬಿ ಮಾಂಗ್ಯತೊ, ಇನ ದೇ; ತಾರಕನ ಕರಜ್ ಮಾಂಗವಾಳನ ಮ್ಹೊಡು ನಕೊ ಫರೈಲೀಶ್.

ದುಶ್‌ಮನ್ನ ಪ್ಯಾರ್ ಕರಾನಿಬಾರೇಮ

(ಲೂಕ 6:27-28,32-36)

43 “ತಾರ ಭೀಡೆವಾಳಾನ ಪ್ಯಾರ್ ಕರ್ ಅಜು ತಾರ ದುಶ್‌ಮನ್ನ ವಹೇರ್ ಕರ್ನ್ ಕರಿ ಬೋಲಿರಾಖ್ಪುಸ್ತೆ ಇನ ತುಮೆ ಖ್ವಮ್‌ಜಿರಾಖ್ಯಾಸ್ ಎತ್ರೇಸ್.

44 ಕತೋಬಿ ಮೇ ತುಮೂನ ಬೋಲಾನು ಶಾತ್‌ಕತೊ, ತುಮಾರ ದುಶ್‌ಮನ್ನ ಪ್ಯಾರ್ ಕರೊ; ತುಮೂನ ಖ್ವತಾವವಾಳನಟೇಕೆ ದೇವ್ವ ಪ್ರಾರ್ಥನೆ ಕರೊ.

45 ಅಮ್ ಕರ್ರ್ಯಾತೊ, ಪರ್ಲೋಕ್‌ಮ ಛಾತೆ ತುಮಾರ ಬಾನ ತುಮೆ ಲಡ್ಕಾಲುಶು. ಯೋ ಖರಾಬ್ಬ ಉಪ್ಪರ್‌ಬಿ ಅಲ್ಟಾನ ಉಪ್ಪರ್‌ಬಿ ಇನೊ ಚಾಂದ್ನು ಉಜಾಳು ಪಡಾನಿಫೋಣಿ ಕರಾಸ್, ನೀತಿವಾಳಾನ ಉಪ್ಪರ್‌ಬಿ ಅನೀತಿವಾಳಾನ ಉಪ್ಪರ್‌ಬಿ ಪಾಣಿ ವರ್ಖ್ವಾವಸ್.

46 ತುಮೂನ ಪ್ಯಾರ್ ಕರಾವಾಳನಾಸ್ ತುಮೆ ಪ್ಯಾರ್ ವತಾಳ್ಕಾತೊ ದೇವ್ ತುಮೂನ ಶನ ಇನಾಮ್ ದಿಶೆ? ಶುಂಕವಶೂಲ್ ಕರವಾಳುಬಿ ಅಮ್ಮಸ್ ಕರಾಸ್ಸಿ!

47 ತುಮೆ ಖಲಿ ತುಮಾರ ದೋಸ್ತಿ ಖ್ವಾರಾನಾಸ್ ಮಾನ್-ಮರ್ರ್ಯಾದಿ ವತಾಳ್ಕಾತೊ, ಇನಾಮ ಶಾತ್ ಬಡೈಮಾರಿಲೆವಾನು ಛಾ? ದೇವ್ ಪರ್ಮ್‌ಖುಕೊಂತೆ ಅದ್ಮಿ ಖ್ವಾರುಬಿ ಇಮ್ಮಸ್ ಕರಾಸ್ಸಿ!

48 ಇನಖ್ವಾಜೇಸ್, ಪರ್ಲೋಕ್‌ಮ ಛಾತೆ ತುಮಾರೊ ಬಾ ಖಿವಿಸ್ ಗಲ್ಲಿಕೊಂತೆ ಛಾತೆ ಇಮ್, ತುಮೇಬಿ ಗಲ್ಲಿಕೊಂತೆ ಇಮ್ ರ್ವವೊ.

6

ಧರಮ್ ದೈವಾನಿ ಬಾರೇಮ

1 ಅದ್ಮಿ ದೇಖಾದೆ ಕರಿ ತುಮೆ ಇವ್ವ ಖ್ವಾಮೆ ತುಮಾರು ಅಲ್ಟುಕಾಮ್ ನಾ ಕರ್ರ್ಯಾ. ಇಮ್ ಕರ್ರ್ಯಾತೊ, ಸೊರ್ಗಾಮ ಛಾತೆ ತುಮಾರ ಬಾಕನ ತುಮೂನ ಶಾತ್ಪಿ ಇನಾಮ್ ಕೋ ಮಳ್‌ಶೇನಿ.

2 ಇನಖ್ವಾಜೇಸ್ ತು ಧರಮ್ ದೈವಾನಿ ವಖ್ವತ್‌ಮ, ನಕೊ ಪೂಕಿಲೇವೊ. ಅದ್ಮಿ ಥಿ ಖ್ವಾರಾಪ್ಪಿ ಕರಿಲೇವ್ವು ಕರಿ ಖೋಟ್ ದಿಲ್‌ವಾಳು ಯೆಹೂದ್ಯರ್‌ಬಿ ಸಬೆ ಭರಾವಾನು ಮಂದಿರ್‌ಮ ಅಜು ಗಲ್ಲಿಯೇಮ ಅಮ್ಮಸ್ ಕರಾಸ್. ಮೇ ಖ್ವಾಚಮಾಬಿ ಬೋಲುಸ್ಕಿ, ಇವ್ವುನ ಮಳ್‌ಣುತೆ ಧನ್ಯವಾದ್ ತದೇಸ್ ಮಳಿಗಯು.

3 ಕತೋಬಿ ತುಮೆ ಧರಮ್ ದೈವಾನಿ ವಖ್ವತ್‌ಮ, ತಾರೊ ಖಾವಹಾತೆ ದಿದೋತೆ ಧರಮ್, ತಾರೊ ಡಾವ ಹಾತ್‌ನಾಬಿ ನಾ ಮಾಲುಮ್ ಪಡ್‌ಣೂತೆ ಇಮ್ ದೇ.

4 ಅಜ್ಜು ದಿಲ್ಮ ಫಾಲಾತೆ ಇನ ದೇಖವಾಳೊ ತಾರೊ ಬಾ, ತುನ ಇನಾಮ್ ದಿಶೆ.

ಪ್ರಾರ್ಥನೆನಿ ಬಾರೇಮ

(ಲೂಕ 11:2-4)

5 “ತುಮೆ ಪ್ರಾರ್ಥನೆ ಕರಾನಿ ವಖ್ತಮ, ಖೋಟ್ ದಿಲ್‌ವಳಾನಿಮತ್ ನಕೊ ಪ್ರಾರ್ಥನೆ ಕರ್; ಅದ್ವಿಖ್ತಾರು ದೇಖಾದೆಕರಿ ಇವ್ಣೆ ಸಬೇನು ಮಂದಿರಮ ಅಜ್ಜು ಗಲ್ಲಿಯೇನು ಚೌಕ್‌ಮ ಭೀರಿನ್, ಪ್ರಾರ್ಥನೆ ಕರಾನ ಆಖ್ವೆಕರಾಸ್. ಮೇ ತುಮೂನ ಖಾಚಮಾಬಿ ಬೋಲುಸ್ಕಿ, ಇವ್ಣುನ ಮಳುಣುತೆ ಇನಾಮ್ ತದ್ವೇಸ್ ಮಳಿಗಯು.

6 ಕತೋಬಿ ತೂ ಪ್ರಾರ್ಥನೆ ಕರಾನಿ ವಖ್ತಮ, ತಾರ ಮಹಿನಕೋಣಾಮ ಜೈನ್, ಬಾಕಲ್ ಲಗಾಡಿನ್, ದಿಲ್ಮ ಛಾತೆ ತಾರ ಬಾನ ಪ್ರಾರ್ಥನೆ ಕರ್. ತದೆ ದಿಲ್ಮ ಫಾಲಾಸ್ತೆ ಇನ ದೇಖವಾಳೊ ತಾರೊ ಬಾ, ತುನ ಇನಾಮ್ ದಿಶೆ.

7 “ತೂ ಪ್ರಾರ್ಥನೆ ಕರಾನಿ ವಖ್ತಮ, ದೇವ್ ಪರ್ಖಾಕೊಂತೆ ಅದ್ವಿ ಬೋಲಾಸ್ತೆ ಇಮ್, ಮತ್ಲಬ್‌ಕೊಂತೆ ವಾತೇನ ಘಡಿಕೇಡೆ ನಕೊ ಬೋಲ್. ಇವ್ಣೆ ಘಣಿ ವಾತೆ ಬೋಲ್ಯಾತೊ, ಇವ್ಣಿ ಪ್ರಾರ್ಥನೆ ದೇವ್ ಖ್ವಮಜ್‌ಶೆ ಕರಿ ಸೋಚ್‌ಸ್.

8 ಇನಖ್ವಾಜೇಸ್ ತುಮೆ ಇವ್ಣಿನಿಫೋಣಿ ನಕೊ ಕರೊ, ತುಮೆ ತುಮಾರ ಬಾಕನ ಮಾಂಗಿಲ್ಯವಾನ ಅಗಾಡಿಸ್, ತುಮೂನ ಶಾತ್ ಜರೂರತ್ ಛಾ ಕರಿ ಇನ ಮಾಲುಮ್.

9 ಇನಖ್ವಾಜೇಸ್, ತುಮೆ ಸೊರ್ಗಾನ ಬಾನ ಅಮ್ ಪ್ರಾರ್ಥನೆ ಕರ್ವ್:

10 ಸೊರ್ಗಾಮ ಛಾತೆ ಮಾರೊ ಬಾ:

ತಾರು ನಾಮ್ ಪರಿಶುದ್‌ಕರಿ ಗಣ್ತಿ ಹುವಾದೆ. ತಾರಿ ರಾಜ್ಯ

ಆವಾದೆ;

ತಾರಿ ಮರ್ಜಿ ಸೊರ್ಗಾಮ ಫಾಲಾಸ್ತೆ ಇಮ್‌ಮ್, ಧರ್ತಿಪರ್‌ಬಿ ಫಾಲಾದೆ.

11 ಹಮ್ಗೆ ಹಮೂನ ದನ್‌ಪರೋಜ್‌ನು ಖಾಣು ದೇ.*

* 6:11 6:11 ಖಾಣು ಆ ವಖ್ತಮ ದೆ.

12 ಹಮಾರ ವಿರೋದ್ ಗಲತ್ ಕರಾವಾಳನ, ಹಮೆ ಮಾಪ್ ಕರೇಸ್ತೆ ಇಮ್ಮಸ್, ಹಮಾರಿ ಗಲ್ಲಿನ ತೂ ಮಾಪ್ಕರ್.

13 ಹಮೂನ ಶೋದನೆಮ ನಕೊನಾಕ್, ಕತೋಬಿ ಶೈತಾನ್‌ಧಿ ಹಮೂನ ಛೋಡಾವ್.'

14 ತುಮೆ ಅದ್ಮಿಖ್ವಾರನಿ ಗಲತ್‌ನ ಮಾಪ್ ಕರೈತೊ, ಪರಲೋಕ್‌ಮ ಛಾತೆ ತುಮಾರೊ ಬಾಬಿ ಜಿನು ತುಮಾರಿ ಗಲತ್‌ನಾಬಿ ಮಾಪ್ ಕರ್ಶೆ.

15 ಕತೋಬಿ ತುಮೆ ಅದ್ಮಿನು ಗಲತ್‌ನ ಮಾಪ್ ನಾ ಕರೈತೊ, ತುಮಾರೊ ಬಾ ಹುಯಿರೈತೊ ದೇವ್‌ಬಿ ತುಮಾರು ಗಲತ್‌ನ ಮಾಪ್ ಕೋ ಕರ್ಶೇನಿ.

ಉಪವಾಸ್‌ನಿ ಬಾರೇಮ

16 "ತುಮೆ ಉಪವಾಸ್ ಕರಾನಿ ವಖ್ವತ್‌ಮ, ಖೋಟ್ ದಿಲ್‌ವಾಳನಿಫೋಣಿ ಮ್ಹೋಡು ನಾ ಮುರೈಪ್ಪಲೇಣು. ಇವ್ಣೆ ಉಪವಾಸ್ ಛಾ ಕರಿ ಅದ್ಮಿಯೇನ ವತಾಳಿಲೆವಾನಖ್ವಾಜೆ ಇವ್ಣು ಮ್ಹೋಡಾನ ಇಮ್ ಕರಿಲೇಸ್, ಮೇ ತುಮೂನ ಖ್ವಾಚಮಾಬಿ ಬೋಲುಸ್ಕಿ, ಇವ್ಣುನ ಮಳ್‌ಣುತೆ ಇನಾಮ್ ತದೇಸ್ ಮಳಿಗಯು.

17 ಕತೋಬಿ ತೂ ಉಪವಾಸ್ ಕರಾನಿ ವಖ್ವತ್‌ಮ, ಮುಡ್‌ಕ್ಯಾನ ತೇಲ್ ಲಗಾಡಿಲೇನ್, ಮ್ಹೋಡು ಧೋಯಿಲೆ.

18 ಅಮ್ ಕರೈತೊ, ತೂ ಉಪವಾಸ್ ಛಾ ಕರಿ ಅದ್ಮಿಯೇನ ಮಾಲುಮ್ ಕೋ ಪಡ್‌ಶೇನಿ, ಕತೋಬಿ ದಿಲ್ಮ ರ್ವಾಳ ತಾರ ಬಾನ ಯೋ ಮಾಲುಮ್‌ಪಡ್‌ಶೆ. ದಿಲ್ಮ ಚಾಲಸ್ತೆ ಇನ ದೇಖವಾಳೊ ತಾರೊ ಬಾ, ತುನ ಇನಾಮ್ ದಿಶೆ.

ಸೋಗ್‌ಮಾನು ದೌಲತ್‌ನಿ ಬಾರೇಮ
(ಲೂಕ 12:33-34)

19 "ಜಗತ್‌ಪರ್ ತುಮಾರಖ್ವಾಜೆ ಧನ್‌ದೌಲತ್‌ನ ನಕೊ ಜಮಕರಿಲೇವೊ, ಹಜ್ಜಾ ಇನ ಕಿಲಪ್‌ಧರೀನ್, ಕೋರ್ಟ್‌ಖೈನ್, ನಾಶ್ ಹುಯಿಜಾಸ್ ಅಜ್ಜು ಚೋರ್ ಖ್ವಾರು ಘರ್‌ನ ಫೋಡಿನ, ಇನ ಚೋರಿ ಕರಿಲಿಶೆ.

20 ಕತೋಬಿ ಸೋರ್ಗಾಮ ಶೋತ್ ಕರಿರಾಖೊ. ಹಿಜ್ಜಾಯೋ ಕೋರ್ಡ್ಲಿ
ಖೈನ್, ಕಿಲಪ್ ಧರೀನ್ ಲುಕ್ಷಾನ್ ಕೋ ಹುವಾನಿ, ಅಜ್ಜು ಚೋರ್ ಖ್ವಾರು
ಘರ್ಫೋಡ್ ಶೇಬಿ ಕೊಯ್ನಿ. ಚೋರೀಬಿ ಕರಾಕೊಯ್ನಿ.

21 ಶನಕತೊ ತುಮಾರಿ ಶೋತ್ ಕಿಜ್ಜಾ ರ್ಲೇಸ್ಕಿ, ಹಿಜ್ಜಾಸ್ ತುಮಾರೊ
ದಿಲ್‌ಬಿ ರ್ಲೇಸ್.

ಶರೀರ್‌ನ ಉಜ್ಜಾಳು (ಲೂಕ 11:34-36)

22 “ಡೋಳಾ ಶರೀರ್‌ನ ದಿವಾನಿಫೋಣಿ ಹುಯಿರ್ಲ್ವೊ. ತಾರ
ಡೋಳ ಬರೋಬರ್ ರ್ಲ್ವಯಾತೊ, ತಾರು ಶರೀರ್ ಅಖ್ವುಸ್, ಉಜ್ಜಾಳು
ಹುಯಿರ್ಲ್ವೊ.

23 ಕತೋಬಿ ತಾರ ಡೋಳಾ ಖರಾಬ್ ರ್ಲ್ವಯಾತೊ, ತಾರು ಶರೀರ್
ಅಖ್ವುಸ್ ಅಂಧಾರು ಹುಯಿರ್ಲ್ವೊ. ತಾರಮಾನು ಉಜ್ಜಾಳುಸ್
ಅಂಧಾರು ಹುಯಿರ್ಲ್ವಯುತೊ, ಯೋ ಕೆತ್ರಿಖತರ್‌ನಾಕ್ ಹುಯಿರ್ಲ್ವೊ!

ದೇವ್ ಅಜ್ಜು ಧನ್‌ದಾಲತ್ (ಲೂಕ 16:13; 12:22-31)

24 “ಕೋಣ್‌ಬಿ ಬೇ ಯಜಮಾನ್ ಸೇವೆಕರಾನ ಕೊಹೊಯ್ನಿ.
ಯೋ ಏಕ್‌ನ ವಹೇರ್ ಕರೀನ್, ಬಿಜೇಕ್‌ನ ಪ್ಯಾರ್ ಕರ್ಶೆ; ನತರ್
ಏಕ್‌ನ ಜೋಡೆ ಅಲ್ಪಿಂತ್ರ ರ್ಲೇನ್, ಬಿಜೇಕ್‌ನ ಫಿಕ್ಕರ್‌ಕೊಕರ್ಷೆನಿ.
ತುಮೆ ದೇವ್‌ನಾಬಿ, ಪೈಶಾನಾಬಿ ಭೇನಾ ಏಕ್‌ದಮ್ ಸೇವೆ ಕರಾನ
ಕೋಹುವ್ವಾನಿ.

25 ಇನಖ್ವಾಜೇಸ್ ಮೇ ತುಮೂನ ಬೋಲುಸ್ಕಿ, ಜಿವಾನಖ್ವಾಜೆ ಶಾತ್
ಖಾಣು ಅಜ್ಜು ಪೀಣು ಕರಿ ಬೋಲಾನಿ ಬಾರೇಮರ್ಲ್ವೊ, ನತರ್‌ಕಿ
ಶರೀರ್‌ನ ಹೋಣುತೆ ಲುಂಗ್ಡಾವ್‌ನಿ ಬಾರೇಮರ್ಲ್ವೊ ವೇರ್ಚ್‌ಣೆ ನಕೊ
ಕರೊ. ಖಾಣಧೀಬಿ ಜಾನ್, ಅಜ್ಜು ಲುಂಗ್ಡಾವ್‌ಧೀಬಿ ಶರೀರ್ ಮಹಾನ್
ಕಾಹೆಕಿ ಶು?

26 ಆಕಾಶ್‌ಪರ್ ಉಡಾಸ್ತೆ ಜಿನಾವರ್‌ನ ದೇಖೊ, ಯೋ
ಪಿಕಾವಕೊಯ್ನಿ, ವ್ಹಾಡಕೊಯ್ನಿ, ಕಣ್ಣಿ ಭರಿನ್ ಮ್ಹೇಲಾಕೊಯ್ನಿ. ಇಮ್

ರಠ್ಠಯುತೋಬಿ, ಸೋರ್ಗಾಮ ಛಾತೆ ತುಮಾರೊ ಬಾ, ಯೋ ಖ್ವಾರಾನ ಪಾಳಿನ್ ಪರ್ವೇಶ್ ಕರಾಸ್. ಇವ್ವೆಥಿಬಿ ತುಮೆ ಕೆತ್ರೆಕ್ಕಿ ಊಚ್ ಹುಯಿರಠ್ಠಾಸ್ಸಿ?

27 ತುಮೆ ವೇಚ್ಚಣೆ ಕರಿನ್ ಏಕ್ ಘಡಿತೋಬಿ ಜ್ಞಾಖ್ತ್ ಜಿವಾನ ತುಮಾರಮ ಕಿನೇಥೀಬಿ ಉಶೇಕಿ ಶು?

28 ಎತ್ರೇಸ್ ಕಾಹೆತೆ ಪೇರಠ್ಠಾನ ಲುಂಗ್ಡಾನಿ ಬಾರೇಮ ಶನ ಫಿಕರ್ ಕರೋಸ್? ಜುಂಗ್ಳಿಫೂಲ್ ಫುಟಾಸ್ತೆ ತರಿಕಾನ ದೇಖೊ: ಯೋ ಮ್ಹಿನತ್ ಕರಕೊಯ್ಚಿ, ಮ್ಹುಡ್‌ನಖ್ವಾಜೆ ಲುಂಗ್ಡಾಬಿ ಬಣ್ಣೆಲೇಯ್ ಕೊಯ್ಚಿ.

29 ರಠ್ಠಯುತೋಬಿ ಮೇ ತುಮೂನ ಬೋಲುಸ್ಕಿ, ರಾಜ ಸೊಲೊಮೋನ್ ಇನಾಕನ ಥೂತೆ ಖ್ವಾರೂಸ್ ವೈಭೋಗ್‌ಥಿಬಿ ಪೇರ್‌ವಾಖ್ವೊ ಪೇರಠ್ಠಿರಾಖ್ಯೊಥೋತೆ ವಖ್ತ್‌ಮಾಬಿ, ಆ ಫೂಲ್‌ಮ ಏಕ್‌ನ ಛಾತೆ ಶನ್‌ಗಾರ್ ಎತ್ರೇ ಇನ ಕೋ ಥೂನಿ.

30 ಅಲಾ, ದರ್ರಾಶಿ ವಿಶ್ವಾಸ್‌ವಾಳ, ಹಮ್ಕೆರಠ್ಠೀನ್ ಕಾಲ್ ಚುಲ್ವಾಮ ಬಳಿಜಾವಾನ ಜುಂಗ್ಳಿ ಫಾಖ್ವೊ ದೇವ್ ಅಮ್ ಪೇರಠ್ಠಿಯೋತೊ, ಅನೇಥಿಬಿ ಜ್ಞಾಖ್ತ್ ತುಮೂನ ಹೋಡಾವಾಶೆ, ಫೇರಾವಾಶೆ ಕೊಯ್ಚಿಶು?

31 ಇನಖ್ವಾಜೇಸ್, ಶಾತ್ ಖಾಣು? ಕರಿ ರಠ್ಠವೊ, ನತರ್‌ಕಿ ಶಾತ್ ಪೀಣು?ಕರಿ ರಠ್ಠವೊ, ಶಾತ್ ಫೇರ್‌ನು? ಕರಿ ಬೋಲಾನಿ ಬಾರೇಮ ರಠ್ಠವೊ ವೇಚ್ಚಣೆ ನಕೊ ಕರೊ.

32 ಆ ತಮಾಮ್‌ನಖ್ವಾಜೆ ದೇವ್‌ಮ ಅಲಕ್ ಅದ್ವಿಖ್ವಾರು ಕದೇಬಿ ವೇಚ್ಚಣೆ ಕರಾಸ್. ಆ ಖ್ವಾರು ತುಮೂನ ಜುರೂರತ್ ಛಾಕರಿ ಪರಲೋಕ್‌ಮ ಛಾತೆ ತುಮಾರ ಬಾನ ಮಾಲುಮ್.

33 ಅನಬದಲ್, ತುಮೆ ಪಹಿಲೆ ದೇವ್ನು ರಾಜ್ಯನಖ್ವಾಜೆ ಅಜು ಇನಿ ನೀತಿನ ಖ್ವಾಜೇಬಿ ತಖ್ವೊ. ತದೆ ಅನಜೋಡೆ ಯೋ ಖ್ವಾರೂಸ್ ಮಳ್‌ಶೆ.

34 ಇನಖ್ವಾಜೇಸ್, ಕಾಲ್ನಿ ಬಾರೇಮ ಫಿಕರ್ ನಕೊ ಕರೊ; ಕಾಲ್‌ನೊ ದನ್ ಇನಿ ಬಾರೇಮ ಯೋಸ್ ಫಿಕರ್ ಕರಿಲಿಶೆ. ಯೋ ದನ್ನಿ ಖ್ವಾತಾಪ್ಪಿ ಯೋ ದನ್‌ಮಾಸ್ ಬಶ್.

7

ಬಿಜ್ಞಾನ ತೀರ್ಪ್ ಕರಾನಿ ಬಾರೇಮ
(ಲೂಕ 6:37,41-42)

1 “ತುಮೆ, ಬಿಜ್ಞಾನ ತೀರ್ಪ್ ನಕೊ ಕರೊ, ತದೆ ದೇವ್‌ಬಿ ತುಮೂನ ತೀರ್ಪ್ ಕೋ ಕರ್‌ಶೇನಿ.

2 ತುಮೆ ಬಿಜ್ಞಾನ ಕಿಮ್ ತೀರ್ಪ್ ಕರಾಸ್ಸಿ, ಇಮ್ಮಸ್ ದೇವ್‌ಬಿ ತುಮೂನ ತೀರ್ಪ್ ಕರ್ಚೆ, ಅಜ್ಜು ತುಮೆ ಬಿಜ್ಞಾನ ಕಿಮ್ ಮಾಪಿನ್ ದೇಸ್ಸಿ, ಇಮ್ಮಸ್ ದೇವ್‌ಬಿ ತುಮೂನ ಮಾಪಿನ್ ದಿಶೆ.

3 ‘ತೂ ತಾರ ಡೋಳಾಮ ಛಾತೆ ಪೇದಡ್‌ನಿ ಬಾರೇಮ ಸೋಚ್ಚೊಂತೆ, ತಾರ ಬೈನ ಡೋಳಾಮ ಛಾತೆ ಕಾಕ್ರಿನಿ ಬಾರೇಮ ಸೋಚ್ಚಾಸ್ತೆ ಕಿಮ್?

4 ತು ತಾರ ಬೈನ, ಬೈತಾರ ಡೋಳಾಮ ಛಾತೆ ಕಾಕ್ರಿನ ಕಾಡುಸ್ ಆವ್’ ಕರಿ ತು ಕಿಮ್ ಬೋಲಾಸ್? ತಾರ ಡೋಳಾಮ ಪೇದಡ್‌ನಿ ಛಾನಿ?

5 ಅಲಾ ರಗಾರ! ತಾರ ಡೋಳಾಮ ಛಾತೆ ಪೇದಡ್‌ನ ಪಹಿಲೆ ಕಾಡ್, ತದೆ ತಾರ ಬೈನ ಡೋಳಾಮ ಛಾತೆ ಕಾಕ್ರಿ ತುನ ಅಲ್ಪಿನಿತರ ದೆಖಾವ್‌ಶೆ.

6 ಪರಿಶುದ್ ರಾಲ್ಫ್‌ವನ್ ಕುತ್‌ರಾಲ್‌ವನ್ ನಕೊ ನಾಖೊ; ಯೊ ಪಾಲ್ಟುಫರಿ ತುಮಾರಪರ್ ಪಡನ್ ಕಲ್ಪಿನಾಕ್ಲೆ. ಮುತ್ತ್‌ಖ್ವಾರ್ ಡೂಕರ್‌ನ ಖ್ವಾಪ್ಪೆ ರಂಫೊ ನಕೊ. ಯೊಅಖ್ವು ಯೊ ಮುತ್ತ್‌ಖುಂದ್ಲಿನಾಕ್ಲೆ.

ಮಾಂಗೊ, ಥೂಂಡೊ, ಖಟ್‌ಖಟಾವೊ
(ಲೂಕ 11:9-13)

7 “ಮಾಂಗಿಲೇವೊ, ತದೆ ತುಮೂನ ದೇವಾವ್‌ಶೆ; ಥೂಂಡೊ, ತದೆ ತುಮೂನ ಮಳ್‌ಶೆ; ಖಟ್‌ಖಟಾವೊ, ತುಮೂನ ಬಾಕಲ್ ನಿಕಳ್‌ಶೆ,

8 ಶನಕತೊ ಮಾಂಗವಾಳ ಹರೇಕ್‌ನ ದೆವಾವ್‌ಶೆ, ಅಜ್ಜು ಥೂಂಡವಾಳನ ಮಳ್‌ಶೆ, ಕೋಣ್ ಖಟ್‌ಖಟಾವಸ್ಸಿ ಇನ ಬಾಕಲ್ ಕಡಾವ್‌ಶೆ.

9 ತುಮಾರಾಮ ಕೋಣ್‌ತೋಬಿ ರೋಟೊ ಮಾಂಗವಾಳ ಛಿಯ್ಯಾನ ಬಂಡೊ ದಿಶುಕಿ ಶು?

10 ನತರ್‌ಕಿ ಮಾಲ್ಟಾಲು ಮಾಂಗ್ಯೊತೊ, ಖ್ವಾಪ್‌ನ ದಿಶೆ!

11 ಇಮ್‌ಕತೊ ಖರಾಬ್ ಹುಯಿರಾಲ್‌ತೆ ತುಮೇಸ್ ತುಮಾರ ಲಡ್ಕಾವ್‌ನ ಅಲ್ಪು ರಾಲ್ಫ್‌ವನ್ ದೆವಾಪರ್, ಪರಲೋಕ್‌ನೊ ತುಮಾರೊ

ಬಾ, ಇನಾಕನ ಮಾಂಗವಾಳನ ಕೆತ್ತೇಕ್ಕಿ ಅಟ್ಟು ರಾಲ್ವನ್ ದಿಶೆಕೊಯ್ನಿಕ್ಕಿ ಶು?

12 ಅದ್ವಿಖ್ವಾರ್ಡು ತುಮೂನ ಶಶ್ಯಾತ್ ಕರ್ನ್ವಕರಿ ತುಮೆ ಆಖ್ವೊ ಕರೋಸ್ಕಿ, ಯೋಸ್ ತುಮೆ ಇವ್ವುನ ಕರೋ: ಮೋಶೇನು ಧರ್ಮಶಾಸ್ತ್ರ ಅಜ್ಜು ಪ್ರವಾದಿಯೇನು ವಚನ್ನು ಮತ್‌ಲಬ್ ಆಸ್ ಹುಯಿರ್ನ್ವೊಸ್.

ನ್ವಾನು ಬಾಕಲ್‌ನಿ ಬಾರೇಮ

(ಲೂಕ 13:24)

13 ನ್ವಾನು ಬಾಕಲ್ ವಾಟೆಕರಿ ಮಹಿ ಜ್ಞಾವೊ, ಶನಕತೊ ನರಕ್‌ನ ಜ್ಞಾವಾನು ಬಾಕಲ್ ಝಾಲು ಅಜ್ಜು ಇನಾಮ ಫಾಲಿ ಜ್ಞಾವಾನು ಶುಲ್ವ, ಅಜ್ಜು ಇನಾಮ ಜ್ಞಾವಾಳು ಅದ್ವಿಘಣು.

14 ಕತೋಬಿ ಹಮೇಶಾನಿ ಚಿಂಡ್‌ಗೀಮ ಜ್ಞಾವಾನು ಬಾಕಲ್ ನ್ವಾನು ಅಜ್ಜು ಇನಾಮ ಜ್ಞಾವಾನ ಮುಶ್ಕಿಲ್, ಯೋ ಮಾರಗ್‌ನ ಡೊಂಡಿಲ್ವಾಳು ಥೋಡುಸ್ ಅದ್ವಿ.

ಝಾಡು ಅಜ್ಜು ಇನು ಪಂಡಾನಿ ಬಾರೇಮ

(ಲೂಕ 6:43-44)

15 ಝೂಟ ಪ್ರವಾದಿಯೇನಿ ಬಾರೇಮ ಹೊಷಾರ್‌ಥಿ ರ್ವವೊ; ಇವ್ವೆ ಮೇಂಡಾನು ಪೇರ್‌ವಾಖ್ವೊ ಫಾಲಿಲೀನ್ ತುಮಾರಕನ ಆವ್‌ಶೆ, ಕತೋಬಿ ಮಹಿ ದೇಖ್ವೊತೊ ಇವ್ವೆ ಖ್ವಾಚಮಾಬಿ ಝಂಜೋಡಿ ಖವಾಳ ಜರಕ್‌ನಿಫೋಣಿ ಹುಯಿರ್ನ್ವೊಸ್.

16 ತುಮೆ ಇವ್ವಿ ಫಾಲ್‌ಥೀಸ್ ಇವ್ವುನ ಮಾಲುಮ್ ಕರಿಲಿಶು. ಕಾಟಾನಿ ಡಾಗೇಮ ದ್ರಾಕ್ಷಿನು ಪಂಡಾ ಅಜ್ಜು ದತ್ತೂರಿನ ಝಾಡಾವ್‌ಮ ಅಂಜೀರ್‌ನ ಪಂಡಾ ಮ್ವೇಲಾಸ್ಕಿ ಶು?

17 ಇಮ್ತುಸ್ ಅಟ್ಟು ಝಾಡು ಅಟ್ಟುಸ್ ಪಂಡು ದೇಸ್, ಕತೋಬಿ ಕೀಡ್‌ಣು ಝಾಡು ಖ್ವಡ್ವುಪಂಡು ದೇಸ್.

18 ಅಟ್ಟು ಝಾಡು ಖ್ವಡ್ವು ಪಂಡು ಕೋ ದೇಯ್ವಿ, ಅಜ್ಜು ಕೀಡ್‌ಣು ಝಾಡು ಅಟ್ಟು ಪಂಡು ಕೋ ದೇಯ್ವಿ.

19 ಅಜ್ಜು ಅಜ್ಜು ಪಂಡು ದೇಯಿಕೊಂತೆ ಹರೇಕ್ ಝಾಡನ ಕತ್ರೀನ್, ಆಗ್‌ಮ ನಾಖಾಸ್.

20 ಅಮ್ ಝೂಟಿ ಪ್ರವಾದಿಯೇನು ಚಾಲ್‌ಥೀಸ್ ತುಮೆ ಇವ್ವುನ ಮಾಲುಮ್ ಕರಿಲಿಶು.

ತು ಕೋಣ್‌ಕರಿ ಮನ ಮಾಲುಮಸ್ ಕೊಯ್ನಿ

(ಲೂಕ 13:25-27)

21 “ಮನ, ‘ಪ್ರಭು, ಪ್ರಭು’ ಕರಿ ಬೋಲವಾಳು ಖ್ವಾರ್ರು ಸೊರ್ಗ ರಾಜ್ಯಮ ಭಾಶೆಕರಿ ನಕೊಲ್ತಾವೊ. ಕತೋಬಿ ಸೊರ್ಗಾಮ ಛಾತೆ ಮಾರ ಬಾನಿ ಮರ್ಜಿನಿಫೋಣಿ ಚಾಲವಾಳುಸ್ ಸೊರ್ಗ ರಾಜ್ಯಮ ಭಾಶೆ.

22 ನ್ಯಾವಾನಿ ತೀರ್ಪ್‌ನ ದನ್ತ ಕೈಯೆಕ್ಕಿ ಅದ್ವಿ ಮನ, ‘ಪ್ರಭು, ಪ್ರಭು’ ತಾರ ನಾಮ್‌ಪರ್ ಹಮೆ ಪ್ರವಾದ್‌ನೆ ಬೋಲ್ಯ ತಾರ ನಾಮ್‌ಪರ್ ಹಮೆ ಭೂತ್‌ನ ಖ್ವಾರ್ರು ಕಾಡ್ಯ ಅಜ್ಜು ಕೈಯೆಕ್ಕಿ ಮಹಾನ್ ಕಾಮ್ನ ಕರ್ಯಾ ಕರಿ ಬೋಲ್‌ಶೆ.

23 ತದೆ ಮೇ ಇವ್ವುನ, ತುಮೆ ಕೋಣ್‌ಕರಿ ಮನ ಮಾಲುಮಸ್ ಕೊಯ್ನಿ ಮಾರೇಥಿ ದೂರ್ ಹಟಿಚಾವೊ, ತುಮೆ ಖರಾಬ್ ಅದ್ವಿ ಹುಯಿರ್ದಾಸ್!” ಕರಿ ಬೋಲಿಶ್.

ಬೇ ಜಣು ಘರ್ ಭಾಂದಾವಾಳು

(ಲೂಕ 6:47-49)

24 “ಇನಖ್ವಾಜೀಸ್, ಆ ಮಾರಿ ವಾತೇನ ಖ್ವಮ್‌ಜಿನ್, ಅನೀನಿಫೋಣಿ ಚಾಲವಾಳು ಹರೇಕ್ ಜಣು ಬಂಡಾಪರ್ ಘರ್ ಭಾಂದಿಲೇಸ್ತೆ ಅಕ್ಲಿ ಅದ್ವಿನಿಫೋಣಿ ಹುಯಿರ್ದಾಸ್.

25 ಭಾಂದಾನ ಬಾದ್ಮ ಅಪಟ್-ಜಪಟ್‌ನೊ ಪಾಣಿ ವರ್ಶೀನ್, ನದ್ವಿಯೆ ಭರೈನ್ ಆಯು, ಅಜ್ಜು ಚಾರ್ಡ್ ಆಡಿಥು ವ್ವಾಯಿರೊ ವಾಗಿನ್ ಯೋ ಘರ್‌ನ ಮಾರ್ ಪಡ್ಯ ಕತೋಬಿ ಯೋ ಘರ್ ಬಂಡಾಪರ್ ಭಂದೈರ್ದೊಡೊತೆ ಇನಖ್ವಾಜೆ, ಯೋ ರಡ್‌ಕ್ಯ ಕೊಯ್ನಿ.

26 ಕತೋಬಿ ಆ ಮಾರಿ ವಾತೇನ ಖ್ವಮ್‌ಜಿನ್‌ಬಿ, ಇನೀನಿಫೋಣಿ ಚಾಲಕೊಂತೆ ಹರೇಕ್ ಜಣು ರೇತಿಪರ್ ಘರ್ ಭಾಂದಿಲೇಸ್ತೆ ಬುಧ್ಧು ಅದ್ವಿನಿಫೋಣಿ ಹುಯಿರ್ದಾಸ್.

27 ಭಾಂದಾನ ಬಾದ್‌ಮ, ಅಪಟ್‌ಝುಪಟ್‌ನೊ ಪಾಣಿ ವರ್ಶೀನ್, ನದ್ದಿಯೆ ಭರೈನ್ ಆಯು, ಅಙ್ಗು ಚಾರ್‌ಡ್ ಆಡಿಝ ವಹಿರೊ ವಾಗಿನ್, ಯೋ ಘರ್‌ನ ಮಾರ್ ಪಡ್ಕು ತದೆ ಯೋ ಘರ್ ಧಡಮ್ ಕರಿ ರಡ್ಕಿ ಗಯು.

ಯೇಸುನಿ ಅದಿಕಾರ್‌ನಿ ಬಾರೇಮ

28 ಯೇಸುನೆ ಆ ಖ್ವಾರಿ ವಾತೇನ ಬೋಲಿನ್ ಖತಮ್ ಕರಾನ ಬಾದ್ಕು ಇನೆ ಬೋಲಿವತಾಳ್ಕೊತೆ ಇನಿ ಬಾರೇಮ ಅದ್ಮಿಖ್ವಾರು ಘಣು ಆಶ್ಚರ್ಯವಾದು.

29 ಶನಕತೊ, ಯೇಸು ಮೋಶಿನಿ ವಚನ್ ಶಿಕಾಡವಾಳ ಶಾಸ್ತ್ರಿಯೇನಿಘೋಣಿ ಕಾಹೆತೆ ಅದಿಕಾರ್ ರ್ವವಾಳಾನಿತರ ಬೋಲಿ ವತಾಳ್‌ತೋಫೊ.

8

ಯೇಸುನೆ ಏಕ್ ಖೋಡೆಲಾನ ಅಱ್ಱು ಕರ್ರೊತೆ

(ಮಾರ್ಕ 1:40-45; ಲೂಕ 5:12-16)

1 ಯೇಸು ಪಹಡ್ ಉತ್ರಿನ್ ಆವಾದಿನ್, ಅದ್ಮಿನು ಏಕ್ ಝುಂಡ್ ಇನ ಪೀರೆ ಗಯು.

2 ತದೆ ಖೋಡ್ ಲಗ್ನೋಹುಯೊ ಏಕ್ ಭಣೊ ಯೇಸುಕನ ಐನ್, ಇನ ಖ್ವಾಪ್ಪೆ ಡುಕ್‌ಣ್ಯ ಟೀಕಿನ್, “ಪ್ರಭು, ತೂ ಮನ್ ಕರ್ರೊತೊ, ಮನ ಶುದ್ಧಿ ಕರೆಜಾಯ್” ಕರಿ ಬೋಲ್ಯೊ.

3 ಯೇಸುನೆ ಹಾತ್ ಖ್ವಾಪ್ಪೆ ಕರಿನ್, ಇನ ಛೀಮಿನ್, “ಮನ ಮನ್ ಛಾ, ಶುದ್ಧಿ ಹೂ” ಕರಿ ಬೋಲ್ಯೊ. ತದ್‌ನು-ತದ್ದೇಸ್ ಯೋ ಅದ್ಮಿನ ಖೋಡ್ ಅಱ್ಱು ಹುಯಿಗಯು.

4 ತದೆ ಯೇಸುನೆ ಇನ, “ಖ್ವಮಜ್! ಕಿನಾಬಿ ನಕೊ ಬೋಲೀಶ್; ಕತೋಬಿ ಯಾಜಕಕನ ಜೈನ್ ತಾರು ಆಂಗ್‌ತನ್ ವತಾಳಿನ್ ಮೋಶೀನೆ ನೇಮ್‌ಶಾಯೋತೆ ಕಾಣ್ಕಿನ ದೇ; ಅನೇಢಿ ಅದ್ಮಿಖ್ವಾರಾಮ ತುನ ಅಱ್ಱು ಹುಯಿಗಯು ಕರಿ ಸಬೂತ್ ರ್ವಿಶೆ” ಕರಿ ಬೋಲ್ಯೊ.

ಖೋ ಶಿಪಾಯಿನೊ ಮೋಟಾನ ಆಳನ ಯೇಸುನೆ ಅಟ್ಟು
ಕರೈತ್ತೆ

(ಲೂಕ 7:1-10)

5 ಯೇಸು ಕಪೆರ್ನಾಹನ ಆವಾದಿನ್, ಖೋಶಿಪಾಯಿನೊ
ಮೋಟಾನೆ ಇನಾಕನ ಗಿಂಗೈನ್,

6 “ಪ್ರಭು, ಮಾರೊ ಸೇವಕ್ ಲಖಾವೊ ಮಾರಿನ್, ಘರಮ
ಲ್ಲಾದ್ರಿಪರ್ ಪಡ್ಯೋಸ್ ಅಜು ಅಜಾಧಿ ಘಣು ತರಪ್ಪಡುಕರಾಸ್” ಕರಿ
ಬೋಲಿಲಿದೊ.

7 ಯೇಸುನೆ, “ಮೇ ಆಯಿನ್, ಇನ ಅಟ್ಟು ಕರುಸ್” ಕರಿ ಬೋಲ್ಯೊ.

8 ತದೆ ಯೋ ಖೋಶಿಪಾಯಿನೊ ಮೋಟಾನೆ, “ಪ್ರಭು, ತೂ ಮಾರ
ಘರಕನ ಆವಾಯೆತ್ರೆ ಮೇ ಲ್ಹಾಯೇಕ್‌ನೊ ಕಾಹೆ. ತೂ ಖಲಿ ಏಕ್ ವಾತೆ
ಬೋಲ್ಯೊತೊ ಬಶ್, ಮಾರ ಸೇವಕ್‌ನ ಅಟ್ಟು ಉಶೆ.

9 ಮೇಬಿ ಬಿಜೇಕ್ ಅದಿಕಾರ್‌ನ ಹಾತ್‌ಹೇಟ್ ರ್ವಾಳೊ, ಮಾರ
ಅದೀನ್‌ಮಾಬಿ ಸಿಪಾಯಿಖ್ವಾರು ಲ್ಹಾ. ಮೇ ಇವ್ವಾಮ ಏಕ್ ಜಣಾನ
‘ಜಾ’ ಕರಿ ಬೋಲ್ಯೊತೊ ಭಾಸ್; ಬಿಜ್ಜೇಕ್ ಜಣಾನ, ‘ಆವ್’ ಕರಿ
ಬೋಲ್ಯೊತೊ, ಆವಸ್; ಮಾರ ಆಳನ, ‘ಅಮ್ಮು-ಅಮ್ಮು ಕರ್’ ಕರಿ
ಬೋಲ್ಯೊತೊ, ಯೋ ಕರಸ್” ಕರಿ ಬೋಲ್ಯೊ.

10 ಯೇಸುನೆ ಅನಖ್ವಮ್‌ಜಿನ್, ಆಶ್ಚರ್ಯಪ್ಪಿನ್, ಇನ ಪೀರೆ
ವಳ್ಳಾವ್‌ತುಡೂತೆ ಇವ್ಣುನ, “ಮೇ ಅವ್ವಿ ಮೋಟೆ ವಿಶ್ವಾಸ್‌ನ
ಇಸ್ರಾಯೇಲ್ ಅದ್ಮಿಮಾಬಿ ಕೋ ದೇಖ್ವೊನಿ ಕರಿ ತುಮೂನ
ಖ್ವಾಚಮಾಬಿ ಬೋಲುಸ್.

11 ಅತ್ರೇಸ್ ಕಾಹೆತೆ, ಮೇ ತುಮೂನ ಬೋಲುಸ್ವಿ, “ಪೂರಬ್
ಪಶ್ಚಿಮ್ ದಿಕ್ ಭಣೀಥು ಅದ್ಮಿಐನ್, ಸೊರ್ಗನು ರಾಜ್ಯಮ ಅಬ್ರಹಾಮ್,
ಇಸಾಕ್ ಅಜು ಯಾಕೋಬನ ಜೋಡೆ ಖಾಣನ ಬೇಖ್ವೆಶೆ;

12 ಕತೋಬಿ ಕೋಣ್ ಆ ರಾಜ್ಯಮ ಮಳವಾಳೊಕಿ ಇವ್ಣೆ ಭಾರ್
ಅಂಧಾರಾಮ ಫೆಕ್ವೆಜಾಶೆ; ಹಿಜ್ಜಾ ಇವ್ಣೆ ರೊವ್‌ಶೆ ಅಜು ಕರ್-ಕರ್ ದಾತ್
ಚಾವಾನು ಉಶೆ” ಕರಿ ಬೋಲ್ಯೊ.

13 ಅಜ್ಜು ಯೇಸುನೆ ಯೋ ಖ್ವೊಶಿಪಾಯಿನೊ ಮೋಟಾನ, “ತೂ ವಿಶ್ವಾಸ್ ಕರೊತ್ತೆ ಇಮ್ಮಸ್ ತುನ ಹುವಾದೆ, ಘರೆ ಜ್ಞಾ” ಕರಿ ಬೋಲ್ಯೊ ಯೋಸ್ ವಖ್ವತ್‌ಮ ಇನ ಸೇವಕ್‌ನ ಅಟ್ಟು ಹುಯಿಗಯು.

ಯೇಸುನೆ ಕೈಯೆಕ್ಕಿ ಅದ್ವಿನ ಅಟ್ಟು ಕರೊತ್ತೆ

(ಮಾರ್ಕ 1:29-34; ಲೂಕ 4:38-41)

14 ಅನಕೇಡೆಧು ಯೇಸು ಪೇತ್ರಾನ ಘರ್‌ಕನ ಆಯಿನ್, ಹಿಜ್ಜಾ ಇನಿ ಖ್ವಾಖ್ವು ತಾವ್ ಐನ್, ಬಿಲ್ಲಾವ್ವಿಪರ್ ಮ್ಹಿತಿಥೀತೆ ದೇಖ್ಲೊ.

15 ಯೇಸುನೆ ಇನ ಹಾತ್ವ ಛೀಮ್ಲೊ; ಛೀಮ್‌ತಾಸ್ನ ತಾವ್ ಉತ್ರಿಗಯೊ, ಅಜ್ಜು ಯೋ ಉರಿನ್ ಇನಿ ಚಾಕ್ರಿ ಕರಿ.

16 ಖ್ವಾಂಜ್ ಹುವ್ವಾದೀನ್, ಭೂತ್ ಧರಿರಾಮ್ಲೊಡೊತೆ ಘಣ ಅದ್ವಿನ ಯೇಸುಕನ ಬುಲೈಲಾಯು; ಯೇಸುನೆ ಖಲಿ ವಾತೆಥೀಸ್ ಭೂತ್‌ಖ್ವಾರು ಕಾಡ್ಲೊ ಅಜ್ಜು ರೋಗ್‌ಮ ಧೂತೆ ಖ್ವಾರಾನ ಅಟ್ಟು ಕರೊತ್ತೊ.

17 ಅನೇಥಿ, “ಖ್ವುಡ್ ಇನೇಸ್ ಅಪ್ಪು ರೋಗ್-ರಾಯನ ಪಾಡಿಲಿದೊ, ಅಜ್ಜು ಅಪ್ಪ ಅಜ್ಞಾನ ಥೊಯಿಲಿದೊ” ಕರಿ ಯೆಶಾಯ ಪ್ರವಾದಿಧಿ ಬೋಲ್ಯೆತೆ ವಾತೆ ಚಾಲಾನಖ್ವಾಜೆ ಯೇಸುನೆ ಆ ಖ್ವಾರು ಕರೊತ್ತೊ.

ಯೇಸುನ ಪೀಲೆ ಜ್ಞಾವಾಳು ಕಿಮ್ ರ್ವೇಣು?

(ಲೂಕ 9:57-62)

18 ಯೇಸುನೆ ಇನ ಅಶ್‌ಪಿಶ್‌ಧೂತೆ ಅದ್ವಿನಿ ಭೀಡ್‌ಣ ದೇಖಿನ್, ದರ್ರಾವ್‌ನಿ ಪಾರ್ಲಿ ಬಾಜೂಮ ಜ್ಞಾವುಕ್‌ಕರಿ ಇನ ಶಿಷ್ಯರ್‌ನ ಹುಕುಮ್ ದಿದೊ.

19 ತದೆ ಮೋಶೆನಿ ವಚನ್ ಶಿಕಾಡವಾಳೊ ಏಕ್ ಜಣೊ ಐನ್, ಯೇಸುನ, “ಗುರು, ತೂ ಕಿಜ್ಜಾ ಗಯೊತೋಬಿ ಮೇ ತಾರ ಪೀಲೇಸ್ ಆವ್‌ಸ್” ಕರಿ ಬೋಲ್ಯೊ.

20 ಯೇಸುನೆ ಇನ, “ನ್ನೋರಿಯೆನ ಘವಿಯೆ ಲ್ಲಾ, ಅಜ್ಜು ಆಬ್‌ಪರ್ ಉಡಾತೆ ಜಿನಾವರ್‌ನ ಖ್ವಾರು ಮ್ಹಾಳೊ ಲ್ಲಾ, ಕತೋಬಿ ಅದ್ವಿನ ಛಿಯ್ಯಾನ ಮುಡ್‌ಕ್ಯು ಟೀಕಯೆವ್ವಿ ಝಗೋಬಿ ಕೊಯ್ನಿ” ಕರಿ ಬೋಲ್ಯೊ.

21 ಶಿಷ್ಯರಾಮ ಬಿಜೇಕ್‌ನಿ, “ಪ್ರಭು, ಮೇ ಪಹಿಲೆ ಜೈನ್ ಮಾರ ಬಾನ ಧಪ್‌ನೈದೀನ್ ಆವಾನ ಮನ ಹುಕುಮ್ ದೆ” ಕರಿ ಬೋಲ್ಯೊ.

22 ಯೇಸುನೆ ಇನ, “ಮಾರ ಪೀಲೆ ಆವ್, ಮರೈಹುಯಾಸ್ ಇವ್ವಮ ಮರಿಗಯೊತೆ ಇನ ಮಾಟಿ ಕರಾದೆ” ಕರಿ ಬೋಲ್ಯೊ.

ಯೇಸುನೆ ತೋಫಾನ್ ಭೀರಾಖ್ಯೊತೆ

(ಮಾರ್ಕ 4:35-41; ಲೂಕ 8:22-25)

23 ಯೇಸು ಡೋಣ್‌ಪರ್ ಚಡ್ಚೊ ಅಜು ಇನ ಶಿಷ್ಯರಾಬಿ ಇನಜೋಡೆ ಗಯ.

24 ಎಕ್ಸದಮ್, ಮೋಟೊ ವಹಿರೊ ದರೈವಾಮ ಹುವಾಲಗ್ಯೊ ಅಜು ರೋಕಾಳ್ಚೊ ಆಯಿನ್ ಡೋಣ್ಣಾ ಥಾಪಿನಾಖಿನಿತರ ಹುಯು. ಕತೋಬಿ ಯೇಸು ಖುತೋಫೊ.

25 ಶಿಷ್ಯರ್ ಯೇಸುಕನ ಜೈನ್, ಇನ ಉರಾಡೀನ್, “ಪ್ರಭು, ಹಮೂನ ಬಫಾಡ್! ಹಮೆ ಮರೈವಾನ ಆಯಾನಿ!” ಕರಿ ಬೋಲ್ಯೊ.

26 ಯೇಸುನೆ, “ತುಮೆ ಶನ ಡರೋಸ್ತೆ? ತುಮೂನ ಕಮಾವಿಶ್ವಾಸ್ ಲ್ಲಾ!” ಕರಿ ಬೋಲಿನ್, ಉರೀನ್ ವಹಿರನಾಬಿ, ದರೈವ್ವ ಗುರ್ಕಾಯೊ, ತದೆ ಖಾರೊಸ್ ಖೊಪೊ ಪಡಿಗಯು.

27 ಹರೇಕ್ ಜಣು ಅಶ್ಚರ್ಯ್ ಖೈನ್, “ಆ ಕಿಮ್ನೊ ಉಶೆ? ವಹಿರೋಬಿ, ದರೈವಾಬಿ ಜಿನು ಆ ಬೋಲಾತೆ ಇಮ್ ಖಡ್ವಾಜಾಸ್‌ನಿ?” ಕರಿ ಬೋಲ್ಯೊ.

ಯೇಸುನೆ ಭೂತ್ ಧರಿರಾಖ್ಯೂಡೊತೆ ಬೇ ಜಣಾನ ಅಲ್ಪು ಕರೈತೆ

(ಮಾರ್ಕ 5:1-20; ಲೂಕ 8:26-39)

28 ಅನಬಾದಾಮ ಯೇಸು ದರೈವಾನಿ ಪಾರ್ಲಿ ಬಾಜೂಮ ಥೂತೆ ಗದರೇನ್ ಕರಿ ತಬರ್‌ಖಾನ ಆವಾದಿನ್, ಭೂತ್ ಧರಿರಾಖ್ಯೂಡೊತೆ ಬೇ ಜಣು ಮಖಾಣ್ಯೊನಿ ಘವಿಮಾಥೊ ನಿಕ್ಕಿನ್, ಇನಖಾಪ್ಪೆ ಆಯು. ಇವ್ವೆ ಘಣು ಚಂಡಾಳಿ ಹುಯಿರೈಡೊತೆ ಇನಖಾಜೆ ಯೋ ವಾಟಿ ಕೋಣ್‌ಬಿ ಕೋ ಫರ್ತುಡೊನಿ.

29 ತದೇಸ್ ಇವ್ವೆ, “ದೇವ್ವ ಛಿಯ್ಯಾ, ಹಮಾರೇಛಿ ತುನ ಶಾತ್ ಛಾ? ವಖ್ವತ್ ಆವಾನ ಆಗಾಡಿಸ್ ಹಮೂನ ನಿಶತ್ ದ್ಯಾವಾನ ಐರೈದ್ವಿಸ್ತಿ ಶು?” ಕರಿ ಚಿಕ್ರಿನ್ ಬೋಲ್ಯೊ.

30 ದ್ರಾಶಿ ದೂರ್ ಪಾರಸ್ ಡೂಕರ್‌ನಿ ಏಕ್ ಮೋಟಿ ಝೂಂಡ್ ಚರೂಕರ್‌ತೂಥು.

31 ಯೋ ಭೂತ್‌ಖ್ವಾರು, “ತೂ ಹಮೂನ ಅವ್ವ ಮಹಿಥು ನಖ್ವಾಡ್‌ತೊ ಉಶೇತೊ, ಯೋ ಡೂಕರ್‌ನಿ ಝೂಂಡ್‌ನ ಮಹಿ ಮೋಕಲ್” ಕರಿ ಗಿಂಗೈಲಿದು.

32 ಯೇಸುನೆ ಇವ್ವುನ, “ಜಾವೊ” ಕರಿ ಬೋಲ್ಯೊ, ತದೆ ಯೋ ಭೂತ್‌ಖ್ವಾರು ಇವ್ವು ಭೇ ಜಣಾನ ಮ್ಹಿಂದಿನ್, ಡೂಕರ್‌ನ ಮಹಿ ಪೆಶಿಗಯು. ತದ್‌ನು-ತದ್ದೇಸ್ ಡೂಕರ್‌ಖ್ವಾರು ನಾಶಿನ್, ಪಹಡ್‌ನಿ ಕಥಾರ್‌ಪರ್‌ಥು ದರೈವ್‌ಮ ಪಡೀನ್, ಡುಬಿನ್ ಮರಿಗಯು.

33 ತದೆ ಡೂಕರ್ ಚರಾವವಾಳು ಇವ್ವೆ ಗಾಮ್‌ನ ಮಹಿ ನಾಶಿ ಜೈನ್, ಭೂತ್ ಧರಿರಾಮ್‌ಥೂತೆ ಇವ್ವುನ ಚಾಲ್ಯುತೆ ಖ್ವಾರಿಸ್ ಬಾರೇಮ ಬೋಲ್ಯು.

34 ತದೆ ಯೋ ತಬರ್‌ಖಾನು ಖ್ವಾರುಸ್ ಅದ್ಮಿ ಯೇಸುನ ಮಳಾನಖ್ವಾಜೆ ಆಯು; ಅಜು ಇವ್ವು ತಬರ್‌ಖಾನ ಮ್ಹಿಂದಿನ್ ಜಾ ಕರಿ ಇನ ಗಿಂಗೈಲಿದು.

9

ಯೇಸುನೆ ಲಕ್‌ವೊ ಮಾರೈಹುಯು ಏಕ್ ಅದ್ಮಿನ ಅಲ್ಫು ಕರೈತೆ

(ಮಾರ್ಕ 2:1-12; ಲೂಕ 5:17-26)

1 ಯೇಸುನೆ ಡೋಣ್ ಚಢೀನ್, ದರೈವ್‌ನಿ ಪಾರ್ಲಿ ಬಾಜೂಮ ಥೂತೆ ಇನ ಗಾಮ್‌ನ ಪಾಛೊ ಗಯೊ.

2 ಹಿಜ್ಜಾ ಥೋಡ ಜಣಾನೆ ಬಿಲ್ಟಾವ್ವಿಪರ್ ಪಡ್ವುಥೂತೆ ಏಕ್‌ಜಣೊ ಲಕ್‌ವೊ ಮಾರೈಹುಯಾನ, ಯೇಸುಕನ ಪಳ್ಳಿನ್ ಆಯು. ಇನೆ ಇವ್ವಿವಿಶ್ವಾಸ್‌ನ ದೇಖಿನ್, ಯೋ ಲಕ್‌ವೊ ಮಾರೈಹುಯಾನ, “ಮಾರ

ಛಿಯ್ಯಾ, ಹಿಮ್ಮತ್ ರಾಕ್! ತಾರು ಪಾಪ್‌ಖ್ವಾರು ಮಾಪ್ ಹುಯಿಗಯು” ಕರಿ ಬೋಲ್ಯೊ.

3 ಹಿಜ್ಜಾ ಥೂತೆ ಮೋಶೇನು ವಚನ್ ಶಿಕಾಡವಾಳು ಶಾಸ್ತ್ರೀಮ ಥೋಡಭಣಾನೆ, “ಆ ಅದ್ಮಿದೇವ್ನಿ ವಿರೋದ್ ಬೋಲಾಸ್ವಿ!” ಕರಿ ಇವ್ಣ-ಇವ್ಣಮಹಿ ಬೋಲಿಲಿದು.

4 ಇವ್ಣೆ ಇಮ್ ಸೋಚುಕರಾತೆ ಯೇಸುನೆ ಮಾಲುಮ್ ಕರೀಲಿನ್, ಇವ್ಣುನ, “ಶನ ತುಮೆ ತುಮಾರ ಮನ್‌ಮ ಅಮ್ ಖರಾಬ್ ಸೋಚೋಸ್ತೆ?

5 ಕೆಹು ಶುಲ್ಬ? ‘ತಾರು ಪಾಪ್‌ಖ್ವಾರು ಮಾಪ್ ಹುಯಿಗಯು’ ಕರಿ ಬೋಲಾನುಕಿ, ‘ಉರೀನ್, ಚಾಲ್’ ಕರಿ ಬೋಲಾನು?

6 ಕತೋಬಿ ಅದ್ಮಿನೊ ಛಿಯ್ಯಾನ ಪಾಪ್‌ಖ್ವಾರು ಮಾಪ್ ಕರಾನ ಧರ್ತಿಪರ್ ಹಕ್ ಲ್ಹಾ ಕರಿ ಮೇ ತುಮೂನ ವತಾಳುಸ್” ಕರಿ ಬೋಲಿನ್, ಯೋ ಲಕ್‌ವೊ ಮಾರಿರಾಖವಾಳನ, “ಉಪ್ಪರ್ ಉಟ್, ತಾರಿ ಬಿಛಾವ್ಣಿನ ಪಳ್ಳಿನ್, ಘರೆ ಜಾ!” ಕರಿ ಬೋಲ್ಯೊ.

7 ತದೆ ಯೋ ಅದ್ಮಿಉಪ್ಪರ್ ಉರೀನ್, ಘರೆ ಗಯೊ.

8 ಅದ್ಮಿಖ್ವಾರು ಅನದೇಖಿನ್, ಡರಿನ್, ದೇವ್ಣೆ ಅದ್ಮಿನ ಅಮ್ಮಿ ಅದಿಕಾರ್ ದಿದೋತೆ ಇನಖ್ವಾಜೆ ದೇವ್ಣ ಖ್ವರಾಯು.

ಯೇಸುನೆ ಮತ್ತಾಯನ ಬುಲಾಯೋತೆ

(ಮಾರ್ಕ 2:13-17; ಲೂಕ 5:27-32)

9 ಯೇಸು ಹಿಜ್ಜಾಥೊ ಜಾತೊರ್ದವಾನಿ ವಖ್ವತ್‌ಮ, ಶುಂಕ ಮಾಂಗವಾಳೊ ಮತ್ತಾಯ ಕರಿ ಏಕ್ ಜಣೊ, ಶುಂಕ ಮಾಂಗಾನಿ ಝಗೋಪರ್ ಬೆರೊಥೋತೆ ದೇಖಿನ್, ಯೇಸು ಇನ, “ಮಾರ ಪೀರೆ ಆವ್” ಕರಿ ಬೋಲ್ಯೊ.

ತದೆ ಮತ್ತಾಯ ಉರೀನ್, ಇನ ಪೀರೆ ಗಯೊ.

10 ಅನಕೇಡೆಥು, ಯೇಸು ಇನ ಘರಮ ಖಾಣನ ಬೆರೊರ್ದವಾನಿ ವಖ್ವತ್‌ಮ, ಘಣು ಅದ್ಮಿ ಶುಂಕ ಮಾಂಗವಾಳು ಅಜ್ಜು ಪಾಪಿಖ್ವಾರು ಐನ್, ಯೇಸು ಅಜ್ಜು ಇನ ಶಿಷ್ಯರ್‌ನ ಜೋಡೆ ಖಾಣನ ಬೇಶಿಗಯು.

11 ಫರಿಸಾಯರನೇ ಅನದೇಖಿನ್, ಯೇಸುನ ಶಿಷ್ಯರನ, “ತುಮಾರೊ ಗುರು ಶುಂಕ ಮಾಂಗವಾಳನ ಅಜ್ಜು ಪಾಪಿ ಖ್ಹಾರಾನ ಜೋಡೆ ಶನ ಖಾಣುಖಾಸ್ತೆ?” ಕರಿ ಬೋಲ್ಯು.

12 ಅನ ಖ್ಹಮ್‌ಜಿನ್ ಯೇಸುನೆ, ಇವ್ವುನ, “ಅಱ್ಱುರ್ದಾವಾಳಾನ ವೈದ್ಯ ಹೋಣುಕೊಯ್ನಿ ರೋಗ್‌ಮ ರ್ದಾವಾಳನ ವೈದ್ಯ ಹೋಣು.

13 ತುಮೆ ಜೈನ್, ‘ಮನ ಜಾನ್ವರ್‌ನು ಬಲಿ ನಕೊ, ಗೋರಸ್ ಹೋಣುತೆ’ ಕರಿ ಧರ್ಮಶಾಸ್ತ್ರಮ ಲೀಖ್ತಿರ್ದಾಸ್ತೆ ವಚನ್ನಿ ಮತ್‌ಲಬ್ ಶಿಕಿಲೇವೊ. ಮೇ ಆಯೋತೆ ನೀತಿವಾಳ ಅದ್ವಿಯೇನ ಬುಲಾವನ ಕಾಹೆ, ಕತೋಬಿ ಪಾಪಿ ಖ್ಹಾರಾನ ಬುಲಾವಾನಖ್ವಾಜೆ ಆಯೋತೆ” ಕರಿ ಬೋಲ್ಯೊ.

ಉಪವಾಸ್‌ನಿ ಬಾರೇಮ ಸವಾಲ್
(ಮಾರ್ಕ 2:18-22; ಲೂಕ 5:33-39)

14 ಅನಬಾದ್‌ಮ, ಬ್ಯಾಪ್ತಿಸ್ಮ ದ್ಯವಾಳೊ ಯೋಹಾನನು ಶಿಷ್ಯರ್ ಯೇಸುಕನ ಆಯಿನ್, “ಹಮೇಬಿ, ಫರಿಸಾಯರ್‌ಬಿ ತದೆ-ತದೆ ಉಪವಾಸ್ ಕರಿಯೇಸ್, ಕತೋಬಿ ತಾರು ಶಿಷ್ಯರ್ ಶನ ಉಪವಾಸ್ ಕೋ ಕರಾನಿ?” ಕರಿ ಪುಲ್ಲಾಯು.

15 ಯೇಸುನೆ ಇವ್ವುನ, “ವ್ಯಹಾನ ಲ್ಲತ್‌ಮ ಆಯೂತೆ ಅದ್ವಿ ಇವ್ವ ಜೋಡೆ ನೌಶೊ ರ್ದಾವಾತೋಡಿ ಇವ್ವುನ ದುಖ್ ರ್ದಿಶೇಕಿ ಶು? ಕೊಯ್ನಿ! ಕತೋಬಿ ನೌಶೊ ಇವ್ವಾಕಂಥು ಮ್ಹಂದಿನ್ ಜಾವಾನಿ ವಖ್ತ್ ಆವ್‌ಶೆ, ತದೆ ಇವ್ವೆ ದುಖ್ ಕರ್ಶೆ ಅಜ್ಜು ಉಪವಾಸ್ ಕರ್ಶೆ” ಕರಿ ಬೋಲ್ಯೊ.

16 “ಅಜ್ಜು ಕೋಣ್‌ಬಿ ನವು ಲುಂಗ್ಡಾನು ಥಿಗ್‌ಳು ಜೂನ ಲುಂಗ್ಡಾನ ಕೇಡೆಲಗಾಡಿನ್ ಶಿವಾಕೊಯ್ನಿ. ಇಮ್ ಕರೈತೊ, ಯೋ ನವು ಲುಂಗ್ಡಾನು ಥಿಗ್‌ಳು ಖೇಚಾವಸ್ತೆ ಇನಖ್ವಾಜೆ, ಯೋ ಜೂನು ಲುಂಗ್ಡು ಬಿಜೂಬಿ ಭಾಖ್ತ್ ಫಾಟಿಜಾಸ್.

17 ಅತ್ರೇಸ್ ಕಾಹೆತೆ, ಜೂನಿ ಚಾಂಬ್ಡಾನಿ ತಿತ್ತಿಯೇಮ ನವು ದ್ರಾಕ್ಷಿನುರಖ್ ಭರಿನ್ ಕೋ ಮ್ಹೆಲಾನಿ, ಇಮ್ ಮ್ಹೆಲ್ಯತೊ ಚಾಂಬ್ಡಾನಿ ತಿತ್ತಿಯೆ ಫುಟಿನ್, ದ್ರಾಕ್ಷಿನು ರಖ್ ಭಾರ್ ರಂಚ್ಚಿಜಾಸ್, ಅಜ್ಜು ತಿತ್ತಿಯೇಬಿ

ಬರ್ಬಾತ್ ಹುಯಿಜಾಸ್. ಇನಖ್ವಾಜೇಸ್ ನವು ದ್ರಾಕ್ಷಿನು ರಖ್ವನ್ ನವಿ ತಿತ್ತಿಯೇಮ ಭರಿನ್ ಮ್ವೇಲಾಸ್, ತದೆ ಭೇಬಿ ಬಚಿಜಾಸ್” ಕರಿ ಬೋಲ್ಯೊ.

ಅದಿಕಾರಿನಿ ಛೋರಿ ಅಜು ಯೇಸುನು ಲುಂಗ್ಲು ಛೀಮೀತೆ ತಯೇಡಾನಿ ಬಾರೇಮ
(ಮಾರ್ಕ 5:21-43; ಲೂಕ 8:40-56)

18 ಯೇಸು ಇವ್ವಿ ಜೋಡೆ ಆ ವಾತೆ ಬೋಲುಕರಾನಿ ವಖ್ತಮ್, ಯೆಹೂದ್ಯರ್‌ನೊ ಏಕ್ ಅದಿಕಾರಿ ಇನಾಕನ ಆಯಿನ್, ಇನಖ್ವಾಮ್ವೆ ಥುಕ್‌ಣ್ಯಟೇಕಿನ್, “ಮಾರಿ ಛೋರಿ ಹಂಕೇಸ್ ಮರಿಗೈ; ತೋಬಿ ತೂ ಏನ್ ಇನಾಪರ್ ಹಾತ್ ಮ್ವೇಲ್ಯೋತೊ ಯೋ ಜಿವ್‌ತಿ ಉಶೆ” ಕರಿ ಗಿಂಗೈಲಿದೊ.

19 ತದೆ ಯೇಸು ಉರೀನ್, ಇನ ಕೇಡೆ ಗಯೊ, ಅಜು ಇನ ಶಿಷ್ಯರ್ ಇನ ಪೀಲೆ ಗಯ.

20 ಭಾರ ವರಖ್ತು ಮುಟ್ಟು ರೋಗ್‌ಥೀತೆ ಏಕ್ ತಯೇಡ ಥಿ ಯೋ ಯೇಸುನ ಪೀಲೇಥಿ ಆಯಿನ್, ಇನ ಝಗ್ಗಾನು ಕನಾರಿನ ಛೀಮಿ.

21 ಯೋ ತಯೇಡ, “ಮೇ ಇನ ಲುಂಗ್ಲಾನ ಛೀಮೀತೊ ಬಶ್, ಮನ ಅಲ್ವು ಹುಯಿಜಾಶೆ” ಕರಿ ಇನು ಯೋಸ್ ಬೋಲಿಲಿದಿ.

22 ತದೆ ಯೇಸುನೆ ಫರೀನ್, ಇನಾಭಣಿ ದೇಖಿನ್, “ಛೋರಿ ಥಿಲ್‌ಪತ್‌ಥಿ ರ್ವಿ! ತಾರಿ ವಿಶ್ವಾಸ್‌ಥೀಸ್ ತುನ ಅಲ್ವುಹುಯು” ಕರಿ ಬೋಲ್ಯೊ ಯೋಸ್ ವಖ್ತಮ್ ಯೋ ತಯೇಡಾನ ಗುಣ್‌ಹುಯು.

23 ಅನಕೇಡೆಥು ಯೇಸು ಯೋ ಅದಿಕಾರಿನ ಘರೆ ಆಯೊತದೆ, ಹಿಜ್ಜಾ ವಾಖ್ವೆಲೆ ವಜಾಡವಾಳನ ಅಜು ಗಲಾಟ್ ಕರುಕರ್ತುಧೂತೆ ಅದ್ವಿಖ್ವಾರಾನ ದೇಖಿನ್,

24 “ಭಾರ್ ಜಾವೊ, ಛೋಕ್ರಿ ಮರಿಕೊಯ್ವಿ, ಖ್ವುತೀಸ್!” ಕರಿ ಬೋಲ್ತಾನ, ಇವ್ವೆ ಖ್ವಾರು ಯೇಸುನ ದೇಖಿನ್ ನಕ್ಲೆಕಾಡಿ ಹಾಶ್ತು.

25 ಅದ್ವಿಖ್ವಾರಾನ ಭಾರ್ ಮೋಕ್ಲಾನ ಬಾದ್, ಯೇಸು ಮಹಿ ಜೈನ್, ಯೋ ಛೋಕ್ರಿನೊ ಹಾತ್ ಧರ್‌ತಾನ, ಯೋ ಉರಿ ಭೀರಿಗೈ.

26 ಆ ಖಬರ್ ಯೋ ದೇಖ್ವೆ ಅಖ್ವುಸ್ ಫೈಲಿಗಯು.

ಯೇಸುನೆ ಬೇ ಜಞ ಹಾಣಾನ ಅಟ್ಟು ಕರಯ್ತೆ

27 ಯೇಸು ಹಿಜ್ಜಾಡ್ಲೊ ಜಾವಾನಿ ವಖ್ತಮ, ಬೇ ಜಞ ಕಾಣು, “ದಾವೀದ್‌ನ ಛಿಯ್ಯಾ ಹಮಾರಪರ್ ಗೋರ್ ಕರ್!” ಕರಿ ಜೋರೇಖ್ಲು ಚಿಕರ್ತು ಹುಯಿನ್, ಇನ ಪೀಲೆ ಗಯ.

28 ಯೇಸು ಘರ್‌ನ ಮಹಿ ಜಾವಾದಿನ್, ಯೋ ಬೇ ಕಾಣು ಇನಾಕನ ಆಯು, ಇನೆ ಇವ್ವುನ, “ಮೇ ತುಮೂನ ಅಟ್ಟು ಕರಜಾಯ್ ಕರಿ ತುಮೆ ನಂಬೋಸ್ತಿ ಶು?” ಕರಿ ಪುಲ್ಲಾಯೊ. ಇವ್ವೆ “ಓಹೋಲಾ, ಪ್ರಭು!” ಕರಿ ಜವಾಬ್ ದಿದು.

29 ತದೆ ಯೇಸುನೆ ಇವ್ವ ಡೋಳಾ ಛೀಮಿನ್, “ತುಮೆ ವಿಶ್ವಾಸ್ ಕರಯ್ತೆ ಇಮ್ಮಸ್, ತುಮೂನ ಹುವಾದೆ!” ಕರಿ ಬೋಲ್ಯೊ.

30 ತದೆ ಇವ್ವ ಡೋಳಾ ದೆಖಾವಲಗ್ಯ ಅಜ್ಜು ಯೇಸುನೆ ಇವ್ವುನ, “ಅ ಬಾರೇಮ ಕಿನಾಬಿ ನಾ ಬೋಲ್‌ನು!” ಕರಿ ಇವ್ವುನ ರ್ಪೀತಾಯೊ.

31 ಕತೋಬಿ ಇವ್ವೆ ಹಿಜ್ಜಾಡ್ಲು ಚಲ್ಯುಜೈನ್, ಯೇಸುನಿ ಬಾರೇನಿ ಖಬರ್‌ನ ಯೋ ದೇಖ್‌ಅಖ್ಲು ಪೈಲೈದಿದು.

ಯೇಸುನೆ ಏಕ್ ಮುಕ್ಕಾನ ಅಟ್ಟು ಕರಯ್ತೆ

32 ಇವ್ವೆ ಭೇ ಜಞ ಹಿಜ್ಜಾಡ್ಲು ಜಾವಾನಿ ವಖ್ತಮ, ಥೋಡು ಅದ್ಮಿನೆ ಭೂತ್ ಧರಿರಾಖ್ಯಥೂತೆ ಏಕ್ ಮುಕ್ಕಾನ ಯೇಸುಕನ ಲಾಯು.

33 ಯೇಸುನೆ ಯೋ ಭೂತ್‌ನ ನಖ್ವಾಡಾನ ಬಾದ್ಮ ಯೋ ಮುಕ್ಕೊ ವಾತೆ ಬೋಲಾಲಗ್ಯೊ ತದೆ ಯೋ ಅದ್ಮಿಖ್ವಾರು, “ಇಸ್ರಾಯೇಲ್‌ಮ ಅಮ್ಮು ಕಾಮ್ಮ ಹಮೆ ಕದೇಸ್ ಕೋ ದೇಖಿರಾಖ್ಯಾನಿ!” ಕರಿ ಆಶ್ಚರ್ಯವಾದು.

34 ಕತೋಬಿ ಫರಿಸಾಯರ್‌ನೆ, “ಭೂತ್ ಖ್ವಾರಾನೊ ಯಜಮಾನ್ನಿ ಮದತ್‌ಥೀಸ್ ಯೇಸು ಭೂತ್‌ನ ಖ್ವಾರು ಕಾಡಸ್ತೆ” ಕರಿ ಬೋಲ್ಯು.

ಅದ್ಮಿಪರ್ ಯೇಸುನಿ ಗೋರ್

35 ಯೇಸು ಖ್ವಾರ ಖ್ವಯೇರ್‌ಮ ಅಜ್ಜು ಗಾಮ್ ಕರಿ ಫರ್ತೊಹುಯಿನ್, ಇವ್ವಿ ಸಬೆ ಭರಾವಾನು ಮಂದಿರ್‌ಮ ಬೋಲಿದೇತೊಹುಯಿನ್, ರಾಜ್ಯನಿ ಅಟ್ಟಿ ಖಬರ್‌ನ

ಬೋಲ್ಡೊಹುಯಿನ್, ಖಾರ್ಡಿಸ್ ತರಾನ್ ರೋಗ್-ರಾಯನ ಅಟ್ಟು ಕರ್ತೊ ಆಯೊ.

³⁶ ಕತೋಬಿ ಅದ್ವಿನಿ ಭೇಡ್ ದೇಖಿನ್, ಇವ್ಣೆ ಖಾರ್ಡು ಕುರುಬಕೊಂತೆ ಮ್ಹೆಂಡವ್‌ನಿ ಘೊಣಿ ಖ್ಹಿರಾಂತೆ ಅಜು ಮದತ್‌ಕೊಂತೆ ಇಮ್ ಲ್ಹಾ ಕರಿ ಬೋಲಿನ್, ಇವ್ಣಾಪರ್ ಗೋರ್ ಖಾದೊ.

³⁷ ತದೆ ಯೇಸುನೆ ಇನ ಶಿಷ್ಯರ್‌ನ, “ಅನಾಞ್ ಜಾಖ್ತ್ ಲ್ಹಾ, ಕತೋಬಿ ಕಾಮ್ ಕರಾವಾಳು ಕಮ್;

³⁸ ಇನಖ್ವಾಜೇಸ್ ಅನಾಞ್ ಪಿಕಾವಳೊ ಯಜಮಾನ್ಯ ತಾರು ಅನಾಞ್‌ನ ಎಕ್ಚು ಕರಾನಖ್ವಾಜೆ ಕಾಮ್‌ವಾಳಾನ ಮೋಕಲ್ ಕರಿ ಬಿಂತಿ ಕರೊ” ಕರಿ ಬೋಲ್ಯೊ.

10

ಭಾರ ಅಪೊಸ್ತಲರ್

(ಮಾರ್ಕ 3:13-19; ಲೂಕ 6:12-16)

¹ ಯೇಸುನೆ ಇನ ಭಾರ ಜಣ ಶಿಷ್ಯರ್‌ನ ಎಕ್ದಮ್ ಬುಲೈನ್, ಭೂತ್‌ಖಾರ್ಡು ಕಾಡಾನ ಅಜು ಖಾರ್ಡಿಸ್ ತರಾನ್ ರೋಗ್-ರಾಯನ ಅಟ್ಟು ಕರಾನ ಇವ್ಣುನ ಅದಿಕಾರ್ ದಿದೊ.

² ಯೋ ಭಾರಜಣ ಅಪೊಸ್ತಲರ್‌ನ್ ನಾಮ್ ಕೆಹುಕತೊ: ಪಹಿಲೊ ಪೇತ್ರ ಕರಿ ಬೋಲೈಲಿದೋತೆ ಸೀಮೋನ, ಇನೊ ಭೈ ಅಂದ್ರೆಯ, ಜೆಬೆದಾಯನೊ ಥಿಯೊ ಯಾಕೋಬ ಅಜು ಇನೊ ಭೈ ಯೋಹಾನ.

³ ಫಿಲಿಪ್ಪ ಅಜು ಬಾರ್ತೊಲೊಮಾಯ, ತೋಮ, ಶುಂಕವಾಳೊ ಮತ್ತಾಯ, ಅಲ್ಫಾಯನೊ ಥಿಯೊ ಯಾಕೋಬ, ತದ್ದಾಯ,

⁴ ದೇಖ್‌ನೊ ಭಕ್ತ ಕರಿ ಬೋಲೈಲಿದೋತೆ ಸೀಮೋನ, ಯೇಸುನ ಧೊಕೇಠಿ ಧರಿದಿದೋತೆ ಇಸ್ಕರಿಯೋತ ಯೂದ, ಅವ್ಣೆಸ್.

ಭಾರ ಜಣಾನಿ ಸೇವೇನಿ ಬಾರೇಮ

(ಮಾರ್ಕ 6:7-13; ಲೂಕ 9:1-6)

⁵ ಆ ಭಾರ ಜಣಾನ ಯೇಸು ಮೋಕ್ಲಾನಿ ವಖ್ತ್‌ಮ, ಇವ್ಣುನ ಶಾತ್ ಬೋಲಿನ್ ಮೋಕ್‌ಲ್ಯೊ ಕತೊ, “ಯೆಹೂದ್ಯರ್‌ಕಾಹೆತೆ ಅದ್ವಿನ

ಗಾಮ್‌ಭಣಿ ರ್ವವೊ, ಸಮಾರಿಯಾನು ಖಿವುಸ್ ಗಾಮ್ಮ ರ್ವವೊ ನಕೊಜಾಶು.

6 ಅನಬದಲ್ ಗುಮೈಗಯೂತೆ ಮೇಂಠನಿಫೋಣಿ ಛಾತೆ ಇಸ್ರಾಯೇಲ್‌ನ ಅದ್ವಿಕನ ಜಾವೊ.

7 ಜೈನ್, 'ಸೊರ್ಗನು ರಾಜ್ಯ ಖನ್ನೆ ಐಗು' ಕರಿ ಬೋಲಿವತಾಳೊ.

8 ರೋಗ್‌ವಾಳಾನ ಅಲ್ಪುಕರೊ, ಮರ್ಯಾಹುಯಾನ ಜಿವ್ತು ಕರೊ, ಖೋಡ್ ಲಗ್ಯಹುಯಾನ ಪಾಕ್‌ಕರೊ ಅಜ್ಜು ಭೂತ್‌ಖ್ವಾರು ಕಾಡೊ. ತುಮೂನ ಪುಗಟ್‌ಮ ಮಳಿರ್ರೊಡ್ ಇನಖ್ವಾಜೆ ಪುಗಟ್‌ಮ ದೆವೊ.

9 ತುಮಾರಿ ಚಂಚಿಮ ಖೊನ್ನು ರೂಪು ನಾತೊ ತಾಂಬಾನು ಪೈಶಾ ರ್ವವೊ, ನಕೊ ಲೀಜಾವೊ;

10 ಜಾವಾನಿ ವಖ್ವತ್‌ಮ, ರೋಳಿ ರ್ವವೊ, ಬೇ ಕುಡ್‌ತಾ ರ್ವವೊ, ಖೋಖ್ವಾಡು ರ್ವವೊ, ಲರೊ ರ್ವವೊ ನಕೊ ಲೀಜಾಶು. ಕಾಮ್ ಕರಾವಾಳ ಆಳ್‌ನ ಶಾತ್ ಜರೂರತ್ ಛಾಕಿ ಯೋ ಇನ ದೆವಾವಾಶೆ.

11 ತುಮೆ ಖಿವತೋಬಿ ಖ್ವಯೇರಾಮ ನತರಾಕಿ ಗಾಮ್ಮ ಗಯಾತೊ, ಹಿಞ್ಲಾ ಕೋಣ್ ಅಲ್ಪುಕರಿ ಪುಟ್ಟೆಲೀನ್, ಯೋ ಗಾಮ್‌ನ ಮ್ಹಂದಿನ್ ಜಾವಾತೋಡಿ ಯೋಸ್ ಝಗೋಮ ರ್ವವೊ.

12 ತುಮೆ ಏಕ್ ಘರಾಮ ಜಾವಾನಿ ವಖ್ವತ್‌ಮ, 'ತುಮೂನ ಸಮಾಧಾನ್ ಮಳಾದೆ' ಕರಿ ಬೋಲೊ.

13 ಯೋ ಘರಮಾನು ಅದ್ವಿ ತುಮೂನ ಬುಲೈಲಿದುತೊ, ತುಮಾರಿ ಸಮಾಧಾನ್ ಇವ್ವುನ ಮಳಾದೆ. ಕತೋಬಿ ಇವ್ವೆ ತುಮೂನ ನಾ ಬುಲೈಲಿದುತೊ, ತುಮಾರಿ ಸಮಾಧಾನ್ ಪಾಲ್ತುಫರಿ ತುಮುನಾಸ್ ಆವಾದೆ.

14 ಖಿವತೋಬಿ ಘರವಾಳು ನತರಾಕಿ ಗಾಮ್‌ವಾಳು ತುಮೂನ ನಾ ಬುಲೈಲಿದುತೊ, ನತರಾಕಿ ತುಮಾರಿ ವಾತೆನ ನಾ ಖ್ವಮಾಜುತೊ, ಯೋ ಗಾಮ್‌ನ ಮ್ಹಂದಿನ್ ಜಾವಾನಿ ವಖ್ವತ್‌ಮ, ತುಮಾರ ಗೋಡಾನ ಲಗ್ಯತೆ ಧೂಳ್‌ನ ಝಟ್‌ಕಿ ದೆವೊ.

15 ನ್ಯಾವ್‌ನಿ ತೀರ್ಪ್‌ನ ದನ್ತ ಇಮ್ಮು ಗಾಮ್‌ನಿ ಹಾಲ್ ಸೊದೋಮ್ ಅಜ್ಜು ಗೊಮೋರ್ ತಬರಾಖಾನಿ ಹಾಲ್‌ಥೀಬಿ ಖರಾಬ್ ರ್ವಶಿ ಕರಿ ಮೇ

ತುಮೂನ ಖ್ವಾಚಮಾಬಿ ಬೋಲುಸ್” ಕರಿ ಬೋಲ್ಯೊ.

ಆವ್‌ಶೇತೆ ಖ್ವತಾಪ್ಪಿನಿ ಬಾರೇಮ

(ಮಾರ್ಕ 13:9-13; ಲೂಕ 21:12-17)

16 “ಖ್ವಮ್‌ಚೊ! ಜರಕ್‌ನ ಮಹಿ ಮೇಂಡವ್‌ನ ಮೋಕ್ಲಾತೆ ಇಮ್ ಮೇ ತುಮೂನ ಮೋಕ್ಲಕರುಸ್. ಇನಖ್ವಾಜೇಸ್ ತುಮೆ ಖ್ವಾಪ್‌ನಿತರ್ ಚಾತುರ್ ಅಜು ಪರ್ಯಾವಾನಿಫೋಣಿ ಖೋಟ್‌ಕೊಂತೆ ಇಮ್ ರ್ವೊ.

17 ಅದ್ನಿನಿ ಬಾರೇಮ ಜತನ್ ರ್ವೊ, ಶನಕತೊ ಇವ್ಣೆ ತುಮೂನ ಧರೀನ್, ನ್ಯಾವ್ ಕರಾನಿ ಸಭೆಮ ಖೇಚಿಲಿಜಾಶೆ, ಅಜು ಇವ್ಣಿ ಸಬೆ ಭರಾವಾನು ಮಂದಿರ್‌ಮ ತುಮೂನ ಕೊಳ್ಳೇಥಿ ಮಾರ್‌ಶೆ.

18 ಮಾರಖ್ವಾಜೆ ತುಮೂನ ಅದಿಕಾರಿ ಅಜು ರಾಜಾವ್‌ನ ಖ್ವಾಪ್ಣೆ ಲೀಜಾಶೆ; ಅಮ್ ಇವ್ಣುನಾಬಿ ಅಜು ಯೆಹೂದ್ಯರ್‌ಕಾಹೆತೆ ಅದ್ನಿವೋನಾಬಿ ತುಮೆ ಸಬೂತ್ ಹುಯಿರ್‌ಶ್ತು.

19 ಇವ್ಣೆ ತುಮೂನ ಧರಿದ್ಯವಾನಿ ವಖ್ವತ್‌ಮ, ತುಮೆ ಶಾತ್ ವಾತೆ ಬೋಲ್‌ನು, ಕಿಮ್ ವಾತೆ ಬೋಲ್ನುಕರಿ ಸೋಚೊ ನಕೊ; ತುಮೆ ಶಾತ್ ಬೋಲ್ನುಕರಿ ಯೋ ವಖ್ವತ್ ಆವಾದಿನ್, ತುಮೂನ ದೆವಾವ್‌ಶೆ.

20 ವಾತೆ ಬೋಲವಾಳ ತುಮೆ ಕಾಹೆ; ತುಮಾರೊ ಬಾನೊ ಪವಿತ್ರ ಆತ್ಮಾಸ್ ತುಮಾರ ಮ್ಹೋಡವಾಟೆ ವಾತೆ ಬೋಲ್‌ಶೆ.

21 ಭೈಲುರೀನ್ ಇನ ಶೊಂತ್ ಭೈಯೇನ, ಅಜು ಬಾ ಉರೀನ್ ಇನ ಶೊಂತ್ ಲಡ್ಕಾವ್‌ನ ಧರೀನ್, ಮರೈನಾಖಾನ ದಿನಾಕ್‌ಶೆ, ಲಡ್ಕಾ ಇವ್ಣ ಆಯ-ಬಾನಿ ವಿರೋದ್ ಉರೀನ್, ಇವ್ಣುನ ಮರಾವ್‌ಶೆ.

22 ಮಾರ ಕಾಮ್‌ಖ್ವಾಜೆ ಹರೇಕ್ ಜಣು ತುಮೂನ ವಹೇರ್ ಕರ್ತೆ. ಕತೋಬಿ ಖ್ವರ್ತಿಲಗು ಖ್ವಮಾಳಿಲ್ವಾವಾಳು ರಕ್ಷಣೆ ಲಿಶೆ.

23 ಏಕ್ ಗಾಮ್‌ತುಮೂನ ಖ್ವತಾಯೂತೊ, ಬಿಜ್ಜೇಕ್ ಗಾಮ್‌ನ ಮಿಲ್ಯೆ ಜಾವೊ, ಅದ್ನಿನೊ ಥಿಯೊ ಆವಾನಮಹಿ ತುಮೆ ಇಸ್ರಾಯೇಲ್ ಅದ್ನಿನು ಖ್ವಾರ್‌ಸ್ ಗಾಮ್‌ಫರೀನ್, ತುಮಾರು ಕಾಮ್ ಖತಮ್ ಕೊಕರಿರಾಕ್‌ಶುನಿ ಕರಿ ಮೇ ತುಮೂನ ಖ್ವಾಚಾಮಬಿ ಬೋಲುಸ್.

24 ಶಿಷ್ಯ ಗುರುಧಿ ಮೋಟೊ ಕಾಹೆ; ಆಳ್ ಇನ ಯಜಮಾನ್‌ಧಿ ಮೋಟೊ ಕಾಹೆ.

25 ಶಿಷ್ಯ ಇನ ಗುರುನಿಮತ್ ಬಣ್ಣೋತೊ ಬಶ್, ಅಜ್ಜು ಆಳ್ ಇನ ಯಜಮಾನ್‌ನಿ ಮತ್ ಬಣ್ಣೋತೊ ಬಶ್. ಘರ್‌ನೊ ಯಜಮಾನ್‌ನಸ್, ಬೆಲ್ಜೆಬೂಲ್* ಕರಿ ಇವ್ಣೆ ಚಿಕ್‌ರೈತೊ, ಯೋ ಘರ್‌ನ ಬಿಞಾಖ್ತಾರ ಅದ್ವಿನ ಅಜ್ಜುಕೆತ್ರಿ ಖರಾಬ್ ನಾಮ್‌ಧಿ ಚಿಕರ್‌ಶೆ ಕೊಯ್ತಿಕಿಶು?

ಕಿನ ದೇಖಿನ್ ಡರೈ?

(ಲೂಕ 12:2-7)

26 ಇನಖ್ವಾಜೀಸ್ ಅದ್ವಿನ ದೇಖಿನ್ ಡರೊನಕೊ, ಲಪೈರೈತ್ತೆ ಖ್ವಾರುಸ್ ಭಡಕಿಜಾಶೆ, ಅಜ್ಜು ಶಿಕಾಡಿ ಬೋಲಾಸ್ತೆ ಹರ್‌ವಾತೆ ಉಜಾಳಾಮ ಭಾರ್ ಮಾಲುಮ್ ಪಡ್‌ಶೆ.

27 ಮೇ ಅಂಧಾರಾಮ ತುಮೂನ ಬೋಲುಸ್ತೆ ಇನ ತುಮೆ ಉಜಾಳಾಮ ಬೋಲೊ. ಅಜ್ಜು ಕಾನ್‌ಮ ಬೋಲುಸ್ತೆ ಇನ ಘರ್‌ನ ಛತ್‌ಪರ್‌ಧು ಭೀರಿನ್ ಚಿಕ್ರಿನ್ ಬೋಲಿನ್ ಪೈಲಾವೊ.

28 ಅತ್ರೇಸ್ ಕಾಹೆತೆ, ಶರೀರ್‌ನ ಮರ್‌ನಾಖಿನ್ ಆತ್ಮನ ಮಾರಾನ ಕೋ ಹುವ್ವಾನಿತೆ ಅದ್ವಿನ ದೇಖಿನ್ ನಕೊ ಡರೊ; ಕತೋಬಿ ಆತ್ಮಾನ ಅಜ್ಜು ಶರೀರ್‌ನ ಭೇನ ನರಕ್ ನಾಖಿನ್ ಬರ್ಬಾತ್ ಕರಾವಾಳೊ ದೇವ್ವ ದೇಖಿನ್ ಡರೊ.

29 ಖಲಿ ಏಕ್ವಾಖ್ವೊನ ಏಕ್ ಜೋಡು ಫುರಕ್‌ಲಿಯೇನ ವೇಚಾಸ್ತಿ, ತೋಬಿ ಇನಾಮಾಧು ತುಮಾರೊ ಬಾನಿ ಮರ್ಜಿಕೊಂತೆ ಯೋ ಫುರಕ್‌ಲೀಮ ಏಕ್‌ಬಿ ಇಮೀನ್‌ಪರ್ ಕೋ ಪಡಾನಿ.

30 ಕತೋಬಿ ತುಮೂನಾತೊ, ತುಮಾರೊ ಮುಡ್‌ಕ್ಯಾನೊ ಕೇಖ್ವೊ ಜಿನ್‌ಕುಬಿ ಖ್ವಾರುಸ್ ಗಣೈರೈಸ್.

31 ಇನಖ್ವಾಜೀಸ್ ಡರೊ ನಕೊ; ಕೈಏಕ್ತಿ ಫುರಕ್‌ಲಿಯೇಧೀಬಿ ತುಮೇಸ್ ಘಣ ಮೋಟೆ ಹುಯಿರೈಸ್.

ಕ್ರಿಸ್ತನಿ ಕಬೂಲಾನು ಅಜ್ಜು ಕಾಡಿನಾಖನಿ ಬಾರೇಮ

(ಲೂಕ 12:8-9)

* 10:25 10:25 ಕತೊ, ಭೂತ್‌ನೊ ಮೋಟೊ ಕರಿ ಮತ್‌ಲಬ್.

32 “ಕೋಣ್ ಅದ್ವಿನ ಖ್ವಾಪ್ಪೆ ಯೋ ಮಾರವಾಳೊಕರಿ ಬೋಲಸ್ತಿ, ಮೇಬಿ ಇನ ಸೊರ್ಗಾಮ ಛಾತೆ ಮಾರ ಬಾನ ಖ್ವಾಪ್ಪೆ ಯೋ ಮಾರ ಭಣಿವಾಳೊ ಕರಿ ಬೋಲಿಶ್.

33 ಕತೋಬಿ ಕೋಣ್ ಅದ್ವಿನ ಖ್ವಾಪ್ಪೆ ಯೇಸುವಾಳೊ ಕಾಹೆ ಕರಿ ಬೋಲಸ್ತಿ, ಮೇಬಿ ಇನ ಸೊರ್ಗಾಮ ಛಾತೆ ಮಾರ ಬಾನ ಖ್ವಾಪ್ಪೆ ಯೋ ಮಾರ ಭಣಿವಾಳೊ ಕಾಹೆಕರಿ ಬೋಲಿಶ್.

ಶಾಂತಿ ದೈವಾನ ಕಾಹೆ, ಭಾಗ್ ಕರಾನ ಆಯೊ

(ಲೂಕ 12:51-53; 14:26-27)

34 ಧರ್ತಿಪರ್ ಶಾಂತಿ ದೈವಾನ ಮೇ ಆಯೊ ಕರಿ ನಕೊ ಸೋಚೊ, ಶಾಂತಿ ಪೈದಾಕರಾನ ಕಾಹೆ, ಪಣ್ಣಿ ತಲ್ವಾರ್ ಪಾಡಾನ ಆಯೋತೆ.

35 ಛಿಯ್ಯಾನ ಅಜು ಬಾನ, ಛೋರಿನ ಅಜು ಆಯನ, ವ್ಹವ್‌ನಾಬಿ ಅಜು ಖ್ವಾಪ್ಪಿನ ಮಹಿ ವಿರೋದ್ ಪೈದಾ ಕರಾನಖ್ವಾಜೆ ಮೇ ಆಯೋತೆ.

36 ಅಮ್ ಏಕ್ ಅದ್ವಿನ ಇನು ಶೊಂತ್ ಘರ್‌ವಾಳುಸ್ ದುಶ್‌ಮನ್ ಉಶೆ.

37 ಬಾನ ರ್ವವೊ, ಆಯಾನ ರ್ವವೊ, ಮಾರೇಥಿಬಿ ಜಾಖ್ತ್ ಪ್ಯಾರ್‌ಕರ್ರ್ಯತೊ ಮನ ಲ್ಹಾಯೇಕ್‌ನೊ ಕಾಹೆ. ಛಿಯ್ಯಾನ ರ್ವವೊ, ಛೋರಿನ ರ್ವವೊ ಮಾರೇಥಿಬಿ ಜಾಖ್ತ್ ಪ್ಯಾರ್‌ಕರ್ರ್ಯತೊ ಮಾರೊ ಶಿಷ್ಯ ಹುವಾನ ಲ್ಹಾಯಕ್ ಕಾಹೆ.

38 ಕೋಣ್ ಇನಿ ಶಿಲ್‌ಬೇನ[†] ಪಳ್ಳಿನ್, ಮಾರ ಪೀರೆ ಕೋ ಆವಾನಿಕಿ, ಯೋ ಮಾರೊ ಶಿಷ್ಯ ಹುವಾನ ಲ್ಹಾಯೇಕ್‌ನೊ ಕಾಹೆ.

39 ಇನು ಶೊಂತ್ ಜಾನ್ನ್ ಬಚಾಡಿಲೇವ್ಣು ಕರಿ ಕರಾವಾಳೊ ಇನ ಗುಮೈಲಿಶೆ; ಕತೋಬಿ ಮಾರಖ್ವಾಜೆ ಇನು ಶೊಂತ್ ಜಾನ್ನ್ ಗುಮೈಲ್ಯವಾಳೊ ಇನ ಬಚಾಡಿಲಿಶೆ.

ಇನಾಮ್‌ನಿ ಬಾರೇಮ

(ಮಾರ್ಕ 9:41)

[†] 10:38 10:38 ಶಿಲ್‌ಬೆ ಕತೊ, ಮರಾತೋಡಿ ಖ್ವಮಾಳ್‌ಣು ಕರಿ ಮತ್‌ಲಬ್.

40 “ಕೋಣತೋಬಿ ತುಮೂನ ಬುಲೈಲಿದುತೊ, ಇವ್ವೆ ಮನ ಬುಲೈಲೆವಾದಾಖ್ಲಲ್; ಮನ ಬುಲೈಲೆಸ್ತೆ ಇವ್ವೆ ಮನ ಮೋಕ್ಲೊತೆ ಇನಾಸ್ ಬುಲೈಲೆವಾದಾಖ್ಲಲ್,

41 ಪ್ರವಾದಿನ, ಆ ಪ್ರವಾದಿ ಕರಿ ಸ್ವಾಗತ್‌ಕರೀನ್ ಬುಲೈಲೆವಾಳಾನ, ಪ್ರವಾದಿನ ಆವಶೇತೆ ಇನಾಮ್ ಲೀಲಿಶೆ. ಅಙ್ಗು ಧರ್ಮಿನ, ಯೋ ಏಕ್ ಧರ್ಮಕರಿ ಬುಲೈಲೆವಾಳಾನ, ಧರ್ಮಿನ ಆವಶೇತೆ ಇನಾಮ್ ಮಳಶೆ.

42 ಆ ನ್ಹಾನಾವಮ ಏಕ್ ಜ್ಞಾನಾನ ಯೇಸುನೊ ಶಿಷ್ಯಕರಿ ಬೋಲಿನ್ ಕೋಣತೋಬಿ ಏಕ್ ತಾಂಬ್ಯೊ ಪಾಣಿ ಪಿಯ್ಯಾನ ದಿದುತೋಬಿ, ಇನ ಆವಶೇತೆ ಇನಾಮ್ ಛುಕ್‌ಶೆಸ್ ಕೊಯ್ನಿ ಕರಿ ಮೇ ತುಮೂನ ಖ್ವಾಚಮಾಬಿ ಬೋಲುಸ್” ಕರಿ ಬೋಲ್ಯೊ.

11

ಬ್ಯಾಪ್ತಿಸ್ಮ ದೆವಾಳೊ ಯೋಹಾನನು ಖಬರ್
(ಲೂಕ 7:18-35)

1 ಯೇಸುನೆ ಇನ ಭಾರ ಶಿಷ್ಯರ್ನ್ ಬೋಲ್ಯುತೆ ಖ್ವಾರುಸ್ ಬೋಲಿನ್ ಖತಮ್ ಕರಾನ ಬಾದ್, ಹಿಜ್ಜಾಡೊ ನಿಕ್ಕಿನ್, ಅಲ್ಫಿ ಖಬರ್ ಬೋಲಿವತಾಳಾನ ಅಙ್ಗು ಶಿಕಾಡಾನಖ್ವಾಜೆ ಖನ್ನೇನ ಗಾಮ್‌ಗಯೊ.

2 ಬ್ಯಾಪ್ತಿಸ್ಮ ದೆವಾಳೊ ಯೋಹಾನನೆ, ಕ್ರಿಸ್ತ ಕರುಕರ್ತೊಥೋತೆ ಕಾಮ್ ಖ್ವಾರಾನಿ ಬಾರೇಮ ಜೇಲ್‌ಮ ಖ್ವಮ್‌ಜಿನ್, ಇನ ಶಿಷ್ಯರಮ ಥೋಡ ಜ್ಞಾನ ಇನಾಕನ ಮೋಕ್ಲೊ.

3 ಇವ್ವೆ ಯೇಸುನ, “ಯೋಹಾನ್ನೆ ಬೋಲ್ಯೊತೆ ಇಮ್ ಆವ್ಣುತೆ ಯೋ ತೂಸ್ತಿಶು, ನಾತೊ ಹಮೆ ಬಿಜೇಕ್‌ನಖ್ವಾಜೆ ಟೆವಾವ್‌ಣು?” ಕರಿ ಪುಲ್ಲಾಯ.

4 ಯೇಸುನೆ, “ಜೈನ್, ತುಮೆ ಶಾತ್ ಖ್ವಮ್‌ಜ್ಯ ಅಙ್ಗು ದೇಖ್ಯಾಕಿ ಇನಿ ಬಾರೇಮ ಯೋಹಾನ್ನ ಬೋಲೊ:

5 ಕಾಣಾವ್ಣ ಡೋಳಾ ಆವಶೆ, ಲಂಗ್ಡು ಖ್ವಾರು ಚಾಲ್‌ಷೆ, ಖೋಡ್ ರ್ವಾಳು ಪಾಕ್ ಉಶೆ, ಭೈರಾವ್‌ನ ಖ್ವಮ್‌ಜಾವಶೆ,

ಮರಿಗಯುಹುಯು ಜಿವ್ವು ಉಟ್‌ಶೆ, ಅಜ್ಜು ಗರೀಬ್‌ನ ಸುವಾರ್ತೆ ಬೋಲಾವ್‌ಶೆ.

⁶ ಮಾರಿ ಬಾರೇಮ ಶಕ್ ಕರಾಕೊಂತೆ ಇವ್ಜೇಸ್ ಧನ್ಯಹುಯಿರ್ದ್ವಸ್” ಕರಿ ಬೋಲ್ಯೊ.

⁷ ಯೋಹಾನನು ಶಿಷ್ಯರ್ ಹಿಜ್ಜಾಡ್ರು ನಿಕ್ಕಿನ್ ಭವ್‌ಕರ್ತುಧೂತೆ ವಖ್ತಾಮ, ಯೇಸುನೆ ಯೋಹಾನ್ನಿ ಬಾರೇಮ ಯೋ ಅದ್ಮಿನಿ ಝೂಂಡ್‌ನ ಶಾತ್ ಬೋಲ್ಯೊಕತೊ, “ತುಮೆ ಶಾತ್ ದೇಕ್ಕು ಕರಿ ಉಜ್ಜಾಡಿ ಝಗೋಮ ಗಯಾಥ್? ವಹಿರಾಮ ಹಲಾಸ್ತೆ ಘಾಖ್ವ್‌ನ ಡಂಟ್‌ನಾಕಿಶು?

⁸ ಕೊಯ್ತಿಕತೊ, ಶಾತ್ ದೇಕ್ಕುಕರಿ ಗಯಾಥ್? ಶನ್ಗಾರ್‌ನ ಲುಂಗ್ಡ ಪೇರ್ದಿರಾಖಾಸ್ತೆ ಅದ್ಮಿನಾಕಿ ಶು? ಅಟ್ಟ ಶನ್‌ಗಾರ್‌ಲುಂಗ್ಡಾ ಪೇರ್ದಿರಾಖಾಸ್ತೆ ಖ್ವಾರು ರಾಜಾನ ಮಹೇಲ್‌ಮ ರ್ದ್ವೇಸ್!

⁹ ಇಮ್‌ಕತೊ ಶಾತ್ ದೇಖಾನ ಗಯಾಥ್? ಏಕ್ ಪ್ರವಾದಿನಕಿ ಶು? ಓಹೊ, ಪ್ರವಾದಿಧೀಬಿ ಮೋಟಾನ ತುಮೆ ದೇಖ್ಯಾಕರಿ ತುಮೂನ ಖ್ವಾಚಮಾಬಿ ಬೋಲುಸ್.

¹⁰ “ಹಂದೇಕ್, ಮಾರ ದೂತಾನ ತಾರ ಖ್ವಾಮ್ಜೆ ಮೋಕ್ಲಿಶ್, ಯೋ ತೂ ಜಾವಾನಿ ವಾಟ್ನ ಬರೋಬರ್ ಕರ್ಶೆ” ಕರಿ ಕಿನಿ ಬಾರೇಮ ವಚನ್‌ಮ ಲೀಖ್ಪಿರೊಸ್ಕಿ, ಯೋ ಅದ್ಮಿಯೋಹಾನಸ್.

¹¹ ತಯೇಡಾನ ಪೇಟಿ ಪೈದಹುಯುತೆ ಖ್ವಾರಾನ ಬ್ಯಾಪ್ತಿಸ್ಮ ದ್ಯವಾಳೊ ಯೋಹಾನ್‌ಧಿ ಮೋಟು ಕೋಣೆಬಿ ಕೊಯ್ತೆ. ತೋಬಿ ಪರ್‌ಲೋಕ್ ರಾಜ್ಯಮ ಛಾತೆ ನ್ಹಾನೊ ಜಿನ್‌ಕುಬಿ ಯೋಹಾನ್‌ಧಿ ಮಹಾನ್ ಹುಯಿರ್ದ್ವೇಸ್ ಕರಿ ಮೆ ತುಮೂನ ಖ್ವಾಚಮಾಬಿ ಬೋಲುಸ್.

¹² ಬ್ಯಾಪ್ತಿಸ್ಮದ್ಯವಾಳೊ ಯೋಹಾನ್ನ ಹಗಾಮ್‌ಥು ಧರೀನ್ ಹಂಕೆತೋಡಿ ಸೊರ್ಗ ರಾಜ್ಯನಿ ಘಣು ಜುಲಮ್‌ನ ರೈಲೆನ್ ಪಡ್ಚ್ಯ ಅಜ್ಜು ಜುಲಮ್ ಕರಾವಾಳು ಅದ್ಮಿ ಇನ ಛಿನೈಲೇಣು ಕರಿ ಕರಾಸ್.

¹³ ತಮಾಮ್ ಪ್ರವಾದಿ ಅಜ್ಜು ಧರ್ಮಶಾಸ್ತ್ರ ಯೋಹಾನ ಆವಾತೋಡಿ ದೇವ್ನಿ ರಾಜ್ಯನಿ ಬಾರೇಮ ಬೋಲ್ಯು.

14 ಇವ್ವೆ ಬೋಲ್ಯುತೆ ಇನ ನಂಬಾನ ತುಮೂನ ಮನ್ ಉಶೇತೊ, ಆ ಯೋಹಾನಸ್ ಆವಾಳೊ ಎಲೀಯಕರಿ ಬೋಲಾನಿತರ ಹುವಾಸ್ಸಿ.

15 ಖ್ವಮ್‌ಭಾನ ಕಾನ್ ರ್ವಾಳು ಖ್ವಮ್‌ಭಾದೆ!

16 “ಹಮ್ಮೆ ಮೆ ಆ ಹಗಾಮ್ ಪಿಳ್ಳಿನ ಮೆ ಖಿವಿ ಪರಕ್ ಬೋಲು? ಅವ್ವೆ ಬಜಾರ್‌ಮ ಬೆರೂತೆ ಲಡ್ಕಾವ್‌ನಿಫೋಣಿ ಹುಯಿರಲ್ವಸ್. ಏಕ್ ಝೂಂಡ್‌ನ ಲಡ್ಕಾ ಬಿಜ್ಜೆಕ್ ಝೂಂಡ್‌ನ ಲಡ್ಕಾವ್‌ನ ಚಿಕ್ರಿನ್,

17 ‘ಹಮೆ ತುಮಾರಖ್ವಾಜೆ ವಾಖ್ವೆಲಿ ವಜಾಡ್ಯ ತುಮೆ ಖೇಲ್ಯಕೊಯ್ವಿ; ಹಮೆ ಅಂದ್ರೋಖ್ವಾನ್ ಗೀದ್ ಬೋಲ್ಯ ಕತೋಬಿ ತುಮೆ ರೋಯಾಕೊಯ್ವಿ!’ ಕರಿ ಬೋಲಾಸ್.

18 ಕಿಮ್‌ಕತೊ, ಯೋಹಾನ ಆಯೊ, ಯೋ ಖಾತೋಥೊಕೊಯ್ವಿ ಅಜ್ಜು ಪೀತೋಥೊಕೊಯ್ವಿ, ಅಜ್ಜು ಅದ್ಮಿಖ್ವಾರು, ‘ಇನ ಭೂತ್ ಧರರಾಖ್ವಾಸ್’ ಕರಿ ಬೋಲ್ಯ.

19 ಅದ್ಮಿನೊ ಛಿಯೊ ಆಯೊ, ಯೋ ಖಾಣುಪಾಣಿ ಲ್ಯವಾಳೊ ಹುಯಿರಲ್ವೊಥೊ. ಅದ್ಮಿಖ್ವಾರು ಇನ, ‘ಆ ಅದ್ಮಿಖಾಣನು ಮರ್‌ತೇಲ್ ಅಜ್ಜು ಪೀಕುಡ್ಯ ಹುಯಿರಲ್ವೊಸ್! ಶುಂಕ ಮಾಂಗವಾಳನೊ ಅಜ್ಜು ಪಾಪಿ ಖ್ವಾರಾನೊ ದೋಸ್ತ’ ಕರಿ ಬೋಲಾಸ್, ಕತೋಬಿ ದೇವ್ನಿ ಗ್ಯಾನ್ ಖ್ವಾಚಿಸ್ ಕರಿ ಬೋಲಾನು ಇನ ಕಾಮ್‌ಥೀಸ್ ಮಾಲುಮ್ ಪಡಾಸ್” ಕರಿ ಬೋಲ್ಯೊ.

ವಿಶ್ವಾಸ್‌ಕೊಂತೆ ಖ್ವಯೇರೆನಿ ಬಾರೇಮ

(ಲೂಕ 10:13-15)

20 ತದೆ ಯೇಸುನೆ ಯೋ ಕೈಯೆಕ್ತಿ ಮಹಾನ್ ಕಾಮ್‌ಖ್ವಾರು ಕರಲ್ಯೊತೆ ಗಾಮ್‌ವಾಳು ಪಾಪ್ ಮ್ಹೇಲಿನ್ ಫರಲ್ಯೊಕೊಂತೆ ದೇಖಿನ್, ಇವ್ವುನ ಗುರ್‌ಕಾವಲಗ್ಯೊ.

21 “ಅಯ್ಯೋ ಖೊರಾಜಿನ್ ಖ್ವಯೇರ್, ತುಮಾರಿ ಹಾಲ್ವ ಶಾತ್ ಬೋಲು ಬೆತ್ಸಾಯಿದ, ತುಮಾರಿ ಹಾಲ್ವಬಿ ಶಾತ್ ಬೋಲು! ತುಮಾರಾಮ ಫಾಲ್ಯುತೆ ಮಹಾನ್ ಕಾಮ್‌ಖ್ವಾರು ತೂರ್ ಅಜ್ಜು ಸೀದೋನ್ ಖ್ವಯೇರ್‌ಮ ಫಾಲ್ಯುಹೋತ್ತೊ, ಹಿಫ್ಲಾವಾಳು ಕದೇಸ್‌ಕಿ

ಛೈನೊಕೋಥ್‌ಲೊ ಲಪೇಟಿಲೀನ್, ರಾಕ್‌ಮ ಬೇಶಿನ್, ಇವ್ವು ಪಾಪ್ಪ ಮ್ಹೇಲಿನ್, ಫರಿಗಯುಹೋತ್!

22 ಕತೋಬಿ ನ್ಯಾವ್‌ನಿ ತೀರ್ಪ್‌ನ ದನ್ಮ ತುಮಾರಿ ಹಾಲ್‌ಥೀಬಿ ತೂರ್ ಅಜ್ಜು ಸೀದೋನ್ ಖ್ವಯೇರ್‌ನಿ ಹಾಲ್ ಅಛಿ ರ್‌ಹಿಶೆ ಕರಿ ಮೇ ತುಮೂನ ಬೋಲುಸ್!

23 ಅಲಾ ಕಪೆರ್ನೊಮ್ ಗಾಮ್, ತೂ ಸೊರ್ಗಾಮ ಪಡೈಲೀಶ್‌ಕರಿ ಸೋಚಾಸ್ತಿ ಶು? ಕೊಯ್ವಿ! ತುನ ಪಾತಾಳ್ ನಾಕ್‌ಶೆ! ತಾರಾಮ ಚಾಲ್ಯುತೆ ಅದ್ಭುತ್‌ಕಾಮ್‌ಖ್ವಾರು ಸೊದೋಮ್‌ಮ ಚಾಲ್ಯುಹೋತ್ತೊ, ಯೋ ಖ್ವಯೇರ್ ಹಂಕೆತೋಡಿ ರ್‌ಹಿಯುಹೋತ್.

24 ಕತೋಬಿ ನ್ಯಾವ್‌ನಿ ತೀರ್ಪ್‌ನ ದನ್ಮ ತಾರಿ ಹಾಲ್‌ಥೀಬಿ ಸೊದೋಮ್ ತಬರ್‌ಖಾನಿ ಹಾಲ್ ಅಛಿ ರ್‌ಹಿಶೆ ಕರಿ ಮೇ ತುಮೂನ ಬೋಲುಸ್” ಕರಿ ಬೋಲ್ಯೊ.

ಮಾರಕನ ಆವೊ ಅಜ್ಜು ಅರಾಮ್ ಕರೊ
(ಲೂಕ 10:21-22)

25 ಯೋ ವಖ್ತಾಮ ಯೇಸುನೆ ಶಾತ್ ಬೋಲ್ಯೊಕತೊ, “ಬಾ, ಸೊರ್ಗ ಅಜ್ಜು ಧರ್ತಿನೊ ಯಜಮಾನ್! ತುನೆ ಗ್ಯಾನಿ ಅಜ್ಜು ಅಕ್ಲಿಥಿ ಅದ್ವಿಥಿ ಆ ವಾತೆನ ಲಪಾಡಿನ್ ಶಾಪ್ತಿ ಮಾಲುಮ್‌ಕೊಂತೆ ಇವ್ವುನ ವತಾಳಿರಾಖ್ತೊತೆ ಇನಖ್ವಾಜೆ ಮೇ ತುನ ಧನ್ಯವಾದ್ ಕರುಸ್.

26 ಓಹೋಲಾ ಬಾ, ಅಮ್ಮಸ್ ಕರಾನು ಅಛಿಕ್ಕರಿ ತುನ ದೆಖಾಯು.”

27 “ಮಾರೊ ಬಾ ಮನ ಖ್ವಾರುಸ್ ಮಾರ ಹಾತ್ಮ ದೀರಾಖ್ತೊಸ್. ಬಾನ ಮ್ಹೆಂದಿನ್ ಕೋಣ್‌ಬಿ ಛಿಯ್ಯಾನ ಮಾಲುಮ್ ಕರಿರಾಖ್ತೊಯ್ವಿ, ಅಜ್ಜು ಛಿಯ್ಯಾನ ಮ್ಹೆಂದಿನ್ ಕೋಣ್‌ಬಿ ಬಾನ ಮಾಲುಮ್ ಕರಿರಾಖ್ತೊಯ್ವಿ ಅಜ್ಜು ಛಿಯ್ಯೊ ಬಾನ ಕಿನ ವತಾಳ್ಕರಿ ಆಖ್ವೊಕರಾಸ್ತಿ, ಇವ್ವೆ ಬಾನ ಮಾಲುಮ್ ಕರಿಲಿಶೆ.

28 “ಅಲಾ ಧಕಿರ್‌ವಾಳ, ಭೋಜೊ ಪಾಡಿರಾವಾಳ, ತುಮೆ ಖ್ವಾರು ಮಾರಕನ ಆವೊ; ಮೇ ತುಮುನ ಅರಾಮ್ ದೆವುಸ್.

29 ಮೇ ಹಂಕಾರ್‌ಭರೈ, ಕಾಹೆ ಅಜ್ಜು ಕೌಳೊ ದಿಲ್‌ವಾಳೊ ಹುಯಿರೈತ್ತೆ ಇನಖ್ವಾಜೆ, ಮಾರು ನೊಗಾನ ತುಮಾರಪರ್ ಪಾಡಿಲೀನ್ ಮಾರೇಧಿ ಶಿಕಿಲೇವೊ. ತದೆ ತುಮಾರು ಆತ್ಮಾನ ಅರಾಮ್ ಮಳ್ಳಶೆ.

30 ಶನಕತೊ ಮಾರು ನೊಗ ಪೋಲು ಹುಯಿರೈಸ್ ಅಜ್ಜು ಮಾರು ಭೋಜ್ ಕಮ್ ವಜ್ಜನ್ನು ಹುಯಿರೈಸ್” ಕರಿ ಬೋಲ್ಯೊ.

12

ಸಬ್ಬತ್‌ನಿ ಬಾರೇಮ ಪುಲ್ಲಾಯತೆ

(ಮಾರ್ಕ 2:23-28; ಲೂಕ 6:1-5)

1 ಯೋ ದನೂಮ ಸಬ್ಬತ್‌ನ್* ರೋಜೆ ಯೇಸು ಅನಾಜ್ ಪಿಕಿಹುಯು ಖೇತರ್‌ಮಾಕರಿ ಭಾಲಿನ್ ಜಾವಾನಿ ವಖ್ವತ್‌ಮ, ಇನ ಶಿಷ್ಯರ್‌ನ ಭುಕ್ ಲಾಗಲಗ್ಗುಧು, ಇನಖ್ವಾಜೆ ಇವ್ಣೆ ಬುಟ್ಟಾ ತೋಡಿನ್, ಖಾವಲಗ್ಗಾಧ.

2 ಅನದೇಖಿನ್ ಫರಿಸಾಯರ್‌ನೆ ಯೇಸುನ, “ಹಂದೇಕ್, ತಾರು ಶಿಷ್ಯರ್ ಧರ್ಮಶಾಸ್ತ್ರನು ವಿರೋದ್ ಸಬ್ಬತ್ ದನ್ಮ ಕರ್ನುನಾತೆ ಕಾಮ್ ಕರುಕರಸ್” ಕರಿ ಬೋಲ್ಯು.

3 ತದೆ ಯೇಸುನೆ ಇವ್ಣುನ, “ದಾವೀದ್‌ನಾಬಿ, ಇನ ಜೋಡ್ ರ್ವಾಳಾನ ಭುಕ್ ಲಾಗಖ್ವತರ್, ದಾವೀದ್‌ನೆ ಶಾತ್ ಕರೈ ಕರಿ ತುಮೆ ಪಡ್ಕಾಕೊಯ್ತಿಕಿ ಶು?

4 ದಾವೀದ್‌ನೆ ದೇವ್ ಮಂದಿರ್‌ಮ ಜೈನ್, ಯಾಜಕರಸ್ ಖಲಿಖಾವ್ಣುತೆ ಪಣ್ಣಿ, ದಾವೀದ್ ರ್ವವೊ, ಇನ ಜೋಡ್ ರ್ವಾಳು ರ್ವವೊ, ನಾ ಖಾವ್ಣುಕರಿ ಖಾನುಲ್ ರ್ವಯುತೋಬಿ, ದೇವ್ ಝಾಳೆಲುತಾರನ ರೋಟಾನ ಖಾದೋನಿ?

5 ಅತ್ರೇಸ್ ಕಾಹೆತೆ, ಸಬ್ಬತ್ ದನ್ಮ ಯಾಜಕರ್ ಮಂದಿರ್‌ಮ ಸಬ್ಬತ್ ದನ್ಮ ಮೈಲಾಪ್ ಕರೈತೋಬಿ ಇವ್ಣೆ ಅಪರಾದ್‌ಕೊಂತೆ ರ್ವೇಸ್. ಇನತುಮೆ ಮೋಶೆನ ಧರ್ಮಶಾಸ್ತ್ರಮ ಪಡ್ಕೊಯ್ತಿಕಿ ಶು?

* 12:1 12:1 ಸಬ್ಬತ್ ದನ್‌ಕತೊ, ಯೆಹೂದ್ಯರ್‌ನು ಅರಾಮ್ ಕರಾನೊ ದನ್.

6 ಕತೋಬಿ ಮೇ ತುಮೂನ, ಮಂದಿರ್‌ಥೀಬಿ ಮೋಟೊ ಹಜ್ಜಾ ಲ್ಲಾ ಕರಿ ಬೋಲುಸ್.

7 'ಮನ ಜಾನ್ವರ್‌ನು ಬಲಿ ನಕೊ, ಗೋರಸ್ ಹೋಣುತೆ' ಕರಿ ಧರ್ಮಶಾಸ್ತ್ರಮ ಬೋಲಾಸ್ತೆ ಇನಿ ಮತ್‌ಲಬ್ ತುಮೂನ ಖಾಚಮಾಬಿ ಮಾಲುಮ್ ರ್ವಯುಹೋತ್ತೊ, ಗಲತ್ ಕರಾಕೊಂತೆ ಇವ್ಜಾಪರ್ ತುಮೆ ಗಲತ್ ಕೋ ಲಗಾಡ್ಯಹೋತ್ತಿ.

8 ಅದ್ವಿನೊ ಲಿಯೊ ಸಬ್ಬತ್ ದನ್ನ ಪ್ರಭು ಹುಯಿರ್ವೊಸ್" ಕರಿ ಬೋಲ್ಯೊ.

ಲಕ್‌ವೊನ ಹಾತ್ವ ಯೇಸುನೆ ಅಲ್ಫು ಕರ್ರೊತೆ

(ಮಾರ್ಕ 3:1-6; ಲೂಕ 6:6-11)

9 ಯೇಸು ಹಿಜ್ಜಾಥೊ ನಿಕ್ಕಿನ್, ಯೆಹೂದ್ಯರ್‌ನ ಸಬೆ ಭರಾವಾನು ಮಂದಿರಮ ಗಯೊ.

10 ಹಿಜ್ಜಾ ಹಾತ್ ಝೂಟೊ ಪಡಿಹುಯು ಏಕ್ ಅದ್ವಿಧು. ತದೆ ಥೋಡು ಭಣು ಯೇಸುಪರ್ ಗಲ್ತಿ ಲಗಾಡ್‌ಣು ಕರಿ, ಇವ್ಜೆ ಇನ, "ಸಬ್ಬತ್ ದನ್ಮ ಅಲ್ಫು ಕರಾನು ಅಪ್ಪ ಧರ್ಮಶಾಸ್ತ್ರಮ ಬರೋಬರ್‌ಕಿ ಶು?" ಕರಿ ಪುಲ್ಲಾಯು.

11 ಯೇಸುನೆ, "ತುಮಾರಮ ಕಿನಾಕನಾತೋಬಿ ಎಕ್ಕ್‌ಸ್ ಮೇಂಡು ರ್ವೊನ್, ಸಬ್ಬತ್ ದನ್ಮ ಯೋ ಮೇಂಡು ಖಾಡ್‌ಮ ಪಡಿಗಯೂತೊ ಯೋ ಇನ ಧರೀನ್, ಉಪ್ಪರ್ ಪಾಡ್‌ಶೆಕೊಯ್ನಿಕಿ ಶು?

12 ಮೇಂಡ್‌ಥೀಬಿ ಅದ್ವಿ ಕೈಯೆಕ್ಕಿ ಮಹಾನ್ ಹುಯಿರ್ವೊಸ್! ಇನಖಾಜೇಸ್ ಸಬ್ಬತ್ ದನ್ಮ ಅಲ್ಫುಕಾಮ್ ಕರಾನು ಅಪ್ಪಿ ಧರ್ಮಶಾಸ್ತ್ರಮ ಬರೋಬರ್‌ಸ್ ಹುಯಿರ್ವೊಸ್" ಕರಿ ಜವಾಬ್ ದಿದೊ.

13 ಅನಕೇಡೆಥು ಯೇಸುನೆ ಯೋ ಹಾತ್ ಝೂಟೊ ಪಡಿಹುಯು ಅದ್ವಿನ, "ತಾರೊ ಹಾತ್ ಖಾಡ್ವೊ ಕರ್" ಕರಿ ಬೋಲ್ಯೊ; ಇನೆ ಖಾಡ್ವೊ ಕರ್ರೊ.

ತದೆ ಇನೊ ಹಾತ್ ಅಲ್ಫು ಹುಯಿನ್, ಬಿಜ್ಜೇಕ್ ಹಾತ್ವಿ ಘೋಣಿ ಹುಯಿಗಯು.

14 ತದೆ ಫರಿಸಾಯರ್ ಖ್ಹಾರು ಭಾರ್ಜೈನ್, ಯೇಸುನ ಖೆವಿ ತರೀಕಾಥಿ ಮಾರಿಯೆ ಕರಿ ಸೋಚ್ಚು.

ದೇವ್ನೆ ಚೂಣ್ಕೊತೆ ಸೇವಕ್

15 ಯೇಸುನೆ ಇನಿ ವಿರೋದ್ ಇವ್ಣೆ ಸೋಚುಕರಾತೆ ಇನ ಮಾಲುಮ್ ಕರಿಲೀನ್, ಹಿಜ್ಜಾಥೊ ಚಲೆಗಯೊ; ಮೋಟಿ ಭೀಡ್ ಇನ ಪೀಲೆ ಗಯು. ಅರಾಮ್‌ಕೊಂತೆ ಖ್ಹಾರಾವ್‌ನ ಇನೆ ಅಟ್ಟು ಕರೈಯೊ.

16 ಅಜ್ಜು ಇನಿ ಬಾರೇಮ ಬಿಜಾನ ನಾ ಬೋಲ್‌ನು ಕರಿ ಅದ್ವಿಖ್ಹಾರಾನ ರ್ಪುತಾಯೊ.

17 ದೇವ್ನೆ ಪ್ರವಾದಿ ಯೆಶಾಯನ ಮ್ಹೋಡೇಥಿ ಬೋಲಾಯೊತೆ ಖ್ಹಾಚನ, ಚಲಾವಾನಖ್ಹಾಜೆ ಯೇಸುನೆ ಆ ಖ್ಹಾರು ಕರೈಯೊತೆ:

18 ಹಂದೇಕ್, ಮಾರೊ ಸೇವಕ್, ಅನ ಮೇ ಚೂಣಿ ರಾಖ್ತೊಸ್, ಆ ಮಾರೊ ಪ್ಯಾರ್‌ನೊ ಹುಯಿರೈಯೊಸ್, ಅನೇಥಿ ಮೇ ಖ್ಹುಶಿ ಲ್ಲೊ.

ಮೇ ಮಾರು ಆತ್ಮಾನ ಇನಾಪರ್ ರಾಖುಸ್, ಅಜ್ಜು ಯೋ ಅಲಕ್ ಅದ್ವಿವೋನಾಬಿ ಮಾರಿ ನ್ಯಾವ್‌ನ ಬೋಲಿವತಾಳ್‌ಶೆ.

19 ಯೋ ಲಡೈ ಕರಾಕೊಯ್ನಿ ಅಜ್ಜು ಚಿಕ್ರಾಕೊಯ್ನಿ; ಗಲ್ಲಿಯೇಮ ಇನಿ ಅವಾಜ್ ಕಿನಾಬಿ ಖ್ಹಮ್‌ಜಾವಕೊಯ್ನಿ.

20 ಚಗ್‌ದೈಗಯುತೆ ಡಂಟ್‌ನ ಯೋ ತೋಡಾಕೊಯ್ನಿ, ಉಝುವ್‌ಕರಾತೆ ದಿವೋನಾಬಿ ಯೋ ಉಝಾವಕೊಯ್ನಿ,

ನ್ಯಾವ್‌ನ ಜೀತಾತೋಡಿ ಯೋ ಲಗ್ನುರೈಶೆ.

21 ಅಜ್ಜು ಅಲಕ್ ಅದ್ವಿಖ್ಹಾರು ಇನ ನಾಮ್‌ಪರ್ ಭರೋಖ್ಹೊ ಕರ್ಶೆ.

ಯೇಸು ಅಜ್ಜು ಬೆಲ್ಲಬೂಲ್

(ಮಾರ್ಕ 3:20-30; ಲೂಕ 11:14-23)

22 ಭೂತ್ ಧರರಾಖ್ಯುಧೂತೆ ಇನಖ್ವಾಜೇಧಿ ಕಾಣು ಅಜ್ಜು ಮುಕ್ಕು ಹುಯಿರ್ದುಧೂತೆ ಏಕ್ ಜಣಾನ ಯೇಸುಕನ ಲಾಯು. ಇನೆ ಇನ ಅಟ್ಟು ಕರ್ತಾನ, ಇನ ಡೋಳಾ ಅಜ್ಜು ವಾತೆ ಆಯು.

23 ತದೆ ಯೇಸುನೆ ಕರ್ರೊತೆ ಇನ ದೇಖಿನ್, ಅದ್ವಿಖ್ವಾರು ಆಶ್ವರ್ಯಪ್ಪಿನ್, “ಆ ದಾವೀದ್‌ನೊ ಛಿಯೊಕಿ ಶು?” ಕರಿ ಬೋಲಿಲಿದು.

24 ಕತೋಬಿ ಫರಿಸಾಯರ್‌ನೆ ಅನಖ್ವಮ್‌ಜಿನ್, “ಭೂತ್ ಖ್ವಾರಾನೊ ಯಜಮಾನ್ ಹುಯಿರ್ದೊತೆ ಬೆಲೆಬೂಲ್‌ನಿ ಮದತ್‌ಥೀಸ್ ಆ ಭೂತ್ ಖ್ವಾರಾನ ಕಾಡಸ್ ಪಣ್ಣಿ, ಬಿಜ್ಜು ಶನೇಥೀಬಿ ಕಾಹೆ” ಕರಿ ಬೋಲ್ಯು.

25 ಯೇಸುನೆ ಇವ್ವಿ ಸೋಚ್ಚ ಮಾಲುಮ್ ಕರಿಲೀನ್, “ಕೆಹು ರಾಜ್ಯ ಫುಟ್ ಪಡೀನ್, ಇನಿ ವಿರೋದ್ ಯೋಸ್ ಭೀಡಾಸ್ಕಿ, ಯೋ ರಾಜ್ ಬರ್ಬಾತ್ ಹುಯಿಜಾಶೆ. ಇಮ್ಮಸ್ ಏಕ್ ಘರ್‌ಮ ರ್ವೊ, ಖ್ವಯೇರ್‌ಮ ರ್ವೊ ಫುಟ್ ಪಡೀನ್, ಖ್ವಿದ್‌ನಿ ವಿರೋದ್ ಭೀಡಾಲಗಾಸ್ಕಿ, ಇಮ್ಮು ಘರ್ ಅಜ್ಜು ಖ್ವಯೇರ್ ಪಡಿಜಾಸ್.

26 ಇಮ್ಮಸ್ ಶೈತಾನ್ ಶೈತಾನ್ ನಖ್ವಾಡ್ಯತೊ ಇನಿ ವಿರೋದ್ ಲಡೈಭೀಡಾನಿತರ ಹುಯು, ಇಮ್‌ರ್ದಯುತೊ ಇನಿ ರಾಜ್ಯ ಕಿಮ್ ಭೀರ್ದೆಪ್ಪೆ?

27 ಮೇ ಬೆಲೆಬೂಲ್‌ನಿ ಶಕಡ್ಲಿ ಭೂತ್‌ಖ್ವಾರು ಕಾಡುಸ್ ಕರಿ ತುಮೆ ಬೋಲೋಸ್. ಇಮ್‌ಕತೊ, ತುಮಾರು ಶಿಷ್ಯರ್‌ಖ್ವಾರು ಕಿನಿ ಶಕಡ್ಲಿ ಭೂತ್‌ಖ್ವಾರನ ಕಾಡಸ್? ಇನಖ್ವಾಜೇಸ್ ತುಮಾರು ಅದ್ವಿತ್ ತುಮೂನ ನ್ಯಾವ್ ಕರ್ಶೆ.

28 ಮೇ ಬೆಲೆಬೂಲ್‌ನಿ ಶಕಡ್ಲಿ ಕಾಹೆ, ಕತೋಬಿ ದೇವ್ನಿ ಆತ್ಮಾನಿ ಶಕಡ್ಲಿ ಭೂತ್‌ಖ್ವಾರನ ಕಾಡ್ತೊ ಉಶೇತೊ, ದೇವ್ನಿ ರಾಜ್ಯ ತುಮಾರ ಖನ್ನೆ ಆಯಿಗೈಯು ಕರಿ ಆ ವತಾಳಸ್.

29 ಅತ್ರೇಸ್ ಕಾಹೆತೆ, ಕೋಣ್‌ಬಿ ಪಹಿಲೆ ಏಕ್ ಶಕತ್‌ವಾಳ ಅದ್ವಿನಿ ಭಾಂದ್ಯನಾತೊ, ಇನ ಘರ್‌ಮ ಪೇಶಿನ್, ಇನು ಶೊತ್‌ನ ಲೂಟಾನ ಕೋ ಹುವಾನಿ, ಪಹಿಲ್‌ವಾಣ್ಣ ಭಾಂದಾನ ಬಾದ್‌ಮ, ಇನ ಘರ್‌ನ ಲೂಟಿಜಾಯ್.

30 ಮಾರ ಜೋಡ್ಡ ಮಳಾಕೊಂತೆ ಇವ್ವೆ ಮಾರು ವಹೇರಲ್ಯ ಹುಯಿರಲ್ಲ್ಯಸ್. ಮಾರ ಜೋಡ್ಡ ಎಕ್ಕು ಕರಾಕೊಂತೆ ಇವ್ವೆ ಛಿದ್ರಾವವಾಳು ಹುಯಿರಲ್ಲ್ಯಸ್.

31 ಇನಖ್ವಾಜೇಸ್ ಮೇ ತುಮೂನ ಬೋಲುಸ್, ಅದ್ಮಿಖ್ವಾರು ಕರಾತೆ ಹರೇಕ್ ಪಾಪ್ಪ ಅಜ್ಜು ಗಾಳೆನಿ ವಾತೇನ ಮಾಪಿ ಛಾ; ಕತೋಬಿ ಪವಿತ್ರಾತ್ಮನ ವಿರೋದ್ ವಾತೆ ಬೋಲವಾಳಾನ ಮಾಪಿಕೊಯ್ವಿ.

32 ಕೋಣ್ತೋಬಿ ಅದ್ಮಿನೊ ಛಿಯ್ಯಾನ ವಿರೋದ್ ವಾತೆ ಬೋಲ್ಯತೊ ಇನ ಮಾಪಿ ಛಾ; ಕತೋಬಿ ಪವಿತ್ರಾತ್ಮನಿ ವಿರೋದ್ ವಾತೆ ಬೋಲ್ಯತೊ ಇನ ಆ ಜಗತ್‌ಮ ಹಮ್ಮೆಬಿ ಕೊಯ್ವಿ, ಕದೇಬಿ ಮಾಪಿಸ್‌ಕೊಯ್ವಿ.

ಝಾಡು ಅಜ್ಜು ಇನು ಪಂಡಾನಿ ಬಾರೇಮ
(ಲೂಕ 6:43-45)

33 “ತುಮೂನ ಅಲ್ಫು ಪಂಡು ಹೋಣುಕತೊ ತುಮಾರಕನ ಅಲ್ಫು ಝಾಡು ರ್ವೇಣು. ತುಮಾರು ಝಾಡು ಅಲ್ಫುನಾ ರ್ವಯೂತೊ, ಯೋ ಖರಾಬ್ ಪಂಡಾನಸ್ ಮ್ಹೇಲ್‌ಶೆ, ಏಕ್ ಝಾಡು ಕಿಮ್ಮು ಕರಿ ಬೋಲಾನು ಯೋ ಮ್ಹೇಲಾತೆ ಪಂಡಾಥೀಸ್ ಮಾಲುಮ್ ಪಡಾಸ್”.

34 ಅಲಾ ಖ್ವಾಪ್‌ನ ಖಾನ್‌ದಾನ್‌ವಾಳ! ತುಮೆ ಖರಾಬ್ ರ್ವವಾಪರ್, ತುಮಾರ ಮ್ಹೋಡವಾಟೆ ಅಲ್ಫು ವಾತೆ ಕಿಮ್ ನಿಕಳಾಶೆ? ದಿಲ್ಮ ಭರೈರ್ಟ್ಲೇಸ್ ಮ್ಹೋಡವಾಟೆ ನಿಕಾಸ್.

35 ಏಕ್ ಅಲ್ಫು ಅದ್ಮಿ ಇನಿ ಕಣ್ಣಿಮಾಥು ಅಲ್ಫು ರಾಲ್ವವ್‌ನ ಭಾರ್ ಕಾಡನ್; ಏಕ್ ಖರಾಬ್ ಅದ್ಮಿ ಇನು ಖರಾಬ್ ಕಣ್ಣಿಮಾಥು ಖರಾಬ್ ರಾಲ್ವವ್‌ನ ಭಾರ್‌ಕಾಡನ್.

36 ಅತ್ರೇಸ್ ಕಾಹೆತೆ, ಮೇ “ತುಮೂನ ಶಾತ್ ಬೋಲುಸ್‌ಕತೊ, ಅದ್ಮಿಖ್ವಾರು ಫಾಯಿದೊಕೊಂತೆ ಬೋಲಾಸ್ತೆ ಹರೇಕ್ ವಾತೇನಿ ಬಾರೇಮ ನ್ಯಾವ್‌ನಿ ತೀರ್ಪ್‌ನ ದನ್ಮ ಗಣ್ಣಿ ದೇವ್ವಪಡಾಶೆ.

37 ತಾರಿ ವಾತೆಥೀಸ್ ತೂ ನೀತಿವಾಳೊಕರಿ ತೀರ್ಪ್ ಮಳ್‌ಶೆ; ಅಜ್ಜು ತಾರಿ ವಾತೆಥೀಸ್ ತೂ ಅಪರಾದಿಕರಿ ತೀರ್ಪ್ ಮಳ್‌ಶೆ” ಕರಿ ಬೋಲ್ಯೊ.

ಅದ್ಭುತ್ ಕರಾನ ಬೋಲ್ಯಾತೆ

(ಮಾರ್ಕ 8:11-12; ಲೂಕ 11:29-32)

38 ತದೆ ಮೋಶಿನಿ ವಚನ್ ಶಿಕಾಡವಾಳು ಶಾಸ್ತ್ರಿಯೆ ಅಜ್ಜು ಫರಿಸಾಯರ್‌ಮ ಥೋಡು ಜಣು ಯೇಸುನ, “ಗುರು, ತೂ ಅದ್ಭುತ್ ಕರಾನು ದೇಕ್ಚು ಕರಿ ಹಮೆ ಆಖ್ವ್‌ಕರಿಯೇಸ್” ಕರಿ ಬೋಲ್ಯಾ.

39 ಯೇಸುನೆ, “ಆ ಜಗ್‌ಗುನು ಅದ್ವಿ ಖರಾಬ್ ಅಜ್ಜು ಪಾಪಿ ಹುಯಿರಲ್ವ್, ಅವ್ಚೆ ಅದ್ಭುತ್ ಕಾಮ್ ದೇಕ್ಚು ಕರಿ ಆಖ್ವ್ ಕರಾಸ್. ಕತೋಬಿ ಯೋನ ಕರಿ ಪ್ರವಾದಿಮ ಹುಯೂತೆ ಅದ್ಭುತ್ ಕಾಮಸ್ ಪಣ್ಣಿ, ಬಿಜ್ಜು ಕೆಹಾಬಿ ಕೊಯ್ಚಿ.

40 ಯೋನ ಕಿಮ್ ತೀನ್ ರಾತ್-ದನ್ ಮೋಟಮಾಲ್ಲಾನ ಪೇಟ್‌ಮ ಥೋಕಿಇಮ್ತ್ಸ್, ಅದ್ವಿನೊ ಛಿಯ್ಯೊ ತೀನ್ ರಾತ್-ದನ್ ಧರ್ತಿನ ಮಹಿ ರ್ಣಿಶೆ.

41 ನ್ಯಾವ್‌ನ ತೀರ್ಪ್‌ನ ದನ್ಮನಿನವೆ ನಂಗರ್‌ವಾಳು ಆ ಪಿಳ್ಳಿವಾಳಾನ ವಿರೋದ್ ಭೀರಿನ್, ತುಮೆ ಗಲತ್ ಕರಿ ಬೋಲ್‌ಶೆ. ಇವ್ಚೆ ಯೋನಾನೆ ಬೋಲ್ಯಾತೆ ವಚನ್ ಖ್ವಮ್‌ಜಿನ್, ಪಾಪ್ ಮ್ಹೇಲಿನ್ ದೇವ್ ಭಣಿ ಫರಿಗಯ್. ಕತೋಬಿ ಮೇ ತುಮೂನ ಬೋಲುಸ್ಕಿ, ಯೋನಾಥೀಬಿ ಮೋಟೊ ಹಜ್ಜಾಲ್ಲಾ!

42 ಶೆಬಾ ದೇಖ್ವ್‌ನಿ ರಾಣಿ ನ್ಯಾವ್‌ನ ತೀರ್ಪ್‌ನ ದನ್ಮ ಆ ಪಿಳ್ಳಿನಿ ವಿರೋದ್ ಭೀರಿನ್, ತುಮೆ ಗಲತ್ ಕರಿ ಬೋಲ್‌ಶೆ. ಯೋ ಸೊಲೊಮೋನ್ನಿ ಗ್ಯಾನ್ನಿ ವಾತೇನ ಖ್ವಮ್‌ಜಾನಖ್ವಾಜೆ ಜಗತ್ತ್ ಕಡ್‌ಶೀಥಿ ಆಯಿ. ಕತೋಬಿ ಮೇ ತುಮೂನ ಬೋಲುಸ್ಕಿ, ಸೊಲೊಮೋನ್‌ಥೀಬಿ ಊಚೊರೈವಾಳೊ ಹಜ್ಜಾಲ್ಲಾ!

ದುರಾತ್ಮ ಪಾಳ್ತುಫರಿ ಆವಸ್ತೆ ಬಾರೇಮು

(ಲೂಕ 11:24-26)

43 “ಭೂತ್ ಏಕ್ ಅದ್ವಿನ ಮ್ಹೇಲಿನ್ ನಿಕ್ಕಿಜಾವಾನ ಬಾದ್ತ್, ಅರಾಮ್ ಕರಾನಖ್ವಾಜೆ ಝಗೊ ಥೂಂಡ್‌ತುಹುಯಿನ್, ಪಾಣಿಕೊಂತೆ ಝಗೋಮ ವನ್‌ವನ್ನು ರ್ಣಿಸ್.

44 ಕತೋಬಿ ಅರಾಮ್ ಕರಾನ ಝಗೊ ಮಳಾಕೊಂತೆ ದೇಖಿನ್, ಯೋ, “ಮೇ ಮ್ಹಿಂದಿನ್ ಆಯೋತೆ ಮಾರ ಘರ್‌ನ ಫಾಲ್ತು ಫರೀನ್ ಜವುಸ್” ಕರಿ ಬೋಲಿನ್, ಪಾಲ್ತು ಯೋ ಘರ್‌ಕನ ಆಯಿನ್, ಯೋ ಘರ್ ಖಾಲಿ ಪಡ್ಕುತೆ ಅಜು ಝಡೈಶನ್‌ಗಾರ್ ಹುಯಿರ್ದೊತೆ ದೇಖಿನ್,

45 ಜೈನ್, ಇನೇಥಿಬಿ ಖರಾಬ್ ಹುಯಿರ್ದೊತೆ ಬಿಜು ಖ್ವಾತ್ ಭೂತ್‌ನ ಇನ ಜೋಡೆ ಬುಲೈಲಿನ್ ಆವಸ್. ಇವ್ಚೆ ಯೋ ಅದ್ವಿನ ಮಹಿ ಪೇಶಿನ್, ಹಿಜ್ವಾಸ್ ರ್ವವಾಲಗಸ್, ತದೆ ಯೋ ಅದ್ವಿನಿ ಖರ್ತಿಮಾನಿ ಹಾಲ್ ಪಹಿಲೆಥಿಬಿ ಖರಾಬ್ ಹುಯಿಜ್ವಾಸ್. ಅಮ್ವಸ್ ಆ ಪಿಳ್ಗಿನ್ ಖರಾಬ್ ಅದ್ವಿನ ಉಶೆ” ಕರಿ ಬೋಲೊ.

ಯೇಸುನಿ ಆಯ ಅಜು ಇನ ಭಯ್ಕೆ

(ಮಾರ್ಕ 3:31-35; ಲೂಕ 8:19-21)

46 ಯೇಸು ಅದ್ವಿನಿ ಝೂಂಡ್‌ನ ಜೋಡೆ ಬಿಜೂಬಿ ವಾತೆ ಬೋಲುಕರಾನಿ ವಖ್ವತ್‌ಮ, ಇನಿ ಆಯಾಬಿ ಇನ ಭೈಯೇ ಆಯಿನ್, ಇನಜೋಡೆ ವಾತೆ ಬೋಲ್‌ನು ಕರಿ ಭಾರ್‌ಭೀರ್ದ್ಯ.

47 ತದೆ ಏಕ್ ಜ್ವಣಾನೆ ಯೇಸುನ, “ಹಂದೇಕ್, ತಾರಿ ಆಯಾಬಿ, ತಾರ ಭೈಯೇ, ತುನ ವಾತೆ ಬೋಲ್‌ನು ಕರಿ ಭಾರ್ ಭಿಯ್ಯುಸ್” ಕರಿ ಬೋಲ್ಯು.

48 ಯೇಸುನೆ, “ಮಾರಿ ಆಯ ಕೋಣ್? ಮಾರ ಭೈಯೇ ಕೋಣ್? ಕರಿ ಬೋಲಿನ್,

49 ಶಿಷ್ಯರ್ ಭಣಿ ಹಾತ್ ವತಾಳಿನ್ “ಹಂದೇಖೊ! ಅವ್ವೆಸ್ ಮಾರಿ ಆಯ ಅಜು ಮಾರ ಭೈಯೇ”.

50 ಪರ್‌ಲೋಕ್‌ಮ ಲ್ಹಾತೆ ಮಾರ ಬಾನಿ ಮರ್ಜಿನಿ ಘೋಣಿ ಕೋಣ್ ಚಾಲಾಸ್ಕಿ, ಯೋಸ್ ಮಾರೊ ಭೈ ಮಾರಿ ಭೇನ್ ಅಜು ಮಾರಿ ಆಯ ಹುಯಿರುಸ್” ಕರಿ ಬೋಲೊ.

13

ಪಂಡಾ ಛಿಡ್ಕಾನಿ ಬಾರೇಮ ಮತ್ವಬ್‌ನಿ ಖೇಣಿ

(ಮಾರ್ಕ 4:1-9; ಲೂಕ 8:4-8)

1 ಯೋಸ್ ದನ್ತಯೇಸು ಘರ್ಥೊ ನಿಕ್ಕಿನ್, ದರ್ಯಾವ್ನ ಕನಾರೆಕನ ಜೈನ್, ಬೇಶಿಗಯೊ.

2 ಘಣು ಅದ್ಮಿ ಇನಾಕನ ಎಕ್ವಹುಯಿನ್ ಆಯೂತೆ ಇನಖ್ವಾಜೆ ಯೇಸು ಡೋಣ್‌ಮ ಚಢೀನ್, ಬೇಶಿಗಯೊ ಯೋ ಅದ್ಮಿಖ್ವಾರು ಕನಾರಿಕನ ಭೀಯೂಥು.

3 ತದೆ ಯೇಸುನೆ ಇವ್ವುನ ಮತ್ಲಬ್‌ನಿ ಖೇಣಿಯೇಥಿ ಕೈಏಕ್ ವಾತೆನಿ ಬಾರೇಮ ಬೋಲ್ಯೊ.

4 “ಖೇತರ್ ಕರಾವಾಳೊ ಏಕ್‌ಜಣೊ ಪಂಡಾ ಛಿಡ್ತಾನಖ್ವಾಜೆ ಗಯೊ. ಯೋ ಪಂಡಾ ಛಿಡ್ತಾನಿ ವಖ್ತುತ್‌ಮ, ಥೋಡ ಪಂಡಾ ವಾಟ್ನಿ ಪಾಕ್ತಿಮ ಪಡ್ಕು ಜಿನಾವರ್ ಖ್ವಾರು ಆಯಿನ್ ಇನ ಚರಿಲಿದು.

5 ಅಜ್ಜು ಥೋಡ ಪಂಡಾ ಜಾಖ್ತುತ್ ಮಾಟಿಕೊಂತೆ ಬಂಡಾನಿ ಜಮೀನ್‌ಪರ್ ಪಡ್ಕು; ಹಿಜ್ಜಾ ಛಿವರ್ ಮಾಟಿ ಥೀತೆ ಇನಖ್ವಾಜೆ ಯೋ ಒಗ್ಗಿಸ್‌ಮ ಫುಟಿ ಆಯು.

6 ಕತೋಬಿ ತಡ್ಕೊ ಪಡಾದೀನ್, ಯೋ ಶೊಶಿಯೆ ಮಹಿತೋಡಿ ಭಡೆ ಕೋ ಮ್ಹೇಲಿರಾಖ್ತುಧುಂತೆ ಇನಖ್ವಾಜೆ ಖ್ವುಕ್ತೆಗಯು.

7 ಅಜ್ಜು ಥೋಡ ಪಂಡಾ ಕಾಟಾನ ಡಾಗ್‌ಮ ಪಡ್ಕು, ಕಾಟಾನು ರ್ಪಿಕ್ತುಖ್ವಾರು ಮೋಟುಹುಯಿನ್, ಯೋ ಶೊಶಿಯೇನ ದಾಬಿನಾಖ್ಕು.

8 ಕತೋಬಿ ಅಜ್ಜು ಥೋಡ ಪಂಡಾ ಅಲ್ಫಿ ಜಮೀನ್‌ಪರ್ ಪಡೀನ್, ಫುಟೀನ್, ಪಂಡು ಮ್ಹೇಲ್ಯು; ಥೋಡು ಖೋಡ ಪಂಡಾವತ್ರ, ಥೋಡು ತೀನಿಖ್ವೊ ಪಂಡಾವತ್ರ, ಥೋಡು ಡೋಡಿಖ್ವೊ ಪಂಡಾವತ್ರ” ಮ್ಹೇಲ್ಯು.

9 “ಖ್ವುಮ್‌ಜಾನ ಕಾನ್‌ರ್ದ್ವಾಳು ಖ್ವುಮ್‌ಜಾದೆ” ಕರಿ ಬೋಲ್ಯೊ.

ಮತ್ಲಬ್‌ನಿ ಖೇಣಿಯೇಥಿ ಶನ ಬೋಲಸ್ತೆ?

(ಮಾರ್ಕ 4:10-12; ಲೂಕ 8:9-10)

10 ಬಾದ್ಮ ಯೇಸುನ ಶಿಷ್ಯರ್ ಇನಾಕನ ಆಯಿನ್, “ತೂ ಅದ್ಮಿನ ಜೋಡೆ ವಾತೆಬೋಲಾನಿ ವಖ್ತುತ್‌ಮ ಮತ್ಲಬ್‌ನಿ ಖೇಣಿಯೇಥಿ ಶನಬೋಲಾಸ್ತೆ?” ಕರಿ ಪುಲ್ಲಾಯ.

11 ಯೇಸುನೆ ಇವ್ವುನ, “ಸೋಗ್ ರಾಜ್ಯನಿ ಬಾರೇಮಾನಿ ಖ್ವಾಚಿನಿ ಮಾಲುಮ್ ಕರಿಲ್ವವಾನು ಕಿಮ್ ಕರಿ ಬೋಲಾನು ತುಮೂನ ದೆವೈರಲ್ವಾಸ್, ಪಣ್ಣಿ ಇವ್ವ ಕಾಹೆ.

12 ಶನಕತೊ ಕಿನಾಕನ ಛಾಕಿ ಇವ್ವುನ ಬಿಜೂಬಿ ಜಾಖ್ವತ್ ದೆವಾವಾಶೆ; ಕತೋಬಿ ಕಿನಾಕನ ಕೊಯ್ನಿಕಿ ಇನಾಕಂಥು ಛಾತೆ ಥೋಡುಬಿ ಕಾಡಿಲಿಶೆ.

13 ಮೇ ಇವ್ವ ಜೋಡೆ ಮತ್ಲಬ್‌ನಿ ಖೇಣಿಯೇಥಿ ವಾತೆ ಬೋಲುಸ್ತೆ ಶನಖ್ವಾಜೆ ಕತೊ, ಇವ್ವುನ ಡೋಳಾ ರ್ವಯುತೋಬಿ ದೇಖಾಕೊಯ್ನಿ ಅಜು ಕಾನ್ ರ್ವಯುತೋಬಿ ಖ್ವಮ್‌ಜಾಕೊಯ್ನಿ ಅಜು ಪರ್ಖಾ ಕೊಯ್ನಿ.

14 ಅಮ್ ಯೆಶಾಯನೆ ಬೋಲ್ಯೋತೆ ಪ್ರವಾದ್‌ನೆ ಇವ್ವಾಮ್ ಚಾಲಸ್. ಯೋ ಶಾತ್‌ಕತೊ ಆ ಅದ್ಮಿಖ್ವಾರು ಖ್ವಮ್‌ಜಾಶೆ ಅಜು ಖ್ವಮ್‌ಜಾತೂಸ್ ರ್ವಿಶೆ, ಕತೋಬಿ ಇವ್ವುನ ಮಾಲುಮ್ ಕೋ ಪಡ್‌ಶೇನಿ; ಇವ್ವೆ ದೇಕ್‌ಶೆ ಅಜು ದೇಕ್‌ತೂಸ್ ರ್ವಿಶೆ, ಕತೋಬಿ ಇವ್ವುನ ದೆಖಾವಾಶೆ ಕೊಯ್ನಿ;

15 ಆ ಅದ್ಮಿ ಖ್ವಾರಾನೊ ದಿಲ್ ಬಂಡೊ ಹುಯಿರಲ್ವಾಸ್, ಅಜು ಅವ್ವ ಡೋಳಾ ಮೂಚ್ಚಿರಲ್ವಾಸ್, ಅವ್ವೆ ಡೋಳಾಥಿ ದೇಖಿನ್, ಕಾನ್‌ಥಿ ಖ್ವಮ್‌ಜಿನ್, ದಿಲ್‌ಥಿ ಪರ್ಖಿನ್, ಮಾರಭಣಿ ಫರಿಜ್ವೆನ್ ಮಾರೇಥಿ ಅಲ್ಫು ನಾಹೊಣುಕರಿ ತೀರ್ಮಾನ್ ಕರಿರಾಖ್ವುಸ್‌ಕರಿ ಬೋಲಾನುಸ್ ಯೋ ಪ್ರವಾದ್‌ನೆ.

16 ಇನಖ್ವಾಜೆ ತುಮೆ ಧನ್ಯರ್ ಹುಯಿರಲ್ವಾಸ್. ಶನಕತೊ ತುಮಾರ ಡೋಳಾ ದೆಖಾವಸ್ ಅಜು ತುಮಾರೊ ಕಾನ್ ಖ್ವಮ್‌ಜಾಸ್.

17 ಮೇ ತುಮೂನ ಖ್ವಾಚಮಾಬಿ ಬೋಲುಸ್ತಿ, ತುಮೆ ದೇಖುಕರಾತೆ ಕಾಮ್‌ಅಖ್ವಾನ ಕೈಯೆಕ್ಕಿ ಪ್ರವಾದಿ ಖ್ವಾರುಬಿ ಅಜು ಕೈಯೆಕ್ಕಿ ನೀತಿವಾಳು ಅದ್ಮಿಖ್ವಾರು ದೇಕ್ಕುಕರಿ ಆಖ್ವ್‌ಕರಲ್ಯ ತೋಬಿ ಇವ್ವೆ ದೇಖಾನ ಕೋ ಹುಯುನಿ. ತುಮೆ ಖ್ವಮ್‌ಜುಕರಾತೆ ಸಮಾಚಾರ್ ಇವ್ವೆ ಖ್ವಮ್‌ಜಾಣು ಕರಿ ಆಖ್ವ್‌ಕರಲ್ಯತೋಬಿ ಖ್ವಮ್‌ಜು ಕೊಯ್ನಿ.

ಯೇಸುನೆ ಪಂಡಾ ಛಿಡ್ಕಾವಾಳನಿ ಮತ್‌ಲಬ್ ಬೋಲಿವತಾಳ್ವೋತೆ
(ಮಾರ್ಕ 4:13-20; ಲೂಕ 8:11-15)

18 “ಪಂಡಾ ಛಿಡ್ಕಾವಾಳನಿ ಬಾರೇಮಾನು ಮತ್ಲಬ್ ಖ್ವಮ್‌ಜೊ.

19 ಪರ್ಲೋಕ್ ರಾಜ್ಯನಿ ಖಬರ್‌ನ ಖ್ವಮ್‌ಜಿನ್, ಪರ್ಖಿ ನಾಲಿದುತೊ, ಶೈತಾನ್ ಆಯಿನ್, ಯೋ ಅದ್ಮಿನ ಮನ್‌ಮ ಪಡ್ಯತೆ ಇನ ಕಾಡಿನಾಖಸ್, ಆ ಅದ್ಮಿನ್ ಪಂಡಾ ಪಡ್ಯತೆ ವಾಟ್ನಿ ಶೇಡೆನು ಝಗೊ ಹುಯಿರಲ್ವಸ್.

20 ಏಕ್ ಜಣೊ ವಚನ್ನ ಖ್ವಮ್‌ಜ್‌ತಾಸ್, ಖ್ವಶಿಥಿ ಇನ ಮಾನಿಲೇಸ್; ಕತೋಬಿ ಜಡ್‌ಕೊಂತೆ ಇನಖ್ವಾಜೆ ಯೋ ಖಲಿ ಥೋಡುಸ್ ದನ್ ರಲ್ವೆಸ್

21 ಶನಕತೊ ಇನ ಜಡ್‌ಕೊಂತೆ ಇನಖ್ವಾಜೆ ಯೋ ಥೋಡಹಗಾಮ್ ಖಲಿರಲ್ವೆನ್ ಯೊ ವಚನ್ನಖ್ವಾಜೆ ಖ್ವತಾಪ್ಪಿ ರಲ್ವೊ ಲತಾಡ ರಲ್ವೊ ಆಯೂತೊ ಒಗ್ಗಿಸ್ ಲೊಕ್‌ರೈ ಪಡಿಜಾಸ್. ಆಸ್ ಪಂಡಾ ಪಡ್ಯತೆ ಬಂಡಾನಿ ಜಮೀನ್ ಹುಯಿರಲ್ವಸ್.

22 ಏಕ್ ಜಣೊ ವಚನ್ನ ಖ್ವಮ್‌ಜುತೋಬಿ, ಆ ಜಗತ್ನಿ ಪಶ್ತಾವ್ಣಿ ಅಜು ಧನ್-ದಾಲತ್‌ಪರ್‌ನಿ ಪ್ಯಾರ್ ಯೋ ವಚನ್ನ ದಾಬಿನಾಖಸ್, ಇನಖ್ವಾಜೆ ಯೋ ಫಲ್ ಕೋದೇಯ್ನಿ. ಆಸ್ ಕಾಟಾನ ಝಿಕ್ರಾನು ಝಗೊಪರ್ ಪಡ್ಯತೆ ಪಂಡು ಹುಯಿರಲ್ವಸ್.

23 ಏಕ್ ಜಣೊ ವಚನ್ನ ಖ್ವಮ್‌ಜಿನ್, ಇನ ಪರ್ಖಿಲಿನ್, ಯೋ ಖ್ವೋಯೆತ್ತು, ಅಜು ತೀನೀಖ್ವೆತ್ತು, ಬಿಜು ಥೋಡು ಡೋಡಿಖ್ವೆತ್ತು ಫಲ್‌ದೇಸ್. ಯೋಸ್ ಅಲ್ಫಿ ಝಗೊಮ ಪಡ್ಯತೆ ಪಂಡು ಹುಯಿರಲ್ವೆಸ್ ಕರಿ ಬೋಲ್ಯೊ.

ಶತ್ತೇನಿ ಮತ್‌ಲಬ್

24 ಯೇಸುನೆ ಬಿಜ್ಜೇಕ್ ಮತ್ಲಬ್‌ನಿ ಖೇಣಿನ ಇವ್ವುನ ಬೋಲ್ಯೊ: ಯೋ ಶಾತ್‌ಕತೊ, “ಸೊರ್ಗನಿ ರಾಜ್ಯ ಅಲ್ಫಿ ದಾಣಾನ ಖೇತರ್‌ಮ ನಾಖ್ವೊತೆ ಏಕ್ ಅದ್ಮಿನಿಪರಕ್ ಘೋಣಿ ಛಾ.

25 ಕತೋಬಿ ಏಕ್ ರಾತೆ ಅದ್ಮಿಖ್ವಾರ್ಡು ಖ್ವತುರಲ್ವಾನಿ ವಖ್ವತ್‌ಮ, ಯೋ ಅದ್ಮಿನು ದುಶ್‌ಮನ್ ಐನ್, ಘವ್‌ನ ಮಹಿ ಶತ್ತೇನ ಛಿಡ್ಕಿನ್ ಚಲೆಗಯೊ.

26 ಫಾವ್ ಫುಟಿನ್ ಬುಟ್ಟಾ ನಿಕ್ಕಾದಿನ್, ಇನಜೋಡೆ ಶತ್ತೇಬಿ ಫುಟಿ ಆಯ್.

27 ತದೆ ಯೋ ಅದ್ಮಿನು ಆಳ್‌ಖ್ತಾರು ಇನಾಕನ ಆಯಿನ್, “ಯಜಮಾನ್, ತುನೆ ತಾರ ಖೇತರ್‌ಮ ಅಲ್ಫ ದಾಣಾವ್‌ನ ನಾಖ್ಯೋಥೋನಿ; ಶತ್ತೇ ಕಿಜ್ಲಾಥು ಆಯ್?” ಕರಿ ಫುಲ್ಲಾಯ್.

28 ಯೋ ಯಜಮಾನ್, “ಆ ಏಕ್ ದುಶ್‌ಮನ್ನೆ ಕರ್ರ್ಯೊತೆ ಕಾಮ್” ಕರಿ ಬೋಲ್ಯೊ ತದೆ ಆಳ್‌ನೆ, “ಹಮೆ ಜೈನ್, ಶತ್ತೇನ ಉಖ್ತಿನಾಖೇಕಿ ಶು?” ಕರಿ ಫುಲ್ಲಾಯ್.

29 ತದೆ ಇನೆ, “ನಕೊ, ಶನಕತೊ ಶತ್ತೇ ಉಖ್ತಾನಿ ವಖ್ತಾಮ್, ತುಮೆ ಘವ್‌ನಾಬಿ ಉಖ್ತಿನಾಕ್‌ಶು.

30 ಇನಖ್ವಾಜೇಸ್ ಖ್ವುಗ್ಗೀನು ದನ್ ಆವಾತೋಡಿ ಭೇಬಿ ಜೋಡ್ವಾಸ್ ಫುಟಾದೆ. ಖ್ವುಗ್ಗೀನ ದನ್ಮ ಮೇ ವ್ಹಾಡವಾಳನ, ‘ಪಹಿಲೆ ಶತ್ತೇನ ಉಖ್ತಿನಾಖಿನ್, ಇನ ಭಾರೊ ಭಾಂದಿ ಬಾಳಿನಾಖೊ, ಅಜು ಘವ್‌ನ ಎಕ್ವು ಕರೀನ್, ಮಾರಿ ಕಣ್ಣಿಮ ಭರೊ’ ಕರಿ ಬೋಲಿಶ್” ಕರಿ ಬೋಲ್ಯೊ.

ರಾಯಿನಿ ಬಾರೇಮನು ಮತ್‌ಲಬ್
(ಮಾರ್ಕ 4:30-32; ಲೂಕ 13:18-19)

31 ಯೇಸುನೆ ಬಿಜೇಕ್ ಮತ್ಲಬ್‌ನ ಇವ್ವುನ ಬೋಲ್ಯೊ: ಯೋ ಶಾತ್‌ಕತೊ, “ಸೊರ್ಗನು ರಾಜ್ಯ ಅಮ್ ಹುಯಿರ್ರ್ವ್. ಕಿಮ್‌ಕತೊ, ಏಕ್ ಜಣಾನೆ ರಾಯಿನ ದಾಣಾನ ಲೀಜೈನ್, ಇನ ಖೇತರ್‌ಮ ಛಿಡ್‌ಕೊ.

32 ಯೋ ರಾಯಿನೊ ದಾಣೊ ಖ್ವಾರಾಸ್ ಬಿಂಜೋಳಾಥೀಬಿ ನ್ಹಾನು ಹುಯಿರ್ರ್ವ್, ತೋಬಿ ಯೋ ಫುಟಾನ ಬಾದ್‌ಖ್ವಾರಸ್ ಭಾಜಿಪಾಲಾನ ಝಾಡ್‌ಥೀಬಿ ಮೋಟು ಹುಯಿನ್, ಝಾಡು ಹುವ್ವಾಸ್, ತದೆ ಆಬ್‌ಪರ್ ಉಡಾತೆ ಜಿನಾವರ್ ಖ್ವಾರು ಆಯಿನ್, ಇನಿ ಡಾಳಿಯೇಮ ಮ್ಹಾಳೊ ಭಾಂದಿನ್ ವಖ್ವಸ್” ಕರಿಬೋಲ್ಯೊ.

ಶೋಡಾನಿ ಬಾರೇಮ ಮತ್‌ಲಬ್
(ಲೂಕ 13:20-21)

33 ಯೇಸುನೆ ಅಜೂಬಿ ಏಕ್ ಮತ್ಲಬ್‌ನಿ ಖೇಣಿನ ಬೋಲ್ಯೊ: ಯೋ ಶಾತ್‌ಕತೊ, “ಸೊರ್ಗನು ರಾಜ್ಯ ಅಮ್ ಹುಯಿರ್ರ್ವ್. ಕಿಮ್‌ಕತೊ,

ಏಕ್ ತಯೇಡಾನೆ ಶೋಡಾನ ಲೀಜೈನ್, ತೀನ್ ಶೇರ್ ಆಟಾಮ ಕಲ್ಟೆನ್ ಮ್ಹೇಲಾಖ್ತರ್, ಯೋ ಆಟೊ ಖ್ವಾರುಸ್ ಫುಗಿಯು.

ಯೇಸುನೆ ಮತ್ಲಬ್‌ನ ಬೋಲ್ಯೋತೆ

(ಮಾರ್ಕ 4:33-34)

34 ಯೇಸುನೆ ಆ ವಾತೆಖ್ವಾರು ಅದ್ಮಿನಿ ಭೀಡ್‌ಣ ಮತ್ಲಬ್‌ನಿ ಖೇಣಿಯೇಥೀಸ್ ಬೋಲ್ಯೊ; ಮತ್ಲಬ್‌ನಿ ಖೇಣಿ ಕೊಂತೆ ಶಾತ್ಪಿ ಕೋ ಬೋಲ್ಯೋನಿ.

35 ಅಮ್ಮಸ್,

“ಮೇ ಬೋಲಾನಿ ವಖ್ವತ್‌ಮ ಮತ್ಲಬ್‌ನಿ ಖೇಣಿಯೇಥಿ ಬೋಲಿಶ್;
ಜಗತ್ ಉಬ್‌ಜ್ಯತೆ ತಪ್‌ಥು ಲಪೈರ್‌ಲ್ಹೊತೆ ಬಾರೇಮ ಮೇ
ಇವ್ವುನ ಬೋಲಿಶ್” ಕರಿ ಪ್ರವಾದಿನ ಮ್ಹೋಡೆ ಬೋಲಾಯೋತೆ
ವಾತೇನ ಯೇಸುನೆ ಅಮ್ ಕರೊ.

ಶತ್ತೇನಿ ಬಾರೇಮ ಯೇಸುನೆ ಮತ್ಲಬ್‌ನ ಬೋಲಿ ವತಾಳೊತೆ.

36 ಯೇಸು ಅದ್ಮಿನ ಮ್ಹಿಂದಿನ್, ಘರೆ ಜಾವಾನ ಬಾದ್ಮ ಇನ ಶಿಷ್ಯರ್ ಇನಾಕನ ಆಯಿನ್, “ಖೇತರ್‌ಮಾನು ಶತ್ತೇನಿ ಬಾರೇಮಾನು ಮತ್ಲಬ್‌ನ ಹಮೂನ ಬೋಲಿವತಾಳ್” ಕರಿ ಬೋಲ್ಯೊ.

37 ಯೇಸುನೆ, “ಅಲ್ಫು ಪಂಡು ನಾಖವಾಳೊ ಕತೊ ಅದ್ಮಿನೊ ಲಿಯೊ;

38 ಖೇತರ್‌ಕತೊ ಆ ಜಗತ್; ಅಲ್ಫು ಪಂಡುಕತೊ ದೇವ್ನಿ ರಾಜ್ಯನು ಅದ್ಮಿಖ್ವಾರು; ಶತ್ತಿಕತೊ ಶೈತಾನ್ ಭಣಿವಾಳು ಕರಿ;

39 ಶತ್ತೇ ನಾಖ್ಯೋತೆ ದುಶ್‌ಮನ್‌ಕತೊ ಶೈತಾನ್ ಕರಿ. ಖ್ವಿಗ್ಗೀನ ದನ್‌ಕತೊ ಜಗತ್‌ನು ಖ್ವರ್ತಿನ ದನ್‌ಕರಿ ಅಜ್ಜು ವ್ಹಾಡವಾಳುಕತೊ ದೇವ್ನು ದೂತರ್ ಕರಿ.

40 ಕಿಮ್ ಶತ್ತೇನ ಉಖ್ವಿನ್ ಬಾಳಿನಾಖಿಸ್ತಿ, ಇಮ್ಮಸ್ ಜಗತ್‌ನು ಖ್ವರ್ತಿನ ದನ್ಮ್‌ಚಾಲ್‌ಷೆ.

41 ಅದ್ಮಿನೊ ಛಿಯೊ ಇನ ದೂತರ್‌ನ ಮೋಕ್ಲಿನ್, ಇವ್ವೆ ಇನ ರಾಜ್ಯಮ ಕೋಣ್ ಪಾಪ್ ಅಜ್ಜು ಖರಾಬ್‌ಕರಾನಿತರ ಕರೈಕ್ಕೀ ಇಮ್ಮ ಅದ್ಮಿಖ್ವಾರನ ಎಕ್ಕು ಕರೀನ್,

42 ಅಜ್ಜು ಇನಿ ರಾಜ್ಯಮಾಡು ಭಾರ್ ಕಾಡಿನ್ ಆಗ್‌ನ ಕುಂಡಾಮ ನಾಕ್‌ಶೆ. ಹಿಜ್ಜಾ ಇವ್ವೆ ರೊವ್‌ಶೆ ಅಜ್ಜು ಕರ್-ಕರ್ ದಾತ್‌ಘಾವ್‌ಶೆ

43 ತದೆ ನೀತಿವಾಳು ಅದ್ಮಿಖ್ವಾರು ಚಾಂದನಿಫೋಣಿ ಚಮಕ್‌ತುಹುಯಿನ್ ಇವ್ವ ಬಾನಿ ರಾಜ್ಯಮ ರಟ್ಟಿಶೆ. ಖ್ವಮ್‌ಜಾನ ಕಾನ್ ರಟ್ಟವಾಳು ಖ್ವಮ್‌ಜಾದೆ” ಕರಿ ಬೋಲ್ಯೊ.

ಲಪೈರೊತ್ತೆ ನಿಧಿನಿ ಮತ್ಲಬ್‌ನಿ ಬಾರೇಮ

44 “ಸೊರ್ಗನು ರಾಜ್ಯ ಅಮ್ ಹುಯಿರೊಸ್. ಕಿಮ್‌ಕತೊ, ಏಕ್ ಭಣಾನೆ ಖೇತರ್‌ಮ ಲಪಿರೊತ್ತೆ ನಿಧಿನ ದೇಖಿನ್, ಇನ ಪಾಲ್ಟು ಖೇತರ್‌ಮಾಸ್ ಖೋಂದಿ ಫಾಲಿದೀನ್, ಇನೇಧಿ ಘಣು ಖ್ವಶಿಹುಯಿನ್ ಜೈನ್, ಇನಾಕನ ಥೂತೆ ಖ್ವಾರುಸ್ ವೇಚಿನಾಖಿದೀನ್, ಆಯಿನ್ ಯೋ ಖೇತರ್‌ನ ಮೋಲ್‌ಲೀಲಿದೊ.

ಮುತ್ ಬಾರೇಮಾನು ಮತ್ಲಬ್‌ನಿ ಖೇಣಿ

45 “ಸೊರ್ಗನು ರಾಜ್ಯ ಅಮ್ ಹುಯಿರೊಸ್. ಕಿಮ್‌ಕತೊ, ಅಲ್ಫು ಮುತ್‌ಅಖ್ವಾನ ಥೂಂಡಾಸ್ತೆ ಏಕ್ ಧಂದೊ ಕರಾವಾಳೊ,

46 ಘಣ ಮೋಲ್ನು ಏಕ್ ಮುತ್ ದೇಖಿನ್, ಹಿಜ್ಜಾಥೊ ಜೈನ್, ಇನಾಕನ ಥೂತೆ ಖ್ವಾರುಸ್ ವೇಚಿನ್, ಯೋ ಮುತ್ ಮೋಲ್‌ಲೀಲಿದೊ.

ಜಾಳಾನಿ ಬಾರೇಮ ಮತ್ಲಬ್‌ನಿ ಖೇಣಿ

47 “ಸೊರ್ಗನು ರಾಜ್ಯ ಅಮ್ ಹುಯಿರೊಸ್. ಕಿಮ್‌ಕತೊ, ಥೋಡು ಜಣು ಮಾಲ್ಟು ಧರಾವಾಳಾನೆ ಜಾಳಾನ ದರೈವ್‌ಮ ನಾಖ್ಯು ತದೆ ಖ್ವಾರಿಸ್ ರಖ್ವಮ್‌ನು ಮಾಲ್ಟು ಇನಾಮ ಖ್ವಪ್‌ಡ್ಯು

48 ಜಾಳು ಭರಾವಾನ ಬಾದ್‌ಮ, ಇನ ಕನಾರೆ ಖೇಚಿಲೈನ್, ಬೇಶಿನ್, ಅಲ್ಫು ಮಾಲ್ಟಾವ್ವ ಟೋಕ್ರಾವ್‌ಮ ಭರಿಲೀನ್, ಖರಾಬ್ ಮಾಲ್ಟಾವ್ವ ಫೇಕಿನಾಖಿದಿದು.

49 ಅಮ್ಮನ್ ಜಗತ್ನ ಖರ್ತಿಮ ಚಾಲ್‌ಪೆ. ದೇವ್‌ನು ದೂತರ್ ಆಯಿನ್, ಧರ್ಮಿ ಅದ್ಮಿಯೇನ ಮಹಿಧು ಖರಾಬ್ ಅದ್ಮಿಯೇನ ಅಲಕ್ ಕರೀನ್,

50 ಇವ್ವುನ ಆಗ್‌ನ ಕುಂಡಾಮ. ಹಿಞ್ಜಾ ಇವ್ವೆ ರೊವ್‌ಶೆ ಅಞ್ಜು ಕರ್-ಕರ್ ದಾತ್‌ಚಾವ್‌ಶೆ” ಕರಿ ಬೋಲ್ಯೊ.

ನವಿ ಅಞ್ಜು ಞ್ಜಾನಿ ಖಾಚಿ

51 ಯೇಸುನೆ ಇನ ಶಿಷ್ಯರ್‌ನ, “ಆ ಖಾರ್ತಿ ವಾತೆನಿ ಮತ್‌ಲಬ್ ತುಮೂನ ಮಾಲುಮ್‌ಪಡ್ಕುಕಿ ಶು?” ಕರಿ ಪುಲ್ಲಾಯೊ.

ಇವ್ವೆ “ಓಹೊ” ಕರಿ ಜವಾಬ್ ದಿದಾ.

52 ತದೆ ಯೇಸುನೆ ಇನ ಶಿಷ್ಯರ್‌ನ, “ಅಮ್‌ಕತೊ, ಸೊರ್ಗ ರಾಜ್ಯನು ಶಿಷ್ಯರ್ ಬಣ್ಣುತೆ ಹರೇಕ್ ಮೋಶೆನಿ ವಚನ್ ಶಿಕಾಡವಾಳು ಶಾಸ್ತ್ರಿಯೆ, ಘರ್‌ನೊ ಯಜಮಾನ್ನಿಫೋಣಿ ಹುಯಿರ್ದ್ವಾನ್, ಯೋ ಯಜಮಾನ್ ಇನ ಘರ್‌ನಿ ಕಣ್ಣಿಮ ಞ್ಜಮ ಕರಿರಾಖ್ಯೊತೆ ನವು ಅಞ್ಜು ಞ್ಜಾನ ರಾಘಾನಖ್ವಾರು ಭಾರ್ ಕಾಡಸ್” ಕರಿ ಬೋಲ್ಯೊ.

ನಜರೇತ್‌ವಾಳು ಯೇಸುನ ಝಿಟ್ಕಾರ್ಯತೆ

(ಮಾರ್ಕ 6:1-6; ಲೂಕ 4:16-30)

53 ಯೇಸು ಆ ಮತ್ಲಬ್‌ನಿ ಖೇಣಿಯೇನ ಬೋಲಾನ ಬಾದ್‌ಮ, ಹಿಞ್ಜಾಥೊ ನಿಕ್ಕಿನ್,

54 ಇನ ಶೊಂತ್ ಗಾಮೆ ಗಯೊ. ಹಿಞ್ಜಾಯೇಸು ಯೆಹೂದ್ಯರ್‌ನ ಸಬೆ ಭರಾವಾನು ಮಂದಿರಮ ಅದ್ಮಿನ ಬೋಲಿವತಾಳ್ಳೊ, ತದೆ ಅದ್ಮಿಖಾರ್ತು ಇನ ಖಿಮ್‌ಜಿನ್, ಆಶ್ಚರ್ಯ್‌ಖೈನ್, “ಅನ ಅಮ್ಮಿ ಗ್ಯಾನ್ ಅಞ್ಜು ಅಮ್ಮು ಅದ್ಭುತ್‌ಕಾಮ್‌ಖಾರ್ತು ಕರಾನು ಕಿಞ್ಜಾಥು ಮಳ್ಳು?

55 ಆ ಯೋ ಖೋಡ್‌ಶಾನು ಖ್ವಾಮನ್ ಕರಾವಾಳಾನೊ ಛಿಯ್ಯೊ ಕಾಹೆಕಿ ಶು? ಅನಿಆಯ ಮರಿಯ ಕಾಹೆಕಿ ಶು? ಯಾಕೋಬ, ಯೋಸೇಫ, ಸೀಮೋನ್ ಅಞ್ಜು ಯೂದ ಅನ ಭೈಯೇ ಕಾಹೆಕಿ ಶು?

56 ಅನಿ ಭೇನೆ ಖ್ವಾರಿ ಹಜ್ಜಾಸ್ ರ್ವೇಸ್‌ನಿ? ಇಮ್‌ಕತೊ, ಆ ಖ್ವಾರು ಅನ ಕಿಜ್ಜಾಡ್ತು ಮಳ್ಳು?” ಕರಿ ವಾತೆ ಬೋಲಿಲಿದು. ಅಜ್ಜು ಯೇಸುನ ಝಿಟ್ಕಾರವಾಳು ಹುಯು.

57 ತದೆ ಯೇಸುನೆ ಇವ್ವುನ, “ಪ್ರವಾದಿನ ಅಲ್ವಾಪ್ ಅದ್ಮಿಮರ್ಯಾದಿ ದೇಸ್, ಕತೋಬಿ ಶೊಂತ್ ಗಾಮ್‌ನು ಅದ್ಮಿನರ್ವ್ವೊ, ಶೊಂತ್ ಘರ್‌ನು ಅದ್ಮಿನರ್ವ್ವೊ ಮರ್ಯಾದಿ ಕೋ ದೇಯ್ತಿ” ಕರಿ ಬೋಲ್ಯೊ.

58 ಇವ್ವೆ ಇನ ನಂಬ್ಯುಕೊಂತೆ ಇನಖ್ವಾಜೆ, ಯೇಸುನೆ ಹಿಜ್ಜಾ ಘಣು ಅದ್ಭುತ್‌ಕಾಮ್ನು ಕೋ ಕರ್ರೋನಿ.

14

ಬ್ಯಾಪ್ತಿಸ್ಮದ್ಯವಾಳೊ ಯೋಹಾನ ಮರ್ರೋತೆ ಬಾರೇಮ

(ಮಾರ್ಕ 6:14-29; ಲೂಕ 9:7-9)

1 ಯೋ ದನೂಮ, ಹೆರೋದ ಗಲಿಲಾಯಮ ರಾಜ್‌ಭಾರ್ ಚಲಾವ್ ಕರ್ತೊಥೊ, ಅದ್ಮಿಖ್ವಾರು ಯೇಸುನಿ ಬಾರೇಮ ಬೋಲುಕರ್ತುಥೊತೆ ಇನೆ ಖ್ವಮ್‌ಜೊ.

2 ಇನಖ್ವಾಜೆ ಇನೆ ಇನ ಸೇವಕರ್‌ನ, “ಖ್ವಾಚಮಾಬಿ ಯೇಸುಸ್ ಬ್ಯಾಪ್ತಿಸ್ಮದ್ಯವಾಳೊ ಯೋಹಾನ ಹುಯಿರ್‌ಹೊಸ್, ಯೋಸ್ ಪಾಲ್ಟೊ ಜಿವ್ವೊಹುಯಿನ್ ಐರ್ರೋಸ್. ಇನಖ್ವಾಜೇಸ್ ಆ ಖ್ವಾರು ಅದ್ಭುತ್ ಕರಾನ ಶಕತ್ ಮಳ್ಳಿರ್ರೇಸ್ತೆ” ಕರಿ ಬೋಲ್ಯೊ.

3 ಹೆರೋದನೆ ಹೆರೋದ್ಯನಖ್ವಾಜೆ ಯೋಹಾನ್ನ್ ಧರೈನ್, ಭಂದೈನ್, ಜೇಲ್‌ಮ ಕೋಂಡಿ ಘಲಾಯೋಥೊ. ಆ ಹೆರೋದ್ಯ ಹೆರೋದನೊ ಮೋಟೊ ಬೈಫಿಲಿಪ್ಪನಿ ಬಾವಣ್ ಹುಯಿರ್ರೇಡಿ.

4 ಯೋಹಾನ ಹೆರೋದಾನ, “ತೊ ಹೆರೋದ್ಯನ ರಾಖಿರಾಖ್ವೊತೆ ನ್ಯಾಪ್‌ಕಾಹೆ” ಕರಿ ಬೋಲ್ತೊರ್ರೇತೋಥೊ.

5 ಹೆರೋದ ಯೋಹಾನ್ನ್ ಮರೈನಾಕ್ಲು ಕರಿ ಥೊ, ತೋಬಿ ಅದ್ಮಿಖ್ವಾರು ಯೋಹಾನ ಏಕ್ ಪ್ರವಾದಿ ಕರಿ ಮಾನ್‌ತುಥೊತೆ ಇನಖ್ವಾಜೆ, ಅದ್ಮಿನ ಡರ್‌ಥಿ ಇನ ಮರಾಯೊ ಕೊಯ್ತಿ.

6 ಹೆರೋದನೊ ಪೈದಾಖ್ವೊನೊ ದನ್ಮ ಹೆರೋದ್ವನಿ ಛೋರಿ ಹೆರೋದ ಅಜ್ಜು ಇನ ಮೆಹಮಾನ್ನ ಖ್ವಾಪ್ಪೆ ನಾಚಿನ್ ವತಾಳಿ. ಅನೇಥಿ ಹೆರೋದನ ಘಣು ಖ್ವುಶಿ ಹುಯು.

7 ಇನಖ್ವಾಜೆ ಇನೆ, “ತೂ ಶಾತ್ ಬೋಲಿಲಿದಿತೋಬಿ, ಮೇ ತುನ ದೆವುಸ್” ಕರಿ ಯೋ ಛೋಕ್ರಿನ ವಾಗ್ವಾನ್‌ದಿದೊ

8 ತದೆ ಇನಿ ಆಯ ಶಾತ್ ಮಾಂಗಿಲೆವ್ವು ಕರಿ ಇನ ಬೋಲಿದಿದಿ. ತದೆ ಇನೆ, “ಹಮ್ಮೆ, ಹಜ್ವಾಸ್ ಬ್ಯಾಪ್ತಿಸ್ಮದ್ಯವಾಳೊ ಯೋಹಾನನು ಮುಡ್‌ಕ್ಯ ಪತ್ತರಾಮ ಮಂಗೈನ್, ಮನ ದೇವ್ವು” ಕರಿ ಬೋಲಿ.

9 ಯೋ ವಾತೇಥಿ ರಾಜಾನ ದುಖ್ ಹುಯು, ತೋಬಿ ಇನೆ ಇನ ಮೆಹಮಾನ್ ಅಖ್ವಾನ ಖ್ವಾಪ್ಪೆ ಆಣ್ ದಿದೋತೆ ಇನಖ್ವಾಜೆ, ಇನೆ ಮಾಂಗಿತೆ ಇನ ದೇವ್ವು ಕರಿ ಹುಕುಮ್ ದಿದೊ.

10 ಅಜ್ಜು ಆಳನ್ ಮೋಕ್ಲಿನ್, ಜೇಲ್‌ಮ ಕೋಂಡಿ ಘಾಲಿರಾಖ್ವುತೆ ಹಿಜ್ವಾಯೋಹಾನನು ಮುಡ್‌ಕ್ಯ ಕತ್ರಾಯೊ.

11 ಇವ್ವೆ ಯೋಹಾನನ ಮುಡ್‌ಕ್ಯಾನ್ ಪತ್ತರಾಮ ಲೈನ್, ಯೋ ಛೋಕ್ರಿನ ದಿದು. ಇನೆ ಯೋ ಮುಡ್‌ಕ್ಯಾನ್ ಇನಿ ಆಯಕನ ಲೀಗೈ.

12 ಯೋಹಾನನು ಶಿಷ್ಯರ್ ಆಯಿನ್, ಇನು ಧಡ್‌ನ ಪಳ್ಳಿಜೈನ್, ಘವಿಮ ಘಾಲ್ಯು. ಅನಕೇಡೆಥು ಇವ್ವೆ ಯೇಸುಕನ ಜೈನ್, ಚಾಲ್ಯುತೆ ಬಾರೇಮ ಬೋಲ್ಯು.

ಯೇಸುನೆ ಪಾಚ್ ಹಜಾರ್ ಅದ್ವಿನ ಖಡಾಯೋತೆ

(ಮಾರ್ಕ 6:30-44; ಲೂಕ 9:10-17)

13 ಯೇಸುನೆ ಯೋಹಾನನಿ ಬಾರೇಮಾನು ಖಬರ್‌ನ ಖ್ವಮ್‌ಜಿನ್, ಯೋ ಝಗೋನ ಮ್ಹೊಂದಿನ್, ಡೋಣ್ ಚಥೀನ್, ಎಕ್ವಸ್ ಭಣೊ ಉಜ್ವಾಡಿ ಝಗೋನ ಚಲೆಗಯೊ. ಅನ ಖ್ವಮ್‌ಜಿನ್ ಅದ್ವಿಖ್ವಾರು, ಇವ್ವ-ಇವ್ವ ಗಾಮ್‌ನ ಮ್ಹೊಂದಿನ್, ಗೋಡೇಥೀಸ್ ಚಾಲಿನ್ ಯೇಸುನ ಪೀಲೆಗಯು.

14 ಯೇಸು ಡೋಣ್‌ಮಾಥು ಭಾರ್ ಆಯಿನ್, ಅದ್ಮಿನಿ ಘಣಿ ಮೋಟಿ ಭೀಡ್‌ಣ ದೇಖಿನ್, ಇವ್ವಾಪರ್ ಗೋರ್‌ಖೈನ್, ರೋಗ್‌ಮ ರ್ವಾಳಾನ್ ಖ್ವಾರು ಅಱ್ಱು ಕರೈಯ್.

15 ಖ್ವಾಂಜ್ ಹುವ್ವಾದೀನ್, ಇನ್ ಶಿಷ್ಯರ್ ಇನಾಕನ್ ಐನ್, “ಆ ಉಜ್ಜಾಡಿ ಝಗೊ, ಅಜ್ಜು ವಖ್ವತ್‌ಬಿ ಘಣಿ ಹುಯಿಗೈ, ಆ ಅದ್ಮಿಖ್ವಾರು ಇವ್ವಾಪರ್ ಖಾಣನು ರಾಱ್ಱು ಲ್ಯವಾನಟೇಕೆ, ಇವ್ವುನ್ ಗಾಮೆ ಬೋಲಿಮೋಕಲ್” ಕರಿ ಬೋಲ್ಯ.

16 ಯೇಸುನೆ ಇವ್ವುನ್, “ಅದ್ಮಿಖ್ವಾರು ಜಾವಾನು ನಕೊ, ತುಮೇಸ್ ಇವ್ವುನ್ ಖಾವಾನ ಶಾತ್‌ತೋಬಿ ದೆವೊ!” ಕರಿ ಬೋಲ್ಯೊ.

17 ತದೆ ಶಿಷ್ಯರ್‌ನೆ, “ಹಜ್ಜಾ ಹಮಾರಕನ್ ಪಾಚ್ ರೋಟಾ ಅಜ್ಜು ಬೇ ಮಾಲ್ಟಾಲಾ ಎತ್ಸುಸ್ ಛಾತೆ” ಕರಿ ಜವಾಬ್ ದಿದಾ.

18 ತದೆ ಯೇಸುನೆ, “ಇನ್ ಹಜ್ಜಾ ಮಾರಕನ್ ಲೀನ್, ಆವೊ” ಕರಿ ಬೋಲ್ಯೊ.

19 ಅಜ್ಜು ಅದ್ಮಿಖ್ವಾರಾನ್ ಫಾಖ್ವೊಪರ್ ಬೇಖೊಕರಿ ಬೋಲಿನ್, ಯೋ ಪಾಚ್ ರೋಟಾ ಅಜ್ಜು ಬೇ ಮಾಲ್ಟಾಲಾನ್ ಪಾಡಿಲೀನ್, ಆಬ್‌ಭಣಿ ದೇಖಿನ್, ದೇವ್ವ ಧನ್ಯವಾದ್ ಕರೀನ್, ಯೋ ರೋಟಾವ್ವ ತೋಡಿನ್, ಶಿಷ್ಯರ್‌ನ್ ಹಾತ್‌ಮ ದಿದೊ. ಶಿಷ್ಯರ್‌ನೆ ಅದ್ಮಿನಿ ಝುಂಡೆನ್ ದಿದಾ.

20 ತಮಾಮ್ ಅದ್ಮಿ ಖೈನ್ ಬಶ್‌ಹುಯು. ಉಬ್‌ರೈತೆ ಟುಕ್ಕಾವ್‌ನ್ ಜಮಾಕರ್ತ್‌ಖ್ವಾರ್ ಭಾರ ಟೋಕ್ರಾ ಭರಾಯು.

21 ಖಾಣು ಖಾದೂತೆ ಇವ್ವಾಮ ತಯೇಡ ಅಜ್ಜು ಲಡ್ಕಾವ್ವ ಮ್ಹಂದಿನ್, ಪರ್ವಾ ಅದ್ಮಿನ್ ಕಮ್‌ಶಿಕಮ್ ಪಾಚ್ ಹಜ್ಜಾರ್‌ಜಣು ಥೂ.

ಯೇಸುನೆ ದರೈವ್‌ಪರ್ ಚಾಲ್ಯೊತೆ

(ಮಾರ್ಕ 6:45-52; ಲೂಕ 6:15-21)

22 ಅನಕೇಡೆಥು ಯೇಸುನೆ ಇನ್ ಶಿಷ್ಯರ್‌ನ್, “ಮೇ ಆ ಅದ್ಮಿನಿ ಭೀಡ್‌ಣ ಮೋಕ್ಲಾನ್ ಮಹಿ, ತುಮೆ ಡೋಣ್ ಚ್ಚಡೀನ್, ಪಹಿಲೆ ಪಾರ್ಲಿ ಕನಾರೆ ಜಾವೊ” ಕರಿ ಬೋಲ್ಯೊ.

23 ಅದ್ವಿನಿ ಭೀಡಣ ಮೋಕ್ಲಾನ ಬಾದ್‌ಮ, ಪ್ರಾರ್ಥನೆ ಕರಾನಖ್ವಾಜಿ ಯೋ ಎಕ್ಲೋಸ್ ಪಹಾಡ್‌ಪರ್ ಗಯೊ. ದನ್ ಡುಬಾನ ಬಾದ್‌ಮ, ಯೇಸು ಎಕ್ಲೋಸ್ ಹಿಜ್ಜಾಧೊ.

24 ಎತ್ರಾಸ್‌ಮ ಡೋಣ್ ಜಮೀನ್‌ಧಿ ಘಣಿ ದೂರ್ ಜೈರ್ದಿ, ಅಜ್ಜು ಖ್ವಾಮ್ಜೆನೊ ವಹಿರೊ ವಾಗುಕರ್ತೋಧೋತೆ ಇನಖ್ವಾಜಿ, ಡೋಣ್ ದರ್ರಾವ್‌ನ ಇಚ್‌ಮ ಜೋಕಾಳ್‌ನ ಮಾರ್‌ಮ ಖ್ವಾಡಿರ್ದಿ.

25 ವ್ಹಾಣ್‌ಖ್ವತ್ರೆ ಚಾರ್ ಘಂಟಾ ಹುಯಿರ್ದು, ತದೆ ಯೇಸು ದರ್ರಾವ್‌ಪರ್ ಚಾಲ್ತೊಹುಯಿನ್ ಶಿಷ್ಯರ್ ಭಣಿ ಆಯೊ.

26 ದರ್ರಾವ್‌ಪರ್ ಚಾಲ್ತೊವಳ್ಳಾವಾತೆ ಯೇಸುನ ಶಿಷ್ಯರಾನ್ ದೇಖಿನ್, ಘಬ್‌ರೈಗಯ. ಅಜ್ಜು ಭೂತ್‌ಕರಿ ಸೋಚಿನ್, ಡರ್ದಿ ಚಿಕ್‌ರ್ದಿ.

27 ತದ್‌ನು-ತದ್ದೇಸ್ ಯೇಸುನೆ ವಾತೆ ಬೋಲಿನ್ ಇವ್ವುನ್, “ಹಿಮ್ಮತ್ ರ್ದಿವಾದೆ; ಆ ಮೇಸ್! ಡರೊ ನಕೊ!” ಕರಿ ಬೋಲ್ಯೊ.

28 ತದೆ ಪೇತ್ರನೆ, “ಪ್ರಭು, ಆ ತೂಸ್ ಉಶೇತೊ, ಮನ ಪಾಣಿಪರ್ ಚಾಲಿನ್ ತಾರಕನ ಆವಾನ ಹುಕುಮ್ ದೇ” ಕರಿ ಬೋಲ್ಯೊ.

29 ಯೇಸುನೆ ಇನ, “ಆವ್!” ಕರಿ ಜವಾಬ್‌ದಿದೊ. ತದೆ ಪೇತ್ರ ಯೇಸುಕನ ಜಾವಾನಖ್ವಾಜಿ ಡೋಣ್‌ಮಾಧು ಉತ್ರಿನ್, ಪಾಣಿಪರ್ ಚಾಲಲಗ್ಯೊ.

30 ಕತೋಬಿ ವ್ಹಯಿರಾನ ರಪಾಟಾನ ದೇಖಿನ್ ಡರಿನ್, ಪಾಣಿಮ ಡುಬಾಲಗ್ಯೊ ಅಜ್ಜು “ಪ್ರಭು, ಮನ ಬಚಾಡ್!” ಕರಿ ಚಿಕ್‌ರ್ದಿ.

31 ಯೋಸ್ ವಖ್ವತ್‌ಮ ಯೇಸು ಹಾತ್ ಖ್ವಾಮ್ಜೆ ಕರೀನ್, ಇನ ಧರೀನ್, “ಏ ಕಮ್‌ವಿಶ್ವಾಸ್‌ವಾಳ! ತೂ ಶನ ಶಕ್ ಕರ್ದಿ?” ಕರಿ ಬೋಲ್ಯೊ.

32 ಇವ್ವೆ ಡೋಣ್‌ಮ ಚಡ್ಡಾನ ಬಾದ್‌ಮ, ವಹಿರೊ ಭೀರಿಗಯೊ.

33 ತದೆ ಡೋಣ್‌ಮ ಥಾತೆ ಶಿಷ್ಯರಾನ್, “ಖ್ವಾಚಮಾಬಿ ತೂ ದೇವ್‌ನೊ ಛಿಯೊ” ಕರಿ ಬೋಲಿನ್, ಯೇಸುನ ಆರಾದನೆ ಕರ್ದಿ.

ಯೇಸುನೆ ಗೆನೆಜರೇತ್‌ಮ ಥೂತೆ ರೋಗ್‌ವಾಳಾನ ಅಟ್ಟು
ಕರಯ್ತೆ

(ಮಾರ್ಕ 6:53-56)

³⁴ ಇವ್ಣೆ ದರಯ್‌ವಾನ್ ಮ್ಹೇಲಿನ್, ಗೆನೆಜರೇತ್ ಝಗೋನಿ ಕನಾರೆಕನ
ಆಯಾ.

³⁵ ಯೋ ಝಗೋವಾಳು ಯೇಸುನಿ ಖ್ವಣೇದ್ ಧರೀನ್, ಇವ್ಣೆ ಯೋ
ಅಶ್‌ಪಿಶ್‌ನು ತಬರ್‌ಖಾಮ ಖ್ವಾರು ಬೋಲಿಮೋಕ್ಲಿನ್, ರೋಗ್‌ಮ
ರ್ದವಾಳ ತಮಾಮ್‌ನ ಯೇಸುಕನ ಬುಲೈ ಮಂಗಾಯು.

³⁶ ಇವ್ಣೆ ಯೇಸುನ, “ಆ ರೋಗ್‌ಮ ರ್ದವಾಳಾನ ತಾರು ಲುಂಗ್ಡಾನು
ಕೋಣೊತೋಬಿ ಛೇಮಾನ ಮ್ಹೇಲ್” ಕರಿ ಗಿಂಗೈಲಿದು. ಅಜು ಇನು
ಲುಂಗ್ಡ ಛೇಮ್ತೊತೆ ಹರೇಕ್ ಅಟ್ಟು ಹುಯು.

15

ಗುರುಗುರಬ್‌ಲ್ಯನೆ ಶಿಕಾಡ್ಯತೆ ಬಾರೇಮ

(ಮಾರ್ಕ 7:1-13)

¹ ಬಾದ್‌ಮ ಯೆರೂಸಲೇಮ್‌ಥು ಫರಿಸಾಯರ್ ಅಜು ಮೋಶೆನಿ
ವಚನ್ನ ಶಿಕಾಡವಾಳು ಶಾಸ್ತ್ರಿಯೆ ಯೇಸುಕನ ಆಯಿನ್,

² “ತಾರು ಶಿಷ್ಯರ್ ಅಪ್ಪ ಶಾಣವ್‌ಥಿ ಆಯೂತೆ ಆದತ್‌ನ ಶನ
ಪಾಡಿನ್ ಚಾಲಕೊಯ್ತಿ? ಇವ್ಣೆ ಹಾತ್ ಧೊವಾಕೊಂತೆ ಖಾಣು ಖಾಸ್ತಿ”
ಕರಿ ಪುಲ್ಲಾಯು.

³ ಯೇಸುನೆ ಇವ್ಣುನ, “ತುಮೆ ತುಮಾರಿ ಆದತ್‌ನ ಪಾಡಿ
ಚಾಲಾನಖ್ವಾಜೆ ದೇವ್ನಿ ಹುಕುಮ್‌ನ ಶನ ತೋಡೊಸ್ತೆ?

⁴ ಕಿಮ್‌ಕತೊ, ‘ಆಯ-ಬಾನ ಮರ್ಯಾದಿ ದೇವ್ಣು ಆಯನ ರ್ದವೊ,
ಬಾನ ರ್ದವೊ ಶಾಪ್ಪ-ಶಬರ್ ದೆವಾಳಾನ ಮರಣ್ ದಂಡ್ ಹೋಣು’ ಕರಿ
ದೇವ್ಣೆ ಬೋಲಿರಾಖ್ಯೊಸ್.

⁵ ಕತೋಬಿ ತುಮೆತೋ, ಕೋಣ್‌ತೋಬಿ ಇನ ಬಾನ ರ್ದವೊ,
ಆಯಾನ ರ್ದವೊ ದೇಖಿನ್, ‘ಮೇ ತಾರಿ ಖ್ವದ್ದರ್‌ನಖ್ವಾಜೆ ದೇವ್ಣುಧೂತೆ
ಇನ ದೇವ್ಣುಖ್ವಾಜೆ ಮುಡಪ್ ಕರಖ್ಯೊಸ್’ ಕರಿ ಬೋಲೊತೊ,

6 ಯೋ ಇನ ಆಯ-ಬಾನ ಮರ್ಯಾದಿ ದೆವಾನು ಜರೂರತ್ ಕೊಯ್ತಿ ಕರಿ ಬೋಲಿದೆವೋಸ್. ಅಮ್ ಕರಾಥಿ ತುಮಾರಿ ಆದತ್ಥೀಸ್ ದೇವ್ನಿ ಹುಕುಮ್‌ನ ಫಾಯಿದೊಕೊಂತೆ ಇಮ್ ಕರಿರಾಖ್ಯಾಸ್.

7 ತುಮೆ ಖೋಟ್ ದಿಲ್‌ವಾಳ! ಯೆಶಾಯನೆ ತುಮಾರಿ ಬಾರೇಮ ಬರೊಬರ್‌ಥೀಸ್ ಪ್ರವಾದನೆ ಕರಿರಾಖ್ಯೋಸ್! ಯೋ ಶಾತ್‌ಕತೊ: ದೇವ್ನೆ ಬೋಲ್ಯೊಕಿ,

8 ‘ಆ ಅದ್ವಿಖ್ತಾರು ವಾತೇಥಿ ಮನ ಮರ್ಯಾದಿ ದೇಸ್, ಕತೋಬಿ ಅವ್ಣೊ ದಿಲ್ ಮಾರೇಥಿ ದೂರ್ ಛಾ.

9 ಅದ್ವಿನ ಖೂಜ್‌ನಿತರ ಶಿಕಾಡ್ತು ಆಯೊತೆ ಇನಾಸ್ ದೇವ್ನಿ ಹುಕುಮ್‌ನಿಫೋಣಿ ಬೋಲಿಶಿಕಾಡವಾಳ ಅವ್ಣೆ ಮನ ಆರಾದನೆ ಕರಾನು ಕಾಮ್ನಕೊಯ್ತಿ.

ಅದ್ವಿನ ಗಲೀಜ್ ಬಣಾವಸ್ತೆ ರಾಛು
(ಮಾರ್ಕ 7:14-23)

10 ಅನಕೇಡೆಥು ಯೇಸುನೆ ಅದ್ವಿನ ಝೂಂಡ್‌ನ ಖನ್ನೆ ಬುಲೈನ್ ಇವ್ಣುನ, ಕಾನ್ ದೀನ್, “ಖ್ವಮ್‌ಜೊ, ಅಜ್ಜು ಮಾಲುಮ್ ಕರಿಲೆವೊ!

11 ಬಾಕನ ಮಹಿಝಾಸ್ತೆ ಯೋ ಅದ್ವಿನ ಮೈಲುಕರಾಕೊಯ್ತಿ ಮ್ಹೊಡಾನ ಮಹಿಥು ಭಾರ್ ನಿಕ್ಕಾಸ್ತೆ ಯೋಸ್ ಅದ್ವಿನ ಮೈಲುಬಣಾವಸ್” ಕರಿ ಬೋಲ್ಯೊ.

12 ತದೆ ಶಿಷ್ಯರ್ ಯೇಸುಕನ ಆಯಿನ್, “ತುನೆ ಬೋಲ್ಯೊತೆ ವಾತೇನ ಖ್ವಮ್‌ಜಿನ್, ಫರಿಸಾಯರ್‌ವಾಳು ಇರಾದೊ ಕರೈತೆ ತುನ ಮಾಲುಮ್‌ಪಡ್ಕುಕಿಶು?” ಕರಿ ಬೋಲ್ಯೊ.

13 ಯೇಸುನೆ, “ಪರಲೋಕ್‌ಮ ಛಾತೆ ಮಾರೊ ಬಾ ಗಾಡ್ಕೊಕೊಂತೆ ಝಾಡಖ್ತಾರನ ಇಡ್ ಖ್ವಮೇಥು ಉಖ್ವಿ ನಾಕೆಶೆ” ಕರಿ ಜವಾಬ್ ದಿದೊ.

14 “ಇವ್ಣಿ ಬಾರೇಮ ಫಿಕರ್ ನಕೊ ಕರೊ! ಇವ್ಣೆ ಕಾಣು ಹುಯಿರ್ದ್ವಸ್, ಬಿಝಾನ ವಾಟ್ ವತಾಳನ ಝಾಸ್, ಕಾಣೊ ಕಾಣಾನ ವಾಟ್ ವತಾಳೊತೊ ಇವ್ಣೆ ಭೇ ಝಣು ಖಾಡ್‌ಮ ಪಡಾಸ್” ಕರಿ ಬೋಲ್ಯೊ.

15 ತದೆ ಪೇತ್ರನೆ, “ಆ ಮತ್ಲಬ್‌ನಿ ಖೇಣಿನ ಹಮೂನ ಬೋಲಿವತಾಳ್” ಕರಿ ಬೋಲ್ಯೊ.

16 ಯೇಸುನೆ ಇವ್ವುನ, ಬಿಜ್ಞಾನಿ ಘೋಣಿ ತುಮೂನಾಬಿ ಬುದ್ಧಿ ಕೊಯ್ತಿಕಿ ಶು?

17 ಮ್ಹೋಡಾಮ ಜ್ಞಾಸ್ತೆ ಖ್ವಾರುಸ್, ಪೇಟ್‌ಮ ಜೈನ್, ಇನಕೇಡೆಥು ಭಾರ್‌ಮ ನಿಕ್ಕಿಜ್ಞಾಸ್ ಕರಿ ಬೋಲಾನು ತುಮೂನ ಮಾಲುಮ್ ಕೋ ಪಡ್ತುನಿಕಿ ಶು?

18 ಕತೋಬಿ ಮ್ಹೋಡಾಮಾಥು ನಿಕ್ಕಾಸ್ತೆ ವಾತೆ ಇನ ದಿಲ್‌ಮಾಥು ಆವಸ್, ಆಸ್ ಅದ್ವಿನ ಅಶುದ್ಧ ಬಣಾವಸ್ತೆ.

19 ಕಿಮ್‌ಕತೊ, ದಿಲ್‌ಮಾಥು ಖರಾಬ್‌ಸೋಚ್, ಖೂನ್‌ಕರಾನು, ವ್ಯಬಿಚಾರ್, ಅಜ್ಜು ಪಾಪೇಲುಕಾಮ್, ಚೋರಿಕರಾನು, ಅಜ್ಜು ಗಾಳೆಅಖ್ಲು ಭಾರ್ ನಿಕ್ಕಾಸ್.

20 ಅಮ್ಮುಸ್‌ಖ್ವಾರು ಅದ್ವಿನ ಮೈಲುಬಣಾವಾಸ್ತೆ. ಕತೋಬಿ ಇವ್ಣೆ ಬೋಲಾತೆ ಇಮ್ ಹಾತ್ ಧೊವಾಕೊಂತೆ ಖಾಣು ಖವಾನು ಅದ್ವಿನ ಅಶುದ್ಧ ಕೋಬಣಾವಾನಿ” ಕರಿ ಬೋಲ್ಯೊ.

ಏಕ್ ತಯೇಡಾನಿ ವಿಶ್ವಾಸ್‌ನಿ ಬಾರೇಮ

(ಮಾರ್ಕ್ 7:24-30)

21 ಯೇಸು ಯೋ ಝಗೋನ ಮ್ಹಿಂದಿನ್, ತೂರ್ ಅಜ್ಜು ಸೀದೋನ್ ಖ್ವಯೇರ್ ಖನ್ನೇನು ತಬರ್‌ಖಾನ ಚಲೆಗಯೊ.

22 ಯೋ ಮುಲಕ್‌ಮ ರ್ವೈತಿಥೀತೆ ಕಾನಾನ್‌ವಾಳಿ ಏಕ್ ತಯೇಡ ಇನಾಕನ ಆಯಿನ್, “ದಾವೀದ್‌ನ ಛಿಯ್ಯಾ! ಪ್ರಭು, ಮಾರಪರ್ ಗೋರ್ ಕರ್! ಮಾರಿ ಛೋರಿಮ ಭೂತ್ ಛಾ ಅಜ್ಜು ಘಣಿ ಖರಾಬ್ ಹಾಲ್‌ಮ ಯೋ ಛಾ” ಕರಿ ಚಿಕ್ರಿನ್ ಬೋಲಿ.

23 ಕತೋಬಿ ಯೇಸುನೆ ಇನ ಶನೀಶ್ ಜವಾಬ್ ಕೋ ದಿದೋನಿ, ತದೆ ಇನ ಶಿಷ್ಯರ್‌ನೆ ಯೇಸುಕನ ಆಯಿನ್, “ಯೋ ತಯೇಡಾನ ಮೋಕ್ತೆದೆ! ಯೋ ಚಿಕರ್ತಿ ಹುಯಿನ್ ಅಪ್ಪಪೀರೇಸ್ ವಳಿಆವಸ್!” ಕರಿ ಗಿಂಗಾಯು.

24 ತದೆ ಯೇಸುನೆ ಫರೈನ್ ಬೋಲ್ಯೋಕಿ, “ಗುಮೈಗಯೂತೆ ಮೇಂಡವಾನಿ ಘೋಣಿ ಛಾತೆ ಇಸ್ರಾಯೇಲ್‌ನು ಅದ್ವಿನ ಮೈಂದಿನ ಬಿಜ್ಞ ಕಿನಾಕನಾಬಿ ದೇವ್ವೆ ಮನ ಮೋಕ್‌ಲ್ಯೊಕೊಯ್ತಿ” ಕರಿ ಬೋಲ್ಯೊ.

25 ತದೆ ಯೋ ತಯೇಡ ಯೋಸ್ ಆಯಿನ್, ಇನ ಆಡ್‌ಪಡಿನ, ಪ್ರಭು ಮನ ಮದತ್‌ಕರ್!” ಕರಿ ಗಿಂಗೈ.

26 ಯೇಸುನೆ ಇನ, “ಲಡ್ಕಾ ಖಾವಾನು ರೋಟಾವ್ವ ಪಾಡೀನ್, ಕುತ್‌ರ್ಯಾವ್‌ನ ನಾಖಾನು ಬರೋಬರ್‌ಕೊಯ್ತಿ” ಕರಿ ಜವಾಬ್ ದಿದೊ.

27 ಯೋ ತಯೇಡಾನೆ, “ಯೋ ವಾತೆ ಖ್ವಾಚಾಸ್‌ಲಾ ಪ್ರಭು, ಕುತ್‌ರ್ಯಾಖ್ವಾರು ಇವ್ವೊಯಜಮಾನ್ನು ಮೇಜ್‌ಪರ್‌ಥು ಹೇಟ್ ಪಡಾಸ್ತೆ ರೋಟಾನು ಟುಕ್ಡಾವ್‌ನ ಖಾಸ್ತಿ” ಕರಿ ಬೋಲಿ.

28 ತದೆ ಯೇಸುನೆ ಇನ, “ಬಾಯಿ, ತಾರಿ ವಿಶ್ವಾಸ್ ಘಣಿ ಮೋಟಿ! ತಾರ ಮನ್‌ಮ ಛಾತೆ ಇಮ್‌ಮ್ ತುನ ಹುವಾದೆ” ಕರಿ ಜವಾಬ್ ದಿದೊ. ಯೋಸ್ ವಖ್ವತ್‌ಮ ಇನಿ ಛೋರಿನ ಅಛ್ವುಹುಯು.

ಯೇಸುನೆ ಕೈಯೆಕ್ಕಿ ಅದ್ವಿನ ಅಛ್ವು ಕರೈತಿ

29 ಯೇಸು ಹಿಜ್ವಾಛೊ ನಿಕ್ಕಿನ್, ಗಲಿಲಾಯ ದರೈವ್‌ಕನ ಆಯಿನ್, ಪಹಾಡ್‌ಪರ್ ಚಢೀನ್ ಬೇಶಿಗಯೊ.

30 ತದೆ ಅದ್ವಿಖ್ವಾರು ಝೂಂಡ್-ಝೂಂಡ್ ಹುಯಿನ್, ಇನಾಕನ ಆಯು, ಇವ್ವೆ ಲಂಗ್ವ, ಕಾಣು, ಮುಕ್ಕು, ಹಾತ್‌ಗೋಡಕೊಂತೆ ಅಜ್ಜು ಕೈಯೆಕ್ಕಿ ಬಿಜಿ ತರೈವ್‌ನು ರೋಗ್-ರಾಯಮ ರೈವಾಳ ಅದ್ವಿನ ಯೇಸುನ ಗೋಡಾಕನ ಲಯಿನ್ ಮ್ವೇಲ್ಯು. ಯೇಸುನೆ ಇವ್ವುನ ಅಛ್ವು ಕರೈತಿ.

31 ಮುಕ್ಕುರೈವಾಳು ವಾತೆ ಬೋಲ್ಯಾತೆ, ಹಾತ್‌ಗೋಡಾಕೊಂತೆ ಅದ್ವಿಖ್ವಾರು ಅಛ್ವು ಹುಯೂತೆ, ಲಂಗ್ವಖ್ವಾರು ಚಾಲ್ಯುತೆ, ಕಾಣಾವ್ವ ಡೋಳಾ ಆಯೂತೆ, ಅದ್ವಿಖ್ವಾರು ದೇಖಿನ್ ಆಶ್ವರ್ಯವಾದು ಅಜ್ಜು ಇಸ್ರಾಯೇಲ್‌ನೊ ದೇವ್ವ ಸ್ತುತಿ ಕರೈ.

**ಯೇಸುನೆ ಚಾರ್ ಹಜಾರ್ ಅದ್ವಿನ ಖಡಾಯೋತೆ
(ಮಾರ್ಕ 8:1-10)**

32 ಯೇಸುನೆ ಇನ ಶಿಷ್ಯರನ ಖನ್ನೆ ಬುಲೈನ್, ಇವ್ವುನ, “ಆ ಖ್ವಾರ ಅದ್ಮಿನ ದೇಖಿನ್, ಮನ ಗೋರ್ಲಾಗಸ್, ಅವ್ವೆ ಮಾರಕನ ಆಯಿನ್, ತೀನ್ ದನ್ ಹುಯಿಗಾ; ಇವ್ವುನ ಖಾಣನ ಶಾಪ್ಪಿ ಕೊಯ್ವು; ಅವ್ವುನ ಭುಕ್ಕುಸ್ ಮೋಕ್ಲಾನ ಮನ ಮನ್‌ಕೊಯ್ವು; ಜಾವಾನಿ ವಖ್ವತ್‌ಮ ಅವ್ವೆ ಥಕಿಜಾಶೆ” ಕರಿ ಬೋಲ್ಯೊ.

33 ಶಿಷ್ಯರನೆ ಯೇಸುನ, “ಅತ್ರಾಅದ್ಮಿನ ಬಶ್ ಹುವ್ವಾವತ್ತು ಖಾಣು ಆ ಉಜ್ಜಾಡಿ ಝಗೋಮ ಹಮೂನ ಕಿಜ್ಜಾಥು ಮಳ್‌ಶೆ?” ಕರಿ ಬೋಲ್ಯೊ.

34 ಯೇಸುನೆ, “ತುಮಾರಕನ ಕೆತ್ರ ರೋಟಾ ಲ್ಲಾ?” ಕರಿ ಪುಲ್ಲಾಯೊ. ಶಿಷ್ಯರನೆ, “ಹಮಾರಕನ ಖ್ವಾತ್ ರೋಟಾ ಅಜ್ಜು ಥೋಡು ನ್ವಾನಿಮಾಲ್ಲಿಯೆ ಲ್ಲಾ” ಕರಿ ಬೋಲ್ಯೊ.

35 ತದೆ ಯೇಸುನೆ ಅದ್ಮಿನಿ ಝೂಂಡ್‌ನ ಜಮೀನ್‌ಪರ್ ಬೇಖ್ಲೊ ಕರಿ ಹುಕುಮ್‌ದಿದೊ.

36 ಯೋ ಖ್ವಾತ್ ರೋಟಾ ಅಜ್ಜು ಯೋ ಮಾಲ್ಟಾಲಾವ್ವ ಪಾಡಿನ್, ದೇವ್ವ ಧನ್ಯವಾದ್ ಕರಿನ್, ಇನ ತೋಡಿನ್, ಶಿಷ್ಯರನ ಹಾತ್‌ಮ ದಿದೊ. ಶಿಷ್ಯರನೆ ಅದ್ಮಿನಿ ಝೂಂಡ್‌ನ ಪಾಟಿಪಾಡಿ ದಿದಾ.

37 ಅದ್ಮಿಖ್ವಾರು ಖೈನ್, ಹಕ್ವಾಲ್‌ಹುಯು. ಉಭಾರ್‌ಯೆ ಟುಕ್ವಾವ್‌ನ ಜಮಾಕರ್ತಖ್ವತರ್ ಖ್ವಾತ್ ಟೋಕ್ವಾ ಭರಾಯು.

38 ಖಾಣು ಖಾದೂತೆ ಇವ್ವಾಪು ತಯೇಡ ಅಜ್ಜು ಲಡ್ಕಾವ್‌ನ ಮ್ಹಿಂದಿನ್, ಪಖ್ವಾ ಅದ್ಮಿನ್ ಚಾರ್ ಹಜಾರ್ ಜಣು ಥೂ.

39 ಅನಕೇಡೆಥು ಯೇಸುನೆ ಯೋ ಅದ್ಮಿನಿ ಝೂಂಡ್‌ನ ಮೋಕ್ಲಿದಿನ್, ಡೋಣ್‌ಪರ್ ಚಥೀನ್, ಮಗದಾನ್ ತಬರ್‌ಖಾನ ಗಯೊ.

16

ಅದ್ಭುತ್ ಕರಿನ್ ವತಾಳ್ ಕರಿ ಬೋಲ್ಯೊತೆ
(ಮಾರ್ಕ 8:11-13; ಲೂಕ 12:54-56)

1 ಫರಿಸಾಯರ್ ಅಜ್ಜು ಸದ್ದುಕಾಯವಾಳು ಯೇಸುನ ಖ್ವಿಪ್‌ಡಾವ್ವು ಕರಿ ಇನಾಕನ ಏನ್, ತೂ ಆಬ್‌ಥೊ ಆಯೊಹುಯೊ ಕರಿ ವತಾಳನಖ್ವಾಜೆ ಹಮೂನ ಏಕ್ ಅದ್ಭುತ್ ಕರಿನ್ ವತಾಳ್ ಕರಿ ಬೋಲ್ವು.

2 ತದೆ ಯೇಸುನೆ ಇವ್ವುನ, “ಖ್ವಾಂಜ್‌ನಿ ವಖ್ವತ್‌ಮ ತುಮೆ ಆಬ್ ಲಾಲ್‌ಹುಯಿರ್ರೋತೊ, ‘ಅಪ್ಪುನ ಅಟ್ಟು ಮೋಸಮ್ ರ್ಲಿಶೆ’ ಕರಿ ಬೋಲೋಸ್.

3 ವ್ವಾಣಾನು ಆಬ್ ವಾದ್‌ಳೇಧಿ ಥಪೈನ್ ಕಾಳೊ ಅಜ್ಜು ಲಾಲ್ ಹುಯಿರ್ರೋತೊ, ‘ಆಜ್ ಪಾಣಿ ವರಖ್‌ಶೆ’ ಕರಿ ಬೋಲೋಸ್ ಕಾಹೆಕಿ ಶು? ದನ್ನಿ ಹಾಲ್-ಭಾಲ್ ದೇಖಿನ್, ಆ ಅಮ್, ಯೋ ಇಮ್ ಕರಿ ಖ್ವಿಣೇದ್ ಕರಾನ ತುಮೂನ ಮಾಲುಮ್; ಕತೋಬಿ ಆ ವಖ್ವತ್‌ನಿ ಖ್ವಿಣೇದ್‌ನಿ ಮತ್‌ಲಬ್ ತುಮೂನ ಮಾಲುಮ್ ಕೊಯ್ತಿಕಿಶು?

4 ಖರಾಬ್ ಅಜ್ಜು ಪಾಪಿ ಹುಯಿರ್ರೋತೆ ಆ ಪಿಳ್ಳೇನು ಅದ್ಲಿ ಏಕ್ ಅದ್ಭುತಾನ ದೇಕ್ಕು ಕರಿ ಆಖ್ವ ಕರಾಸ್! ಯೋನನ ಭಾಲ್ಯುತೆ ಅದ್ಭುತ್ ಕಾಮಸ್ ಪಣ್ಣಿ ಬಿಜ್ಜು ಕೆಹೂಬಿ ಇವ್ವುನ ಮಳ್‌ಶೆ ಕೊಯ್ತಿಸ್!” ಕರಿ ಜವಾಬ್ ದೀನ್,

ಇವ್ವುನ ಮ್ಹಂದಿನ್ ಚಲೆಗಯೊ.

ಫರಿಸಾಯರ್ ಅಜ್ಜು ಸದ್ದುಕಾಯವಾಳನಿ ಬಾರೇಮ ರ್ಪೀತಾಯೊತೆ
(ಮಾರ್ಕ 8:14-21)

5 ಯೇಸು ಅಜ್ಜು ಇನ ಶಿಷ್ಯರ್ ದರ್ರ್ಯಾವ್‌ನಿ ಪಾರ್ಲಿ ಬಾಜೂಮ ಗಯ, ತದೆ ಶಿಷ್ಯರ್‌ನೆ ರೋಟ ಪಳ್ಳಿಜಾವಾನು ಭೈಕಿಗಯಾಥಾ.

6 ಯೇಸುನೆ ಇವ್ವುನ, “ಜತನ್ ರ್ಲವೊ! ಫರಿಸಾಯರ್ ಅಜ್ಜು ಸದ್ದುಕಾಯವಾಳನು ಶೋಡ ನಾಖ್ಯುಹುಯು ಆಟಾನಿ ಬಾರೇಮ ಜತನ್‌ಧಿ ರ್ಲವೊ ಕರಿ ಬೋಲ್ವೊ.

7 ತದೆ ಇವ್ವೆ “ಅಪ್ಪೆ ರೋಟಾ ಲಾಯಕೊಂತೆ ಇನಖ್ವಾಜೆ ಅಮ್ ಬೋಲ್ವೊಕಿ ಶುಕಿ” ಕರಿ ಇವ್ವ-ಇವ್ವಾಮ ಬೋಲಿಲಿದು.

8 ಯೇಸುನೆ ಇವ್ವೆ ಬೋಲಿಲೆವ್‌ಕರಾತೆ ಮಾಲುಮ್‌ಕರಿನ್, ಇವ್ವುನ, “ಕಮ್‌ವಿಶ್ವಾಸ್‌ವಾಳ! ರೋಟಾ ಕೊಯ್ನಿ ಕರಿ ಬೋಲಾನಿ ಬಾರೇಮ ಶನ ವಾತೆ ಬೋಲಿಲೆವ್‌ಕರಾಸ್ತೆ?

9 ತುಮೂನ ಬಿಜೂಬಿ ಮಾಲುಮ್ ಕರ್ಯಾಕೊಯ್ನಿ ಕಿ ಶು? ತುಮೂನ ಯಾದ್ ಕೊಯ್ನಿ ಕಿ ಶು? ಯೋ ಪಾಚ್ ರೋಟಾನ ಪಾಚ್ ಹಜಾರ್ ಅದ್ವಿನ ಖಡಾವಾನ ಬಾದ್‌ಮ ಕೆತ್ರ ಟೋಕ್ರಾ ತುಮೆ ಭರ್ಯಾಥ?

10 ಎತ್ರೇಸ್ ಕಾಹೆತೆ ಯೋ ಖ್ವಾತ್ ರೋಟಾನ ಚಾರ್ ಹಜಾರ್ ಅದ್ವಿನ ಖಡಾವಾನ ಬಾದ್‌ಮ ತುಮೆ ಕೆತ್ರ ಟೋಕ್ರಾ ಭರ್ಯಾಥ?

11 ಮೇ ರೋಟಾನಿ ಬಾರೇಮ ವಾತೆ ಬೋಲ್ಯೊತೆ ಕಾಹೆ ಕರಿ ತುಮೂನ ಮಾಲುಮ್ ಪಡ್ಯಕೊಯ್ನಿ ಕಿಮ್? ಜತನ್! ಫರಿಸಾಯರ್ ಅಜ್ಜು ಸದ್ದುಕಾಯವಾಳನು ಶೋಡಾ ಪಡ್ಯಹುಯು ಆಟಾನಿ ಬಾರೇಮ ಹೊಷಾರ್‌ಥಿ ರ್ವೊ ಕರಿ ಬೋಲ್ಯೊ.

12 ತದೆ ಇನ ಶಿಷ್ಯರ್‌ನೆ ರೋಟಾಮ ನಾಖಾತೆ ಶೋಡಾನಿ ಬಾರೇಮ ಜತನ್‌ಥಿ ರ್ವೊ ಕರಿ ಕಾಹೆ ಯೇಸುನೆ ಅಪ್ಪುನ ಬೋಲ್ಯೊತೆ, ಫರಿಸಾಯರ್ ಅಜ್ಜು ಸದ್ದುಕಾಯವಾಳು ಬೋಲಿ ಶಿಕಾಡಸ್ತೆ ಇನಿ ಬಾರೇಮ ಜತನ್‌ಥಿ ರ್ವೊ ಕರಿ ಇನೆ ಬೋಲ್ಯೊತೆ ಕರಿ ಇವ್ವೆ ಮಾಲುಮ್ ಕರಿಲಿದು.

ಪೇತ್ರನೆ ಯೇಸುನ ಕ್ರಿಸ್ತ ಕರಿ ಕಬುಲ್ಯೊತೆ

(ಮಾರ್ಕ 8:27-30; ಲೂಕ 9:18-21)

13 ಯೇಸು ಫಿಲಿಪ್ಪನು ಕೈಸರೆಯ ಕರಿ ಖ್ವಯೇರನ್ ಇಟಾರಮ್ಮ ಗಯೊ. ಹಿಜ್ಜಾ ಇನ ಶಿಷ್ಯರ್‌ನ, “ಅದ್ವಿನೊ ಛಿಯೊ ಹುಯಿರನ್ಯೊತೆ ಮನ ಅದ್ವಿಖ್ವಾರು ಕೋಣ್ ಕರಿ ಬೋಲಾಸ್?” ಕರಿ ಪುಲ್ಲಾಯೊ.

14 ಇವ್ವೆ ಇನ, “ಥೋಡು ಜಣು ತುನ, ‘ಬ್ಯಾಪ್ತಿಸ್ಮದ್ಯವಾಳೊ ಯೋಹಾನ’ ಕರಿ ಬೋಲಾಸ್, ಬಿಜ್ಜು ಥೋಡು ಜಣು, ‘ಎಲೀಯ’ ಕರಿ ಬೋಲಾಸ್, ಅಜ್ಜು ಥೋಡು ಜಣು, ಯೆರೆಮೀಯ ನತರ್‌ಕಿ ಪ್ರವಾದೀಮ ಏಕ್ ಜಣೊ’ ಕರಿ ಬೋಲಾಸ್” ಕರಿ ಜವಾಬ್ ದಿದಾ.

15 ಯೇಸುನೆ ಇವ್ವುನ, “ತುಮೆ ಮನ ಕೋಣ್ ಕರಿ ಬೋಲೋಸ್?” ಕರಿ ಪುಲ್ಲಾಯೊ.

16 ತದೆ ಸೀಮೋನ ಪೇತ್ರನೆ, “ತೂ ಆವ್ವುತೆ ಕ್ರಿಸ್ತ, ಜಿವೊ ದೇವ್‌ನೊ ಛಿಯೊ” ಕರಿ ಜುವಾಬ್ ದಿದೊ.

17 ಯೇಸುನೆ, “ಯೋನಾನೊ ಛಿಯೊ ಸೀಮೋನ, ತೂ ಧನ್ಯ ಹುಯಿರ್ದೋಸ್! ಆ ಖ್ವಾಚನ ತುನ ಮಾಲುಮ್ ಕರಾಯೂತೆ ಅದ್ವಿನೆ ಕಾಹೆ, ಪಣ್ಣಿ ಸೊರ್ಗಾಮ ಛಾತೆ ಮಾರ ಬಾನೇಸ್ ಆ ಖ್ವಾಚ್ ಕರಾಯೋತೆ ಕರಿ ಬೋಲೊ.

18 ಅಜ್ಜು ಮೇ ತುನ ಶಾತ್ ಬೋಲಸ್‌ಕತೊ, ಪೇತ್ರ, ತೂ ಬಂಡೊ, ಅಜ್ಜು ಆ ಬಂಡಾಪರ್ ಮೇ ಮಾರಿ ಸಬೆನ ಭಾಂದೀಶ್, ಪಾತಾಳ್ವಿ ಶಕತ್‌ಬಿ ಇನ ಕದೇಬಿ ಹರಾವನ ಕೋ ಉಶೇನಿ.

19 ಸೊರ್ಗಾನು ರಾಜ್ಯನು ಬೀಗಾನ ಖ್ವಾರು ಮೇ ತುನ ದಿಶ್; ಧರ್ತಿಪರ್ ತೂ ಶಾತ್ ಭಾಂದೀಶ್‌ಕಿ, ಯೋ ಸೊರ್ಗಾಮಾಬಿ ಭಂದಾವ್‌ಶೆ, ಅಜ್ಜು ಧರ್ತಿಪರ್ ತೂ ಶಾತ್ ಛೋಡ್‌ಶೆ, ಯೋ ಸೊರ್ಗಾಮಾಬಿ ಛೋಡಾವ್‌ಶೆ” ಕರಿ ಬೋಲೊ.

20 ಅನಕೇಡೆಡು ಯೇಸುನೆ ಇನ ಶಿಷ್ಯರನ, “ಮೇಸ್ ಕ್ರಿಸ್ತ ಹುಯಿರ್ದೋಸ್ ಕರಿ ಕಿನಾಬಿ ನಾ ಬೋಲ್‌ನು” ಕರಿ ರೈತೈನ್ ಬೋಲೊ.

ಯೇಸುನೆ ಇನ ಖ್ವಾಚ್ಚಿ ಅಜ್ಜು ಮರಣ್ಣಿ ಬಾರೇಮ ಬೋಲೊತೆ
(ಮಾರ್ಕ 8:31—9:1; ಲೂಕ 9:22-27)

21 ತಪ್‌ಥೊ ಯೇಸು, “ಮೇ ಯೆರೂಸಲೇಮ್‌ನ ಜೈನ್, ಹಿಜ್ಜಾ ಶಾಣಾವ್‌ಧೀಬಿ, ಗಲ್‌ಥಯಾಜಕರ್‌ಧಿ, ಅಜ್ಜು ಮೋಶೆನಿ ವಚನ್ ಶಿಕಾಡವಾಳೆ ಶಾಸ್ತ್ರಿಯೇಧಿ ಘಣು ಲತಾಡ ಖ್ವಮಾಳ್‌ಣು ಅಜ್ಜು ಇವ್ವೆ ಇನ ಮರ್‌ನಾಕೆಶೆ; ಕತೋಬಿ ತೀನ್ ದನ್‌ಕೇಡೆ ಮೇ ಪಾಲ್ಟೊ ಜಿವೊಹುಯಿನ್, ಉರೀನ್ ಆಯಿಶ್” ಕರಿ ಶಿಷ್ಯರನ ಬೋಲಾನ ಶುರು ಕರೊ.

22 ತದೆ ಪೇತ್ರನೆ ಯೇಸುನ, ಏಕಾಡಿ ಬುಲೈಲಿಜೈನ್, ಪ್ರಭು, ದೇವ್ ತೂ ಇಮ್ ನಕೋಸ್ ಬೋಲ್! ತುನ ಇಮ್ ನಾಸ್ ಹೋಣು!” ಕರಿ ಬೋಲಿನ್, ಇನ ಜಿದ್‌ಕರೈನ್.

23 ತದೆ ಯೇಸುನೆ ಫರೀನ್, ಪೇತ್ರನ, “ಏ ಶೈತಾನ್, ಮಾರ ಖ್ವಾಪ್ಪೇಥೊ ಹಟಿಜಾ! ತೂ ಮಾರ ಕಾಮ್ನ ಅಡ್ಡಿ ಹುಯಿರೈಸ್! ತಾರಿ ಆ ಸೋಚ್ ಅದ್ಮಿನಿ ಸೋಚಸ್ ಪಣ್ಣಿ ದೇವ್ನಿ ಸೋಚ್ ಕಾಹೆ” ಕರಿ ಬೋಲೈನ್.

24 ಅನಕೇಡೆಥು ಯೇಸುನೆ ಇನ ಶಿಷ್ಯರನ, “ಕಿನಾತೋಬಿ ಮಾರ ಪೀರೆ ಆವ್ವುಕರಿ ಮನ್ ಉಶೇತೊ, ಯೋ ಖ್ವುದ್‌ನ ಬೈಕಿಜೈನ್, ಇನಿ ಶಿಲ್‌ಬೇನ್* ಪಾಡಿಲೀನ್, ಮಾರ ಪೀರೆ ಆವಾದೆ.

25 ಇನೊ ಜಾನ್ನ್ ಬಚಾಡಿಲೇವ್ವು ಕರಿ ಕರಾವಾಳು ಇನ ಗುಮೈಲಿಶೆ; ಕತೋಬಿ ಮಾರಖ್ವಾಜೆ ಇನ ಜಾನ್ನ್ ಗುಮೈಲ್ಯಾವಾಳು ಇನ ಬಚಾಡಿಲಿಶೆ.

26 ಏಕ್ ಅದ್ಮಿ ಹಿಡಿ ಜಗತ್‌ನಾಸ್ ಕಮೈಲೀನ್, ಇನ ಜಾನ್ನ್ ಲುಕ್‌ಶಾನ್ ಕರಿಲಿದುತೋ, ಇನ ಶನಿ ಫಾಯಿದೊ? ಶನೀಸ್ ಫಾಯಿದೊ ಕೊಯ್ನಿ! ಯೋ ಅದ್ಮಿಬಿಜು ಶಾಪ್ಪಿ ದೀನ್ ಇನ ಜಾನ್ನ್ ಪಾಳ್ಳು ಬಚಾಡಿಲ್ಯವಾನ ಕೋ ಹುವಾನಿ!

27 ಅದ್ಮಿನೊ ಛಿಯೈ ಇನ ಬಾನಿ ಮಹಿಮೆಥಿ ಅಜು ಇನ ದೂತರನ ಜೋಡೆ ಆವಾಶೆ; ಯೋ ವಖ್ವತ್‌ಮ ಏಕೇಕ್‌ನ ಇವ್ವಿ ಚಾಲ್‌ನಿಫೋಣಿ ಇನಾಮ್ ದಿಶೆ.

28 ಮೇ ತುಮೂನ ಖ್ವಾಚಾಮ ಬೋಲುಸ್ಕಿ, ಹಜ್ಜಾ ಭಿಯುತೆ ಇವ್ವಾಮ ಥೋಡು ಜಣು ಅದ್ಮಿನೊ ಛಿಯೈ ಇನ ರಾಜ್ಯಮ ಆವಾಶೇತೆ ದೇಖಲಗೂಬಿ ಮರ್‌ಶೆಸ್ ಕೊಯ್ನಿ” ಕರಿ ಬೋಲೈನ್.

17

ಯೇಸುನು ರೂಪ್ ಬದ್‌ಲ್ಯಾತೆ

(ಮಾರ್ಕ 9:2-13; ಲೂಕ 9:28-36)

* 16:24 16:24 ಶಿಲ್‌ಬೆ ಕತೊ ಮರಾತೋಡಿ ಖ್ವತಾಪ್ಪಿನ ಖ್ವಮಾಳಾನು ಕರಿ ಮತ್‌ಲಬ್.

1 ಲೋ ದನ್ನ ಬಾದ್‌ಮ ಯೇಸುನೆ ಪೇತ್ರ, ಯಾಕೋಬ ಅಜ್ಜು ಇನೊ ಬೈಯೋಹಾನ್ನ ಬುಲೈಲಿನ್, ಏಕ್ ಉಚ್ಚಾ ಪಹಡ್‌ಪರ್ ಗಯೊ. ಹಿಜ್ಜಾ ಇವ್ವುನ ಮ್ಹಂದಿನ್ ಕೋಣ್‌ಬಿ ಕೋ ಥೂನಿ.

2 ಹಿಜ್ಜಾ ಇವ್ವ ಡೋಳಾನ ಖ್ವಾಮ್ಜೆಸ್, ಯೇಸುನು ರೂಪ್ ಬದ್ಲಿಗಯ್: ಇನು ಮ್ಹೋಡು ಚಾಂದ್‌ನಿಫೋಣಿ ಝಮ್‌ಕಾಲಗ್ಲು ಅಜ್ಜು ಇನ ಲುಂಗ್ಲ ಉಜ್ಜಾಳಾನಿಫೋಣಿ ಧೋಳುಫಟ್ ಹುಯಿಗಯ್.

3 ಎತ್ರೇಸ್ ಕಾಹೆತೆ ಮೋಶೇಬಿ, ಎಲೀಯ ಯೇಸುನ ಜೋಡೆ ವಾತೆ ಬೋಲುಕರಾತೆ ಯೋ ತೀನ್ ಶಿಷ್ಯರಾನೆ ದೇಖ್.

4 ತದೆ ಪೇತ್ರನೆ ಯೇಸುನ, “ಪ್ರಭು, ಹಮೆ ಹಜ್ಜಸ್ ರ್ವಾನು ಕೆತ್ರೇಕ್ತಿ ಅಲ್ಪು ಹುಯಿರ್ಲ್ಯಾಸ್! ತೂ ಬೋಲ್ತೊ ಉಶೇತೊ, ಮೇ ಹಜ್ಜಾ ತೀನ್ ಡೇರಾ ರೋಕೆಸ್, ಏಕ್ ತುನ, ಏಕ್ ಮೋಶೇನ ಅಜ್ಜು ಏಕ್ ಎಲೀಯನ್” ಕರಿ ಬೋಲ್ಯೊ.

5 ಯೋ ಅಮ್ ಬೋಲುಕರಾನಿ ವಖ್ತ್‌ಮಾಸ್, ಏಕ್ ಉಜ್ಜಾಖ್ವಾನು ವಾದ್‌ಳು ಐನ್, ಇವ್ವಾಪರ್ ಡಪಾಯ್, ಅಜ್ಜು ಯೋ ವಾದ್ವಾನ ಮಹಿಧು, “ಆ ಮಾರೊ ಪ್ಯಾರ್‌ನೊ ಛಿಯ್ತೊ ಅನೇಥಿ ಮೇ ಘಣು ಖ್ವುತಿ ಲ್ಲೊ!” ಕರಿ ಏಕ್ ಅವಾಜ್ ಆಯೊ.

6 ಶಿಷ್ಯರಾನೆ ಆ ಅವಾಜ್‌ನ ಖ್ವಮ್‌ಜೆನ್, ಡರ್‌ಥಿ ಮ್ಹೋಡು ಹೇಟ್ ಕರೀನ್, ಜ್ಲಮೀನ್‌ಪರ್ ಊಂಧಾ ಪಡಿಗಯ್.

7 ತದೆ ಯೇಸು ಇವ್ವಾಕನ ಐನ್, ಇವ್ವುನ ಛೀಮಿನ್, “ಉಪ್ಪರ್ ಉಲೊ, ಡರೊ ನಕೊ!” ಕರಿ ಬೋಲ್ಯೊ.

8 ತದೆ ಇವ್ವೆ ಡೋಳಾ ಪಾಡೆನ್ ದೇಖ್, ತದೆ ಯೇಸು ಎಕ್ಕ್‌ಸ್ ಜ್ಲೊ ಥೊ, ಬಿಜ್ಜು ಕೋಣ್‌ಬಿ ಕೋ ಥೂನಿ.

9 ಇವ್ವೆ ಯೋ ಪಹಡ್‌ಪರ್‌ಥು ಉತ್ರಿನ್ ಆವಾನಿ ವಖ್ತ್‌ಮ, ಯೇಸುನೆ ಇವ್ವುನ, “ತುಮೆ ಹಮ್ಗೆ ದೇಖ್ಯಾತೆ ಇನ ಅದ್ಮಿನೊ ಛಿಯ್ತೊ ಮರಿನ್, ಪಾಲ್ಟೊ ಜಿವ್ತೊ ಹುಯಿನ್, ಉರಿ ಆವಾತೋಡಿ, ಕಿನಾಬಿ ನಾ ಬೋಲ್‌ನು” ಕರಿ ಹುಕುಮ್‌ದಿದೊ.

10 ತದೆ ಶಿಷ್ಯರಾನೆ ಯೇಸುನ, “ಕ್ರಿಸ್ತ ಆವಾನಿ ಅಗಾಡಿ ಎಲೀಯ ಆವ್ವುಕರಿ ಮೋಶೇನಿ ವಚನ್ ಶಿಕಾಡವಾಳು ಶಾಸ್ತ್ರಿಯೆ ಬೋಲಾಸ್ತೆ ಶನ?”

ಕರಿ ಪುಲ್ಲಾಯ.

11 ಯೇಸುನೆ ಇವ್ವುನ, “ಎಲೀಯ ಪಹಿಲೆ ಆವ್ವುಕರಿ ಇವ್ವೆ ಬೋಲಾಸ್ತೆ ಬರೊಬರಸ್, ಖ್ವಾಚಮಾಬಿ ಎಲೀಯ ಆಯಿನ್, ಖ್ವಾರುಸ್ ಖ್ವಾರ್ಶೆ.

12 ಕತೋಬಿ ಮೇ ತುಮೂನ ಶಾತ್ ಬೋಲುಸ್ಕತೊ, ಎಲೀಯ ಅಗಾಡಿಸ್ ಐನ್‌ಬಿ, ಚಲೆಗಯೊ. ಕತೋಬಿ ಅದ್ವಿಖ್ವಾರು ಇನಿ ಖ್ವಣೇದ್ ಕೋ ಧರೈನಿ, ಅಜು ಇವ್ವಮನ್‌ಮ ಆವಾತೆ ಇಮ್ ಇನ ಕರೈ ಇನ ಕರೈತೆ ಇಮ್ವಸ್ ಅದ್ವಿನ ಛಿಯ್ಯಾನಾಬಿ ಇವ್ವೇಥಿ ಖ್ವತಾಪ್ಪಿ ಉಶೆ” ಕರಿ ಜುವಾಬ್ ದಿದೊ.

13 ಬ್ಯಾಪ್ತಿಸ್ತದ್ಯವಾಳೊ ಯೋಹಾನ್ನಿ ಬಾರೇಮ ಯೇಸು ವಾತೆ ಬೋಲುಕರಾಸ್ತೆ ಕರಿ ಶಿಷ್ಯರ್‌ನೆ ತದೆ ಮಾಲುಮ್ ಕರಿಲಿದ.

ಯೇಸುನೆ ಭೂತ್ ಧರಿರಾಖ್ಯಥೂತೆ ಏಕ್ ಛೋಕ್ತಾನ ಅಟ್ಟು ಕರೈತೆ

(ಮಾರ್ಕ 9:14-29; ಲೂಕ 9:37-43)

14 ಯೇಸು ಅಜು ಇನ ಶಿಷ್ಯರ್ ಪಾಲ್ತು ಫರೀನ್ ಅದ್ವಿನಿ ಝೂಂಡ್‌ಕನ ಆವಾದಿನ್, ಏಕ್ ಜಣೊ ಯೇಸುಕನ ಐನ್, ಇನಖ್ವಾಮ್ವೆ ಗುಡ್‌ಘ್ಯ ಟೀಕಿನ್,

15 “ಪ್ರಭು, ಮಾರ ಛಿಯ್ಯಾನ ಗೋರ್ ಕರ್! ಇನ ಮಿರ್‌ಫಿ ಲಾಗಿರೈಸ್, ಇನೇಥಿ ಯೋ ಘಣು ತರಪ್‌ಡುಕರಾಸ್. ಯೋ ತದೆ-ತದೆ ಆಗ್‌ಮಾಬಿ ಪಾಣಿಮಾಬಿ ಪಡ್‌ತೊರೈಸ್.

16 ಮೇ ಇನ ತಾರ ಶಿಷ್ಯರ್‌ಕನ ಬುಲೈಲಿ ಆಯೊ, ಕತೋಬಿ ಇನ ಅಟ್ಟು ಕರಾನ ಇವ್ವಹಾತೆ ಕೋ ಹುಯೋನಿ” ಕರಿ ಬೋಲೈ.

17 ಯೇಸುನೆ, “ಏ, ವಿಶ್ವಾಸ್‌ಕೊಂತೆ ಬುಧ್ಧು ಖಾಂದಾನ್‌ವಾಳ! ಬಿಜು ಕೆತ್ರ ದನ್ ಮೇ ತುಮಾರ ಜೋಡೆ ರೈಣು? ಬಿಜು ಕೆತ್ರ ದನ್ ತುಮೂನ ಖ್ವಮಾಳ್‌ಣು? ಯೋ ಛೋಕ್ತಾನ ಹಜ್ಜಾ ಮಾರಕನ ಬುಲೈಲಿ ಆವೊ!” ಕರಿ ಬೋಲೈ.

18 ಯೇಸುನೆ ಯೋ ಫೋಕ್ರಮ ಥೂತೆ ಭೂತ್‌ನ ಗುರ್‌ಕಾವಖ್ತರ್, ಯೋ ಭೂತ್ ಇನ ಮ್ಹೆಂದಿನ್ ನಿಕ್ಕಿಗಯು. ಯೋಸ್ ವಖ್ತಮ ಇನ ಅಲ್ಫು ಹುಯಿಗಯು.

19 ಅನಕೇಡೆಡು ಯೇಸು ಎಕ್ಲೋಸ್ ರ್ಹವಾನಿ ವಖ್ತಮ, ಇನ ಶಿಷ್ಯರ್ ಇನಾಕನ ಆಯಿನ್, “ಯೋ ಭೂತ್‌ನ ಕಾಡಾನ ಹಮಾರೇಥಿ ಶನ ಕೋ ಹುಯೂನಿತೆ?” ಕರಿ ಪುಲ್ಲಾಯ.

20 ತದೆ ಯೇಸುನೆ ಇವ್ಣುನ, “ತುಮಾರಿ ವಿಶ್ವಾಸ್ ಕಮ್ ಥೀತೆ ಇನಖ್ವಾಜೀಸ್ ತುಮೂನ ಕೋ ಹುಯೂನಿ, ಮೇ ತುಮೂನ ಖ್ವಾಚಮಾಬಿ ಬೋಲುಸ್ಕಿ, ರಾಯಿನ ದಾಣ ಎವ್ಡಿ ವಿಶ್ವಾಸ್ ತುಮೂನ ರ್ಹಯೂತೊ,

21 ತುಮೆ ಆ ಪಹಡ್‌ಣ, ‘ಹಜ್ಜಾಡು ಹಿಜ್ಜಾ ಜಾ!’ ಕರಿ ಬೋಲ್ಯಾತೋಬಿ ಯೋ ಜಾಶೆ. ತುಮಾರ ಹಾತೆ ಹುವ್ವಾಕೊಂತೆ ಕಾಮ್ ಏಕೊಬಿ ಕೋ ರ್ಹಿಶೇನಿ” ಕರಿ ಬೋಲ್ಯೊ.

ಯೇಸುನೆ ಇನಿ ಮರಣ್ಣಿ ಬಾರೇಮ ಪಾಳ್ಹೊ ಬೋಲ್ಯೊತೆ

(ಮಾರ್ಕ 9:30-32; ಲೂಕ 9:43-45)

22 ಶಿಷ್ಯರ್ ಖ್ವಾರು ಎಕ್ದಮ್ ಗಲಿಲಾಯಮ ಆವಾದಿನ್, ಯೇಸುನೆ ಇವ್ಣುನ, “ಅದ್ವಿನ ಛಿಯ್ಯಾನ ಅದ್ಮಿಖ್ವಾರಾನ ಹಾತ್‌ಮ ದೆವೈಜಾಶೆ.

23 ಇವ್ಣೆ ಇನ ಮಾರಿನಾಕ್‌ಶೆ! ಕತೋಬಿ ತೀನ್ ದನ್‌ಕೇಡೆ ಯೋ ಪಾಳ್ಹೊ ಜಿವ್ಣೊ ಹುಯಿನ್, ಉರಿ ಆವ್‌ಶೆ” ಕರಿ ಬೋಲ್ಯೊ.

ಅನ ಖ್ವಮ್‌ಜಿನ್, ಶಿಷ್ಯರ್‌ನ ಘಣು ದುಖ್ ಹುಯು.

ಮಂದಿರ್‌ನ ಶುಂಕ ಭಾಂದಾನಿ ಬಾರೇಮ

24 ಯೇಸು ಅಜು ಇನ ಶಿಷ್ಯರ್ ಕಪೆರ್ನೌಮ್ ಆವಾದಿನ್, ಮಂದಿರ್‌ನಖ್ವಾಜೆ ಶುಂಕ ಮಾಂಗವಾಳು ಪೇತ್ರಕನ ಆಯಿನ್, “ತುಮಾರೊ ಗುರು ಮಂದಿರ್‌ನ ದೇವ್ಣತೆ ಶುಂಕಾನ ಭಾಂದಾ ಕೊಯ್ತಿಕಿ ಶು?” ಕರಿ ಪುಲ್ಲಾಯು.

25 ತದೆ ಪೇತ್ರನೆ, “ಒಹೊ, ಭಾಂದಾಶೆ” ಕರಿ ಬೋಲ್ಯೊ.

ಪೇತ್ರ ಘರಮ ಆವಾದಿನ್, ಯೇಸುನೆ ಇನೇಥಿ ಪಹಿಲೇಸ್, “ಸೀಮೋನ, ತುನ ಕಿಮ್ ದೆಖಾವಸ್? ಆ ಧರ್ತಿಪರ್ಲ್ಯ ರಾಜಖ್ವಾರು ಕಿನಾಕಂಥು ಶುಂಕ ಮಾಂಗಾಸ್? ಶೊಂತ್ ದೇಖ್ವಾನ್ ಅದ್ವಿಧೀಕಿ ನತರ್ಕಿ ಪರೈದೇಖ್ವಾವಾಳ ಅದ್ವಿಕಂಥು ಮಾಂಗಾಸ್?” ಕರಿ ಬೋಲ್ಯೊ.

26 ಪೇತ್ರನೆ, “ಪರೈದೇಖ್ವಾವಾಳಕಂಥು” ಕರಿ ಜವಾಬ್ ದಿದೊ.

ತದೆ ಯೇಸುನೆ ಪೇತ್ರನ, “ಇಮ್ಕತೊ, ಶೊಂತ್ ದೇಖ್ವಾವಾಳು ಶುಂಕ ಭಾಂದಾನು ಕೊಯ್ನಿ ಕರಿ ಬೋಲ್ಯೊ.

27 ತೋಬಿ ಶುಂಕ ಮಾಂಗವಾಳು ಅಪ್ಪಿ ಬಾರೇಮ ಖಟು ಕರಾನು ನಕೊ. ಇನಖ್ವಾಜಿ ತೂ ದರ್ಮಾವನ್ ಜೈನ್, ಗಳ್ ನಾಖಿನ್, ಪಹಿಲೆ ಮಳಾಸ್ತೆ ಮಾಲ್ಲಾಲಾನ ಮ್ಹೋಡಾನ ಕಾಡಿ ದೇಕ್, ಇನಾಮ ಶುಂಕ ಭಾಂದಾನ ಹೋಣುತೆ ಏಕ್ ಪೈಶಾನು ಬಿಲ್ಲು ಮಳ್ಳಶೆ. ಇನ ಲಯಿನ್, ಅಪ್ಪ ಭೇ ಜಣಾನು ಕರಿ ಬೋಲಿನ್ ದೇ” ಕರಿ ಬೋಲ್ಯೊ.

18

ಖ್ವಾರೇಥಿ ಮೋಟು ಕೋಣ್?

(ಮಾರ್ಕ 9:33-37; ಲೂಕ 9:46-48)

1 ಯೋ ವಖ್ವತ್ಮಮ ಶಿಷ್ಯರ್ ಯೇಸುಕನ ಆಯಿನ್, “ಸೊರ್ಗಾನು ರಾಜ್ಯಮ ಖ್ವಾರೇಥಿ ಮೋಟು ಕೋಣ್?” ಕರಿ ಪುಲ್ಲಾಯ.

2 ಇನಖ್ವಾಜಿ ಯೇಸುನೆ ಏಕ್ ಅಡ್ವಾಣಿ ಲಡ್ಕಾನ ಬುಲೈನ್, ಶಿಷ್ಯರ್‌ನ ಖ್ವಾಮೈ ಭಿರಾಖಿನ್,

3 “ಮೇ ತುಮೂನ ಖ್ವಾಚಮಾಬಿ ಬೋಲುಸ್ಸಿ, ತುಮೆ ಪಾಲ್ತು ಫರೀನ್, ಆ ಅಡ್ವಾಣಿ ಲಡ್ಕಾನಿ ಘೋಣಿ ನಾ ಹುಯಾತೊ, ತುಮೆ ಸೊರ್ಗಾನು ರಾಜ್ಯಮ ಜಾಶುಸ್ ಕೊಯ್ನಿ.

4 ಕೋಣ್ ಅಡ್ವಾಣಿ ಲಡ್ಕಾನಿಘೋಣಿ ಇನು ಯೋ ಝುಕೈಲೇಸ್ಸಿ, ಯೋಸ್ ಸೊರ್ಗಾನು ರಾಜ್ಯಮ ಖ್ವಾರೇಥಿ ಮೋಟೊ.

5 ಅತ್ರೇಸ್ ಕಾಹೆತಿ ಕೋಣ್ತೋಬಿ ಮಾರ ನಾಮ್‌ಪರ್ ಅಮ್ಮಏಕ್ ಅಡ್ಡಾಣಿ ಲಡ್ಕಾನ ಬುಲೈಲೇಸ್ಕಿ, ಯೋ ಮನ ಬುಲೈಲ್ಯವಾಳೊ ಹುಯಿರ್ರ್ವೊಸ್.

ಪಾಪ್‌ಮ ಚಲಾವವಾಳಾನಿ ಬಾರೇಮ
(ಮಾರ್ಕ 9:42-48; ಲೂಕ 17:1-2)

6 ಮಾರಪರ್ ವಿಶ್ವಾಸ್ ಕರಾವಾಳ ಆ ನ್ವಾನಾವ್‌ಮ ಏಕ್‌ನ ಕೋಣ್ತೋಬಿ ಭೀರಾಖ್ಯೊತೊ, ಇಮ್‌ನಾನ ಘಲೆಂಡ ಕೇಡೆ ಘಟ್ಟಿನ ಬಂಡಾನ ಭಾಂದಿನ್, ಗಧಾರ್ ದರ್ರ್ಯಾವ್‌ಮ ಡುಬೈನಾಖಾನುಸ್ ಇನ ಅಲ್ಫೈ.

7 ಜಗತ್ತಿ ಹಾಲ್ವ ಶಾತ್ ಬೋಲು! ಶನಕತೊ, ಅದ್ವಿನ ಪಾಪ್‌ಮ ಚಲಾವವಾಳು ರಾಘುಖ್ವಾರು ಛಾ! ಇಮ್ಮು ರಾಘುಖ್ವಾರು ಕದೇಬಿ ಚಾಲ್‌ಷೆ. ಕತೋಬಿ ಇಮ್ ಹುವ್ವಾನಿಫೋಣಿ ಕರಾಸ್ತೆ ಯೋ ಅದ್ವಿನಿ ಹಾಲ್ವ ಶಾತ್ ಬೋಲು!

8 “ತಾರೊ ಹಾತ್ ನತರ್‌ಕಿ ತಾರೊ ಗೋಡೊ ತುನ ಪಾಪ್‌ಮ ಖ್ವಪ್‌ಡಾವ್‌ತೊ ಉಶೇತೊ, ಇನ ಕತ್ರಿನ್ ಫೇಕಿದೆ! ಬೇ ಹಾತ್ ಅಜು ಬೇ ಗೋಡ ರ್ವ್ವೀನ್, ಹರ್‌ಹಮೇಶಾನಿ ಆಗ್‌ಮ ಫೆಕಾವಧೀಬಿ, ಹಾತ್-ಗೋಡಕೊಂತಿ ಹರ್‌ಹಮೇಶಾನಿ ಜಿಂದ್‌ಗೀಮ ಜಾವಾನೂಸ್ ತುನ ಅಶೇಲ್.

9 ತಾರೊ ಡೋಳೊ ತುನ ಪಾಪ್‌ಮ ಖ್ವಪ್‌ಡಾವ್‌ತೊ ಉಶೇತೊ, ಇನ ಕಚ್‌ಕೋರಿನ್ ಫೇಕಿದೆ! ಬೇ ಡೋಳಾ ರ್ವ್ವೀನ್ ನರಕ್‌ನಿ ಆಗ್‌ಮ ಫೆಕಾವಧೀಬಿ ಎಕ್ಕ್‌ಸ್ ಡೋಳೊ ರ್ವ್ವೀನ್, ಹರ್‌ಹಮೇಶಾನಿ ಜಿಂದ್‌ಗೀಮ ಜಾವಾನೂಸ್ ತುನ ಅಶೇಲ್.

ಗುಮೈಗಯೂತಿ ಮೇಂಡಾನಿ ಬಾರೇಮ ಮಕ್ಲಬ್‌ನಿ ಖೇಣಿ
(ಲೂಕ 15:3-7)

10 ಆ ನ್ವಾನಾವ್‌ಮ ಏಕ್‌ನಾಬಿ ಕಡ್‌ತೆಲ್ ಕರಿ ನಕೊ ಸೋಚ್‌ಶು. ಸೊರ್ಗಾಮ ಅವ್ವು ದೂತರ್ ಸೊರ್ಗಾಮ ಛಾತೆ ಮಾರ ಬಾನು ಮ್ಹೋಡಾನ ಹಮೇಶ ದೇಕ್ತುರ್ವ್ವೀಸ್ ಕರಿ ಮೇ ತುಮೂನ ಬೋಲುಸ್.

11 ಅದ್ಮಿನೊ ಛಿಯ್ಯೊ ಖರಾಬ್ ಹುಯಿಗಹುಯಾನ ಡೂಂಡಿನ್ ಬಘಾಡನ ಆಯೊ.

12 ತುಮೂನ ಕಿಮ್ ದೆಖಾವಸ್? ಏಕ್ ಅದ್ಮಿಕನ ಖ್ವೊ ಮೇಂಡರ್ದೀನ್, ಇನಾಮ ಏಕ್ ಮೇಂಡು ಗುಮೈಗಯೂತೆ, ಯೋ ಅದ್ಮಿ ನೌ ಉಪ್ಪರ್ ಖ್ವಡ್‌ಚಾರೀಖ್ ಮೇಂಡಾನ ಮ್ಹಂದಿನ್, ಗುಮೈಗಯೂತೆ ಯೋ ಮೇಂಡಾನ ಡೂಂಡಾನ ಜಾಯಿಕೊಯ್ಪಿ ಕಿ ಶು?

13 ಗುಮೈಗಯೂತೆ ಯೋ ಮೇಂಡು ಮಳ್ಳುತೊ, ಗುಮಾಯುಕೊಂತೆ ಯೋ ನೌ ಉಪ್ಪರ್ ಖ್ವಡ್‌ಚಾರೀಖ್ ಮೇಂಡವ್‌ಥೀಬಿ ಯೋ ಏಕ್ ಮೇಂಡಾನಖ್ವಾಜೆ ಜಾಖ್ವತ್ ಖ್ವಶಿ ಕರಾಸ್ ಕರಿ ಮೇ ತುಮೂನ ಖ್ವಾಚಮಾಬಿ ಬೋಲುಸ್.

14 ಇಮ್ತಸ್ ಆ ನ್ಹಾನಾವ್‌ಮ ಏಕ್‌ಬಿ ಖರಾಬ್ ನಾ ಜಾವ್ವು ಕರಿ ಬೋಲಾನುಸ್ ಸೊರ್ಗಾಮ ಛಾತೆ ತುಮಾರ ಬಾನಿ ಮರ್ಜಿ.

ಪಾಪ್ ಕರಾಸ್ತೆ ಭೇನೆ ನತರ್ ಭೈನಿ ಬಾರೇಮ

15 ತಾರೊ ಭೈ ತಾರಿ ವಿರೋದ್ ಗಲತ್ ಕರಯ್ತೊತೊ, ತೂ ಜೈನ್, ಯೋ ಎಕ್ಲೋಸ್ ರ್ಹವಾನಿ ವಖ್ವತ್‌ಮ, ಇನಿ ಗಲ್ತಿನ ಇನ ಬೋಲಿವತಾಳ್. ಯೋ ತಾರಿ ವಾತೇನ ಖ್ವಮ್‌ಜಿಗಯೊತೊ ತಾರ ಭೈನ ತೂ ಪಾಲ್ಟೊ ಕಮೈಲಿದೊ ಕರಿ.

16 ಕತೋಬಿ ಯೊ ತಾರಿ ವಾತೆನ ನಾ ಖ್ವಮ್‌ಜ್ಯೊತೊ, ತಾರ ಜೋಡೆ ಬಿಜು ಏಕ್ ನತರ್‌ಕಿ ಬೇ ಜಣಾನ ಬುಲೈಲಿ ಇನಾಕನ ಜಾ, ಶನಕತೊ 'ಹರೇಕ್ ವಾತೇನ ಬೇ ನತರ್‌ಕಿ ತೀನ್ ಅದ್ಮಿನಿ ಸಾಕ್ಷಿ ರ್ಹೀಣು.

17 ಯೋ ಇವ್ವಿ ವಾತೇನಾಬಿ ನಾ ಖ್ವಮ್‌ಜ್ಯೊತೊ, ಸಭೆನ ಬೋಲ್, ಯೋ ಸಬೇನಿ ವಾತೇನಾಬಿ ನಾ ಖ್ವಮ್‌ಜ್ಯೊತೊ ಯೋ ದೇವ್‌ಮ ವಿಶ್ವಾಸ್‌ಕರಾಕೊಂತೆ ನತರ್‌ಕಿ ಶುಂಕ ಮಾಂಗವಾಳ ಅದ್ಮಿನಿಫೋಣಿ ಇನ ದೇಕ್.

18 ಮೇ ತುಮೂನ ಖ್ವಾಚಮಾಬಿ ಬೋಲುಸ್: ತುಮೆ ಆ ಧರ್ತಿಪರ್ ಶಶ್ವತ್ ಭಾಂದಾಸ್ತಿ, ಯೋ ಖ್ವಾರು ಸೊರ್ಗಾಮಾಬಿ ಭಂದೈರ್ದೀಶೆ,

ಅಜ್ಜು ತುಮೆ ದರ್ತಿಪರ್ ಶಶ್ಯತ್ ಫೋಡಾಸ್ಕಿ ಯೋ ಖ್ವಾರು ಸೋರ್ಗಾಮಾಬಿ ಫೋಡಾವ್‌ಶೆ.

19 ಎತ್ರೇಸ್ ಕಾಹೆತೆ, ತುಮಾರಾಮ ಬೇ ಜ್ಞಣು ಆ ಧರ್ತಿಪರ್ ಎಕ್ಸ್‌ನ್ ಮನ್‌ಧಿ ಶಾತ್ ಮಂಗಿಲಿದುತೋಬಿ ಸೋರ್ಗಾಮ ಛಾತೆ ಮಾರೊ ಬಾ ಇವ್ವುನ ದಿಶೆ ಕರಿ ಮೇ ತುಮೂನ ಖ್ವಾಚಮಾಬಿ ಬೋಲುಸ್.

20 ಶನಕತೊ ಬೇ ನತರ್‌ಕಿ ತೀನ್ ಜ್ಞಣು ಮಾರ ನಾಮ್‌ಪರ್ ಕಿಜ್ಞಾ ಎಕ್ಸ್ ಹುಯಿನ್ ಐರ್ಟ್ಲೆಸ್ಕಿ ಹಿಜ್ಜಾ ಇವ್ವ ಇಚ್‌ಮ ಮೇ ರ್ಟ್ಲೆಪುಸ್.

ಮಾಪ್ ಕರಾಕೊಂತೆ ಆಳ್ವಿ ಬಾರೇಮ ಮತ್ಲನಿ ಖೇಣಿ

21 ತದೆ ಪೇತ್ರನೆ ಯೇಸುಕನ ಆಯಿನ್, “ಪ್ರಭು, ಮಾರೊ ಭೈಮಾರಿ ವಿರೋದ್ ಗಲತ್ ಕರ್ಟ್ಯೋತೊ, ಮೇ ಇನ ಕೆತ್ರಿಹಲ್ಲ ಮಾಪ್ ಕರ್ಟ್ವು? ಖ್ವಾತ್ ಹಲ್ಲಾಕಿ ಶು?” ಕರಿ ಇನ ಪುಲ್ಲಾಯೊ.

22 ಯೇಸುನೆ, “ಖ್ವಾತ್ ಹಲ್ಲಾಕಾಹೆ, ಖ್ವಾತ್ ಖ್ವಡ್‌ತೀನಿಖ್ವಹಲ್ಲ” ಕರಿ ಜವಾಬ್ ದಿದೊ.

23 “ಶನಕತೊ ಸೋರ್ಗ ರಾಜ್ಯನ ಇನ ಸೇವಕರ್‌ಧಿ ಪೈಶಾನಿ ಇಶಾಬ್ ಲೇವ್ವು ಕರಿ ತೀರ್ಮಾನ್ ಕರಾಸ್ತೆ ಏಕ್ ರಾಜಾನಿಫೋಣಿ ಛಾ.

24 ಯೋ ಇಶಾಬ್ ಲ್ಯವಾನು ಶುರುಕರ್‌ತಾನ, ಕರೋಡೊ ರಪ್ಪ ದೇವ್ವು ಥೂತೆ ಏಕ್‌ನ ಇನಾಕನ ಲಾಯು.

25 ಯೋ ಕರಜ್ ಫೇಡಾನ ಇನಾಕನ ಶಾಪ್ಪಿ ಕೋ ಥೂನಿತೆ ಇನಖ್ವಾಜೆ, ಇನ ಯಜಮಾನ್ನೆ, ‘ಇನಾಬಿ ಇನಿ ಬಾವಣ್ ಅಜ್ಜು ಲಡ್ಕಾವ್‌ನ, ಅಜ್ಜು ಇನಾಕನ ಛಾತೆ ಖ್ವಾರಸ್ಸು ವೇಚಿನ್, ಯೋ ಕರಜ್‌ನ ಫೇಡ್‌ಣು’ ಕರಿ ಹುಕುಮ್ ದಿದೊ.

26 ತದೆ ಯೋ ಆಳ್‌ನೆ ಇನ ರಾಜಾನ ಆಡ್‌ಪಡಿನ, ‘ರಾಜಾ, ಜರ ಖ್ವಮಾಳಿಲೇ, ಮೇ ತುನ ದೇವ್ವುತೆ ಖ್ವಾರುಸ್ ಫೇಡುಸ್’ ಕರಿ ಇನ ಗಿಂಗೈಲಿದೊ.

27 ಅನ ದೇಖಿನ್ ಯೋ ಯಜಮಾನ್ನೆ ಇನ ಆಳ್‌ಪರ್ ಗೋರ್‌ಖೈನ್, ಯೋ ದೇವ್ವುತೆ ಖ್ವಾರು ಕರಜ್‌ನ ಮಾಘ್‌ಕರೀನ್, ಇನ ಭಾವಾನ ಮ್ಹಂದಿದೊ.

28 “ಅನಕೇಡೆಥು ಯೋ ಆಳ್ ಭಾರ್‌ಆಯಿನ್, ಇನ ಥೋಡ ಪೈಶಾ ದೇವ್ವುಡ್ಡೂತೆ ಇನ ಜೋಡ್ಡ ಕಾಮ್ ಕರಾವಾಳೊ ಆಳ್‌ನ ದೇಖಿನ್, ಇನಿ ನ್ಹೇಟಿ ಭೇಚಿನ್, ‘ಮಾರು ಕರಚ್ ಫೇಡ್ಲ!’ ಕರಿ ಬೋಲ್ಯೊ.

29 ತದೆ ಯೋ ಆಳ್‌ನೆ ಇನ ಗೋಡಾಪರ್ ಪಡೀನ್, ‘ಜರ ಖ್ವಮಾಳಿಲೇ, ಮೇ ಫೇಡುಸ್!’ ಕರಿ ಗಿಂಗೈಲಿದೊ.

30 ಕತೋಬಿ ಇನೆ ಮಾನ್ಯೊಕೊಂತೆ, ಇನ ಧರೀನ್, ಕರಚ್ ಫೇಡಾತೋಡಿ ಇನ ಜೇಲ್‌ಮ ಘಲಾಯೊ.

31 ತದೆ ಅನ ದೇಖ್ತೆ ಬಿಜಾಖ್ವಾರ ಆಳ್‌ನೆ ಘಣು ದುಖ್ ಖೈನ್, ಯಜಮಾನ್‌ಕನ ಆಯಿನ್, ಚಾಲ್ತುತೆ ಇನಿ ಬಾರೇಮ ಖ್ವಾರುಸ್ ಇನ ಬೋಲ್ಯು.

32 ತದೆ ಯಜಮಾನ್ನೆ ಯೋ ಆಳ್‌ನ ಬುಲೈನ್, ‘ತೂ ಖರಾಬ್ ಆಳ್! ತೂ ಮನ ಬೋಲಿಲೇತಾನ, ಮನ ದೇವ್ವುಡ್ಡೆ ಯೋ ಖ್ವಾರೊಸ್ ಕರಚ್‌ನ ಮೇ ಮ್ಹಂದಿದೋನಿ.

33 ಮೇ ತಾರಪರ್ ಗೋರ್ ವತಾಳ್ಕೊತೆ ಇಮ್ಮಸ್, ತೂಬಿ ತಾರ ಜೋಡ್ಡ ಕಾಮ್ ಕರಾವಾಳೊ ಯೋ ಆಳ್‌ನ ಮಾಪ್ ನಾ ಕರ್ನುಡುಕಿ ಶು?’ ಕರಿ ಬೋಲಿನ್,

34 ಯಜಮಾನ್ನೆ ಖೀಚ್ ಕರೀನ್, ಇನ ದೇವ್ವುಡ್ಡೂತೆ ಖ್ವಾರುಸ್ ಕರಚ್ ಫೇಡಾತೋಡಿ, ಇನ ದಂಡ್ ದೃವಾನಖ್ವಾಜೆ ಜೇಲ್‌ಮ ಘಲಾಯೊ.

35 ತುಮಾರಾಮ ಹರೇಕ್ ಭಣು ಇನ ಭೈನ ದಿಲ್‌ಥಿ ಮಾಪ್ ನಾ ಕರ್ತೊ, ಸೊರ್ಗಾಮ ಲ್ಹಾತೆ ಮಾರೊ ಬಾಬಿ ತುಮೂನ ಯೋ ರಾಜಾನೆ ಕರ್ತೊತೆ ಇಮ್ಮಸ್ ಕರ್ಶೆ” ಕರಿ ಬೋಲ್ಯೊ.

19

ತಲಾಕ್‌ನಿ ಬಾರೇಮ ಯೇಸುನೆ ಬೋಲ್ಯೊತೆ

(ಮಾರ್ಕ 10:1-12)

1 ಯೇಸುನೆ ಆ ಖ್ವಾರಿ ವಾತೇನ ಬೋಲಾನ ಬಾದ್‌ಮ, ಗಲಿಲಾಯನ ಮ್ಹಂದಿನ, ಯೊರ್ದನ್ ನದ್ವಿನು ಪಾರ್ಲಿ ಬಾಜೂಮ ಥೂತೆ ಯೂದಾಯ ತಬರ್‌ಖಾನ ಗಯೊ.

2 ಕೈಯೆಕ್ಕೆ ಅದ್ವಿನಿ ಮೋಟಿ ಝೂಂಡ್ ಇನ ಪೀಲೆ ಗಯು, ಅಜ್ಜು ಯೇಸುನೆ ಇವ್ವುನ ಹಿಜ್ಜಾ ಅಲ್ಪು ಕರಯ್ತೊ.

3 ತದೆ ಫರಿಸಾಯರ್‌ವಾಳು ಯೇಸುಕನ ಆಯಿನ್ ಇನ ಫಖ್ವಾಪ್ಪು ಕರಿ, “ಏಕ್ ಜಣೊ ಖಿವಿತೋಬಿ ಏಕ್ ಭಾಮ್‌ಥಿ ಇನಿ ಬಾವಣ್ಣ ಮ್ಹೇಲಿದ್ಯವಾನು ಬರೊಬರೈ ನಿಯಮ್ ಕಿಶು?” ಕರಿ ಪುಲ್ಲಾಯು.

4 ತದೆ ಯೇಸುನೆ, “ಅದ್ವಿನ ಉಬ್‌ಜಾಯೋತೆ ಇನೆ ಶುರುವಾತ್‌ಥೂಸ್ ಇವ್ವುನ ಪಖ್ವೊ ತಯೇಡಕರಿ, ಬಣಾಯೊ ಕರಿ ವಚನ್‌ಮ ಲ್ಹಾತೆ ಇನ ತುಮೆ ಪಡಿರಾಖ್ತೊಯ್ತೊ ಶು?

5 ಇನಖ್ವಾಜೆ ದೇವ್ಚೆ ಇನ ಆಯ-ಬಾನ ಮ್ಹೇಲಿನ್, ಇನಿ ಬಾವಣ್‌ಥಿ ಮಳಾಸ್. ಇವ್ಚೆ ಭೇ ಜಣು ಎಕ್ಕ್‌ಸ್ ಶರೀರ್ ಹುಯಿನ್ ರಕ್ತಿಶೆ’ ಕರಿ ಬೋಲ್ಯೊತೆ.

6 ಇನಖ್ವಾಜೆಸ್ ಬಿಜ್ಜು ಖ್ವಾಪ್ಪೊ ಇವ್ಚೆ ಬೇಜಣ ಕಾಹೆ, ಎಕ್ಕ್‌ಸ್ ಶರೀರ್ ಹುಯಿರಕ್ಲ್ಯಾಸ್. ಇನಖ್ವಾಜೆಸ್ ದೇವ್ಚೆ ಮಳಾಯಹುಯಾನ ಅದ್ವಿ ಅಲಕ್‌ನಾಸ್ ಕರಯ್ತೊ” ಕರಿ ಬೋಲ್ಯೊ.

7 ತದೆ ಪರಿಸಾಯರ್‌ನೆ ಯೇಸುನ, “ಇಮ್‌ಕತೊ, ಏಕ್ ಪಖ್ವೊ ತಲಾಕ್‌ನು ಕಾಗತ್ ಲೀಖಿದೀನ್, ಇನಿ ಬಾವಣ್ಣ ಮ್ಹೇಲಿದಿಯ್ಚೆಜಾಯ್ ಕರಿ ಮೋಶೇನೆ ಹಮೂನ ಹುಕುಮ್ ದಿದೋನಿ ಶನ?” ಕರಿ ಪುಲ್ಲಾಯು.

8 ತದೆ ಯೇಸುನೆ ಇವ್ವುನ, “ಮೋಶೆನೆ ತುಮಾರ ಮೊಂಡಿದಿಲನ್ ದೇಖಿನ್, ತುಮಾರಿ ಬಾವಣ್ಣ ಮ್ಹೇಲಿದ್ಯವಾನ ಹುಕುಮ್ ದಿದೋತೆ. ಕತೋಬಿ ಶುರುವಾತ್‌ಥೂಸ್ ಅಮ್ ಕೋಥೂನಿ.

9 ಮೇ ತುಮೂನ ಶಾತ್ ಬೋಲುಸ್‌ಕತೊ, ವ್ಯಬಿಚಾರೈ ಕಾರಣ್ ಕೊಂತೆಸ್ ಇನಿ ಬಾವಣ್ಣ ಮ್ಹೇಲಿದಿನ್, ಬಾವ್ತಿ ಮ್ಹೇಲಿಹುಯಿನ ವ್ಯಹಾ ಕರಿಲ್ವವಾಳೊ ವ್ಯಬಿಚಾರಿ ಹುಯಿರಕ್ಲ್ಯಾಸ್” ಕರಿ ಬೋಲ್ಯೊ.

10 ತದೆ ಇನ ಶಿಷ್ಯರ್‌ನೆ ಇನ, “ಬಾವಣ್ಣಿ ಬಾರೇಮ ಬಾವ್ತಿ ಅಮ್‌ಸ್ ಚಾಲಿಲೇವ್ವು ಕರಿ ಉಶೇತೊ, ವ್ಯಹಾ ಕರಾಕೊಯ್ತೀಸ್ ರಕ್ತವಾನುಸ್ ಅಲ್ಪು” ಕರಿ ಬೋಲ್ಯೊ.

11 ಯೇಸುನೆ, “ಆ ವಾತೇನ ಮಾನಿಲ್ಯವಾನು ದೇವ್‌ಥಿ ಕಿನ ದೆವೈರಲ್ಯಸ್ತಿ ಇವ್ಣೇಸ್ ಪಣ್ಣಿ, ಬಿಜ್ಜು ಕೋಣ್‌ಬಿ ಇನ ಮಾನಿಲ್ಯವಾನ ಕೋ ಹುವಾನಿ.

12 ಪರ್ಖ್ವಾ ಅದ್ವಿ ವ್ಯಹಾ ಕರಾಕೊಯ್ತೆ ಇನ ಬಿಜಿ-ಬಿಜಿ ಕಾರಣ್ ಲ್ಲಾ. ಕೆಹುಕತೊ, ಥೋಡು ಭಣು ಆಯಾನ ಗರಬ್‌ಮಾಥೂಸ್ ವ್ಯಹಾ ಕರಾನ ಲ್ಲಾಯಕ್‌ಕೊಂತೆ ಇಮ್ ಪೈದಾಹುವ್ವಾಸ್; ಅಜ್ಜು ಥೋಡು ಭಣು ಅದ್ವಿನ ಹಾತೆ ಇಮ್ ಕರೈಲೇಸ್; ಕತೋಬಿ ಬಿಜ್ಜು ಥೋಡು ಭಣು ಸೊರ್ಗಾನು ರಾಜ್ಯನಖ್ವಾಜೆ ವ್ಯಹಾ ಕರಾಕೊಯ್ತೆ. ಕಿನ ಆ ವಾತೇನ ಮಾನಾನ ಹುವಾಸ್ತಿ ಇವ್ಣೆ ಮಾನಿಲೇಸ್.

ಯೇಸುನೆ ಅಡ್ಡಾಣಿ ಲಡ್ಕಾವ್ವ ಆಶೀರ್ವಾದ್ ಕರಯ್ತೆ

(ಮಾರ್ಕ 10:13-16; ಲೂಕ 18:15-17)

13 ಥೋಡು ಭಣು ಇವ್ಣೆ ಅಡ್ಡಾಣಿ ಲಡ್ಕಾವ್‌ನ ಯೇಸುಕನ ಲೈನ್, ಇವ್ಣಾಪರ್ ಹಾತ್ ಮೈಲಿನ್, ಪ್ರಾರ್ಥನೆ ಕರಯ್ ಕರಿ ಬೋಲಿಲಿದು, ಕತೋಬಿ ಶಿಷ್ಯರನೆ ಇವ್ಣುನ ಗುರ್‌ಕಾಯು.

14 ತದೆ ಯೇಸುನೆ, “ಅಡ್ಡಾಣಿ ಲಡ್ಕಾವ್‌ನ ಮೈಲೊ, ಮಾರಕನ ಆವಾನ ಇವ್ಣುನ ಭೀರಾಖೊ ನಕೊ, ಶನಕತೊ ಸೊರ್ಗಾನು ರಾಜ್ಯ ಇಮ್‌ವಾಳನೂಸ್” ಕರಿ ಬೋಲಿನ್,

15 ಇವ್ಣಾಪರ್ ಹಾತ್ ಮೈಲಿನ್, ಹಿಜ್ಜಾಥೊ ಚಲೆಗಯೊ.

ಏಕ್ ಭವಾನ್ ಶೌಕಾರ್‌ನಿ ಅದ್ವಿನಿ ಬಾರೇಮ

(ಮಾರ್ಕ 10:17-31; ಲೂಕ 18:18-30)

16 ಏಕ್ ಹಲ್ಲ ಏಕ್ ಅದ್ವಿ ಯೇಸುಕನ ಆಯಿನ್, “ಗುರು, ಮನ ಹಮೇಶಾನಿ ಜಿಂದಾಗಿ ಮಳ್‌ಣುಕತೊ ಮೇ ಖೆವು ಅಲ್ಪು ಕಾಮ್ ಕರಯ್?” ಕರಿ ಪುಲ್ಲಾಯೊ.

17 ತದೆ ಯೇಸುನೆ ಇನ, “ಅಲ್ಪಾನಿ ಬಾರೇಮ ತೂ ಮನ ಪುಲ್ಲಾವಾಸ್ತೆ ಶನ? ದೇವ್ ಎಕ್ಕ್‌ಸ್ ಭಣೊ ಅಲ್ಪೊ. ಕತೋಬಿ ತುನ ಹರ್‌ಹಮೇಶಾನಿ ಜಿಂದಾಗಿ ಹೋಣುಕತೊ, ದೇವ್ನಿ ಖ್ವಾರಿ ಹುಕುಮ್‌ನಿಫೋಣಿ ಚಾಲಿಲೇ” ಕರಿ ಬೋಲೊ.

18 ಯೋ ಅದ್ವಿನೆ, “ಖಿವಿ ಖ್ವಾರಿ ಹುಕುಮ್?” ಕರಿ ಪುಲ್ಲಾಯೊ.

ಯೇಸುನೆ, “ಖೂನಿ ನಾಹೋಣು; ವೈಬಿಚಾರ್ ನಾ ಕರವ್ವು; ಚೋರಿ ನಾ ಕರವ್ವು; ಬಿಛಾಪರ್ ಝೂಟಿ ಸಾಕ್ಷಿ ನಾ ಬೋಲ್‌ನು;

19 ತಾರ ಆಯ-ಬಾನ ಮರ್ಯಾದಿ ದೇವ್ವು; ಅಜ್ಜು ತಾರು ತೂ ಕಿಮ್ ಪ್ಯಾರ್ ಕರಿಲೇಸ್ತಿ, ಇಮ್ಮಸ್ ತಾರ ಭೀಡೆವಾಳಾನ ಪ್ಯಾರ್ ಕರವ್ವು;

20 ಯೋ ಜಾನ್‌ಮಾನ್ ಅದ್ವಿನೆ, “ಮೇ ಆ ಖ್ವಾರಿಸ್ ಹುಕುಮ್‌ನಿಫೋಣಿ ಚಾಲಿರಾಖ್ಯೋಸ್. ಬಿಜ್ಜು ಶಾತ್ತ್ವಿ ಕಮ್ ಹುಯಿರವ್ವುಶು?” ಕರಿ ಪುಲ್ಲಾಯೊ.

21 ಯೇಸುನೆ ಇನ, “ತೂ ಪಕ್ಕಾ ಹೋಣುಕರಿ ಉಶೇತೊ, ಜೈನ್, ತಾರು ಶೊತ್ತ್ ಖ್ವಾರು ವೇಚಿನ್, ಇನೇಥಿ ಆವಸ್ತೆ ಪೈಶಾನ ಗರೀಬ್‌ನ ದೇ, ತದೆ ಸೊರ್ಗಾಮ ತುನ ಶೊತ್ ರಕ್ಷಿಶೆ. ಅನಕೇಡೆಥು ತೂ ಐನ್, ಮಾರ ಪೀರೆ ಆವ್!” ಕರಿ ಬೋಲ್ಯೊ.

22 ಯೋ ಜಾನ್‌ಮಾನ್ ಅದ್ವಿನೆ ಅನ ಖ್ವಮ್‌ಜಿನ್, ಘಣು ದುಖ್‌ಥಿ ಚಲಿಗಯೊ. ಶನಕತೊ ಯೋ ಘಣೊ ಶೌಕಾರ್ ಹುಯಿರವ್ವೊಥೊ.

23 ತದೆ ಯೇಸುನೆ ಇನ ಶಿಷ್ಯರ್‌ನ, “ಮೇ ತುಮೂನ ಖ್ವಾಚ ಬೋಲುಸ್: ಶೌಕಾರ್ ಅದ್ವಿ ಸೊರ್ಗಾನು ರಾಜ್ಯಮ ಜಾವಾನು ಘಣು ಮುಶ್ಕಿಲ್.

24 ಒಹೊ, ಶೌಕಾರ್ ಅದ್ವಿ ದೇವ್‌ನು ರಾಜ್ಯಮ ಜಾವಾಥಿಬಿ, ಊಟ್ ಖ್ವುಯಿನ ಡೋಳವಾಟಿಕರಿ ಪೇಶಿಜಾವನು ಶುಲ್ಪ ಕರಿ ಮೇ ತುಮೂನ ಪಾಳ್ತೊ ಬೋಲುಸ್” ಕರಿ ಬೋಲ್ಯೊ.

25 ಅನ ಖ್ವಮ್‌ಜಿನ್, ಶಿಷ್ಯರ್‌ನೆ ಘಣು ಆಶ್ಚರ್ಯಥಿ, “ಇಮ್‌ಕತೊ, ಕಿನ ರಕ್ಷಣೆ ಮಳ್‌ಶೆ?” ಕರಿ ಪುಲ್ಲಾಯ.

26 ಯೇಸುನೆ ಇನ ಶಿಷ್ಯರ್ ಭಣಿ ರರ್‌ಕೈ ದೇಖಿನ್, “ಆ ಅದ್ವಿಥಿ ಹುವ್ವಾಕೊಯ್ಚಿ, ಕತೋಬಿ ದೇವ್‌ಥಿ ಖ್ವಾರುಸ್ ಹುವಾಸ್” ಕರಿ ಬೋಲ್ಯೊ.

27 ತದೆ ಪೇತ್ರನೆ, “ಹಂದೇಕ್! ಹಮೆ ಖ್ವಾರೂಸ್ ಮ್ಹೆಂದಿನ್, ತಾರ ಪೀರೆ ಐಗಯ. ಹಮೂನ ಶಾತ್ ಮಳ್‌ಶೆ?” ಕರಿ ಪುಲ್ಲಾಯೊ.

28 ಯೇಸುನೆ ಇವ್ವುನ, “ಮೇ ತುಮೂನ ಖ್ವಾಚ ಬೋಲುಸ್: ನವಜಗಮ ಅದ್ಮಿನೊ ಛಿಯೊ ಇನಿ ಮಹಿಮೆನಿ ಸಿಂಹಾಸನ್‌ಪರ್ ಬೇಖ್ತೆ, ತದೆ ಮಾರ ಪೀಲೆ ಆಯಾತೆ ತುಮೆ ಭಾರ ಭಣಾಬಿ ಸಿಂಹಾಸನ್‌ಪರ್ ಬೇಶಿನ್, ಇಸ್ರಾಯೇಲನ್ ಭಾರ ಖೂಮ್‌ವಾಳನ ನ್ಯಾವ್‌ಫೇಡ್‌ಶು.

29 ಅಜು ಮಾರ ನಾಮ್‌ಪರ್ ಘರ್‌ನರತ್ವೊ, ಬೈಯೇನ ರತ್ವೊ, ಭೇನೇನ ರತ್ವೊ, ಬಾನ ರತ್ವೊ, ಆಯಾನ ರತ್ವೊ, ಲಡ್ಕಾವ್ವ ರತ್ವೊ, ಖೇತರ್‌ನ ರತ್ವೊ ಮ್ಹೇಲಿದಿದೂತೆ ಹರೇಕ್ ಖ್ವೊ ಪಟ್ ಭಾಖ್ತೆ ಮಳ್‌ಶೆ ಅಜು ಹರ್‌ಹಮೇಶಾನಿ ಜಿಂಧಗೀಬಿ ಮಳ್‌ಶೆ.

30 ಕತೋಬಿ ಹಮ್ಮೆ ಅಗಾಡಿ ಛಾತೆ ಕೈಯೆಕ್ತಿ ಭಣು ಪಾಲ್ಲಳ್ ಹುಯಿಜಾಶೆ ಅಜು ಪಾಲ್ಲಳ್ ಛಾತೆ ಕೈಯೆಕ್ತಿ ಭಣು ಅಗಾಡಿ ಹುಯಿಜಾಶೆ.

20

ದ್ರಾಕ್ಷಿನ ಬಾಗ್‌ಮ ಕಾಮ್ ಕರಾವಾಳಾನಿ ಬಾರೇಮ

1 ಸೊರ್ಗಾನು ರಾಜ್ಯ ಏಕ್ ದ್ರಾಕ್ಷಿನೊ ಬಾಗ್‌ನೊ ಯಜಮಾನ್ನಿಫೋಣಿ ಛಾ.ಏಕ್ ದನ್ನೆ ವ್ಹಾಣಾನು ಯೋ ಇನ ಬಾಗ್‌ಮ ಕಾಮ್ ಕರಾನಖ್ವಾಜೆ ಥೋಡ ಕೂಲಿಆಳ್‌ನ ಬುಲಾವನ ನಿಕ್‌ಳ್ಳೊ.

2 ಇನೆ ದನ್ನ ಏಕ್ ಕೂಲಿ ಆಳ್‌ನ ಏಕ್ ರೂಪಾನಬಿಲ್ಲಾ ದೆವುಸ್ ಕರಿ ವಾತೆ ಕರಿನ್, ಯೋ ಆಳ್‌ನ ಖ್ವಾರು ಇನ ಬಾಗ್‌ಮ ಬೋಲಿ ಮೋಕ್‌ಲ್ಯೊ.

3 ಅನಕೇಡೆಥು ಯೋ ಬಾಗ್‌ನೊ ಯಜಮಾನ್ ಕಮ್‌ಶಿಕಮ್ ನೌ ಘಂಟಾನ ಪಾಲ್ಲೊ ಘರ್‌ಥೊ ನಿಕ್ಶಿನ್, ಬಜಾರ್‌ನಿ ಝಗೋಕನ ಜೈನ್, ಹಿಜ್ಜಾ ಥೋಡು ಭಣು ಫಾಯಿದೊಕೊಂತೆ ಭೀರೈಡೂತೆ ದೇಖಿನ್,

4 ಇವ್ವುನ, “ತುಮೇಬಿ ಮಾರ ದ್ರಾಕ್ಷಿನ ಬಾಗ್‌ಮ ಜೈನ್ ಕಾಮ್ ಕರೊ. ತುಮೂನ ಮೇ ನೀತಿನಿ ಕೂಲಿ ದೆವುಸ್’ ಕರಿ ಬೋಲ್ಯೊ.

5 ತದೆ ಇವ್ವೆ ಬಾಗ್‌ಮ ಗಯು. ಯೋ ಯಜಮಾನ್ ಪಾಲ್ಟೊ ಕಮಾಶಿಕಮ್ ಭಾರ ಘಂಟಾನ ಅಜ್ಜು ತೀನ್ ಘಂಟಾನ ಏಕ್ ಹಲ್ಲ ಬಜಾರ್‌ನಿ ಝಗೋಕನ ಗಯೊ.

6 ಖ್ವಮಾರ್ ಪಾಚ್ ಘಂಟಾನ ಏಕ್ ಹಲ್ಲ ಯೋ ಯಜಮಾನ್ ಬಿಜೇಕ್ ಹಲ್ಲ ಬಜಾರ್‌ನಿ ಝಗೋಕನ ಜೈನ್, ಹಿಜ್ಜಾ ಭೀರೈಧೂತೆ ಥೋಡ ಅದ್ವಿನ ಇನೆ ದೇಖಿನ್, 'ತುಮೆ ದನ್‌ಭರ್ ಫಾಯಿದೊಕೊಂತೆ ಚುಪ್‌ಕೆಸ್ ಶನ ಭೀಯಾಸ್?' ಕರಿ ಪುಲ್ಲಾಯೊ.

7 ತದೆ ಇವ್ವೆ 'ಕೋಣೆಬಿ ಹಮೂನ ಕಾಮ್ ಬುಲಾಯು ಕೊಯ್ನಿ' ಕರಿ ಬೋಲ್ಯು. ಯೋ ಯಜಮಾನ್ನ್ಯೆ 'ಇಮ್‌ಕತೊ, ತುಮೆ ಜೈನ್, ಮಾರ ದ್ರಾಕ್ಷಿನ ಬಾಗ್‌ಮ ಕಾಮ್ ಕರೊ' ಕರಿ ಬೋಲ್ಯೊ.

8 ಖ್ವಾಂಜ್ ಹುವ್ವಾದೀನ್, ಬಾಗ್‌ನೊ ಯಜಮಾನ್ನ್ಯೆ ಕಾಮ್ ಕರಾವಾಳಾನ ದೇಖಿಲೇಸ್ತೆ ಇನ ಬುಲೈನ್, 'ಖ್ವಾರೇಥಿ ಪಾಲ್ಟೆ ಆಯೂತೆ ಆಳ್‌ಥಿ ಶುರುಕರೀನ್, ಪಹಿಲೆ ಆಯೂತೆ ಆಳ್‌ತೋಡಿ ಖ್ವಾರಾನಿ ಕೂಲಿನ ದೇ' ಕರಿ ಬೋಲ್ಯೊ.

9 ಪಾಚ್ ಘಂಟಾನ ಕೂಲಿನ ಆಯುಧೂತೆ ಆಳ್ ಖ್ವಾರಾನಾಬಿ ಏಕೇಕ್ ರೂಪಾನುಬಿಲ್ಲಾ ಮಳ್ಳು.

10 ಅನಕೇಡೆಥು ಪಹಿಲೆ ಕಾಮ್‌ಪರ್ ಆಯುಧೂತೆ ಇವ್ವೆ ಆಯಿನ್, ಹಮೂನ ಜಾಖ್ವತ್ ಕೂಲಿ ಮಳ್‌ಶೆ ಕರಿ ಸೋಚ್ಚು; ಕತೋಬಿ ಇವ್ವುನಾಬಿ ಏಕೇಕ್ ರೂಪಾನುಬಿಲ್ಲಾ ಮಳ್ಳು.

11 ಇವ್ವೆ ಯೋ ಪೈಶಾನ ಲೀಲಿನ್, ಯೋ ಬಾಗ್‌ನ ಯಜಮಾನ್‌ಪರ್ ಮಶ್ಲಾ ಮಾರ್‌ತುಹುಯಿನ್,

12 'ಪಾಲ್ಟೆ ಆಯೂತೆ ಆ ಎಕ್ಕ್‌ಸ್ ಘಂಟೊ ಕಾಮ್ ಕರೈ, ಕತೋಬಿ ಹಮೆಖ್ವಾರು ದನ್‌ಭರ್ ತಡ್ಕಾಮ ಮ್ಹಿನತ್ ಕರೀನ್, ಕಾಮ್ ಕರೈ, ತೋಬಿ ತುನೆ ಹಮೂನ ದಿದೋತೆ ಎತ್ರಸ್ ಇವ್ವುನಾಬಿ ದಿದೋನಿ!' ಕರಿ ಬೋಲ್ಯು.

13 ತದೆ ಬಾಗ್‌ನೊ ಯಜಮಾನ್ನ್ಯೆ ಯೋ ಆಳ್‌ಮ ಏಕ್‌ನ, 'ಹಂದೇಕ್‌ಲ, ದೋಸ್ತ, ಮೇ ತುನ ಠಗಾಯೊ ಕೊಯ್ನಿ. ತೂ

ಏಕ್ ರೂಪಾನ ಕಾಖ್ತಾನಖ್ವಾಜೆ ಏಕ್ ದನ್ನು ಕಾಮ್ ಕರುಸ್ ಕರಿ ಮಾನಿಗಯೊಥೋನಿ?

14 ಅಲ್ಲೆ ತಾರಿ ಕೂಲಿ, ಅನ ಲೀನ್ ಘರೆ ಜಾ. ತುನ ದಿದೋತೆ ಇಮ್ಮಸ್, ಆ ಪಾಲ್ತಳ್ ಆಯೋತೆ ಇನಾಬಿ ಮನ ಮನ್ ಛಾ.

15 ಮಾರ ಶೊಂತ್ ಪೈಶಾನ ಮಾರು ಮನ್‌ಆವಾತೆ ಇಮ್ ಕರಾನ ಮನ ಹಕ್‌ಕೊಯ್ತಿಕಿ ಶು? ಮೇ ಇವ್ಣುನ ಅಲ್ಫು ಕರೊತೆ ಇನಖ್ವಾಜೆ ತೂ ಬಳಾಪೊ ಕರಾಸ್ತಿ ಶು? ಕರಿ ಬೋಲ್ಯೊ.

16 “ಅಮ್ಮಸ್ ಪಾಲ್ತಳ್ ರ್ವಾಳು ಅಗಾಡಿ ಹುಯಿಜಾಶೆ, ಅಜು ಅಗಾಡಿ ರ್ವಾಳು ಪಾಲ್ತಳ್ ಹುಯಿಜಾಶೆ.

ಯೇಸುನೆ ಇನಿ ಮರಣ್ಣಿ ಬಾರೇಮ ತೀನ್ನಿ ಹಲ್ಲ ಬೋಲ್ಯೊತೆ

(ಮಾರ್ಕ 10:32-34; ಲೂಕ 18:31-34)

17 ಯೇಸು ಯೆರೂಸಲೇಮ್ಮ ಜವ್‌ಕರಾನಿ ವಖ್ತಾಮ, ಭಾರ ಜಣ ಶಿಷ್ಯರನ್ ಏಕ್ ತರಬ್ ಬುಲ್ಟೆನ್, ವಾಟ್‌ಪರ್ ಚಾಲ್ತೊಹುಯಿನ್, ಇವ್ಣುನ,

18 “ಹಂದೇಖೊ, ಅಪ್ಲೆ ಯೆರೂಸಲೇಮ್‌ನ ವಳ್ಕಾಜಯ್ತೆಸ್, ಹಿಜ್ಜಾ ಅದ್ವಿನೊ ಛಿಯ್ಯಾನ ಗಲ್‌ಡಯಾಜಕರ್‌ನ ಅಜು ಮೋಶೆನಿ ವಚನ್ ಶಿಕಾಡವಾಳ ಶಾಸ್ತ್ರಿಯೇನ ಹಾತ್‌ಮ ಧರಿದಿನಾಕ್‌ಶೆ.

19 ಇವ್ಣೆ ಇನ ಮರಣ್ ದಂಡ್ ದೀನ್, ಇನ ಖ್ವರಮ್ ಕಾಡಾನ, ಕೊಳ್ಳೇಧಿ ಮಾರಾನ ಅಜು ಶಿಲ್‌ಬೇಪರ್ ನಾಖಾನಖ್ವಾಜೆ ಪರೈ ಜಾತ್‌ವಾಳಾನ ಹಾತ್‌ಮ ದಿನಾಕ್‌ಶೆ. ಕತೋಬಿ ಮರೀನ್ ತೀನ್ ದನ್‌ಕೇಡೆ ಯೋ ಪಾಲ್ಟೊ ಜಿವ್ತೊಹುಯಿನ್ ಆವ್‌ಶೆ” ಕರಿ ಬೋಲ್ಯೊ.

ಏಕ್ ಆಯಾನಿ ಬಿಂತಿ

(ಮಾರ್ಕ 10:35-45)

20 ತದೆ ಜೆಬೆದಾಯನಿ ಬಾವಣ್ ಇನ ಭೇ ಪಖ್ವಾ ಲಡ್ಕಾನ ಜೋಡೆ ಯೇಸುಕನ ಐನ್, ಇನಖ್ವಾಪ್ಲೆ ಆಡ್‌ಪಡೆನ್, ಮಾರಿ ಏಕ್ ಬಿಂತಿನ ಚಲೈದೇಣು ಕರಿ ಬೋಲಿಲಿದಿ.

21 ಯೇಸುನೆ ಇನ, “ತುನ ಶಾತ್ ಹೋಣು?” ಕರಿ ಪುಛಾಯೊ.

ತದೆ ಇನೆ, “ಮನ ಹುಕುಮ್‌ಕರ್ ತಾರಿ ರಾಜ್ಯಮ ಮಾರ ಬೇ ಛಿಯ್ಯಾಮ ಏಕ್ ಭಣೊ ತಾರಿ ಖಾವಿ ಬಾಙ್ಕುಮ ಅಙ್ಕು ಏಕ್‌ಭಣೊ ತಾರಿ ಡಾವಿ ಬಾಙ್ಕುಮ ಬೇಖ್ವಾನ ಬೋಲ್‌ಕರಿ ಬೋಲಿ

22 ಯೇಸುನೆ ಇನ ಛಿಯ್ಯಾವ್‌ನ, “ತುಮೆ ಶಾತ್ ಮಾಂಗಿಲಿದ ಕರಿ ತುಮೂನ ಮಾಲುಮ್ ಕೊಯ್ತೆ. ಮೇ ಪೀಣುತೆ ಖ್ವಿತ್ತಾಪ್ಪಿನ ರಾಲ್ಹಮ ತುಮೆ ಪಿಯ್ಯಾನ ಉಶೇಕಿ ಶು?” ಕರಿ ಪುಲ್ಲಾಯೊ.

ಇನ ಇವ್ಣೆ “ಹಮೂನ ಹುವಾಸ್” ಕರಿ ಭವಾಬ್‌ದಿದಾ.

23 ತದೆ ಯೇಸುನೆ ಇವ್ಣುನ, “ಮೇ ಪೀಣುತೆ ರಾಲ್ಹಮ ತುಮೇಬಿ ಪೀಶು. ಕತೋಬಿ ಮಾರಿ ಖಾವಿ ಬಾಙ್ಕುಮ ಅಙ್ಕು ಡಾವಿ ಬಾಙ್ಕುಮ ಕೋಣ್ ಬೇಖ್ವೆಶೆ ಕರಿ ಭೂಣವಾಳೊ ಮೇ ಕಾಹೆ. ಮಾರೊ ಬಾ ಯೋ ಝಗೋನ ಕಿನ ಕರಿ ಮ್ಹೇಲಿರಾಖ್ಯೋಸ್ಕಿ ಇವ್ಣುನಾಸ್ ಯೋ ಮಳ್‌ಶೆ” ಕರಿ ಬೋಲ್ಯೊ.

24 ಉಬ್‌ರೈತೆ ದಖ್ವೆಜಣ ಶಿಷ್ಯರ್‌ನೆ ಅನ ಖ್ವಮ್‌ಜಿನ್, ಯೋ ಬೇ ಬೈಯೇಪರ್ ಖೀಝ್‌ಖಾದ.

25 ಕತೋಬಿ ಯೇಸುನೆ ಇವ್ಣು ಖ್ವಾರಾನ ಇನಾಕನ ಬುಲೈನ್ ಇವ್ಣುನ, “ಯೆಹೂದ್ಯರ್‌ಕಾಹೆತೆ ಅದ್ಮಿನ ಅದಿಕಾರ್‌ಮ ರ್ವವಾಳು ಇವ್ಣುಪರ್ ಹಂಕಾರ್‌ಧಿ ಅದಿಕಾರ್ ಭಲಾವಸ್, ಅಙ್ಕು ಮೋಟು ಅದಿಕಾರಿಖ್ವಾರು ಇವ್ಣುಪರ್ ಝಲಮ್‌ಧಿ ಹಕ್ವ ಭಲಾವಸ್ ಕರಿ ಹಮೂನ ಮಾಲುಮ್.

26 ಕತೋಬಿ ತುಮಾರಮ ಇಮ್ ನಾರ್ವೈವ್ಣು. ತುಮಾರಮ ಕೋಣ್‌ತೋಬಿ ಮೋಟು ಹೋಣು ಕರಿ ಉಶೇತೊ, ಯೋ ತುಮಾರೊ ಸೇವಕ್ ಹುಯಿರ್ದವಾದೆ.

27 ಅಙ್ಕು ತುಮಾರಾಮ ಅಖ್ವೇಧಿ ಖ್ವಾವ್ಣೆ ರ್ವವಾನ ಆಖ್ವೆಕರವಾಳೊ ಕೋಣ್‌ತೋಬಿ ಉಶೇತೊ, ಯೋ ತುಮಾರೊ ಸೇವಕ್ ಹುಯಿರ್ದೆಣು.

28 ಅಮ್ತಸ್ ಅದ್ಮಿನೊ ಛಿಯ್ಯೊಬಿ ಸೇವೆ ಕರೈಲ್ಯವಾನಖ್ವಾಜೆ ಕೋ ಆಯೋನಿ, ಪಣ್ಣಿ ಸೇವೆ ಕರಾನ ಅಙ್ಕು ಇನೊ ಜಾನ್ವ ದೀನ್, ಕೈಯೆಕ್ಕಿ ಅದ್ಮಿನ ಛೋಡೈಲ್ಯವಾನಖ್ವಾಜೆ ಆಯೊ” ಕರಿ ಬೋಲ್ಯೊ.

ಯೇಸುನೆ ಬೇ ಜ್ಞಾನ ಕಾಣಾನ ಅಟ್ಟು ಕರೈಯೊತೊ

(ಮಾರ್ಕ 10:46-52; ಲೂಕ 18:35-43)

29 ಯೇಸು ಅಜ್ಜು ಇನ ಶಿಷ್ಯರ್ ಯೆರಿಕೋಡು ಚಲ್ಯಾಜ್ಜವ್‌ಕರ್ತಧಾತೆ ವಖ್ತಮ, ಅದ್ಮಿನಿ ಮೋಟಿ ಭೀಡ್ ಇನ ಪೀಲೆ ಗಯು.

30 ತದೆ ಮಾರಗ್‌ನ ಶೇಡೆ ಬೆರಾಧಾತೆ ಬೇ ಜ್ಞಾನ ಕಾಣಾನ ಯೇಸು ಹಜ್ಜಾಸ್‌ಕರಿ ವಳ್ಳೊಜಾಸ್ ಕರಿ ಖ್ವಮ್‌ಜಿನ್, “ಪ್ರಭು, ದಾವೀದ್‌ನ ಛಿಯ್ಯಾ! ಹಮಾರಪರ್ ಗೋರ್‌ಕರ್” ಕರಿ ಚಿಕ್ರಾಲ್ಯಾ.

31 ಯೋ ಭೀಡ್‌ಮ ಧೂತೆ ಅದ್ಮಿಖ್ವಾರ್ಡು ಇವ್ವುನ ಗುರ್‌ಕೈನ್, “ಖ್ವೊಪೇಛಿರ್‌ವೊ” ಕರಿ ಬೋಲ್ಯು. ತೋಬಿ ಭೇ ಕಾಣಾವ್ನೆ ಬಿಜೂಬಿ ಬೋರೇಖ್ವು ಚಿಕ್ರಿನ್, “ಪ್ರಭು, ದಾವೀದ್‌ನ ಛಿಯ್ಯಾ! ಹಮಾರಪರ್ ಗೋರ್‌ಕರ್” ಕರಿ ಬೋಲ್ಯು.

32 ತದೆ ಯೇಸುನೆ ಭೀರಿನ್, ಇವ್ವುನ ಬುಲೈನ್, “ಮೇ ತುಮೂನ ಶಾತ್ ಕರ್ನ್?” ಕರಿ ಇವ್ವುನ ಪುಲ್ಲಾಯೊ.

33 ಇವ್ವೆ “ಪ್ರಭು, ಹಮಾರ ಡೋಳಾ ದೆಖಾವಾನಿಘೋಣಿ ಕರ್ಲಾ!” ಕರಿ ಬೋಲ್ಯು.

34 ತದೆ ಯೇಸುನೆ ಇವ್ವಾಪರ್ ಗೋರ್‌ಖೈನ್, ಇವ್ವ ಡೋಳಾನ ಛೀಮ್ಚೊ ತದ್‌ನು ತದ್ದೇಸ್ ಇವ್ವ ಡೋಳಾ ಐಗಯ, ಅಜ್ಜು ಇವ್ವೆ ಇನ ಪೀಲೆ ಗಯ.

21

ಯೇಸು ರಾಜಾನಿಘೋಣಿ ಯೆರೂಸಲೇಮ್‌ಗಯೋತೆ

(ಮಾರ್ಕ 11:1-11; ಲೂಕ 19:28-40; ಯೋಹಾನ 12:12-19)

1 ಯೇಸು ಅಜ್ಜು ಇನ ಶಿಷ್ಯರ್ ಯೆರೂಸಲೇಮ್‌ನ ಖನ್ನೆ-ಖನ್ನೆ ಐನ್, ಆಲಿವ್ ಪಹಾಡ್‌ಕನ ಛಾತೆ ಬೆತ್ಲಗೆ ಕರಿ ಗಾಮ್‌ಕನ ಆಯಾ. ತದೆ ಯೇಸುನೆ ಇನ ಬೇ ಶಿಷ್ಯರ್‌ನ ಬುಲೈನ್,

2 “ತುಮಾರ ಖ್ವಾಮ್ಲೆ ಛಾತೆ ಗಾಮ್ಲ ಜಾವೊ, ಜಾತಸ್‌ನ ಹಿಜ್ಜಾ ಭಂದೈರ್ದ್ವೀಶೆತೆ ಗಧೇಡಾನ ಅಜು ಇನಬೋಡೆ ಛಾತೆ ಇನ ಚೆಲ್ಕಾನ ದೇಕ್‌ಶು; ಯೋ ಭೇನ ಛೋಡಿಲಿನ್, ಮಾರಕನ ಲ್ಯಾವೊ.

3 ಕೋಣ್‌ತೋಬಿ ತುಮೂನ ಶಾತ್‌ತೋಬಿ ಬೋಲ್ಯಾತೊ, ‘ಪ್ರಭುನ ಆ ಹೋಣುಕಸ್; ಅಜು ಒಗ್ಗಿಸ್‌ಮ ಯೋ ಅನ ಮೋಕ್ಲಿದಿಶೆ’ ಕರಿ ಬೋಲೊ” ಕರಿ ಬೋಲಿನ್ ಮೋಕ್‌ಲ್ಯೊ.

4 ಏಕ್ ಪ್ರವಾದೀನ ಮ್ಹೋಡವಾಟೆ ಬೋಲಾಯೋತೆ ವಾತೆ ಚಾಲಾನಖ್ವಾಜಿ ಅಮ್ ಹುಯೂತೆ: ಯೋ ವಾತೆ ಶಾತ್ ಕತೊ,

5 ಚೀಯೋನ್ ನಂಗರ್ದ್ವ ಬೋಲೊ,

ದೇಕ್ ತಾರೊ ರಾಜ ತಾರಕನ ವಳ್ಳಾವಸ್,

ಯೋ ಖ್ವಾದ್‌ನ ಝುಕ್ಯೆಲೀನ್, ಗಧೇಡಾಪರ್ ಬೇಶಿನ್,

ಒಹೊ, ಗಧೇಡಾನ ಚೆಲ್ಕಪರ್ ಬೇಶಿನ್ ವಳ್ಳಾವಸ್’ ಕರಿ ಬೋಲಾನುಸ್.

6 ತದೆ ಶಿಷ್ಯರ್ ಜೈನ್, ಯೇಸುನೆ ಇವ್ಣುನ ಬೋಲ್ಯೋತೆ ಇಮ್ಮಸ್ ಕರ್ದ್.

7 ಇವ್ಣೆ ಗಧೇಡಾನ ಅಜು ಗಲ್‌ಡ ಚೆಲ್ಕಾನ ಲೈನ್, ಇನಪರ್ ಇವ್ಣ ಲುಂಗ್ವಾವ್‌ನ ನಾಖ್ಲು ಯೇಸು ಇನಾಪರ್ ಚಡೀನ್ ಬೇಶಿಗಯೊ.

8 ತದೆ ಅದ್ಮಿನಿ ಝೂಂಡ್‌ಮ ಥೂತೆ ಘಣು ಅದ್ಮಿ ಇವ್ಣ ಲುಂಗ್ವಾವ್‌ನ ವಾಟ್‌ಪರ್ ಬಿಲ್ಲಾಯು, ಬಿಜು ಥೋಡಾನೆ ಝೂಡಾನಿ ಡಾಳಿಯೇನ ಕತ್ರಿಲೈನ್, ವಾಟ್‌ಪರ್ ನಾಖ್ಲು.

9 ಯೇಸುನ ಖ್ವಾಮ್ಲೆ ಅಜು ಪೀರೆ ಝೂಂಡ್‌ಥಿ ವಳ್ಳುಜಾತುಥೂತೆ ಅದ್ಮಿಖ್ವಾರು, “ದಾವೀದ್‌ನ ಛಿಯ್ಯಾನ ಸ್ತುತಿಹುವ್ವಾದೆ! ಪ್ರಭು ದೇವ್ ನಾಮ್‌ಪರ್ ಆವಾಳಾನ ಆಶೀರ್ವಾದ್ ಹುವಾದೆ! ಉಪ್ಪರ್‌ಲ್ಯ ಲೋಕಾಮ ದೇವ್ ಧನ್ಯವಾದ್ ಹುವಾದೆ!” ಕರಿ ಚಿಕ್‌ರ್ದ್.

10 ಯೇಸು ಯೆರೂಸಲೇಮ್‌ನ ಜಾವಾದಿನ್, ಯೋ ಖ್ವಯೇರ್ ಅಖ್ವಸ್ ಚಿಕ್ರಾಣ್ ಪಡೀನ್, “ಆ ಕೋಣ್?” ಕರಿ ಅದ್ಮಿಖ್ವಾರು ಪುಲ್ಲಾಯು.

11 ತದೆ ಯೋ ಅದ್ವಿನಿ ಝೂಂಡನೆ, “ಆ ಪ್ರವಾದಿ ಹುಯಿರ್ದೋತೆ ಯೇಸು, ಆ ಗಲಿಲಾಯಾನು ನಜರೆತ್‌ವಾಳೊ” ಕರಿ ಜವಾಬ್ ದಿದು.

ಯೇಸು ಮಂದಿರ್‌ಮ ಗಯೋತೆ
(ಮಾರ್ಕ 11:15-19; ಲೂಕ 19:45-48; ಯೋಹಾನ 2:13-22)

12 ಯೇಸು ಮಂದಿರ್‌ಮ ಜೈನ್, ಹಿಜ್ಜಾ ವೇಚವಾಳ ಅಜ್ಜು ಲ್ವಾಳ ತಮಾಮ್ ಅದ್ವಿನಿ ಭಾರ್ ನಖ್ವಾಡಿದಿದೊ. ಪೈಶಾ ತೋಡಾವಾನು ಧಂದೊ ಕರಾವಾಳಾನ ಅಜ್ಜು ಪರ್ಯಾವೊ ವೇಚವಾಳಾನು ಮೇಜನ್ ರಡ್‌ಕೈನಾಖಿದಿದೊ.

13 ಅಜ್ಜು ಇವ್ವ ಖ್ವಾರಾನ, “ದೇವ್ ಬೋಲೋತೆ ಇಮ್, ‘ಮಾರಿ ಮಂದಿರ್ ಪ್ರಾರ್ಥನೇನು ಘರ್ ಕರಿ ಬೋಲೈಲಿಶೆ’ ಕರಿ ವಚನ್‌ಮ ಲೀಖೈರ್ದೊಸ್‌ನಿ ಕತೋಬಿ ತುಮೆ ಇನ ಚೋರ್‌ನಿ ಲಪಾನಿ ಘವಿ ಕರುಕರಸ್!” ಕರಿ ಬೋಲೊ.

14 ತದೆ ಕಾಣು ಅಜ್ಜು ಲಂಗ್ವಾಖ್ವಾರು ಮಂದಿರ್‌ಮ ಇನಾಕನ ಆಯು, ಯೇಸುನೆ ಇವ್ವನ ಅಫ್ಫು ಕರ್ದೊ.

15 ಕತೋಬಿ ಗಲ್‌ಥಯಾಜಕರ್ ಅಜ್ಜು ಮೋಶಿನಿ ವಚನ್ ಶಿಕಾಡವಾಳ ಶಾಸ್ತ್ರಿಯೇನೆ ಯೇಸುನೆ ಕರ್ದೊತೆ ಆಶ್ಚರ್ಯನು ಕಾಮ್‌ಖ್ವಾರು ಅಜ್ಜು ದಾವೀದ್‌ನ ಛಿಯ್ಯಾನ ಸ್ತುತಿಹುವ್ವಾದೆ ಕರಿ ಮಂದಿರ್‌ಮ ಚಿಕ್ರಕರ್ತುಧೂತೆ ಲಡ್ಕಾವ್ವ ದೇಖಿನ್, ಖೀರ್ಜ್‌ಖಾದು.

16 ಇನಖ್ವಾಜೆ ಇವ್ವೆ ಯೇಸುನ, “ಅವ್ವೆ ಬೋಲುಕರಾತೆ ಇನ ತೂ ಖ್ವಮ್‌ಜುಕರಾಸ್ತಿ ಶು?” ಕರಿ ಪುಲ್ಲಾವ್‌ತಾನೆ,

ಯೇಸುನೆ, “ಓಹೊ, ಖ್ವಮ್‌ಜುಕರೂಸ್, ‘ಅಡ್ವಾಣಿ ಲಡ್ಕಾವ್‌ನ ಮ್ಹೋಡವಾಟೆ ಅಜ್ಜು ದೂದ್ ಪಿಯ್ಯಾವಾಳ ಲಡ್ಕಾವ್ವ ಮ್ಹೋಡವಾಟೆ ಸ್ತುತಿ ಕರಾಯೊ’ ಕರಿ ವಚನ್‌ಮ ಛಾತೆ ಇನ ತುಮೆ ಪಡ್ಯಾಕೊಯ್ತಿಕಿ ಶು?” ಕರಿ ಬೋಲೊ.

17 ಅನಕೇಡೆಧು ಯೇಸು ಇವ್ವನ ಮ್ಹಂದಿನ, ಖ್ವಯೇರ್‌ಧು ನಿಕ್ಕಿನ್, ಬೇಧಾನ್ಯ ಗಾಮ್‌ಐನ್, ಹಿಜ್ಜಾಸ್ ರಾತ್ ಕಾಡ್ಲೊ.

ಯೇಸುನೆ ಅಂಜೀರ್‌ನ ಝಾಡಾನ ಶಾಪ್ ದಿದೋತಿ
(ಮಾರ್ಕ 11:12-14,20-24)

18 ತಿನವ್ವಾಣೆ ಯೇಸು ಪಾಟ್ಲೊಫರಿ ಯೆರೂಸಲೇಮ್ ಖ್ವಯೇರ್ನ್
ಭಾವಾನಿ ವಖ್ವತ್‌ಮ, ಯೇಸುನ ಭುಕ್‌ಲಾಗ್ಲು.

19 ಇನೆ ವಾಟ್ನ ಶೇಡೆಏಕ್ ಅಂಜೀರ್‌ನ ಝಾಡಾನ ದೇಖಿನ್,
ಇನಖನ್ನೆ ಜೈನ್, ಇನಾಮ ಖಲಿ ಪಾಂದ್‌ಡುಸ್ ಪಣ್ಣಿ, ಬಿಜು ಶಾಪ್ತಿ
ಕೋಥುಂತೆ ದೇಖಿನ್, “ಅನಾಪರ್‌ಥು ತೂ ಬಿಜು ಕದಕದೇಬಿ ಪಂಡು
ನಾ ಮ್ಹೇಲ್‌ನೂತೆ ಇಮ್ ಹುವಾದೆ!” ಕರಿ ಬೋಲ್ಯೊ ತದ್‌ನು-ತದ್ದೇಸ್
ಯೋ ಅಂಜೀರ್‌ನು ಝಾಡು ಖ್ವುಕ್ತೆಗಯು.

20 ಶಿಷ್ಯರಾನೆ ಅನ ದೇಖಿನ್, ಆಶ್ಚರ್ಯಖೈನ್, “ಅಂಜೀರ್‌ನು
ಝಾಡ್ ಎಕ್ಕ್‌ಸ್ ಘಡೀಮ ಖ್ವುಕ್ತೆಗಯೂತೆ ಕಿಮ್?” ಕರಿ ಪುಲ್ಲಾಯು.

21 ಯೇಸುನೆ, “ತುಮುನ ಖ್ವಾಚ ಬೋಲುಸ್, ತುಮೆ ಗುಮಾನಿ
ಕರಾಕೊಂತೆ ಇಮ್ ವಿಶ್ವಾಸ್ ಕರ್ಯೊತೊ, ಮೇ ಆ ಅಂಜೀರ್‌ನ
ಝಾಡಾನ ಕರ್ಯೊತೆ, ಇಮ್ಸ್, ತುಮೇಬಿ ಕರ್ಶು. ಅಜು ಎತ್ರೆಸ್
ಕಾಹೆತಿ, ಆ ಪಹಾಡ್‌ನ, ‘ತೂ ಉಖ್‌ಡೈ ಜೈನ್, ದರ್ಯಾವ್‌ಮ ಪಡ್’ ಕರಿ
ಬೋಲ್ಯಾತೊಬಿ ಯೋ ಉಶೆ.

22 ತುಮೆ ನಂಬಿನ್, ಪ್ರಾರ್ಥನೆಮ ಶಾತ್ ಮಾಂಗೋಸ್‌ಕಿ ಯೋ
ತುಮೂನ ಮಳ್‌ಶೆ” ಕರಿ ಬೋಲ್ಯೊ.

ಯೇಸುನಿ ಹಕ್‌ನಿ ಬಾರೇಮ ಪುಲ್ಲಾಯೂತೆ
(ಮಾರ್ಕ 11:27-33; ಲೂಕ 20:1-8)

23 ಯೇಸು ಪಾಟ್ಲೊ ಮಂದಿರ್‌ಮ ಏನ್, ವಚನ್ನ ಬೋಲಿದೆವ್‌ಕರಾನಿ
ವಖ್ವತ್‌ಮ, ಗಲ್‌ಥಯಾಜಕರ್ ಅಜು ಶಾಣುಖ್ವಾರು ಇನಾಕನ
ಆಯಿನ್, “ತೂ ಖೆವಿ ಹಕ್‌ಥಿ ಆ ಖ್ವಾರು ಕರುಕರಸ್? ಆ ಹಕ್ಕ್
ತುನ ದಿದೂತೆ ಕೋಣ್?” ಕರಿ ಪುಲ್ಲಾಯು.

24 ಯೇಸುನೆ ಇವ್ಣುನ, “ಮೇ ತುಮೂನ ಏಕ್ ಸವಾಲ್
ಪುಲ್ಲಾವ್‌ಸ್, ತುಮೆ ಮನ ಜವಾಬ್ ದಿದಾತೊ, ಮೇ ಹಕ್‌ಥಿ ಆ
ಖ್ವಾರು ಕರುಸ್ ಕರಿ ತುಮೂನ ಬೋಲುಸ್.

25 ಬ್ಯಾಪ್ತಿಸ್ತ ದೈವಾನಿ ಹಕ್ ಯೋಹಾನ್ನ ಕಿಜ್ಜಾಧಿ ಆಯಿ? ಪರಲೋಕಧೀಕಿ, ನತರ್‌ಕಿ ಅದ್ವಿಧಿ?” ಕರಿ ಪುಲ್ಲಾಯೊ.

ತದೆ ಇವ್ವೆ “ದೇವ್‌ಧಿ ಆಯು ಕರಿ ಅಪ್ಪೆ ಬೋಲ್ಯಾತೊ, ‘ಇಮ್‌ಕತೊ, ತುಮೆ ಇನ ಶನ ನಂಬ್ಯಾಕೊಯ್ನಿ’ ಕರಿ ಅಪ್ಪುನ ಬೋಲ್‌ಶೆ.

26 ‘ಅದ್ವಿಧಿ ಆಯು’ ಕರಿ ಬೋಲ್ಯಾತೊ, ಅಪ್ಪುನ ಅದ್ವಿನೊ ಡರ್ ಲ್ಲಾ” ಕರಿ ಇವ್ವ-ಇವ್ವ ಮಹಿಸ್ ಬೋಲಿಲಿದು. ಶನಕತೊ, ಯೋಹಾನ ಏಕ್ ಪ್ರವಾದಿ ಕರಿ ತಮಾಮ್ ಅದ್ವಿ ಶಕ್‌ಕೊಂತೆ ಇಮ್ ನಂಬಿರಾಘ್ತು.

27 ಇನಖ್ವಾಜೆ ಇವ್ವೆ “ಹಮೂನ ಮಾಲುಮ್ ಕೊಯ್ನಿ” ಕರಿ ಯೇಸುನ ಜವಾಬ್ ದಿದು.

ತದೆ ಯೇಸುನೆ ಇವ್ವುನ, “ಮೇಬಿ ಖಿವಿ ಹಕ್‌ಧಿ ಆ ಖ್ವಾರ್ಡು ಕರುಸ್ ಕರಿ ತುಮೂನ ಕೋ ಬೋಲೂನಿ” ಕರಿ ಬೋಲ್ಯೊ.

ಬೇ ಛಿಯ್ಯಾನಿ ಬಾರೇಮಾನು ಮತ್ಸಚ್‌ನಿ ಖೇಣಿ

28 “ಕತೋಬಿ ತುಮೂನ ಕಿಮ್ ದೆಖಾವಸ್? ಏಕ್ ಅದ್ವಿನ ಬೇ ಛಿಯ್ಯಾ ಥಾ. ಇನೆ ಇನ ಮೋಟಾ ಛಿಯ್ಯಾಕನ ಜೈನ್, ‘ಛಿಯ್ಯಾ ಆಘ್ ತೊ ಜೈನ್, ದ್ರಾಕ್ಷಿನ ಬಾಗ್‌ಮ ಕಾಮ್ ಕರ್’ ಕರಿ ಬೋಲ್ತಾನ,

29 ಇನೆ, ‘ಮೇ ಕೋ ಜವ್‌ನಿ’ ಕರಿ ಬೋಲೀನ್‌ಬಿ, ಬಾದ್‌ಮ ಮನ್ ಫರೈಲಿನ್, ಬಾಗ್‌ಮ ಗಯೊ.

30 ಇನಕೇಡೆಥು ಬಾನೆ ನ್ಹಾನ ಛಿಯ್ಯಾಕನ ಜೈನ್, ಯೋಸ್ ವಾತೇನ ಬೋಲ್ಯೊ ತದೆ ಇನೆ, ‘ಜವುಸ್‌ಲಾ ಬಾ’ ಕರಿ ಬೋಲಿನ್‌ಬಿ ಕೋಸ್‌ಗಯೋನಿ.

31 ಇವ್ವ ಭೇಮ ಬಾನಿ ಮರ್ಜಿನಿಘೋಣಿ ಚಾಲಿಲಿದುತೆ ಕೋಣ್?” ಕರಿ ಪುಲ್ಲಾವ್‌ತಾನ,

ಇವ್ವೆ “ಮೋಟೊ ಛಿಯ್ಯೋಸ್” ಕರಿ ಬೋಲ್ಯೊ.

ತದೆ ಯೇಸುನೆ ಇವ್ವುನ, “ಮೇ ತುಮೂನ ಖ್ವಾಚ ಬೋಲುಸ್: ಶುಂಕ ಮಾಂಗವಾಳು ಅಜ್ಜು ಶೂಳೆ ತಯೇಡ ಖ್ವಾರಿ ತುಮಾರೇಛಿ ಅಗಾಡಿ ದೇವ್ನಿ ರಾಜ್ಯಮ ಜಾಶೆ.

32 ಬ್ಯಾಪ್ಟಿಸ್ಮ ದೈವಾಳೊ ಯೋಹಾನ ತುಮಾರಕನ ಆಯಿನ್, ತುಮೂನ ಜಿವಾನೊ ಬರೋಬರ್‌ನ ಮಾರಗ್‌ನ ವತಾಳ್ಚೊ ತೋಬಿ ತುಮೆ ಇನ ನಂಬ್ಯಾಕೊಯ್ಚಿ; ಕತೋಬಿ ಶುಂಕ ಮಾಂಗವಾಳು ಅಜ್ಜು ವ್ಯಬಿಚಾರ್ ಕರವಾಳು ಖ್ಹಾರು ಇನ ನಂಬ್ಯು. ಅನ ದೇಖಿನ್‌ಬಿ ತುಮೆ ತುಮಾರು ಮನ್‌ಫರಾಯಕೊಯ್ಚಿ ಇನಾಬಿ ನಂಬ್ಯಾಕೊಯ್ಚಿ.

ದ್ರಾಕ್ಷಿನ ಬಾಗ್‌ನ ವಾರ್‌ನ ಕರಿರಾಖವಾಳಾನಿ ಬಾರೇಮಾನಿ ಮತ್ಲಾಬ್‌ನಿ ಖೇಣಿ

(ಮಾರ್ಕ 12:1-12; ಲೂಕ 20:9-19)

33 “ಬಿಜೇಕ್ ಮತ್ಲಾಬ್‌ನಿ ಖೇಣಿನ ಖ್ಹಮ್‌ಜೊ: ಏಕ್ ಜಮೀನ್‌ದಾರ್ ಥೊ. ಇನೆ ಇನಿ ಜಮೀನ್‌ಮ ದ್ರಾಕ್ಷಿನೊ ಬಾಗ್‌ನ ಬಣೈನ್, ಇನ ಅಶ್‌ಪಿಶ್ ವಾಡ್‌ಗಿ ನಖೈನ್, ದ್ರಾಕ್ಷಿನೊರಖ್ತ್ ಕಾಡಾನಖ್ಹಾಜೆ ಖಾಡ್ ಖೋಂದೈನ್, ಕಾವ್ಲಿನಖ್ಹಾಜೆ ಅಟ್‌ಲೊ ಭಂದಾಯೊ. ಅನಕೇಡೆಥು ಯೋ ಬಾಗ್‌ನ ಇನೆ ವಾರ್‌ನ ಕರಾವಾಳನ ಹಾತ್‌ಮ ದೀನ್, ದೇಖ್ಪರ್ ಚಲೆಗಯೊ ಕರಿ ಯೇಸುನೆ ಬೋಲ್ಚೊ.

34 ಪಂಡಾ ತೋಡಾನಿ ವಖ್ತ್ ಆವಾದಿನ್, ಇನ ಆವ್ಣೆತೆ ಭಾಗ್ ಲ್ಹವಾನಖ್ಹಾಜೆ ಯೋ ವಾರ್‌ನ ಕರಿರಾಖವಾಳಕನ ಇನ ಆಳ್‌ನ ಖ್ಹಾರು ಮೋಕ್‌ಲ್ಚೊ.

35 ಕತೋಬಿ ಯೋ ವಾರ್‌ನ ಕರಿರಾಖವಾಳಾವ್‌ನೆ ಇನ ಆಳ್‌ನ ಖ್ಹಾರು ಧರೀನ್, ಏಕ್‌ನ ಮಾರ್ಚ್ಯು ಬಿಜೇಕ್‌ನ ಮಾರಿಸ್‌ನಾಖ್ಚಿ ಅಜ್ಜು ಏಕ್‌ನ ಬಂಡಾ ಫೇಕಿನ್ ಮಾರ್ಚ್ಯು.

36 ಯೋ ಬಾಗ್‌ನ ಯಜಮಾನ್ನೆ ಪಾಳ್ಚೊ ಅಗಾಡಿ ಮೋಕ್‌ಲ್ಚೊಥೋತೆ ಇನೇಥಿಬಿ ಜಾಖ್ತ್ ಆಳ್‌ನ ಖ್ಹಾರು ಮೋಕ್‌ಲ್ಚೊ ವಾರ್‌ನ ಕರಿರಾಖವಾಳನೆ ಇವ್ಣುನಾಬಿ ಇಮ್ಮತ್ ಕರ್ಚ್ಯು.

37 ಬಾದ್‌ಮ, ‘ಮಾರ ಛಿಯ್ಯಾನ ತೋಬಿ ಮರ್ಯಾದಿ ದಿಶೆ’ ಕರಿ ಬೋಲಿನ್, ಇನ ಛಿಯ್ಯಾನ ಇವ್ಣಾಕನ ಮೋಕ್‌ಲ್ಚೊ.

38 ಕತೋಬಿ ಯೋ ವಾರ್‌ನ ಕರಿರಾಖವಾಳು ಖ್ಹಾರು ಇನ ಛಿಯ್ಯಾನ ದೇಖಿನ್, ‘ಆಸ್ ಮಾಲಿಕ್‌ನೊ ಛಿಯ್ಚೊ ಆವೊ, ಅನ

ಮಾರಿನಾಖಿದಿಯ್ಯೆ ತದೆ ಇನು ಶೋತ್ ಅಪ್ಪು ಹುಯಿಜಾಶೆ' ಕರಿ
ಇವ್ವ-ಇವ್ವಾಮ ವಾತೆ ಬೋಲಿಲೀನ್,

39 ಇನ ಧರೀನ್, ದ್ರಾಕ್ಷಿನ ಬಾಗ್‌ಥಿ ಭಾರ್ ಫೇಕಿನ್, ಇನ
ಮಾರಿನಾಖ್ಯು.

40 ಇಮ್‌ಕತೊ, ದ್ರಾಕ್ಷಿನೊ ಬಾಗ್‌ನೊ ಯಜಮಾನ್ ಆವಾದಿನ್,
ಯೋ ವಾರ್‌ನ ಲೀರಾಖ್ಯುಧೂತೆ ಇವ್ವುನ ಶಾತ್ ಕರ್ತೆ?" ಕರಿ ಯೇಸುನೆ
ಇವ್ವುನ ಪುಲ್ಲಾಯೊ.

41 ಇವ್ವೆ ಇನ, "ಯೋ ಖರಾಬ್ ಅದ್ವಿ ಖ್ವಾರಾನ ಮಾರಿನಾಖಿದೀನ್,
ಖ್ವುಗ್ಗೀನ ದನ್ತು ಇನು ವಾಟೊ ಬರೋಬರ್‌ಥಿ ದ್ಯವಾಳ ಬಿಜು ವಾರ್‌ನ
ಕರಾವಾಳಾನ ಇನ ಬಾಗ್‌ನ ದಿಶೆ" ಕರಿ ಜವಾಬ್ ದಿದು.

42 ಯೇಸುನೆ ಇವ್ವುನ,
"ಘರ್ ಭಾಂದಾವಾಳು ನಕೊಕರಿ ಧಕೇಲ್ಯೆಗಯೋತೆ ಬಂಡೋಸ್,
ಅಖ್ವೇಥಿ ಹೋಣುತೆ ಕೋಣಾನೊ ಬಂಡೊ ಹುಯೊ.

'ಆ ಪ್ರಭುನೇಸ್ ಕರಯ್ತೆ,
ಆ ಅಪ್ಪ ಡೋಳಾಮ ಆಶ್ಚರ್ಯ ದೆಖಾವಸ್!' ಕರಿ
ಧರ್ಮಶಾಸ್ತ್ರಮ ಛಾತೆ ತುಮೆ ಕದೆತೋಬಿ ಪಡ್ಯಾಕೊಯ್ತಿಕಿ
ಶು?

43 ಇನಖ್ವಾಜೇಸ್ ಮೇ ತುಮೂನ ಬೋಲುಸ್ಕಿ: ದೇವ್ನಿ ರಾಜ್ಯನ
ತುಮಾರಕಂಥು ಕಾಡಿಲೀನ್, ದೇವ್ನಿ ಮರ್ಜಿನಿಫೋಣಿ ಭಾಲಾಸ್ತೆ ಅದ್ವಿನ
ದೆವಾವ್‌ಶೆ.

44 ಆ ಬಂಡಾಪರ್ ಪಡಾವಾಳು ಟುಕ್‌ಡಾ-ಟುಕ್‌ಡಾ ಹುಯಿಜಾಶೆ;
ಅಜು ಆ ಬಂಡೊ ಕಿನಾಪರ್ ಪಡಾಸ್ಕಿ, ಇವ್ವುನ ಬುಕ್‌ನು-ಬುಕ್‌ನು
ಕರಿನಾಕ್‌ಶೆ" ಕರಿ ಬೋಲ್ಯೊ.

45 ಗಲ್‌ಥಯಾಜಕರ್ ಅಜು ಫರಿಸಾಯರ್‌ನೆ ಯೇಸುನೆ
ಬೋಲ್ಯೊತೆ ಮತ್ತಬ್‌ನಿ ಖೇಣಿಯೇನ ಖ್ವಮ್‌ಜಿನ್, ಆ ಅಪ್ಪೀಸ್
ಬಾರೇಮ ಬೋಲ್ಯೊತೆ ಕರಿ ಮಾಲುಮ್ ಕರಿಲೀನ್,

46 ಇನ ಧರಾನ್ ಕರಿ ಕರ್ಯ್ ಕತೋಬಿ ಅದ್ವಿಖ್ವಾರು ಯೇಸುನ
ಪ್ರವಾದಿ ಕರಿ ಮಾನಿರಾಖ್ಯುಧೂತೆ ಇನಖ್ವಾಜೆ ಅದ್ವಿಧಿ ಡರಿಗಯು.

22

ವ್ಯಹಾನು ಮಿರ್ಝಾವಾನ್ನಿ ಬಾರೇಮಾನು ಮತ್ಲಬ್‌ನಿ ಖೇಣಿ
(ಲೂಕ 14:15-24)

1 ಯೇಸುನೆ ಬಿಜೂಬಿ ಮತ್ಲಬ್‌ನಿ ಖೇಣಿಥಿ ಅದ್ನಿ ಖ್ವಾರಾನ ಬೋಲ್ಯೊಕಿ,

2 “ಸೋರ್ಗಾನ್ ರಾಜ್ಯ ಇನ ಛಿಯ್ಯಾನಿ ವ್ಯಹಾ ಕರಲ್ಯೊತೆ ಏಕ್ ರಾಜಾನಿಘೋಣಿ ಛಾ.

3 ಇನೆ ವ್ಯಹಾನು ಮಿರ್ಝಾವಾನ್ ಖಾವಾನ ಬುಲಾಯೊಥೋತೆ ಮೆಹೆಮಾನ್ನಖ್ವಾರು ಬುಲಾವಾನಟೀಕೆ ಇನ ಆಳೆನ ಖ್ವಾರು ಮೋಕ್‌ಲ್ಯೊ ಕತೋಬಿ ಇವ್ಣುನ ಆವಾನ ಮನ್ ಕೋ ಥೂನಿ.

4 ತದೆ ಇನೆ ಪಾಫೊ ಬಿಜಾಖ್ವಾರ ಆಳೆನ ಬುಲ್ಚೆನ್, ‘ತುಮೆ ಜೈನ್, ಮೇ ಮಿರ್ಝಾವಾನ್ನ ಬುಲಾಯೊಥೋತೆ ಇವ್ಣುನ, ಹಂದೇಖೊ, ಮಿರ್ಝಾವಾನ್ ತೈಯಾರ್ ಹುಯಿಗಯು, ಮಾರು ಥಾಂಡಾವ್‌ನ ಅಜ್ಜು ಪಲ್ಪಹುಯ ಮೇಂಥಾವ್ ರಕ್ಟೆಖ್ವಯ್‌ರಾಖ್ಯೊಸ್; ಖ್ವಾರುಸ್ ತೈಯಾರ್ ಹುಯಿಗಯು. ವ್ಯಹಾನು ಮಿರ್ಝಾವಾನ್ ಖಾವಾನ ಆವೊ’ ಕರಿ ಬೋಲೊ” ಕರಿ ಹುಕುಮ್ ದೀನ್, ಮೋಕ್‌ಲ್ಯೊ.

5 ಕತೋಬಿ ಇವ್ಣೆ ಮಜುರಸ್ ಕರಲ್ಯೊಂತೆ ಏಕ್ ಜಣೊ ಖೇತರ್‌ನ, ಏಕ್ ಜಣೊ ಧಂದಾನ ಚಲೆಗಯೊ.

6 ಬಿಜು ಥೋಡು ಜಣು ಯೋ ಆಳೆನ ಖ್ವಾರು ಧರೀನ್, ಇವ್ಣುನ ಮಾರಿನ್, ಮರ್‌ನಾಖಿದಿದು.

7 ತದೆ ಯೋ ರಾಜಾನೆ ಘಣು ಖಿಜೈನ್, ಇನು ದಂಡ್-ದಳೆವಾಯಿನ ಮೋಕ್ಲೆನ್, ಇನ ಆಳೆನ ಖೂನಿಯೇವ್ ಮರೈನಾಖ್ಯೊ ಅಜ್ಜು ಇವ್ಣು ಖ್ವಯೇರ್ ಬಾಳಿನಾಖ್ಯೊ.

8 ಅನಕೇಡೆಥು ಇನೆ ಇನ ಆಳೆ ಖ್ವಾರಾನ, “ವ್ಯಹಾನು ಮಿರ್ಝಾವಾನ್ ತೈಯಾರ್ ಛಾ, ಕತೋಬಿ ಮೇ ಬುಲಾಯೊಥೋತೆ ಅದ್ನಿಖ್ವಾರು ಇನ ಲ್ಹಾಯಕ್‌ನು ಕೋ ಥೂನಿ.

9 ಇನಖ್ವಾಜೇಸ್ ತುಮೆ ಗಲ್ಲಿ-ಗಲ್ಲಿಯೇಮ ಜೈನ್, ತುಮೂನ ದೆಖಾವಸ್ತೆ ಅದ್ವಿಖ್ವಾರಾನ ಬುಲಾವೊ” ಕರಿ ಬೋಲ್ಯೊ.

10 ಇಮ್ಮಸ್ ಯೋ ಆಳ್‌ಖ್ವಾರು ಗಲ್ಲಿ ಗಲ್ಲಿಯೇಮ ಜೈನ್, ಅಟ್ಟು ಖರಾಬ್ ಕರಿ ದೇಖುಕೊಂತೆ, ಇವ್ವುನ ಮಳಾತೆ ಖ್ವಾರ ಅದ್ವಿನ ಎಕ್ವು ಕರಿನ್, ಬುಲೈಲಿ ಆಯೊ; ಅಮ್ ಯೋ ವ್ಯಹಾನುಮಂಟಪ್ ಅಮ್ಮಿನ್ ಅದ್ವಿಭರೈಗಯು.

11 ಅನ ಬಾದ್‌ಮ ಯೋ ರಾಜಾನೆ ಖಾಣನ ಬೆರುಥೂತೆ ಇವ್ವುನ ದೇಖಾನಖ್ವಾಜೆ ಆಯೊ, ತದೆ ವ್ಯಹಾನು ಲುಂಗ್ಡ ಪೇರ್ದಿರಾಖುಕೊಂತೆ ಎಕ್ ಅದ್ವಿನ ದೇಖಿನ್,

12 ‘ಅಲಾ ದೋಸ್ತ್, ವ್ಯಹಾನು ಲುಂಗ್ಡ ಕೊಂತೆ ತೂ ಕಿಮ್ ಮಹಿ ಆಯೊ?’ ಕರಿ ಪುಲ್ಲಾಯೊ. ಕತೋಬಿ ಯೋ ಅದ್ವಿನೆ ಶಾಪ್ತಿ ಭವಾಬ್ ಕೋ ದಿದೋನಿ.

13 ತದೆ ಯೋ ರಾಜಾನೆ ಇನ ಆಳ್‌ನ ಖ್ವಾರು, ‘ಅನ ಹಾತ್-ಗೋಡ ಭಾಂದಿನ್, ಭಾರ್ ಅಂಧಾರಾಮ ಫೇಕಿದೆವೊ’ ಕರಿ ಬೋಲ್ಯೊ. ಹಿಜ್ಜಾ ಅದ್ವಿಖ್ವಾರು ರೊವ್‌ತುಹುಯಿನ್, ಕರ್-ಕರ್ ದಾತ್ ಚಾವ್ತು ರ್‌ಶ್ತೆ.

14 ಅಮ್ ಬುಲಾಯೂತೆ ಘಣು ಅದ್ವಿನ, ಕತೋಬಿ ಚೂಣಾಯೂತೆ ಥೋಡುಸ್ ಅದ್ವಿ” ಕರಿ ಯೇಸುನೆ ಬೋಲ್ಯೊ.

**ಶುಂಕ ಭಾಂದಾನಿ ಬಾರೇಮ ಪುಲ್ಲಾಯೂತೆ
(ಮಾರ್ಕ 12:13-17; ಲೂಕ 20:20-26)**

15 ತದೆ ಫರಿಸಾಯರ್ ಜೈನ್, ಯೇಸುನ ವಾತೇಮ ಖ್ವಪ್‌ಡಾವ್ವು ಕರಿ ವಾತೆ ಕರಿಲೀನ್, ಇನಾಕನ ಆಯು.

16 ಪರಿಸಾಯರ್‌ನು ಶಿಷ್ಯರಾಮ ಥೋಡಾನ ಅಜು ಹೆರೋದ ಭಣಿವಾಳ ಥೋಡು ಅದ್ವಿನ ಮೋಕ್‌ಲ್ಯು. ಇವ್ವೆ ಐನ್, “ಗುರು, ತೂ ಖ್ವಾಚಿಸ್ ಬೋಲಾಸ್ ಕರಿ ಹಮೂನ ಮಾಲುಮ್. ತೂ ಅದ್ವಿನಖ್ವಾಜೆ ಲ್ಲಾತೆ ದೇವ್ನಿ ಮರ್ಜಿನಿ ಬಾರೇಮ ಖ್ವಾಚಿಸ್ ಬೋಲಿವತಾಳಸ್, ಎತ್ರೇಸ್ ಕಾಹೆತೆ ಅದ್ವಿಖ್ವಾರು ಶಾತ್ ಸೋಚ್‌ಶೆ ಕರಿ ಬೋಲಾನಿ ಬಾರೇಮ ತುನ

ಫಿಕರ್ ಕೊಯ್ವಿ, ಶನಕತೊ, ತು ಕಿನಾಬಿ ಮ್ಹೋಡು ದೇಖಿನ್, ವಾತೆ ಬೋಲಾಕೊಯ್ವಿ.

17 ಇನಖ್ವಾಜೇಸ್ ಹಮೂನ ಬೋಲ್, ಕೈಸರ್‌ನ ಶುಂಕ ಭಾಂದಾನು ನಿಯಮ್‌ಕಿ ಕೊಯ್ವಿ? ತುನ ಕಿಮ್ ದೆಖಾವಸ್?

18 ಯೇಸುನೆ ಇವ್ಣಿ ಖರಾಬ್ ಭಾಲ್‌ನ ಮಾಲುಮ್ ಕರಿಲೀನ್, “ತುಮೆ ಖೋಟ್ ದಿಲ್‌ವಾಳ! ತುಮೆ ಮನ ಖ್ವಾಡಾವ್ಣು ಕರಿ ಶನ ದೇಖೋಸ್ತೆ?

19 ಶುಂಕ ಭಾಂದಾಸ್ತೆ ಪೈಶಾನ ಮನ ವತಾಳೊ!” ಕರಿ ಬೋಲ್ಯೊ.

ಇವ್ಣಿ ಏಕ್ವಾಖ್ವೊಲಯಿನ್ ಇನ ದಿದು.

20 ತದೆ ಯೇಸುನೆ ಇವ್ಣುನ, “ಅನಾಪರ್ ಕಿನು ರೂಪ್ ಅಜ್ಜು ಕಿನುನಾಮ್ ಛಾತೆ?” ಕರಿ ಪುಲ್ಲಾಯೊ.

21 ಇವ್ಣಿ “ಕೈಸರ್‌ನು” ಕರಿ ಭವಾಬ್ ದಿದು.

ತದೆ ಯೇಸುನೆ ಇವ್ಣುನ, “ಇಮ್‌ಕತೊ, ಕೈಸರ್‌ನು ಶಾತ್ ಛಾಕಿ, ಯೋ ಕೈಸರ್‌ನ ದೆವೊ, ಅಜ್ಜು ದೇವ್‌ನು ಶಾತ್ ಛಾಕಿ, ಯೋ ದೇವ್ ದೆವೊ” ಕರಿ ಬೋಲ್ಯೊ.

22 ಇವ್ಣಿ ಆ ವಾತೇನ ಖ್ವಮ್‌ಜಿನ್, ಆಶ್ಚರ್ಯ್‌ಖೈನ್, ಇನ ಮ್ಹೆಂದಿನ್, ಚಲ್ಯುಗಯು.

ಮರೈಹುಯು ಪಾಳ್ವು ಜಿವ್ತುಹುಯಿನ್ ಉತಾನಿ ಬಾರೇಮ ಪುಲ್ಲಾಯೊತೆ

(ಮಾರ್ಕ 12:18-27; ಲೂಕ 20:27-40)

23 ಯೋಸ್ ದನ್ನೆ ಸದ್ವಕಾಯವಾಳು ಯೇಸುಕನ ಆಯು. ಅವ್ಣೆ ಮರೈಹುಯು ಅದ್ವಿ ಪಾಳ್ವು ಜಿವ್ತುಹುಯಿನ್ ಉತಾಕೊಯ್ವಿ ಕರಿ ಬೋಲಾವಾಳು.

24 ಇವ್ಣಿ ಯೇಸುನ, “ಗುರು, ಏಕ್ ಅದ್ವಿ ಲಡ್ಕಾಕೊಂತೆ ಮರಿಗೋತೊ, ಇನಿ ಬಾವಣ್ಣ ಇನೊ ಭೈ ಕರಿಲೇವ್ಣು ಅಜ್ಜು ತದೆ ಇವ್ಣುನ ಲಡ್ಕಾ ಹುಯಾತೊ, ಯೋ ಲಡ್ಕಾ ಮರೈಹೋತೆ ಭೈನ ಲಡ್ಕಾ ಹುಯಿರೈತೆ ಕರಿ ಮೋಶೆನೆ ಬೋಲಿರಾಖ್ಯೊಸ್.’

25 ಹಜ್ಜಾ ಖ್ವಾತ್ ಜಞ ಭೈಯೆ ಥಾ. ಮೋಟೊ ಭೈ ವ್ಯಹಾ ಕರಿಲೀನ್, ಲಡ್ಕಾ ಕೊಯ್ತೀಸ್ ಮರಿಗಯೊ, ಇನಖ್ವಾಜೀಸ್ ಇನ ಭೈನೆ ಇನಿ ಬಾವಣ್ಣ ಕರಿಲಿದೊ.

26 ಯೋ ಬೇನೊ ಭೈನಾಬಿ ಇಮ್ಮಸ್ ಹುಯು, ಅಮ್ಮಸ್ ತೀನ್ನೊ ಭೈನಾಬಿ, ಅಜು ಖ್ವರ್ತಿಮ ಖ್ವಾತೆ ಭೈಯೇನಾಬಿ ಇಮ್ಮಸ್ ಹುಯು.

27 ಆ ಖ್ವಾರಾನ ಬಾದ್‌ಮ ಯೋ ತಯೇಡಾಬಿ ಮರಿಗೈ.

28 ಇಮ್‌ಕತೊ, ಮರವಾಳು ಜಿವ್ತುಹುಯಿನ್, ಆವ್‌ಶೇತೆ ತದೆ ಯೋ ತಯೇಡ ಪಿವಾನಿ ಬಾವಣ್ ಹುಯಿರ್ದಿಶೆ? ಇವ್ಣೆ ಖ್ವಾರಾಸ್ ಇನ ವ್ಯಹಾ ಕರಿಲಿದಾಥಾನಿ?” ಕರಿ ಪುಲ್ಲಾಯು.

29 ಯೇಸುನೆ ಇವ್ಣುನ, “ತುಮೆ ಕೆತ್ರಿ ಗಲ್ತಿಮ ಪಡ್ಯಾಸ್ತೆ ದೇಖೊ! ಶನಕತೊ ತುಮೂನ ದೇವ್ನಿ ವಚನ್‌ಬಿ ನಾತೊ ದೇವ್ ಕೆತ್ರಿ ಶಕತ್‌ವಾಳೊ ಕರಿಬಿ ಮಾಲುಮ್‌ಕೊಂತೆ ಇನಖ್ವಾಜೀಸ್.

30 ಮರವಾಳು ಜಿವ್ತುಹುಯಿನ್ ಆವ್‌ಶೇತೆ ತದೆ, ಇವ್ಣೆ ಸೊರ್ಗಾನು ದೂತರ್‌ನಿ ಘೋಣಿ ರ್ದಿಶೆ, ಅಜು ಇವ್ಣೆ ವ್ಯಹಾ ಕರ್ಶೆ ಕೊಯ್ನಿ.

31 ಮರವಾಳು ಜಿವ್ತುಹುಯಿನ್ ಆವ್‌ಶೇತೆ ಬಾರೇಮ ದೇವ್ಣೆ ಬೋಲ್ಯೋತೆ ಇನ ತುಮೆ ಪಡ್ಯಾಕೊಯ್ನಿಶಿ ಶು?

32 ‘ಮೇ ಅಬ್ರಹಾಮ್‌ನೊ ದೇವ್, ಇಸಾಕನೊ ದೇವ್, ಯಾಕೋಬನೊ ದೇವ್ ಕರಿ ಯೋ ಜಿವ್ತಾ ಅದ್ಮಿನೊ ದೇವ್ ಹುಯಿರ್ದೋಸ್, ಪಣ್ಣಿ ಮರ್ರಾಹುಯಾನೊ ಕಾಹೆ” ಕರಿ ಬೋಲ್ಯೊ.

33 ಅದ್ಮಿಖ್ವಾರು ಇನ ಖ್ವಮ್‌ಜಿನ್, ಯೋ ಬೋಲಿವತಾಳಾಸ್ತೆ ಬಾರೇಮ ಆಶ್ಚರ್ಯ ಖಾದು.

ಖ್ವಾರೇಥಿ ಮೋಟಿ ಹುಕುಮ್

(ಮಾರ್ಕ 12:28-34; ಲೂಕ 10:25-28)

34 ಯೇಸುನೆ ಬರೋಬರ್‌ನು ಜಞವಾಬ್‌ದೀನ್, ಸದ್ವುಕಾಯವಾಳನು ಮ್ಹೋಡು ಭಾಂದ್ಯೊ ಕರಿ ಫರಿಸಾಯರ್‌ನೆ ಖ್ವಮ್‌ಜಿನ್, ಇವ್ಣೆ ಎಕ್ಚು ಹುಯಿನ್ ಹಿಜ್ಜಾ ಆಯು.

35 ಇವ್ವಾಮ ಥೋತೆ ಮೋಶೆನಿ ವಚನ್ ಶಿಕಾಡವಾಳೊ ಶಾಸ್ತ್ರಮ ಏಕ್‌ಜಣೊ ವಾತೆಥಿ ಯೇಸುನ ಖ್ವಪ್‌ಡಾವ್ವು ಕರಿ,

36 “ಗುರು, ಧರ್ಮಶಾಸ್ತ್ರನಿ ನಿಯಮ್ ಖ್ವಾರೇಥಿ ಮೋಟಿ ಹುಕುಮ್ ಖೆವಿ?” ಕರಿ ಪುಲ್ಲಾಯೊ.

37 ಯೇಸುನೆ, “ತಾರೊ ದೇವ್ ಹುಯಿರಲ್ಲೊತೆ ಪ್ರಭುನ ತಾರೊ ಪೂರ ದಿಲ್‌ಥಿ, ಪೂರ ಜಾನ್‌ಥಿ, ತಾರೊ ಪೂರ ಮನ್‌ಥಿ ಪ್ಯಾರ್‌ಕರ್ದ್.

38 ಆಸ್ ಖ್ವಾರೇಥಿ ಮೋಟಿ ಅಜ್ಜು ಮುಖ್ಯ ಹುಕುಮ್.

39 ಆಸ್ ಹುಕುಮ್‌ನಿಫೋಣಿ ಲ್ಹಾತೆ ಬೇನೆ ಮುಖ್ಯ ಹುಕುಮ್ ಖೆವಿಕತೊ, ತಾರು ತೂ ಕಿಮ್ ಪ್ಯಾರ್ ಕರಾಸ್ತಿ ಇಮ್ಮಸ್, ತಾರ ಭೀಡೆವಾಳಾನ ಪ್ಯಾರ್ ಕರ್ದ್ ಕರಿ ಬೋಲನುಸ್.

40 ಹಿಡಿ ಮೋಶೇನು ಧರ್ಮಶಾಸ್ತ್ರ ಅಜ್ಜು ಪ್ರವಾದೀನು ವಚನ್‌ಖ್ವಾರು ಆ ಬೇಸ್ ಹುಕುಮ್‌ಪರ್ ಟಿಕ್ಕುಸ್ತೆ” ಕರಿ ಬೋಲ್ಯೊ.

ಕ್ರಿಸ್ತ ದಾವೀದ್ ರಾಜನೊ ಘರ್‌ವಾಳೊ

(ಮಾರ್ಕ 12:35-37; ಲೂಕ 20:41-44)

41 ಫರಿಸಾಯರ್ ಖ್ವಾರು ಎಕ್ವ ಹುಯಿನ್ ಆವಾದಿನ್, ಯೇಸುನೆ ಇವ್ವುನ,

42 ಅವ್ವುತೆ ಕ್ರಿಸ್ತನಿ ಬಾರೇಮ ತುಮಾರಿ ಸೋಚ್ ಶಾತ್? ಯೋ ಕಿನೊ ಥಿಯೊ?” ಕರಿ ಪುಲ್ಲಾಯೊ. ಇವ್ವೆ

“ಯೋ ದಾವೀದ್‌ನೊ ಥಿಯೊ” ಕರಿ ಜವಾಬ್ ದಿದು.

43 ತದೆ ಯೇಸುನ, ದಾವೀದನೊ ಥಿಯೊಕರಿ ಬೋಲ್ಯು. ತದೆ ಇನೆ, ಇಮ್‌ಕತೊ, ದಾವೀದಸ್, ಪವಿತ್ರಾತ್ಮನಿ ಖ್ವಿಯಾಲ್‌ಥಿ ಇನ ಪ್ರಭುಕರಿ ಬುಲಾಯೋನಿ, ಯೋ ಕಿಮ್?

44 ಮೇ ತಾರ ದುಶ್‌ಮನ್ನ ಖ್ವಾರು ತಾರ ಗೋಡ ಹೇಟ್ ನಾಖಾಲಗು, ಮಾರಿ ಖಾವಿ ಬಾಜೂಮ ಬೆಲೋರೆ ಕರಿ ಪ್ರಭುನೆ ಮಾರ ಮಾಲಿಕ್‌ನ ಬೋಲ್ಯೊ ಕರಿ ಪವಿತ್ರಾತ್ಮನಿ ಬೋಲ್ಯೊನಿ.

45 ದಾವೀದಸ್ ಕ್ರಿಸ್ತನ ಪ್ರಭುಕರಿ ಬೋಲಾಪರ್, ಕ್ರಿಸ್ತ ದಾವೀದನೊ ಥಿಯೊ ಕಿಮ್ ಉಶೆ?” ಕರಿ ಬೋಲ್ಯೊ.

46 ಯೇಸುನೆ ಪುಲ್ಲಾಯೋತೆ ಇನ ಕಿನಾಬಿ ಭವಾಬ್ ದೈವಾನ ಕೋ ಹುಯೂನಿ, ಅತ್ರೇಸ್ ಕಾಹೆತೆ ತಪ್ಪು ಇನ ಬಿಜು ಶಾಸ್ತ್ರಿಸವಾಲ್‌ಕರಾನ ಇವ್ಣೆಹಿಮತ್ ಕೋ ಕರ್ಯನಿ.

23

ಯೇಸುನೆ ಪರಿಸಾಯರ್ ಅಜು ಮೋಶೆನಿ ವಚನ್ನ ಶಿಕಾಡವಾಳ ಶಾಸ್ತ್ರಿಯೇನಿ ಬಾರೇಮ ರುತಾಯೊತೆ

(ಮಾರ್ಕ 12:38-39; ಲೂಕ 20:45-46)

1 ಅನಕೇಡೆಧು ಯೇಸುನೆ ಅದ್ಮಿನಿ ಝೂಂಡ್‌ನ ಅಜು ಇನ ಶಿಷ್ಯರ್‌ನ ಬೋಲ್ಯೊ

2 ಪಂಡಿತ್‌ಖ್ವಾರುಬಿ ಫರಿಸಾಯವಾಳೂಬಿ ಮೋಶೆನಿ ಖುಡ್‌ಶಿಪರ್ ಬೆರುರ್ಯ್. ಶಾಸ್ತ್ರಿಯೇನ ಅಜು ಪರಿಸಾಯರ್‌ನ ಹಕ್ ಛಾ.

3 ಇನಖ್ವಾಜೇಸ್ ತುಮೆ ಇವ್ಣೆ ಬೋಲಾತೆ ಇನಖ್ವಾರಾನ ಖ್ವಮಜ್‌ಣು ಅಜು ಇನೀನಿಫೋಣಿ ಚಾಲ್ತು; ಇವ್ಣೆ ಕತೋಬಿ ಚಾಲಿಲೇಸ್ತೆ ಇಮ್ ನಾ ಚಾಲಿಲೇವ್ಣು ಶನಕತೊ ಇವ್ಣೆ ಬೋಲಾತೆ ಇಮ್ ಇವ್ಣೇಸ್ ಕೋ ಕರಾನಿ.

4 ಇವ್ಣೆಘಣು ವಜನ್ನು ಭೋಜಾನ ಭಾಂದಿನ್, ಅದ್ಮಿನ ಖಾಂದಾಪರ್ ನಾಖಾಸ್, ಕತೋಬಿ ಇವ್ಣೆತೊ ಚಿಟಿಂಗ್‌ಳಿಥೀಬಿ ಇನ ಕೋ ಥೀಮಾನಿ.

5 ಇವ್ಣೆ ಅದ್ಮಿನ ಖ್ವಾರು ದೆಖಾವಾದೆ ಕರಿ ಇವ್ಣು ಕಾಮ್ ಕರಾಸ್. ವಚನ್ ಲೀಖ್ಪಿರ್ಯೊತೆ ಪಟ್ಟಿಯೇನ ತಾಳ್ವಪರ್ ಅಜು ಡಂಟ್‌ಪರ್ ಭಾಂದಿರಾಖಾಸ್ತೆ ದೇಖೊ. ಇವ್ಣೆ ಪೇರ್ಯ್ತೆ ಝುಗ್ಗಾವ್‌ನ ಗೊಂಡಾನ ಲಾಂಬು ಕರಿಲೇಸ್!

6 ಅತ್ರೇಸ್ ಕಾಹೆತೆ, ಮಾನ್-ಮಿರ್ಯ್‌ವಾನೇನಿ ಝುಗೋಮ ಖ್ವಾರು ಖ್ವಾರೇಥಿ ಖ್ವಾಮ್ಣೆ ಅಜು ಸಬೆ ಭರಾವಾನು ಮಂದಿರ್‌ಮ ಖ್ವಾರು ಅಖ್ವಾನ ದೆಖಾವಾನಿಫೋಣಿ ಖ್ವಾಮ್ಣೆ ಬೇಖ್ಣೆಣು ಕರಿ ಇವ್ಣೆ ಆಖ್ಡ್ ಕರಾಸ್.

7 ದುಕಾನೇನಿ ಗಲ್ಲಿಯೇಮ ಅದ್ಮಿಖ್ವಾರು ಇವ್ಣುನ ಖ್ವಲಾಮ್ ಕರ್ಯ ಕರಿ ಅಜು ಗುರುಕರಿ ಬೋಲ್ಪಿಲೇವ್ಣು ಕರಿ ಬೋಲನುಸ್ ಇವ್ಣೆ ಆಖ್ಡ್

8 ಕತೋಬಿ ತುಮೆ ಗುರು ಕರಿ ನಕೊ ಬೋಲೈಲಿಶು; ಶನಕತೊ ಕ್ರಿಸ್ತ ಎಕ್ಕಸ್‌ಞ್ಜಣೊ ತುಮೂನಲ್ಲಾತೆ ಗುರು ಅಜ್ಜು ತುಮೆಖ್ವಾರ್ಡು ಭೈಯೇ ಭೇನೆನಿಘೋಣಿ ಹುಯಿರ್ದ್ವಾಸ್.

9 ಆ ಧರ್ತಿಪರ್ ತುಮೆ ಕಿನಾಬಿ 'ಬಾ' ಕರಿ ನಕೊ ಚಿಕರ್‌ಶು, ಶನಕತೊ ಸೊರ್ಗಾಮ ಲ್ಲಾತೆ ಎಕ್ಕಸ್‌ಞ್ಜಣೊ ತುಮಾರೊ ಬಾ ಹುಯಿರ್ದ್ವಾಸ್.

10 ಅಜ್ಜು ತುಮೆ 'ಮೋಟೊ' ಕರಿ ನಕೊ ಬೋಲೈಲಿಶು; ಶನಕತೊ ಕ್ರಿಸ್ತ ಎಕ್ಕಸ್‌ಞ್ಜಣೊ ತುಮಾರೊ ಮೋಟೊ.

11 ತುಮಾರಾಮ ಮಹಾನ್ ಕರಿ ರ್ದ್ವಾಳೊ ತುಮಾರೊ ಆಳ್‌ನಿಘೋಣಿ ರ್ದ್ವೇಣು.

12 ಇನುಯೋಸ್ ಮೋಟೊಕರಿ ಬೋಲೈಲ್ಯವಾಳೊ ಹೇಟು ಹುಯಿಜ್ಜಾಶೆ, ಇನುಯೋಸ್ ಹೇಟುಕರಿ ಬೋಲೈಲ್ಯವಾಳೊ ಯೋ ಮೋಟೊ ಹುಯಿಜ್ಜಾಶೆ.

ಯೇಸುನೆ ಇವ್ವು ಖೋಟ್ ದಿಲ್‌ಪರ್ ಗಲತ್ ಲಗಾಡ್ಯೋತೆ
(ಮಾರ್ಕ 12:40; ಲೂಕ 11:39-42,44,52; 20:47)

13 “ಮೋಶೆನಿ ವಚನ್ನ ಶಿಕಾಡವಾಳ ಶಾಸ್ತ್ರಿಯೆ ಅಜ್ಜು ಫರಿಸಾಯರ್‌ವಾಳ ತುಮಾರಿ ಹಾಲ್ವ ಶಾತ್ ಬೋಲು! ತುಮೆ ಖೋಟ್ ದಿಲ್‌ವಾಳ ಹುಯಿರ್ದ್ವಾಸ್! ಅದ್ಮಿಖ್ವಾರು ಸೊರ್ಗಾನು ರಾಜ್ಯಮ ಜ್ಞಾವಾನು ಬಾಕಲ್‌ನ ತುಮೆ ಖ್ವಾಮ್ಜೆ ಮೂಚಿನಾಖೋಸ್, ತುಮೇಬಿ ಮಹಿ ಕೋಜಾಯ್ನಿ ಅಜ್ಜು ಮಹಿ ಜ್ಞಾವ್ಣಕರಿ ಕರಾವಾಳಾನಾಬಿ ಕೋ ಮ್ಹೇಲೋನಿ.

14 ಅಲಾ ಠಗಾರು ಖ್ವಾರ ಪಂಡಿತ್ ಪರಿಸಾಯವಾಳ ಅದ್ಮಿಖ್ವಾರು ದೇಖಾದೆಕರಿ ಲಾಂಬಿ ಪ್ರಾರ್ಥನೆ ಕರೋಸ್ ತುಮೆ ಮುಂಡಚ್ಚಿನ ಶೊತ್‌ನ ಗಳಿಲಿನ್ ನಾಟಕ್ ಕರೋಸ್. ಇನಖ್ವಾಜೆ ತುಮೆ ಘಣಿ ನಿಶತ್ ಲೀಲಿಶು.

15 ಮೋಶೆನಿ ವಚನ್ ಶಿಕಾಡವಾಳ ಶಾಸ್ತ್ರಿಯೆ ಅಜ್ಜು ಫರಿಸಾಯರ್‌ವಾಳ ತುಮಾರಿ ಹಾಲ್ವ ಶಾತ್ ಬೋಲು! ತುಮೆ ಖೋಟ್ ದಿಲ್‌ವಾಳ ಹುಯಿರ್ದ್ವಾಸ್! ತುಮೆ ಏಕ್ ಜ್ಞಾನ ತುಮಾರಿ ಧರಮ್ ಮಳ್ಳೆಲ್ಯವಾನಖ್ವಾಜೆ ದರ್ಮಾವ್‌ನ ಖ್ವಾರು ಉಲಾಂಗಿನ್, ಬಿಜ್-ಬಿಜ್

ದೇಖ್ವೊನ್ನ ಜಾವೋಸ್. ಅಜ್ಜು ಯೋ ಮಳಾನ ಬಾದ್‌ಮ ತುಮಾರೇಢಿ ಬೇ ಪಟ್ ನರಕ್‌ನ ಜಾವಾನಿಘೋಣಿ ಇನ ಕರೋಸ್!

16 ವಾಟ್ ವತಾಳವಾಳ ಕಾಣ ಅದ್ವಿಯೆ, ತುಮಾರಿ ಹಾಲ್ವ ಶಾತ್ ಬೋಲು! ಏಕ್ ಜಣೊ ಮಂದಿರ್‌ಪರ್ ಆಣ್ ಲಿದೋತೊ, ಯೋ ಶಾತ್ ಆಣ್ ಕಾಹೆ, ಕತೋಬಿ ಏಕ್ ಜಣೊ ಮಂದಿರ್‌ನು ಖೊನ್ನಾಪರ್ ಆಣ್ ಲಿದೋತೊ, ಇನ ಚಲಾವ್ಣುಸ್ ಚಲಾವ್ಣು' ಕರಿ ಬೋಲೋಸ್.

17 ತುಮೆಖ್ವಾರು ಕಾಣ ಬುಧ್ಧ ಹುಯಿರ್ದಾಸ್! ಕೆಹು ಮೋಟು? ಖೊನ್ನಾಕಿ, ಮಂದಿರ್? ಖೊನ್ನಾನ ಪರಿಶುದ್ ಕರ್ಯತೆ ಮಂದಿರ್ ಕಾಹೇಕಿಶು?

18 ಎತ್ರೇಸ್ ಕಾಹೆತೆ, 'ಏಕ್ ಜಣೊ ಚಾಚರ್‌ಪರ್ ಆಣ್ ಲಿದೋತೊ, ಯೋ ಶಾತ್ ಆಣ್ ಕಾಹೆಕರಿ ಬೋಲೋಸ್, ಕತೋಬಿ ಇನಮಾನಿ ಕಾಣ್ಕೆಪರ್ ಆಣ್ ಲಿದುತೋ ಇನ ಚಲಾವ್ಣುಸ್ ಚಲಾವ್ಣು' ಕರಿ ತುಮೆ ಬೋಲೋಸ್.

19 ತುಮೆ ಕೆತ್ರಿ ಕಾಣ ಹುಯಿರ್ದಾಸ್! ಕೆಹು ಮೋಟು? ಕಾಣ್ಕೆಕಿ, ಕಾಣ್‌ಕೆನ ಪಾಕ್ ಕರಾಸ್ತೆ ಚಾಚರ್?

20 ಚಾಚರ್‌ಪರ್ ಆಣ್ ಲ್ಯವಾಳೊ, ಖಲಿ ಚಾಚರ್‌ಪರಸ್ ಕಾಹೆ, ಇನಾಪರ್ ಮ್ಹೇಲಾಸ್ತೆ ಖ್ವಾರಿಸ್ ಕಾಣ್ಕೆಪರ್ ಆಣ್ ಲ್ಯಾವದಾಖ್ವಲ್;

21 ಮಂದಿರ್‌ಪರ್ ಆಣ್ ಲ್ಯವಾಳೊ, ಖಲಿ ಮಂದಿರ್‌ಪರಾಸ್ ಕಾಹೆ, ಇನಾಮಹಿ ರ್ದವಾಳೊ ದೇವ್‌ಪರ್‌ಬಿ ಆಣ್ ಲ್ಯಾವದಾಖ್ವಲ್.

22 ಅಜ್ಜು ಸೊರ್ಗಪರ್ ಆಣ್ ಲ್ಯವಾಳೊ, ದೇವ್ನಿ ಸಿಂಹಾಸನ್‌ಪರ್‌ಬಿ, ಇನಾಪರ್ ಬೇಖ್ವಾವಾಳಪರ್‌ಬಿ ಆಣ್ ಲ್ಯಾವದಾಖ್ವಲ್.

23 ಮೋಶೆನಿ ವಚನ್ನ ಶಿಕಾಡವಾಳ ಶಾಸ್ತ್ರಿಯೆ ಅಜ್ಜು ಫರಿಸಾಯರ್‌ವಾಳ ತುಮಾರಿ ಹಾಲ್ವ ಶಾತ್ ಬೋಲು! ತುಮೆ ಖೋಟ್ ದಿಲ್‌ವಾಳ ಹುಯಿರ್ದಾಸ್! ತುಮಾರಕನ ಛಾತೆ ಹರೇಕ್‌ಮಾಬಿ ಪುದೀನ, ಖೋಪ್ ಅಜ್ಜು ಜೀರಮಾಬಿ ದಖ್ವೆಮ ಏಕ್ ಭಾಗ್ ದೇವ್ನ ಕರಿ ತುಮೆ ದೆವೋಸ್. ಕತೋಬಿ ಧರ್ಮಶಾಸ್ತ್ರಮ ಬೋಲಾಸ್ತೆ ನ್ಯಾವ್‌ನಾಬಿ, ಗೋರ್‌ನಾಬಿ ಅಜ್ಜು ವಿಶ್ವಾಸ್‌ನಾಬಿ ಮ್ಹೇಲಿಲಿದಾ. ಆ ಖ್ವಾರಿ ಹುಕುಮ್‌ನಿಘೋಣಿ ಪಹಿಲೆ ಚಾಲೊ ಅಜ್ಜು ಯೋ ಖ್ವಾರು

ಕರಾನಬಿ ನಕೊ ಮ್ವೊಲೊ.

24 ವಾಟ್ ವತಾಳವಾಳ ಕಾಣ! ತುಮೆ ಮಲ್ಫರಾನ ಛಾಣಿನ್ ಕಾಡೋಸ್, ಕತೋಬಿ ಊಟ್ಟು ಗಳಿಲೆವೊಸ್!

25 ಮೋಶಿನಿ ವಚನ್ ಶಿಕಾಡವಾಳ ಶಾಸ್ತ್ರಿಯೆ ಅಜ್ಜು ಫರಿಸಾಯರ್ ತುಮಾರಿ ಹಾಲ್ವ ಶಾತ್ ಬೋಲು! ತುಮೆ ಖೋಟ್ ದಿಲ್‌ವಾಳ ಹುಯಿರ್ದಾಸ್! ತುಮೆ ತುಮಾರು ಹಂಡ್‌ಕು ಅಜ್ಜು ಥಾಳಿ ಭಾರ್ ಪಾಕ್‌ಥಿ ಮಾಂಜಸ್. ಕತೋಬಿ ಇನಮಹಿ ದೋಚಿಲ್ವವಾನುಬಿ, ಲಾಲಚ್‌ಥಿಬಿ ಭರ್ಪೆರ್ದೆಸ್.

26 ಫರಿಸಾಯರ್ ತುಮೆ ಕಾಣ ಹುಯಿರ್ದಾಸ್! ಪಹಿಲೆ ಹಂಡ್‌ಕು ಮಹಿ ಅಲ್ಪಿನಿತರ ಧೋವೊ, ತದೆ ಹಂಡ್‌ಕು ಭಾರ್‌ಬಿ ಪಾಕ್ ಹುಯಿಜಾಶೆ.

27 ಮೋಶಿನಿ ವಚನ್ ಶಿಕಾಡವಾಳ ಶಾಸ್ತ್ರಿಯೆ ಅಜ್ಜು ಫರಿಸಾಯರ್ ತುಮಾರಿ ಹಾಲ್ವ ಶಾತ್ ಬೋಲು! ತುಮೆ ಖೋಟ್ ದಿಲ್‌ವಾಳ ಹುಯಿರ್ದಾಸ್! ತುಮೆ ಚುನ್ನೊ ಮರ್ಪೆರ್ದೆಯಿತೆ ಮಖ್ವಾಣ್ಣಿನಿಘೋಣಿ ಹುಯಿರ್ದಾಸ್. ಯೋ ಮಖ್ವಾಣ್ಣಿ ಭಾರ್ ಅಲ್ಪು ದೆಖಾವಸ್, ಕತೋಬಿ ಮಹಿ ಮರ್ಮುರ್ದಾನ ಹಡ್‌ಕ್ಯಾ ಅಜ್ಜು ಖ್ವಾರಿಸ್ ತರ್ದಾನು ಖ್ವಡ್ಕು ಭರ್ಪೆರ್ದೆಸ್.

28 ಇಮ್ತಾಸ್ ತುಮೇಬಿ, ಭಾರ್‌ಲ್ಯ ಅದ್ಮಿವೋನ ನೀತಿವಾಳ ಕರಿ ದೆಖಾವೋಸ್, ಕತೋಬಿ ತುಮಾರ ಮಹಿ, ಖೋಟ್ ಅಜ್ಜು ಪಾಪ್ ಭರ್ಪೆರ್ದೆಸ್.

ಯೇಸು ಇವ್ವಿಡಂಡನ್ ಅಗಾಡಿಸ್ ಬೋಲಿನ್‌ವಾತಾಳ್ವೊತೆ

(ಲೂಕ 11:47-51)

29 ಮೋಶಿನಿ ವಚನ್ ಶಿಕಾಡವಾಳ ಶಾಸ್ತ್ರಿಯೆ ಅಜ್ಜು ಫರಿಸಾಯರ್ ತುಮಾರಿ ಹಾಲ್ವ ಶಾತ್ ಬೋಲು! ತುಮೆ ಖೋಟ್ ದಿಲ್‌ವಾಳ ಹುಯಿರ್ದಾಸ್! ತುಮೆ ಪ್ರವಾದಿ ಖ್ವಾರಾನಖ್ವಾಜೆ ಅಲ್ಪಿ ಮಖ್ವಾಣ್ಣಿನಿ ಘವಿಯೇನ ಬಣಾವೋಸ್, ಅಜ್ಜು ನೀತಿವಾಳಾನ ಮಖ್ವಾಣ್ಣಿವ್‌ನ ಶನ್‌ಗಾರ್ ಕರೋಸ್;

30 ಹಮಾರ ಗುರುಗುರುಬ್‌ಲ್ಯವ್‌ನ ಜಂಗ್‌ಮ ಹಮೆ ರ್ಡ್ಡಯಾಹೋತ್ತೊ, ಆ ಪ್ರವಾದಿ ಖ್ವಾರಾನ ಮಾರ್ಚ್ಚತೆ ಖೂನಿಮ ಭಾಗಿ ಹುಯಹೊತ್‌ಕೊಯ್ನ್ ಕರಿ ಬೋಲೋಸ್.

31 ಇಮ್‌ಕತೊ, ತುಮೆ ಪ್ರವಾದಿ ಖ್ವಾರಾನ ಮಾರ್ಚ್ಚತೆ ಇವ್ವ ಲಡ್ಕಾ ಹಮೆ ಕರಿ ತುಮಾರು ತುಮೇಸ್ ಸಾಕ್ಷಿ ಬೋಲಿಲೆವೊಸ್.

32 ಅಲ್ಫ್ರೆಸ್, ತುಮಾರ ಗುರುಗುರಬ್‌ಲ್ಯಾನಿ ಪಾಪ್ಪ ತುಮೆ ಪೂರ ಕರೊ!

33 ಅಲ ಖ್ವಾಪ್ ಅಜ್ಜು ಖ್ವಾಪ್‌ನಿ ಪಿಳ್ಳಿವಾಳ, ತುಮೆ ನರಕ್‌ನಿ ತೀರ್ಪ್‌ಥಿ ಲ್ಹುಕ್‌ಶು ಕರಿ ಕಿಮ್ ಸೋಚೋಸ್?

34 ಇನಖ್ವಾಜೇಸ್ ಮೇ ಬೋಲುಸ್ಕಿ, ಮೇ ತುಮಾರಕನ ಪ್ರವಾದಿಯೇನಾಬಿ, ಗ್ಯಾನಿ ಅದ್ವಿಖ್ವಾರಾನಾಬಿ ಅಜ್ಜು ಬೋದಕರ್ ಖ್ವಾರಾನ ಮೋಕ್ಷೇಶ್; ತುಮೆ ಇವ್ವಾಮ ಥೋಡಾನ ಮಾರಿನಾಕ್‌ಶು, ಅಜ್ಜು ಥೋಡಾನ ಶಿಲ್‌ಬೇಪರ್ ನಾಕ್‌ಶು ಅಜ್ಜು ಬಿಜ್ಜು ಥೋಡಾನ ತುಮಾರಿ ಸಬೆ ಭರಾವಾನು ಮಂದಿರ್‌ಮ ಖ್ವಾರು ಕೊಳ್ಳೇಥಿ ಮಾರಿನ್ ಗಾಮ್‌ಥು-ಗಾಮ್ ನಖ್ವಾಡಿಲಿಜ್ಜಾಶು.

35 ಅಮ್ ನೀತಿವಾಳೊ ಹುಯಿರ್ದೋತೆ ಹೇಬೆಲ್‌ನು ಲ್ಹೊಯಿಥಿ ಧರೀನ್, ತುಮೆ ಮಂದಿರ್‌ನಾಬಿ ಅಜ್ಜು ಚ್ಚಾಚ್‌ರನ ಇಚ್ಚೆಮ ಮಾರಿನಾಖ್ಯಾತೆ ಬರಕೀಯಾನೊ ಛಿಯೊ ಜಕರೀಯಾನು ಲ್ಹೊಯಿತೋಡಿ, ಧರ್ತಿಪರ್ ರಂಚಾಯತೆ ಹರೇಕ್ ನೀತಿವಾಳಾನು ಲ್ಹೊಯಿನು ಮಾರ್ ತುಮಾರ ಮುಡ್‌ಕ್ಯಪರ್ ಆವ್‌ಶೆ.

36 ಮೇ ತುಮೂನ ಖ್ವಾಚಾಮ ಬೋಲುಸ್, ಅಖ್ವು ಅಪರಾದ್ ಆ ಪಿಳ್ಳಿಪರ್ ಆವ್‌ಶೆ!

ಯೇಸು ಯೆರೂಸಲೇಮ್‌ನಖ್ವಾಜೆ ರೋಯೊತೆ

(ಲೂಕ 13:34-35)

37 ಯೆರೂಸಲೇಮ್, ಯೆರೂಸಲೇಮ್! ಪ್ರವಾದಿ ಖ್ವಾರಾನೊ ಜಾನ್ ಕಾಡಾವಾಳಿ! ದೇವ್ನೆ ತಾರಕನ ಮೋಕ್‌ಲ್ಯೊತೆ ಅದ್ವಿಖ್ವಾರಾನ ಬಂಡೊ ಫೇಕಿನ್, ಮಾರವಾಳಿ! ಮುರ್‌ಗಿ ಚೇಲ್ಯಾನ ಇನಿ ಪಾಖ್ತಿಯೆಮ

ಪೆಖ್ವಾಡಿಲೇಯಿತೆ ಇಮ್, ತಾರ ಲಡ್ಕಾವ್ವ ಮೇ ಪೆಖ್ವಾಡಿಲೇವ್ವು ಕರಿ ಮನ ಕೆತ್ರಿಕ್ಕಿಹಲ್ಲ ಮನ್‌ಹುಯು, ಕತೋಬಿ ತುನ ಪಣ್ಣಿ ದಿಲ್ ಕೋಡುನಿ.

³⁸ ಹಂದೇಕ್, ತಾರಿ ಮಂದಿರ್ ಉಜ್ವಾಡಿ ಪಡಿಜಾಶೆ.

³⁹ ಹಂಕೇಡು ಧರೀನ್, ‘ಪ್ರಭುನ ನಾಮ್‌ಪರ್ ಆವಾಳಾನ ಆಶೀರ್ವಾದ್ ಹುವಾದೆ’ ಕರಿ ತುಮೆ ಬೋಲಾತೋಡಿ, ತುಮೆ ಮನ ಪಾಠು ದೇಕ್‌ಶುಸ್ ಕೊಯ್ನಿ ಕರಿ ಮೇ ತುಮೂನ ಬೋಲುಸ್” ಕರಿ ಬೋಲ್ಯೊ.

24

ಯೆರೂಸಲೇಮ್‌ನು ಮಂದಿರ್ ಬರ್ಬಾತ್ ಉಷೇತೆ ಬಾರೇಮ ಯೇಸುನೆ ಬೋಲ್ಯೋತೆ

(ಮಾರ್ಕ 13:1-2; ಲೂಕ 21:5-6)

¹ ಅನಕೇಡೆಡು ಯೇಸು ಮಂದಿರ್‌ನ ಮ್ಹಂದಿನ್ ಭಾವಾನಿ ವಖ್ತಾಮ್, ಮಂದಿರ್ ಭಂದೈರ್ದೆತೆ ತರೀಕಾನ ಇನ ವತಾಳ್ಜು ಕರಿ ಇನ ಶಿಷ್ಯರ್ ಇನಾಕನ ಆಯಾ.

² ತದೆ ಯೇಸುನೆ, “ತುಮೆ ಆ ಖ್ವಾರು ದೇಖುಕರಾಸ್‌ನಿ ಹಜ್ಜಾ ಏಕ್ ಬಂಡಾಪರ್ ಬಿಜೇಕ್ ಬಂಡೊ ಭೀರಿಶೆ ಕೊಯ್ನಿ; ಅಖ್ವಾಸ್ನ ರಡ್‌ಕೈನಾಖಿದಿಶೆ ಕರಿ ಮೇ ತುಮೂನ ಖ್ವಾಜಾಮ ಬೋಲುಸ್” ಕರಿ ಬೋಲ್ಯೊ.

ವದೇಖೊ ಅಜು ಖ್ವತಾಪ್ಪಿನಿ ಬಾರೇಮ

(ಮಾರ್ಕ 13:3-13; ಲೂಕ 21:7-19)

³ ಯೇಸುನೆ ಆಲಿವ್ ಪಹಡ್‌ಪರ್ ಬೆರೋಫೋತೆ ತದೆ ಇನ ಶಿಷ್ಯರ್ ಇನಾಕನ ಅಲಕ್‌ಥಿ ಆಯಿನ್, “ಆ ಖ್ವಾರು ಕದೆ ಚಾಲ್‌ಷೆ? ತೂ ಆಯಿಶ್‌ತೆ ಅಜು ಆ ಜಗತ್ತಿ ಖ್ವರ್ತಿ ಹುವಾನ ಖ್ವಣೇದ್‌ಕಿ ಶು? ಹಮೂನ ಬೋಲ್” ಕರಿ ಪುಲ್ಲಾಯಾ.

⁴ ಯೇಸುನೆ ಇವ್ವುನ, “ಕೋಣ್‌ಬಿ ತುಮೂನ ರಗಾವ್ಣುನಾತೆ ಇಮ್, ಜತನ್‌ಥಿ ರ್ವವೊ.

5 ಶನಕತೊ, ಕೈಯೆಕ್ಕಿ ಜಞು ಆಯಿನ್, ಮಾರು ನಾಮ್‌ಲೀನ್, 'ಮೇ ತ್ರಿಸ್ತ, ಮೇ ತ್ರಿಸ್ತ' ಕರಿ ಬೋಲಿನ್, ಘಣ ಅದ್ವಿನ ವಾಟ್ ಭೈಕಾವಾಶೆ.

6 ಅತ್ರೇಸ್ ಕಾಹೆತೆ ತುಮಾರ ಖನ್ನೆ ಜಂಗ್ ಭೀಡುಕರಾತೆ ಅವಾಙ್ ಅಜ್ಜು ದೂರ್ಮ ಚಾಲುಕರಾತೆ ಜಂಗ್‌ನಿ ಬಾರೇಮಾನಿ ಖಬರ್ ತುಮೆ ಖ್ವಮಜ್‌ಶು, ಕತೋಬಿ ಡರ್‌ಶು ನಕೊ. ಖ್ವರ್ತಿ ಆವಾನ ಅಗಾಡಿ ಆ ಖ್ವಾರು ಚಾಲ್ತುಸ್ ಚಾಲ್ತು.

7 ದೇಖ್ವನ್ ವಿರೋದ್ ದೇಖ್ವ್ ರಾಜ್ಯನ ವಿರೋದ್ ರಾಜ್ಯ ಉಟ್‌ಶೆ; ಖ್ವಾರಿಸ್ ಬಾಜೂಮ ಕಾಳ್ತುಕಾಳ್ ಉಶೆ ಅಜ್ಜು ಜಮೀನ್ ಹಲ್‌ಶೆ.

8 ಆ ಖ್ವಾರು ಲಡ್ಕಾ ಪೈದಾ ಹುವಾನಿ ವಖ್ವತ್‌ಮ ಆವಾಸ್ತೆ ಪಹಿಲಿ ಅಜಾನಿಘೋಣಿ ಹುಯಿರ್‌ವ್ತ್ಸ್ ಎತ್ರೇಸ್.

9 ತದೆ ತುಮೂನ ಧರೀನ್ ದಂಡನೆ ದೀನ್ ಮಾರ ನಾಮ್‌ಖ್ವಾಜೆ ಹರೇಕ್ ದೇಖ್ವ್‌ವಾಳು ತುಮೂನ ವಹೇರ್ ಕರ್ತೆ.

10 ಯೋ ವಖ್ವತ್‌ಮ ಕೈಯೆಕ್ಕಿ ವಿಶ್ವಾಸಿಖ್ವಾರು ಪಿನ್‌ಮಾಟಿಜಾಶೆ; ಏಕ್‌ನ-ಏಕ್ ಧೋಕೇಧಿ ಧರಿದಿಶೆ ಅಜ್ಜು ಏಕ್‌ಪರ್-ಏಕ್ ವಹೇರ್ ಕರ್ತೆ.

11 ಘಣು ಜಞು ಝೂಟುಪ್ರವಾದಿ ಖ್ವಾರು ಆಯಿನ್, ಕೈಯೆಕ್ಕಿ ಅದ್ವಿನ ಖ್ವಾರು ರಗಾವಾಶೆ.

12 ಅತ್ರೇಸ್ ಕಾಹೆತೆ ಜಗತ್‌ಮ ಖರಾಬ್ ಜಾಖ್ವತ್ ಹುಯಿಜಾಶೇತೆ ಇನಖ್ವಾಜೆ ಘಣ ಅದ್ವಿನಿ ಪ್ಯಾರ್ ರಂಡು ಪಡಿಜಾಶೆ.

13 ಕತೋಬಿ ಖ್ವರ್ತಿತೋಡಿ ಖ್ವಮಾಳಿಲ್ಯವಾಳಾನ ರಕ್ಷಣೆ ಲಿಶೆ.

14 ರಾಜ್ಯನು ಆ ಅಲ್ಪಿಸಮಾಚಾರ್ ಜಗತ್‌ನು ತಮಾಮ್ ದೇಖ್ವ್‌ವಾಳ ಅದ್ವಿನ ಸಾಕ್ಷಿನಟೀಕೆ ಬೋಲಾವಾಶೆ; ತದೆ ಖ್ವರ್ತಿನದನ್ ಆವಾಶೆ.

**ಬರ್ಬಾತ್ ಕರಾವಾಳು ಖರಾಬ್ ರಾಘು
(ಮಾರ್ಕ 13:14-23; ಲೂಕ 21:20-24)**

15 “ಪ್ರವಾದಿ ದಾನಿಯೇಲ್‌ನೆ ಬೋಲ್ಯೋತೆ, ‘ಬರ್ಬಾತ್ ಕರಾವಾಳು ಗಲೀಝ್ ರಾಘು’ ಪವಿತ್ರ ಝಗೋಪರ್ ಭೀರಾವನು ತುಮೆ ದೇಕ್‌ಶು. ಅನ ಪಡವಾಳು ಅನಿ ಮತ್ಲಬ್ ಶಾತ್ ಕರಿ ಪರ್ವಿಲ್ಯವಾದೆ.

16 ಯೋ ವಖ್ತಮ ಯೂದಾಯಮ ರ್ಹವಾಳು ಪಹಾಡೋಮ ಮಿಲ್ಯೆಜಾಣು.

17 ಕೋಣ್ತೋಬಿ ಏಕ್ಲಣೊ ಇನ ಘರ್‌ನ ಲ್ಲತ್‌ಪರ್ ರ್ಹಯೋತೊ, ಯೋ ಹೇಟ್ ಉತ್ರಿನ್ ಶಾತ್‌ತೋಬಿ ಪಾಡಿಲೇಣು ಕರಿ ಘರ್‌ನ ಮಹಿ ಜೈನ್, ವಖ್ತ ಬರ್ಬಾತ್ ನಾ ಕರ್ನ್.

18 ಅಜು ಕೋಣ್ತೋಬಿ ಏಕ್ ಲ್ಲಣೊ ಖೇತರ್‌ಮ ರ್ಹಯೋತೊ, ಯೋ ಇನೊ ಝಗೊ ಪಾಡಿಲೇಣು ಕರಿ ಪಾಛೊಫರಿ ಘರೆ ನಾ ಜಾವ್ವು.

19 ಯೋ ದನೂಮ ಬೇಜೂನಿ ಅಜು ದೂದ್ ಪಿಡಾವವಾಳಿ ತಯೇಡಾವ್ ಉಷೇತೆ ಹಾಲ್ವ ಶಾತ್ ಬೋಲು!

20 ತುಮೆ ಮಿಲ್ಯೆಜಾಣುತೆ ದನ್ ರಣೆನೊ ದನ್ ನಾತೊ ಸಬ್ಬತ್‌ನೊ ದನ್ ನಾ ಹುಯಿರ್ದೇಣು ಕರಿ ದೇವ್ ಪ್ರಾರ್ಥನೆ ಕರೊ!

21 ಶನಕತೊ ಯೋ ವಖ್ತಮ ಘಣು ಲತಾಡ ರ್ಹಿಶೆ. ಜಗತ್ ಉಬ್‌ಜ್ಜುತೆ ತಪ್‌ಧು ಧರೀನ್, ಹಮ್‌ಲಗು ಕದೇಸ್ ಅಮ್ಮು ಲತಾಡ ಕೋ ಐರ್‌ನ್ದಿನಿ. ಬಿಜು ಖ್ವಾಪ್ಪೆಬಿ ಕೋ ಆವ್‌ಶೇನಿ.

22 ದೇವ್ ಯೋ ಖ್ವಾರ ದನ್ನ ಕಮ್ ನಾ ಕರ್ಯೋತೊ, ಏಕ್ ಅದ್ಮಿ ಜಿನ್‌ಕುಬಿ ಬಚಿಜಾಶೆಕೊಯ್ತು; ಕತೋಬಿ ಇನೆ ಚೂಣಿಲಿದೊತೆ ಅದ್ಮಿನಿಖ್ವಾಜೆ ದೇವ್ ಯೋ ಖ್ವಾರ ದನ್ನ ಕಮ್ ಕರ್ಶೆ.

23 ಯೋ ವಖ್ತಮ ಕೋಣ್ತೋಬಿ ತುಮೂನ, 'ದೇಖೊ, ಕ್ರಿಸ್ತ ಹಜ್ಜಾ ಲ್ಲಾ! ನಾತೊ, ಯೋ ಹಿಜ್ಜಾ ಲ್ಲಾ! ಕರಿ ಬೋಲ್ಯುತೊ, ಇನ ನಕೊ ನಂಬ್‌ಶು.

24 ಶನಕತೊ ಝೂಟುಕ್ರೈಸ್ತರ್ ಖ್ವಾರು ಅಜು ಝೂಟು ಪ್ರವಾದಿಖ್ವಾರು ದೆಖೈನ್, ಇವ್ಣೇಥಿ ಹುಯೂತೊ ದೇವ್‌ಥಿ ಚೂಣೈರ್‌ವಾಳನಾಬಿ ರಗಾವಾನಿಖ್ವಾಜೆ, ಅದ್ಭುತ್‌ಕಾಮ್ ಅಜು ಅಶ್ವರ್ಯನು ಕಾಮ್‌ಖ್ವಾರು ಕರಿ ವತಾಳೆಶೆ.

25 ಖ್ವಮ್‌ಜೊ! ಮೇ ತುಮೂನ ಆ ಖ್ವಾರು ಚಾಲಾನ ಅಗಾಡಿಸ್ ಇನಿ ಬಾರೇಮ ಬೋಲಿರಾಖ್ಯೊಸ್.

26 ಇನಾಖ್ವಾಜೆ ಕೋಣ್ತೋಬಿ ತುಮೂನ, "ಹಂದೇಖೊ, ಕ್ರಿಸ್ತ ಉಜ್ವಾಡಿ ಝಗೋಮ ಲ್ಲಾ' ಕರಿ ಬೋಲ್ಯುತೊ, ನಕೊ ಚಲ್ಯಾಜಾಶು,

‘ಹಂದೇಖೊ, ಯೋ ಮಹಿನಕೋಣಾಮ ಛಾ’ ಕರಿ ಬೋಲ್ಯೊತೊ, ನಕೊ ನಂಬ್‌ಶು.

27 ಶನಕತೊ ವಿಜ್ಞಳಿ ದನ್‌ನಿಕ್‌ಳಾ ಭಣೀಧು ದೆಖೈನ್, ದನ್ ಡುಬಾಭಣೀನು ಬಾಜುತೋಡಿ ಚಮ್‌ಕಾಸ್ತೆ ಇಮ್ಮಸ್ ಅದ್ಮಿನೊ ಛಿಯೊಬಿ ಆವ್‌ಶೆ.

28 ಮುದುರ್ ಕಿಜ್ಜ ಪಡ್ಕುರ್ದಿಸ್ತಿ, ಹಿಜ್ಜಾಸ್ ಗರದ್‌ಖ್ವಾರು ಎಕ್ಕುಹುವಾಸ್.

ಅದ್ಮಿನೊ ಛಿಯೊ ಆವ್‌ಶೇತೆ ಬಾರೇಮ

(ಮಾರ್ಕ 13:24-27; ಲೂಕ 21:25-28)

29 ಯೋ ಖ್ವಾರು ದನ್ನು ಖ್ವತಾಪ್ಪಿ ಖತಮ್ ಹೋತಾಸ್‌ನ, ಚಾಂದ್ ಕಾಳೊಪಡಿಜಾಶೆ, ಚಂದರ್‌ಮೊ ಉಜಾಳು ಕೋದಿಶೇನಿ, ಆಬ್‌ಪರ್‌ಧು ಶುಕ್ಕ್‌ರ್ ಖ್ವಾರು ಖಂಕರ್‌ಶೆ, ಅಜು ಆಬ್‌ಮ ಛಾತೆ ಶಕತ್‌ಖ್ವಾರಿ ಕಾಪ್‌ಶೆ.

30 ತದೆ ಅದ್ಮಿನೊ ಛಿಯ್ಯಾನ ವತಾಳವಾಳಿ ಖ್ವಣೇದ್ ಆಬ್‌ಮ ದೆಖಾವ್‌ಶೆ. ತದೆ ಧರ್ತಿಪರ್ ಛಾತೆ ತಮಾಮ್ ಖೂಮ್‌ವಾಳು ಛಾತಿಪರ್ ಮಾರಿಲಿಶೆ ಅಜು ಅದ್ಮಿನೊ ಛಿಯ್ಯೊ ಶಕತ್‌ಥೀಬಿ, ಮಹಾನ್ ಮಹಿಮೆಥೀಬಿ ಆಬ್‌ನ ವಾದ್‌ಪರ್ ಆವ್‌ಶೇತೆ ಇನ ದೇಕ್‌ಶೆ.

31 ಅಜು ಯೋ ತುತ್ತೂರಿನೊ ಮೋಟೊ ಅವಾಜ್‌ಥಿ, ಇನ ದೂತರ್‌ನ ಜಮೀನ್ನಿ ಚಾರ್‌ ಬಾಜೂಮ ಮೋಕಲ್‌ಶೆ, ಇವ್ಣೆ ಇನೆ ಚೂಣಿಲಿದೊತೆ ಇವ್ಣುನ ಆಬ್‌ನ ಏಕ್ ಬಾಜುಧು ಧರಿನ್ ಬಿಜೇಕ್ ಬಾಜೂಲಗು ಎಕ್ಕು ಕರ್‌ಶೆ.

ಅಂಜೀರ್‌ನ ಝಾಡೇಥಿ ಅಕ್ಕ್‌ಲ್ ಶಿಕಾನು

(ಮಾರ್ಕ 13:28-31; ಲೂಕ 21:29-33)

32 ಅಂಜೀರ್‌ನ ಝಾಡಾನಿ ಖೇಣಿಥಿ ತುಮೆ ಅಕ್ಕ್‌ಲ್‌ಶಿಕೊ. ಇನಿ ಡಾಳಿಯೆ ಹರಿಗಾರ್ ಕವ್ಣಿ ಹುಯಿನ್, ಪಾಂದ್‌ಡ ಮ್ಹೇಲಾಲಗ್ಕುತೊ ತಡ್ಕಾನ ಹಗಾಮ್ ಖನ್ನೆಐಗು ಕರಿ ತುಮೆ ಮಾಲುಮ್ ಕರಿಲೇವೊಸ್ತಿ.

33 ಇಮ್ಮಸ್, ತುಮೇಬಿ ಆ ಖ್ವಾರು ದೇಖಾನಿ ವಖ್ವೆತೆ ಯೋ ದನ್ ಖನ್ನೆಛಾ, ಬಾಕಲ್‌ಕನಸ್ ಛಾಕರಿ ಮಾಲುಮ್ ಕರಿಲೇವೊ.

34 ಹಮ್ಮೆ ಜಿವ್ತು ಛಾತೆ ಅದ್ಮಿಖ್ಹಾರು ಮರ್‌ವಾನ ಮಹಿಸ್ ಆ ಖ್ಹಾರು ಚಾಲ್‌ಶೇತೆ ಕರಿ ಮೇ ತುಮೂನ ಖ್ಹಾಚಮಾಬಿ ಬೋಲುಸ್.

35 ಆಬ್-ಧರ್ತಿ ಮಟಿಛಾಶೆ, ಕತೋಬಿ ಮಾರಿ ವಾತೆಖ್ಹಾರಿ ಕದೇಬಿ ಮಟ್‌ಶೆಸ್ ಕೊಯ್ನಿ.

ಯೋ ವಖ್ಹತ್ ಅಙ್ಞು ದನ್ ಕಿನಾಬಿ ಮಾಲುಮ್ ಕೊಯ್ನಿ
(ಮಾರ್ಕ 13:32-37; ಲೂಕ 17:26-30,34-36)

36 ಎತ್ರೇಸ್ ಕಾಹೆತೆ, ಯೋ ದನ್ನಿ ಬಾರೇಮ ರ್ಹವೊ, ಯೋ ವಖ್ಹತ್‌ನಿ ಬಾರೇಮ ರ್ಹವೊ, ಮಾರ ಬಾನ ಮಾಲುಮ್ ಪಣ್ಣಿ ಬಿಙ್ಞು ಕಿನಾಬಿ ಮಾಲುಮ್‌ಕೊಯ್ನಿ; ಪರ್‌ಲೋಕ್‌ಮ ಛಾತೆ ದೇವ್‌ನು ದೂತರ್‌ನಾಬಿ ಮಾಲುಮ್‌ಕೊಯ್ನಿ; ಛಿಯ್ಯಾನಾಬಿ ಮಾಲುಮ್‌ಕೊಯ್ನಿ.

37 ನೋಹಾನ ದನ್ಮ ಚಾಲ್ಯುತೆ ಇಮ್ಮಸ್ ಅದ್ಮಿನೊ ಛಿಯ್ಯೊ ಆವ್‌ಶೇತೆ ದನ್ಮ ಚಾಲ್‌ಷೆ.

38 ಕಿಮ್‌ಕತೊ, ತೋಫಾನ್ ಆವಾನ ಅಗಾಡಿ ಅದ್ಮಿಖ್ಹಾರು ಖಾತು-ಪೀತು ಹುಯಿನ್, ವ್ಯಹಾ ಕರ್ತುಹುಯಿನ್, ವ್ಯಹಾ ಕರಿದೇತುಹುಯಿನ್ ಥೂ. ನೋಹಾನೆ ಙ್ಹಾಜ್‌ನ ಮಹಿ ಚ್ಚಡ್ಯೊತೆ ದನ್‌ಮಾಬಿ ಇವ್ಣೆ ಇಮ್ಮಸ್ ಕರುಕರ್ತುಥು.

39 ತೋಫಾನ್ನು ಪಾಣಿ ಏನ್, ತಮಾಮ್‌ನ ವವ್ವಾಡಿಲೀನ್, ಜಾವಾತೋಡಿ ಇವ್ಣೆ ಶಾತ್ಪಿ ಮಾಲುಮ್‌ಕೊಂತೆ ಇಮ್ ಥೂ. ಇಮ್ಮಸ್ ಅದ್ಮಿನೊ ಛಿಯ್ಯೊ ಆವ್‌ಶೇತೆ ತದೇಬಿ ರ್ಹಶೆ.

40 ಯೋ ವಖ್ಹತ್‌ಮ ಖೇತರ್‌ಮ ಬೇ ಙ್ಹಣು ಕಾಮ್ ಕರ್ತು ರ್ಹಶೆ, ಏಕ್‌ಙ್ಹಣಾನ ಪಾಡಿಲಿಶೆ, ಅಙ್ಞು ಏಕ್‌ ಙ್ಹಣಾನ ಮ್ಹೆಂದಿಶೆ.

41 ಬೇ ತಯೇಡ ಬೇಶಿನ್, ಘಟ್ಟಿ ದಳುಕರ್‌ಶೆ, ಏಕ್‌ನ ಪಳ್ಳಿಶೆ ಏಕ್‌ನ ಮ್ಹೆಂದಿಶೆ.

42 ಇನಖ್ಹಾಜೇಸ್ ತುಮಾರೊ ಪ್ರಭು ಆವ್‌ಶೇತೆ ದನ್ ತುಮುನ ಮಾಲುಮ್‌ಕೊಂತೆ ಇನಾಖ್ಹಾಜಿ ಹೊಷಾರ್‌ಥಿ ರ್ಹವೊ.

43 ಬೋರ್ ಆವಾನಿ ವಖ್ತ್ ಘರ್‌ನ ಯಜಮಾನ್ ಮಾಲುಮ್ ರ್ಹಯುಹೋತ್ನೊ, ಯೋ ಹೊಷಾರಿ ರ್ಹೀನ್, ಇನ ಘರ್‌ನ ಕೋ ತೋಡಾದಿದೊಹೋತ್ನಿ.

44 ಇನಖ್ವಾಜೇಸ್ ತುಮೇಬಿ ಕದೇಬಿ ತೈಯಾರ್ ರ್ಹೀಣು, ಶನಕತೊ ತುಮೆ ಸೋಚಾಸ್‌ಕೊಂತೆ ವಖ್ತ್‌ಮ ಅದ್ವಿನೊ ಛಿಯೊ ಆವಾಶೆ.

ನಿಯತ್ ಅಜ್ಜು ನಿಯತ್ ಕೊಂತೆ ಆಳ್ವಿ ಬಾರೇಮ

(ಲೂಕ 12:41-48)

45 ಇಮ್‌ಕತೊ, ಯಜಮಾನ್ ಇನ ಘರ್‌ಮ ಕಾಮ್ ಕರಾವಾಳ ಆಳ್‌ನ ಖ್ವಾರು ಬರೋಬರ್‌ನಿ ವಖ್ತ್‌ಮ ಖಾಣು ದೈವಾನಖ್ವಾಜೆ ಇವ್ವಾಪರ್ ನೇಮ್‌ಶಾಯೋತೆ ನಿಯತ್‌ವಾಳೊಬಿ ಅಕ್ಲಿಆಳ್ ಕೋಣ್?

46 ಯಜಮಾನ್ ಆವಾನಿ ವಖ್ತ್‌ತೆ, ಕೆಹೊ ಆಳ್ ಆ ಖ್ವಾರು ಕರುಕರಾತೆ ದೇಕ್‌ಶೇಕಿ, ಯೋ ಆಳ್ ಧನ್ಯ ಹುಯಿರ್ದೋಸ್!

47 ಇಮ್ಮ ಆಳ್‌ನ ಯೋ ಇನು ಖ್ವಾರೂಸ್ ಧನ್-ದೊಲತ್‌ಪರ್ ಅದಿಕಾರಿಹುಯಿನ್ ನೇಮ್‌ಶಾವಾಶೆ ಕರಿ ಮೇ ತುಮೂನ ಖ್ವಾಚಮಾಬಿ ಬೋಲುಸ್.

48 ಕತೋಬಿ ಯೋ ಆಳ್ ಖರಾಬ್ ರ್ಹಯೋತೊ, ಇನೊ ಯಜಮಾನ್ ಒಗ್ಗಿಸ್‌ಮ ಕೋ ಆವಾಶೇನಿ ಕರಿ ಇನ ಮನ್‌ಮ ಸೋಚಿಲೇನ್,

49 ಇನ ಜೋಡ್ ಕಾಮ್‌ಕರವಾಳ ಬಿಜಾಖ್ವಾರ್ ಆಳ್‌ನ ಮಾರಲಗ್‌ಶೆ ಅಜ್ಜು ಪೀ ಕುಡ್‌ಕಾವ್‌ನ ಜೋಡೆ ಖಾತೊ-ಪೀತೊ ರ್ಹಿಶೆ.

50 ತದೆ ಏಕ್ ದನ್ನೆ ಯೋ ಆಳ್ ಸೋಚಾಸ್‌ಕೊಂತೆ ದನ್ಮ ಅಜ್ಜು ಇನ ಮಾಲುಮಸ್ ಪಡಾಕೊಂತೆ ವಖ್ತ್‌ಮ ಯೋ ಇನೊ ಯಜಮಾನ್ ಐನ್,

51 ಇನ ಕತ್ರೀನ್, ಟುಕ್‌ಡಾ-ಟುಕ್‌ಡಾ ಕರೀನ್, ಖೋಟ್ ದಿಲ್‌ವಾಳಾನ ನಾಖಾಸ್ತೆ ಝಗೋಪರ್ ಇನ ನಾಕ್‌ಶೆ. ಹಿಜ್ವಾ ಯೋ ರೋವಾತೊ ಹುಯಿನ್, ಕರ್-ಕರ್ ದಾತ್ ಭಾವಾಶೆ.

25

ದಖ್ವಿ ಜಣಿ ಕವಾರಿನಿ ಬಾರೇಮ ಮತ್ಲಬ್‌ನಿ ಖೇಣಿ

1 ಯೋ ವಖ್ವತ್‌ಮ ಸೋರ್ಗಾನ್ ರಾಜ್ಯ ದೀವೊ ಖ್ವಾರು ಪಾಡಿಲೀನ್, ನೌಶೋನ ಮಳಾನ ಜಾಸ್ತೆ ದಖ್ವೆಜ್ಜಣಿ ಕವಾರಿನಿಫೋಣಿ ರಕ್ತಿಶೆ.

2 ಇನಾಮ ಪಾಚ್ ಜಣಿ ಬುಧ್ಧ ಅಜ್ಜು ಪಾಚ್ ಜಣಿ ಅಕ್ಲಿ ಹುಯಿರಕ್ತಿಥಿ.

3 ಬುಧ್ಧ ಕವಾರಿಯೇನೆ ಇವ್ವು ದೀವೋನ ಪಾಡಿಲಿದಿಯೆ, ಕತೋಬಿ ಜಾಖ್ವತ್ ಆಲಿವ್‌ತೇಲ್‌ನ ಕೋ ಪಾಡಿಲಿದಿಯೇನಿ.

4 ಅಕ್ಲಿ ಕವಾರಿಯೇನೆ ದೀವೋನ ಜೋಡೆ ಕಟೋರಿಮ ತೇಲ್‌ನಾಬಿ ಪಾಡಿಲಿದಿಯೆ.

5 ನೌಶೋ ಆವಾನ ಧೇರ್ ಹೋತಾಖ್ವತ್‌ರ್, ಇವ್ವೆ ಖ್ವಾರು ಝೂಕಾರೆ ಮಾರಿನ್, ಖ್ವುಯಿಗಯ್.

6 ಕತೋಬಿ “ಅಧಿರಾತ್ಮ ‘ಹಂದೇಖೊ, ನೌಶೋ ವಳ್ಳಾವಸ್! ಇನ ಮಳಾನಖ್ವಾಜೆ ಆವೊ!’ ಕರಿ ಅವಾಜ್ ಆಯು.

7 ತದೆ ಯೋ ದಖ್ವೆ ಕವಾರಿಯೆ ಉರೀನ್, ಇವ್ವ ದೀವೋನ ತೈಯಾರ್ ಕರಿಲಿದಿಯೆ.

8 ತದೆ ಯೋ ಬುಧ್ಧ ಕವಾರಿಯೇನೆ ಅಕ್ಲಿ ಕವಾರಿಯೇನ, ‘ತುಮಾರ ತೇಲ್‌ಮ ಹಮೂನ ಥೋಡು ದೆವೊ; ಶನಕತೊ, ಹಮಾರೊ ದೀವೊ ಉಝಾವಾನ ಆಯೊ’ ಕರಿ ಬೋಲಿಯೆ.

9 ತದೆ ಅಕ್ಲಿ ಕವಾರಿಯೇನೆ, ‘ಕೊಯ್ತಿ, ‘ತುಮೂನ ದಿದುತೊ, ಹಮುನಾಬಿ ತುಮೂನಾಬಿ ಪೂರಾಕೊಂತೆ ಇಮ್ ಹುಯಿಜಾಶೆ. ತುಮೆ ವೇಫಾವಾಳಾಕನ ಜೈನ್, ಮೋಲ್ ಲೀಲೆವಾನೂಸ್ ಅಲ್ಫ್ ಕರಿ ಜವಾಬ್ ದಿದಿಯೆ.’

10 ಯೋ ಬುಧ್ಧ ಕವಾರಿಯೆ ತೇಲ್ ಲ್ಯಾವಾನ ಜಾವಾದಿನ್, ನೌಶೋ ಆಯೊ. ತೈಯಾರ್ ರಕ್ತಿವಾಳಿಯೆ ವ್ಯಹಾನು ಮಿಝ್ವಾವಾನ್ ಖಾವಾನಖ್ವಾಜೆ ಇನಜೋಡೆ ಮಹಿ ಗಯ್. ತದೆ ಬಾಕಲ್ ಮೂಚ್ಚೆಗಯ್.

11 ಅನ ಬಾದ್‌ಮ ಯೋ ಬುಧ್ಧ ಕವಾರಿಯೆ ಆಯಿನ್, ‘ಪ್ರಭು, ಪ್ರಭು ಮಹಿ ಆವಾನ ಬಾಕಲ್ ಕಾಡ್’ ಕರಿ ಚಿಕ್ರಿಲಿದಿಯೆ

12 ತದೆ ಯೋ ನೌಶಾನೆ, 'ತುಮೆ ಕೋಣ್ ಕರಿ ಮನ ಮಾಲುಮ್ ಕೊಯ್ನಿ, ಕರಿ ಮೇ ಖ್ವಾಚಮಾಬಿ ಬೋಲುಸ್' ಕರಿ ಬೋಲ್ಯೊ."

13 ಅಜ್ಜು ಯೇಸುನೆ ಖ್ವರ್ತಿಮ ಬೋಲ್ಯೊಕಿ, "ಯೋ ದನ್‌ರ್ದವೊ, ವಖ್ವರ್‌ರ್ದವೊ ತುಮೂನ ಮಾಲುಮ್‌ಕೊಂತೆ ಇನಖ್ವಾಜೇಸ್ ಹೊಷಾರ್‌ಧಿರ್ದವೊ.

ತೀನ್ ಆಳ್ವಿ ಬಾರೇಮ ಮತ್ಸಬ್‌ನಿ ಬೇಣಿ

(ಲೂಕ 19:11-27)

14 "ಸೊರ್ಗಾನು ರಾಜ್ ಇನ ಘರ್‌ನ ಮ್ಹೊಂದಿನ್ ಬಿಜೇಕ್ ದೇಖ್ವಾನ್ ಗಯೋತೆ ಅದ್ನಿಫೋಣಿ ಹುಯಿರ್ದೊಸ್. ಯೋ ಅದ್ನಿ ಭಾವಾನ ಅಗಾಡಿ ಇನ ಆಳ್‌ನ ಖ್ವಾರು ಬುಲ್ಯೆನ್, ಇನು ಧನ್‌-ದೌಲತ್‌ನ ದೇಖಿಲ್ಪವಾನಖ್ವಾಜೆ ಇವ್ವುನ್ ನೇಮಕ್‌ಕರ್ದೊ.

15 ಇನೆ ಏಕ್‌ನ ಪಾಚ್ ಹಜಾರ್, ಖ್ವೊನ್ನಾನು ಬಿಲ್ಲು ಬಿಜೇಕ್‌ನ ಬೇ ಹಜಾರ್, ಅಜ್ಜು ಬಿಜೇಕ್ ಜಣಾನ ಏಕ್ ಹಜಾರ್. ಅಮ್ ಇವ್ವ ಇವ್ವ ತಾಖತ್ ಎತ್ರೆ ಇವ್ವುನ್ ದೀನ್, ಬಿಜೇಕ್ ದೇಖ್ವಾನ್ ಚಲೆಗಯೊ.

16 ಪಾಚ್ ಹಜಾರ್ ಖ್ವೊನ್ನಾನು ಬಿಲ್ಲು ಲಿದಾಹುಯಾನೆ ಇನ ಲೀಜೈನ್, ಧಂದೊ ಕರಾನ ನಾಖಿನ್, ಇನೇಧಿ ಬಿಜು ಪಾಚ್ ಹಜಾರ್ ಖ್ವೊನ್ನಾನು ಬಿಲ್ಲು ಕಮೈಕರ್ದೊ.

17 ಇಮ್ಮಸ್ ಬೇ ಹಜಾರ್ ಖ್ವೊನ್ನಾನು ಬಿಲ್ಲು ಮಳ್ಳುಹುಯೊ ಬಿಜು ಬೇ ಹಜಾರ್ ಖ್ವೊನ್ನಾನು ಬಿಲ್ಲು ಕಮಾಯೊ.

18 ಕತೋಬಿ ಏಕ್ ಹಜಾರ್ ಬಿಲ್ಲು ಮಳ್ಳುಹುಯಾನೆ ಜೈನ್, ಬಲ್ದಾಮ ಖಾಡ್ ಖೋಂದಿನ್, ಇನು ಯಜಮಾನ್ನು ಬಿಲ್ಲಾನ ಲಪಾಡಿನಾಖ್ವೊ.

19 ಘಣ ದನ್ನ ಬಾದ್‌ಮ ಯೋ ಆಳ್ ಖ್ವಾರಾನೊ ಯಜಮಾನ್ ಘಾಫೊ ಆಯಿನ್, ಇವ್ವೇಧಿ ಇಶಾಬ್ ಮಾಂಗ್‌ತಾನ,

20 ಪಾಚ್ ಹಜಾರ್ ಖ್ವೊನ್ನಾನು ಬಿಲ್ಲು ಲಿದಾಹುಯಾನೆ ಖ್ವಾಪ್ಪೊ ಆಯಿನ್, ಇನಜೋಡೆ ಬಿಜು ಪಾಚ್ ಹಜಾರ್ ಖ್ವೊನ್ನಾನು ಬಿಲ್ಲು ಲಯಿನ್, 'ಪ್ರಭು, ತುನೆ ಪಾಚ್ ಹಜಾರ್ ಖ್ವೊನ್ನಾನು ಬಿಲ್ಲು ಮನ

ದಿದೋಥೋನಿ, ಹಂದೇಕ್, ಇನಬೋಡೆ ಬಿಜು ಪಾಚ್ ಹಜಾರ್ ಖೊನ್ನಾನು ಬಿಲ್ಲು ಕಮೈರಾಖ್ಯೋಸ್' ಕರಿ ಬೋಲ್ಯೊ.

21 ತದೆ ಇನ ಯಜಮಾನ್ನೆ ಇನ, 'ಶಬಾಶ್, ತೂ ಅಫ್ಲೊ ಅಜು ಭರೋಖಾನೊ ಆಳ್! ಹುಯಿರ್ದೋಸ್!' ತೂ ಥೋಡಾಮ ನಿಯಡ್ಲಿ ರ್ಹೆಯೋತೆ ಇನಖ್ವಾಜೆ, ಮೇ ತುನ ಮೋಟಾ ಕಾಮ್‌ಪರ್ ನೇಮ್‌ಶಾವುಸ್. ಐನ್, ಮಾರಿ ಖ್ವಶಿಮ ಭಾಗ್ ಹೂ' ಕರಿ ಬೋಲ್ಯೊ.

22 "ತದೆ ಬೇ ಹಜಾರ್ ಖೊನ್ನಾನು ಬಿಲ್ಲು ಲಿದೊಹುಯೊ ಆಳ್ ಖ್ವಾಮ್ಪೆ ಐನ್, ಪ್ರಭು, 'ತುನೆ ಮನ ಬೇ ಹಜಾರ್ ಖೊನ್ನಾನು ಬಿಲ್ಲು ದಿದೋಥೋನಿ, ಹಂದೇಕ್, ಬಿಜು ಬೇ ಹಜಾರ್ ಕಮೈರಾಖ್ಯೋಸ್' ಕರಿ ಬೋಲ್ಯೊ.

23 ಇನ ಯಜಮಾನ್ನೆ ಇನ, 'ಶಬಾಶ್! ತೂ ಅಫ್ಲೊ ಅಜು ಭರೋಖಾನೊ ಆಳ್ ಹುಯಿರ್ದೋಸ್!' ತೂ ಥೋಡಾಮ ನಿಯಡ್ಲಿ ರ್ಹೆಯೋತೆ ಇನಖ್ವಾಜೆ, 'ಮೇ ತುನ ಮೋಟಾ ಕಾಮ್‌ಪರ್ ನೇಮ್‌ಶಾವುಸ್, ತೂ ಐನ್, ಮಾರಿ ಖ್ವಶಿಮ ಭಾಗ್ ಹೂ!' ಕರಿ ಬೋಲ್ಯೊ.

24 ಅನ "ಬಾದ್‌ಮ ಏಕ್ ಹಜಾರ್ ಖೊನ್ನಾನು ಬಿಲ್ಲು ದೇವ್ವುಡ್ಲೂತೆ ಇನೆ ಖ್ವಾಮ್ಪೆ ಆಯಿನ್, 'ಪ್ರಭು, ತೂ ಕರಣ್ ಅದ್ಮಿಕರಿ ಮನ ಮಾಲುಮ್; ತೂ ಛಿಡ್‌ಕ್ಯೊಕೊಂತೆ ಇನ ವ್ಹಾಡವಾಳೊ, ತೂ ಗಾಡ್ಲೊಕೊಂತೆ ಅನಾಜ್‌ನ ಎಕ್ವ ಕರಾವಾಳೊ.

25 ಮೇ ಡರಿನ್, ತಾರ ಪೈಶಾನ ಭಮೀನ್‌ಮ ಲಪಾಡಿರಾಖ್ಯೊಥೊ. ಹಂದೇಕ್, ತಾರು ತುನಾಸ್ ದೆವ್‌ಕರೂಸ್' ಕರಿ ಬೋಲ್ಯೊ.

26 ತದೆ ಇನ ಯಜಮಾನ್ನೆ 'ತೂ ಖರಾಬ್ ಅಜು ಶೋಂಬೇರಿ ಆಳ್ ಹುಯಿರ್ದೋಸ್! ಮೇ ಛಿಡ್‌ಕ್ಯೊಕೊಂತೆ ಹಿಜ್ವಾ ವ್ಹಾಡವಾಳೊ, ಮೇ ಗಾಡ್ಲೊಕೊಂತೆ ಅನಾಜ್‌ನ ಎಕ್ವ ಕರಾವಾಳೊ ಕರಿ ತುನ ಮಾಲುಮ್ ಥೂಕಿ ಶು?

27 ಇಮ್‌ಕತೊ, ತೂ ಮಾರ ಪೈಶಾನ ಬಡ್ಲಿಪರ್ ದೇವ್ವುಡ್ಲೂ, ತದೆ ಮೇ ಆಯಿನ್, ಮಾರ ಪೈಶಾನ ಬಡ್ಲಿ ಖ್ವಮೇದ್ ಲೀಲಿದೊಹೋತ್' ಕರಿ

ಬೋಲ್ಯೊ.

28 ಅಜ್ಜು ಇನ ಆಳ್ ಖ್ವಾರಾನ, 'ಆ ದೇವ್ವುತೆ ಯೋ ವೈಶಾನ ಲೀನ್, ದಖ್ವ್ಹಜಾರ್ ಖ್ವೊನ್ನಾನು ಬಿಲ್ಲಾ ಛಾತೆ ಇನ ದೆವೊ.

29 ಕಿನಾಕನ ಥೋಡು ಛಾಕಿ ಇವ್ವುನ ಬಿಜೂಬಿ ದೆವಾವ್‌ಶೆ, ಅಜ್ಜು ಇನ ಹೋಣುತೆ ಇನೇಥಿಬಿ ಜಾಖ್ವತ್ ಇನ ಮಳ್‌ಶೆ; ಕತೋಬಿ ಕಿನಾಕನ ಶಾಪ್ಪಿ ಕೊಯ್ಪಿ, ಇನಾಕಂಥು ಇನಾಕನ ಛಾತೇಬಿ ಥೋಡು ಕಾಡಿಲಿಶೆ.

30 ಅನಕೇಡೆಥು ಯೋ ಯಜಮಾನ್ಯೆ, ಕಾಮ್‌ಕೊಂತೆ ಆ ಖರಾಬ್ ಆಳ್‌ನ ಭಾರ್ ಅಂಧಾರಾಮ ನಾಖಿದೆವೊ; ಹಿಜ್ಜಾ ಆ ರೊವ್‌ತೊಹುಯಿನ್, ಕರ್-ಕರ್ ದಾತ್ ಚಾವ್‌ಶೆ' ಕರಿ ಬೋಲ್ಯೊ.

ಖ್ವರ್ತಿನು ನ್ಯಾವ್‌ನು ತೀರ್ಪ್

31 ಅತ್ರೇಸ್ ಕಾಹೆತೆ ಅದ್ಮಿನೊ ಛಿಯೊ ಇನಿ ಮಹಾನ್ ಮಹಿಮೆಥಿ ತಮಾಮ್ ದೇವ್‌ನು ದೂತರ್‌ನ ಜೋಡೆ ಆವಾನಿ ವಖ್ವತ್‌ಮ, ಯೊ ಇನಿ ಮಹಿಮೆನು ಸಿಂಹಾಸನ್‌ಪರ್ ಬೇಖ್‌ಶೆ.

32 ಅಜ್ಜು ತಮಾಮ್ ದೇವ್‌ನು ಅದ್ಮಿಖ್ವಾರು ಇನಖ್ವಾಪ್ಪೆ ಎಕ್ವು ಉಶೆ. ಚರಾವವಾಳೊ ಬೋಕ್‌ಡಾವ್ ಅಜ್ಜು ಮೇಂಡವ್‌ನ ಅಲಕ್ ಕರಾತೆ ಇಮ್ವಸ್, ಯೊ ಇವ್ವುನ ಅಲಕ್ ಕರೀನ್,

33 ಮೇಂಡವ್‌ನ ಇನಿ ಖಾವಿ ಬಾಜೂಮ ಅಜ್ಜು ಬೋಕ್‌ಡಾವ್ ಇನಿ ಡಾವಿ ಬಾಜೂಮ ಭೀರಾಕ್‌ಶೆ.

34 ತದೆ ರಾಜಾ ಇನಿ ಖಾವಿ ಬಾಜೂಮ ಭಿಯುತೆ ಅದ್ಮಿ ಖ್ವಾರಾನ, 'ಮಾರ ಬಾನೆ ಆಶೀರ್ವಾದ್ ಕರೊತೆ ತುಮೆ ಆವೊ, ಜಗತ್ ಉಬ್‌ಜ್ಜುತೆ ತಪ್‌ಥು ತುಮಾರಖ್ವಾಜೆ ತೈಯಾರ್ ಹುಯಿರೊತ್ತೆ ರಾಜ್ಯನ ಅಲ್ಲೇವೊ.

35 ಮೇ ಭುಕ್ಕೊಥೊ, ತುಮೆ ಮನ ಖಾಣು ದಿದಾ; ಮೇ ಟೋಖ್ವಾಮ್ ಥೊ, ತುಮೆ ಮನ ಪಿಯ್ಯಾನ ದಿದಾ; ಮೇ ಪರೈ ಅದ್ಮಿಹುಯಿನ್ ಥೊ, ತುಮೆ ಮನ ಮಳ್ಳೆಲಿದ;

36 ಮೇ ಉಫಾಡೊ ಥೊ, ತುಮೆ ಮನ ಪೇರಾನ್ ಲುಂಗ್ಡಾದಿದಾ; ಮೇ ರೋಗ್‌ಮ ಪಡ್ಕೊಥೊ, ತುಮೆ ಮನ ದೇಕ್‌ಭಾಲ್ ಕರಾ; ಮೇ ಜೇಲ್‌ಮ ಥೊ, ತುಮೆ ಮನ ದೇಖಾನ ಆಯಾಥಾ' ಕರಿ ಬೋಲ್‌ಶೆ.

37 ತದೆ ಯೋ ಧರ್ಮಿ ಅದ್ಮಿಖ್ವಾರು, 'ಪ್ರಭು, ಕದೆ ತೂ ಭುಕ್ಯೊಥೋತೆ ದೇಖಿನ್, ಹಮೆ ಖಾಣು ದಿದಾ? ನಾತೊ ಕದೆ ತೂ ಟೋಖ್ವಾಮ ಥೋತೆ ದೇಖಿನ್, ತುನ ಪಿಯಾನ ದಿದಾ?

38 ಕದೆ ತೂ ಪರೈ ಅದ್ಮಿ ಹುಯಿರಾನ್ ಥೋತೆ ದೇಖಿನ್, ಹಮೆ ತುನ ಮಳ್ಳೆಲಿದಾ? ನಾತೊ ಕದೆ ತೂ ಉಫಾಡೊ ಥೋತೆ ದೇಖಿನ್, ಹಮೆ ತುನ ಪೇರಾನ್ ಲುಂಗ್ಡಾದಿದಾ?

39 ಕದೆ ತೂ ರೋಗ್‌ಮ ಥೋತೆ ದೇಖಿನ್, ನಾತೊ ಜೇಲ್‌ಮಥೋತೆ ದೇಖಿನ್, ಹಮೆ ತುನ ದೇಖಾನ ಆಯಾಥಾ?' ಕರಿ ಬೋಲ್‌ಶೆ.

40 ತದೆ ಯೋ ರಾಜಾ ಫರೈನ್, 'ಆ ಮಾರ ಭೇನೆ-ಭೈಯೇಮ ಕಡತೇಲಾನಿಮತ್ ಥೂತೆ ಏಕ್‌ನ ತುಮೆ ಶಶ್ವತ್ ಕರಾಕಿ, ಯೋ ಮನಾಬಿ ಕರಾದಾಖ್ವಲ್ ಕರಿ ಮೇ ತುಮೂನ ಖ್ವಾಚಮಾಬಿ ಬೋಲುಸ್' ಕರಿ ಬೋಲ್‌ಶೆ!

41 ಅನಕೇಡೆಥು ಯೋ ರಾಜ ಇನಿ ಡಾವಿ ಬಾಜೂಮ ಭೀರಾನ್ ಅದ್ಮಿಖ್ವಾರಾನ್, 'ಮಾರೇಥಿ ದೂರ್ ಹಟಿಜಾವೊ, ತುಮೆ ದೇವ್ ಶಾಪ್ಪ ಹೇಟ್ ಛಾ! ಮನ ಮ್ಹಂದಿನ್, ಶೈತಾನ್ ಅಜು ಇನ ದೂತರ್‌ನಖ್ವಾಜೆ ತೈಯಾರ್ ಹುಯಿರಾನ್ ಹರ್‌ಹಮೇಶಾನಿ ಆಗ್‌ಮ ಜೈನ್, ಪಡೊ!

42 ಮೇ ಭುಕ್ಯೊ ಥೊ, ತುಮೆ ಮನ ಖಾಣು ಕೋ ದಿದಾನಿ; ಮೇ ಟೋಖ್ವಾಮ ಥೊ, ತುಮೆ ಮನ ಪಿಯಾನ ಕೋ ದಿದಾನಿ;

43 ಮೇ ಪರೈ ಹುಯಿನ್ ಥೊ, ತುಮೆ ಮನ ಮಳ್ಳೆಲಿದಾಕೊಯ್ತಿ; ಮೇ ಉಫಾಡೊ ಥೊ, ತುಮೆ ಮನ ಪೇರಾನ್ ಲುಂಗ್ಡಾ ಕೋ ದಿದಾನಿ; ಮೇ ರೋಗ್‌ಮ ಥೊ, ತುಮೆ ಮನ ದೇಕ್‌ಭಾಲ್ ಕೋ ಕರಾ; ಮೇ ಜೇಲ್‌ಮ ಥೊ, ತುಮೆ ಮನ ದೇಖಾನ ಕೋಆಯನಿ' ಕರಿ ಬೋಲ್‌ಶೆ.

44 ತದೆ ಇವ್ಣೆ ಇನ, 'ಪ್ರಭು, ಕದೆ ತೂ ಭುಕ್ಯೊ ಥೋತೆ, ನಾತೊ ಟೋಖ್ವಾಮ ಥೋತೆ, ನಾತೊ ಪರೈಹುಯಿನ್ ಥೋತೆ, ನಾತೊ

ರೋಗ್‌ಮ ಥೋತೆ, ನಾತೊ ಜೇಲ್‌ಮಥೋತೆ ದೇಖಿನ್, ಹಮೆ ತುನ ಮದತ್ ಕರ್ಯಾಕೊಂತೆ ಗಯ್?” ಕರಿ ಪುಲ್ಲಾವ್.

45 ತದೆ ಯೋ ರಾಜ್ ಫರೈನ್ ಇವ್ವುನ, ‘ತುಮೆ ಆ ನ್ಹಾನಾವ್‌ಮ ಕಡ್‌ತೇಲ್‌ನಿಮತ್ ಛಾತೆ ಏಕ್‌ನ ಶಶ್ಯತ್ ಕೋ ಕರ್ಯಾನಿಕಿ, ಯೋ ಮನಾಬಿ ಕರ್ಯಾಕೊಯ್ನಿ ಕರಿ ಮೇ ತುಮೂನ ಖ್ವಾಚಮಾಬಿ ಬೋಲುಸ್’ ಕರಿ ಬೋಲ್‌ಶೆ.

46 ತದೆ ಖರಾಬ್ ಅದ್ಮಿ ಖ್ವಾರಾನ ಹರ್‌ಹಮೇಶಾನಖ್ವಾಜೆ ಡಂಡ್ ಉಶೆ ಅಜ್ಜು ಧರ್ಮಿ ಖ್ವಾರಾನ ಹರ್‌ಹಮೇಶಾನಿ ಭಿಂದ್‌ಗಿ ಮಳ್‌ಶೆ.

26

ಯೇಸುನಿ ವಿರೋದ್ ಮಶ್ಲತ್ ಭಂದಾಯುತೆ

(ಮಾರ್ಕ 14:1-2; ಲೂಕ 22:1-2; ಯೋಹಾನ 11:45-53)

1 ಯೇಸುನೆ ಆವಾತೆಖ್ವಾರಿ ಬೋಲಿನ್ ಖತಮ್ ಕರಾನ ಬಾದ್‌ಮ, ಇನ ಶಿಷ್ಯರನ್,

2 “ಬಿಜ್ಜು ಬೇ ದನ್ಮಪಸ್ಕ ಪೂಜಾ ಆವ್‌ಶೆಕರಿ ತುಮೂನ ಮಾಲುಮ್; ತದೆ ಅದ್ಮಿನೊ ಲಿಯ್ಯಾನ ಶಿಲ್‌ಬೇಪರ್ ನಾಖಾನಖ್ವಾಜೆ ಇವ್ವಹಾತ್ಮ ದಿನಾಕ್‌ಶೆ” ಕರಿ ಬೋಲ್ಯೊ.

3 ತದೆ ಗಲ್‌ಥಯಾಜಕರ್‌ಬಿ ಅಜ್ಜು ಶಾಣುಖ್ವಾರು ಮಹಾಯಾಜಕ್ ಕಾಯಫನ ಮಹೇಲ್‌ಮ ಮಳೇನ್‌ಆಯು,

4 ಯೇಸುನ ಕಿನಾಬಿ ಮಾಲುಮ್‌ಕೊಂತೆ ಇಮ್ ಧರೀನ್, ಮರೈನಾಕ್ಟು ಕರಿ ವಾತೆ ಕರಿಲಿದು.

5 “ತೋಬಿ ಪೂಜಾನಿ ವಖ್ವಿತ್‌ಮ ನಾ ಧರ್‌ನು, ಶನಕತೊ ಅಪ್ಪ ಅದ್ಮಿಮ ಕಲ್ಯಾಗಟ್ ಪಡಿಜ್ಞಾಶೆ” ಕರಿ ಬೋಲಿಲಿದು.

ಬೆಥಾನ್ಯಾಮ ಯೇಸುನ ಅಬಿಷೇಕ್ ಹುಯೂತೆ

(ಮಾರ್ಕ 14:3-9; ಯೋಹಾನ 12:1-8)

6 ಯೇಸು ಬೆಥಾನ್ಯಾಮ ಸೀಮೋನ್ನ ಘರ್‌ಮ ಥೊ, ಆ ಸೀಮೋನ್ ಅಗಾಡಿ ಖೋಡ್‌ವಾಳೊ ಹುಯಿರ್ರ್ವೊಥೊ.

7 ಯೇಸು ಖಾಣು ಖಾವಾನಿ ವಖ್ವತ್‌ಮ, ಏಕ್ ತಯೇಡ ಘಣ ಮೋಲ್ವು ವಾನು ತೇಲ್ವ ಧೋಳ ಬಂಡಾನಿ ಶೀಶಿಮ ಲೀನ್, ಇನಾಕನ ಆಯಿನ್, ಯೋ ತೇಲ್ವ ಇನ ಮಾಥಪರ್ ರಂಚಿ.

8 ಅನ ದೇಖಿನ್, ಶಿಷ್ಯರ್‌ನೆ ಖೀಜ್ ಕರ್ಯ್, ಅಜ್ಜು, “ಆ ವಾನು ತೇಲ್ವ ಶನ ಲುಕ್ಸಾನ್ ಕರಿ?

9 ಆ ತೇಲ್ವ ಘಣ ಪೈಶಾನ ವೇಚಿನ್, ಆವಾಸ್ತೆ ಪೈಶಾನ ಗರೀಬ್‌ನ ದಿಯೈಜಾಯಿಥೂನಿ?” ಕರಿ ಬೋಲ್ಯ.

10 ಯೇಸುನೆ ಇವ್ವೆ ಬೋಲುಕರಾತೆ ಮಾಲುಮ್ ಕರಿಲೀನ್ ಇವ್ವುನ, “ತುಮೆ ಆ ತಯೇಡಾನ ಶನ ಖ್ವತ್‌ವಕರಸ್ತೆ? ಅನೆ ಮಾರಖ್ವಾಜಿ ಘಣು ಅಲ್ಪುಕಾಮ್ ಕರಿರಾವೀಸ್.

11 ಗರೀಬ್ ಅದ್ವಿಖ್ವಾರು ಕದೇಬಿ ತುಮಾರಕನ ರೆಪ್ಪಿಶೆ, ಕತೋಬಿ ಮೇ ಹಮೇಶ ತುಮಾರಕನ ರೆಪ್ಪಿಶೆ ಕೊಯ್ತಿ.

12 ಮೇ ಮರ್‌ವಾನ ಬಾದ್‌ಮ, ಮಾರು ಶರೀರ್‌ನ ಮಖ್ವಾಣ್ಣು ಕರಾನಟೀಕೆ, ಅನೆ ಮಾರ ಆಂಗ್‌ತನ್‌ಪರ್ ವಾನು ತೇಲ್ವ ರಂಚಿರಾವೀಸ್.

13 ಮೇ ತುಮುನ ಖ್ವಾಚಮಾಬಿ ಬೋಲುಸ್, ಹಿಡಿ ಜಗತ್‌ಮ ಆ ಅಲ್ಪಿ ಖಬರ್ ಕಿಜ್ಜ-ಕಿಜ್ಜ ಬೋಲಾವ್‌ಶೇಕಿ, ಹಿಜ್ಜಾ ಖ್ವಾರು ಅನೆ ಕರೀತೆ ಇನಾಬಿ ಅನಿ ಯಾದ್‌ನಖ್ವಾಜಿ ಬೋಲ್‌ಶೆ” ಕರಿ ಬೋಲ್ಯೊ.

ಯೂದಾನೆ ಯೇಸುನ ಧೋಕೇಥಿ ಧರಿದ್ಯವಾನ ಮಾನಿಗಯೋತೆ
(ಮಾರ್ಕ 14:10-11; ಲೂಕ 22:3-6)

14 ಅನ ಬಾದ್‌ಮ ಭಾರ ಶಿಷ್ಯರ್‌ಮ ಏಕ್ ಜಣೊ ಹುಯಿರೊಡ್ವೋತೆ ಇಸ್ಕರಿಯೋತ ಯೂದಾನೆ ಗಲ್‌ಥಯಾಜಕರ್‌ಕನ ಜೈನ್,

15 “ಮೇ ಇನ ಧೋಕೇಥಿ ಧರಿದಿದೋತೊ, ತುಮೆ ಮನ ಶಾತ್ ದಿಶು?” ಕರಿ ಪುಲ್ಲಾಯೊ. ತದೆ ಇವ್ವೆ ಡೋಡಿಖ್ವೊ ರೂಪಾನು ಬಿಲ್ಲಾನ ಗಣೀನ್, ಇನ ದಿದು.

16 ತಪ್‌ಥೊ ಯೂದ ಯೇಸುನ ಧರಿದ್ಯವಾನಿ ಬರೋಬರ್‌ನಿ ವಖ್ತನ್‌ಖ್ವಾಜೆ ಜಪೂಕರ್ತೊಥೊ.

ಯೇಸುನೆ ಇನ ಶಿಷ್ಯರ್‌ನ ಜೋಡೆ ಪಸ್ಕಾನು ಖಾಣು ಖಾದೋತೆ
(ಮಾರ್ಕ 14:12-21; ಲೂಕ 22:7-13,21-23; ಯೋಹಾನ 13:21-30)

17 ಖಾಟುಕೊಂತೆ ರೋಟಾನು ಪೂಜಾನ ಪಹಿಲ ದನ್ನೆ, ಶಿಷ್ಯರ್ ಯೇಸುಕನ ಐನ್, “ಹಮೆ ತಾರಖ್ವಾಜೆ ಪಸ್ಕಾನು ಖಾಣನ ಕಿಜ್ಜಾ ತೈಯಾರ್ ಕರ್ನ್?” ಕರಿ ಪುಲ್ಲಾಯಾ.

18 ತದೆ ಯೇಸುನೆ ಇವ್ಣುನ, “ತುಮೆ ಖ್ವಿಯೇರಾಮ ಮೇ ವತಾಳ್ಕೊತೆ ಇನಕನ ಜೈನ್ ಇನ, ‘ಮಾರಿ ವಖ್ತತ್ ಖನ್ನೆ ಐಗೈ, ತಾರ ಘರಾಮ ಮಾರ ಶಿಷ್ಯರ್‌ನ ಜೋಡೆ ಪಸ್ಕಾನು ಖಾಣು ಖವುಸ್ ಕರಿ ಗುರುನೆ ಬೋಲ್ಯೊ’ ಕರಿ ಬೋಲ್ಯೊ.”

19 ಶಿಷ್ಯರ್‌ನೆ ಯೇಸುನೆ ಇವ್ಣುನ ಬೋಲ್ಯೊತೆ ಇಮ್ಮಸ್ ಕರ್ನ್, ಅಜ್ಜು ಪಸ್ಕಾನ ಖಾಣನ ತೈಯಾರ್ ಕರ್ನ್.

20 ಖ್ವಾಂಜ್ ಹುವ್ವಾದೀನ್, ಯೇಸು ಇನ ಭಾರ ಶಿಷ್ಯರ್‌ನ ಜೋಡೆ ಖಾಣನ ಬೇಶಿಗಯೊ.

21 ಇವ್ಣೆ ಖಾಣು ಖವ್‌ಕರಾನಿ ವಖ್ತತ್‌ಮ, ಯೇಸುನೆ ಇವ್ಣುನ, “ಮೇ ಖ್ವಾಚಮಾಬಿ ಬೋಲುಸ್ಕಿ, ತುಮಾರಾಮ ಏಕ್ ಜಣೊ ಮನ ಧೋಕೇಥಿ ಧರಿದಿಶೆ” ಕರಿ ಬೋಲ್ಯೊ.

22 ತದೆ ಶಿಷ್ಯರ್ ಖ್ವಾರು ಘಣು ದುಖ್‌ಥಿ, “ಪ್ರಭು, ಖ್ವಾಚಮಾಬಿ ಮೇ ಕಾಹೆ ಕೊಯ್ಲಿ?” ಕರಿ ಏಕ್‌ನ ಬಾದ್ಮಏಕ್ ಇನ ಪುಲ್ಲಾವಲಗ್ಯಾ.

23 ಯೇಸುನೆ, “ಕೋಣ್ ಮಾರ ಜೋಡ್ತ್ ಕಟೋರಿಮ ಬೋಪ್‌ಡಾಸ್ಕಿ, ಯೋಸ್ ಮನ ಧೋಕೇಥಿ ಧರಿದ್ಯವಾಳೊ” ಕರಿ ಬೋಲ್ಯೊ.

24 ವಚನ್‌ಮ ಲೀಖ್ತಿರ್ದೊತೆ ಇಮ್ಮಸ್, ಅದ್ಮಿನೊ ಛಿಯೊ ಮರ್‌ಶೆ, ಕತೋಬಿ ಕೋಣ್ ಅದ್ಮಿನೊ ಛಿಯ್ತಾನ ಧರಿದಿಶೆಕಿ, ಇನಿ ಹಾಲ್ವ ಶಾತ್ ಬೋಲು! ಯೋ ಅದ್ಮಿಪೈದಾ ನಾಸ್ ಹುಯುಹೊತ್ತೊ ಇನ ಅಛ್ಛು ಥೊ.

25 ತದೆ ಇನ ಧೋಕೇಥಿ ಧರಿದೇಣು ಕರಿ ಧೋತೆ ಯೂದಾನೆ, “ಗುರು, ಖ್ವಾಚಮಾಬಿ ಯೋ ಮೇತೊ ಕಾಹೆನಿ?” ಕರಿ ಪುಲ್ಲಾಯೊ.
ಯೇಸುನೆ ಇನ, “ತೂಸ್ ಬೋಲ್ಯೊನಿ” ಕರಿ ಜವಾಬ್ ದಿದೊ.

ಪ್ರಭುನು ಭೋಜನ್

(ಮಾರ್ಕ 14:22-26; ಲೂಕ 22:14-20; 1 ಕೊರಿಂಥ 11:23-25)

26 ಇವ್ಣೆ ಖಾಣು ಖವ್‌ಕರಾನಿ ವಖ್ವತ್‌ಮ, ಯೇಸುನೆ ರೋಟಾನ ಪಾಡೀನ್, ದೇವ್ವ ಧನ್ಯವಾದ್ ಕರೀನ್, ಇನ ತೋಡೀನ್, ಇನ ಶಿಷ್ಯರಾನ್ ದೀನ್, “ಅಲ್ಲೇವೊ, ಅನಖಾವೊ, ಆ ಮಾರು ಶರೀರ್” ಕರಿ ಬೋಲ್ಯೊ.

27 ಅನಕೇಡೆಥು ಕಟೋರಿನ ಪಾಡೀನ್, ದೇವ್ವ ಧನ್ಯವಾದ್ ಕರೀನ್, ಇವ್ಣುನ ದೀನ್, “ತುಮೆ ಖ್ವಾರು ಅನಾಮ ಪೀಯ್ಚೊ.

28 ಆ ಮಾರು ಲ್ಹೊಯಿ, ಆ ದೇವ್‌ನು ನವು ಒಪ್ಪಂದಾನನ ಮುದ್ರೊ ಮರೈಹುಯು ಮಾರು ಲ್ಹೊಯಿ; ಕೈಯೆಕ್ಕಿ ಅದ್ತಿನು ಪಾಪ್‌ಖ್ವಾರು ಮಾಪ್ ಕರಾನಖ್ವಾಜ್ ರಂಘಾಯುತೆ ಮಾರು ಲ್ಹೊಯಿ.

29 ಮೇ ತುಮೂನ ಬೋಲುಸ್ಕಿ, ಹಂಕೇಥು ಧರೀನ್, ಬಾನಿ ರಾಜ್ಯಮ ನವು ದ್ರಾಕ್ಷಿನು ರಖ್ವ್ ಪಿಯ್ಯಾನ ದನ್‌ತೋಡಿ, ಅನ ಮೇ ಪಾಲ್ಟೊ ಪೀಶಸ್ ಕೊಯ್ತಿ” ಕರಿ ಬೋಲ್ಯೊ.

30 ಅನಕೇಡೆಥು ಇವ್ಣೆಸ್ತುತಿನು ಗೀದ್ ಬೋಲಿನ್ ಆಲಿವ್ ಪಹಡ್‌ಕನ ಚಲೇಗಯ.

ಪೇತ್ರ ಝೂಟಿ ಬೋಲ್‌ಶೆ ಕರಿ ಯೇಸುನೆ ಬೋಲ್ಯೊತೆ

(ಮಾರ್ಕ 14:27-31; ಲೂಕ 22:31-34; ಯೋಹಾನ 13:36-38)

31 ತದೆ ಯೇಸುನೆ ಇವ್ಣುನ, “ಆ ರಾತೆ ತುಮೆ ಖ್ವಾರುಸ್ ಮನ ಮ್ಹೆಂದಿನ್, ಮಿಲ್ಟೆಚಾಶು; ದೇವ್ ವಚನ್‌ಮ ಬೋಲುಕರಸ್ ಮೆ ಮೇಂಡ್ ಚರಾವವಾಳಾನ ಮರ್‌ನಾಕಿಶ್, ತದೆ ಮಂಧಾಮಾಥು ಮೇಂಡ್ ಛಿಡ್‌ಗರ್ ಹುಯಿಚಾಶೆ,

32 ಕತೋಬಿ ಮೇ ಜಿವೊಹುಯಿನ್, ಉತಾನ ಬಾದ್‌ಮ ತುಮಾರೇಥಿ ಅಗಾಡಿ ಗಲಿಲಾಯ ಜೈಶ್” ಕರಿ ಬೋಲ್ಯೊ.

33 ತದೆ ಪೇತ್ರನೆ ಯೇಸುನ, “ಖ್ವಾರು ಡರಿನ್, ತುನ ಮ್ಹಿಂದಿದಾತೋಬಿ ಮೇ ತುನ ಮ್ಹೇಲಿಶ್ ಕೊಯ್ನಿ” ಕರಿ ಬೋಲಾಖ್ವತರ್,

34 ಯೇಸುನೆ ಪೇತ್ರನ, “ಖ್ವಾಚಮಾಬಿ ತುನ ಬೋಲುಸ್ಕಿ, ಆ ರಾತೇಸ್ ಮುರ್‌ಗೊ ಬಾಂಗ್ ದ್ಯವಾನ ಅಗಾಡಿ ತೂ ಮಾರಿ ಬಾರೇಮ, ‘ಯೋ ಮನ ಮಾಲುಮ್ ಕೊಯ್ನಿ’ ಕರಿ ತೀನ್‌ಹಲ್ಲ ಬೋಲಿಶ್” ಕರಿ ಬೋಲ್ಯೊ.

35 ಪೇತ್ರನೆ, “ಮೇ ತಾರ ಜೋಡ್ತ ಮರಾನು ರ್ಹಯುತೋಬಿ, ಮೆ ತುನ ಮಾಲುಮ್ ಕೊಯ್ನಿ ಕರಿ ಕೋ ಬೋಲಿಶ್‌ನಿ” ಕರಿ ಬೋಲ್ಯೊ.

ಅಜ್ಜು ಬಿಜಾಖ್ವಾರ ಶಿಷ್ಯರ್‌ನೇಬಿ ಇಮ್ಮುಸ್ ಬೋಲ್ಯೊ.

ಯೇಸು ಗೆತ್ಸೆಮನೆಮ ಪ್ರಾರ್ಥನೆ ಕರಯ್ತೆ

(ಮಾರ್ಕ 14:32-42; ಲೂಕ 22:39-46)

36 ಅನಕೇಡೆಥು ಯೇಸು ಇನ ಶಿಷ್ಯರ್‌ನ ಜೋಡೆ ಗೆತ್ಸೆಮನೆ ಕರಿ ಬಾಗ್‌ನ ಗಯೊ, ಇವ್ವುನ, “ಹಜ್ವಾಸ್ ಬೇಖ್ವೊ ಮೇ ಹಿಜ್ವಾ ಜೈನ್, ಪ್ರಾರ್ಥನೆ ಕರೀನ್, ಆವುಸ್” ಕರಿ ಬೋಲ್ಯೊ.

37 ಅಮ್ ಬೋಲಿನ್, ಪೇತ್ರ ಅಜ್ಜು ಜೆಬೆದಾಯನ ಛಿಯ್ಯಾವ್‌ನ ಇನಜೋಡೆ ಬುಲೈಲಿ ಗಯೊ. ತದೆ ಯೇಸುನ ಘಣು ಘಬ್ರಾವ್‌ಣಿ ಹುಯು ಅಜ್ಜು ಯೋ ದುಖ್‌ಥಿ ಭರೈಗೊ.

38 ಅಜ್ಜು ಯೇಸುನೆ ಇವ್ವುನ, “ಮಾರೊ ಜಾನ್ ಮರ್ದವತ್ರೆ ದುಖ್‌ಮ ಛಾ. ತುಮೆ ಹಾಸ್‌ರ್ದೀನ್, ಮಾರ ಜೋಡೆ ಹೊಷಾರಿ ರ್ಹವೊ” ಕರಿ ಬೋಲ್ಯೊ.

39 ಅನಕೇಡೆಥು ಯೋ ಜರ ಖ್ವಾಮ್ವೆ ಜೈನ್, ಜಮೀನ್‌ಪರ್ ಆಡೊ ಪಡೀನ್, “ಮಾರೊ ಬಾ, ಹೋತು ಉಶೇತೊ, ಆ ವದೇಖ್ವಾನಿ ಕಟೋರಿ ಮನ ಮ್ಹಿಂದಿನ್ ಜಾವಾನಿಘೋಣಿ ಕರ್! ತೋಬಿ ಮಾರಿ ಮರ್ಜಿನಿಘೋಣಿ ಕಾಹೆ, ತಾರಿ ಮರ್ಜಿನಿ ಘೋಣಿಸ್ ಹುವಾದೆ” ಕರಿ ಪ್ರಾರ್ಥನೆ ಕರಯ್ತೆ.

40 ಅನ ಯೇಸು ಯೋ ಶಿಷ್ಯರ್‌ಕನ ಆಯಿನ್, ಇವ್ವೆ ಖ್ವತಾತೆ ದೇಖಿನ್, ಪೇತ್ರನ, “ಅಮ್‌ಕಿ ಶು? ತುಮೆ ಮಾರ ಜೋಡೆ ಏಕ್ ಘಡೀಬಿ ಹೊಷಾರಿ ರ್ಹವಾನ ಕೋ ಹೋಯ್ತೆಕಿ ಶು?

41 ಶೋದನೆಮ ಪಡ್ಡುನಾತೆ ಇಮ್ ಹೊಷಾರಿ ರಕ್ಷೀನ್, ಪ್ರಾರ್ಥನೆ ಕರೊ. ಮನ್ ಛಾ ಖ್ವಾಚಸ್, ಕತೋಬಿ ಶರೀರ್‌ನ ಶಕತ್ ಪುರಾಕೊಯ್ಸ್” ಕರಿ ಬೋಲ್ಯೊ.

42 ಬಿಜು ಪಾಟ್ಲೊ ಭೇನೆಹಲ್ಲ ಜೈನ್, “ಮಾರೊ ಬಾ, ಮೇ ಆ ವದೇಖ್ವಾನಿ ಕಟೋರಿನ ಪಿಯಾಶೆ, ಆ ಮನ ಮ್ಹಂದಿನ್ ನಾ ಜ್ಞಾವು ಕರಿ ತಾರಿ ಮರ್ಜಿ ಉಶೇತೊ, ತಾರಿ ಮರ್ಜಿನಿಫೋಣಿಸ್ ಹುವಾದೆ” ಕರಿ ಬೋಲಿನ್, ಪ್ರಾರ್ಥನೆ ಕರೈಲ್ಯೊ.

43 ಅನ ಬಾದ್‌ಮ ಪಾಟ್ಲೊ ಶಿಷ್ಯರ್‌ಕನ ಏನ್, ಇವ್ಣೆ ಖ್ವತಾತೆ ದೇಖ್ಚೊ; ಇವ್ಣೆ ಡೋಳಾಮ ನಿಂದರ್ ಘುವಕರ್ತಿಧಿ.

44 ಅನಕೇಡೆಧು ಪಾಟ್ಲೊ ಇವ್ಣುನ ಮ್ಹಂದಿನ್ ಜೈನ್, ಯೋಸ್ ವಾತೇನ ಬೋಲ್ತೊಹುಯಿನ್, ತೀನ್ನೆಹಲ್ಲ ಪ್ರಾರ್ಥನೆ ಕರೈಲ್ಯೊ.

45 ಬಾದ್‌ಮ ಯೋ ಬಿಜು ಪಾಟ್ಲೊಫರಿನ್, ಇನ ಶಿಷ್ಯರ್‌ಕನ ಆಯಿನ್, “ತುಮೆ ಬಿಜೂಬಿ ಖ್ವಯಿನ್, ಅರಾಮ್ ಕರುಕರಾಸ್ಕಿ ಶು? ಹಂದೇಖೊ, ಅದ್ಮಿನೊ ಛಿಯ್ಯಾನ್ ಪಾಪಿ ಅದ್ಮಿಯೇನ ಹಾತ್‌ಮ ದೆವೈಜಾಶೆ.

46 ಉಲೊ, ಜಯ್ಚೆ ಮನ ಧೋಕೇಧಿ ಧರಿದ್ಯವಾಳೊ ಖನ್ನೆಸ್ ಐರ್ದೋಸ್” ಕರಿ ಬೋಲ್ಯೊ.

ಯೇಸುನ ಧರ್ಮ್ಯತೆ

(ಮಾರ್ಕ 14:43-50; ಲೂಕ 22:47-53; ಯೋಹಾನ 18:3-12)

47 ಯೇಸು ಅಜೂಬಿ ವಾತೆ ಬೋಲುಕರಾತೆ ತದ್ದೇಸ್, ಇನ ಭಾರಜಣ ಶಿಷ್ಯರ್ಮ ಏಕ್ ಜಣೊ ಹುಯಿರ್ದೊಡೊತೆ ಯೂದ ಹಿಜ್ಜಾ ಆಯೊ. ಇನ ಜೋಡ್ತ ಗಲ್‌ಥಯಾಜಕರ್ ಅಜು ಶಾಣುಖ್ವಾರು ಬೋಲಿ ಮೋಕ್‌ಲ್ಯಾತೆ ಅದ್ಮಿನಿ ಏಕ್ ಮೋಟಿ ಝೂಂಡಸ್ ತಲ್ವಾರೆ ಅಜು ಲಠ್ಠ ಧರಲಿನ್ ಹಿಜ್ಜಾ ಆಯು.

48 ಯೇಸುನ ಧೋಕೇಧಿ ಧರಿದ್ರವಾಳೊ ಯೋ ಅದ್ವಿನಿ ಝೂಂಡ್‌ನ, “ಮೇ ಕಿನ ಬುಝ್ಣಾ ದೆವ್‌ಸ್ತಿಯೋಸ್ ತುಮೂನ ಹೋಣುತೆ ಅದ್ವಿ ಇನ ಧರೊ!” ಕರಿ ಖಣ್ಣೇದ್ ಬೋಲಿ ದೀರಾಖ್ಯೊಥೊ

49 ಇಮ್ತಸ್ ಯೂದ ಯೇಸುನ ಖನ್ನೆ ಜೈನ್, “ಗುರು, ಶೂಲ” ಕರಿ ಬೋಲಿನ್, ಇನ ಬುಝ್ಣಾ ದಿದೊ.

50 ತದೆ ಯೇಸುನೆ, “ದೋಸ್, ತೂ ಕರಾನ ಆಯೋತೆ ಕಾಮ್ ಆಸ್ತಿಶು?” ಕರಿ ಬೋಲ್ಯೊ.

ತದೆ ಇವ್ಣೆ ಖನ್ನೆ ಐನ್, ಯೇಸುಪರ್ ಹಾತ್ ನಾಖಿನ್, ಇನ ಧರೈ.

51 ಧರ್ತಾಸ್‌ನ ಯೇಸುನ ಜೋಡ್ಡ್ ಥೂತೆ ಇವ್ಣಾಮ ಏಕ್‌ನೆ, ಇನಿ ತಲ್ವಾರ್‌ನ ಕಾಡಿನ್, ಗಲ್‌ಡಯಾಜಕ್‌ನ ಆಳ್‌ನ ಮಾರಿನ್, ಇನು ಕಾನ್ನ ಕತ್ತಿನಾಖ್ಯೊ.

52 ತದೆ ಯೇಸುನೆ ಇನ, “ತಾರಿ ತಲ್ವಾರ್‌ನ ಕಷ್‌ಬಂದ್‌ನಿ ಚಂಚಿಮ ಪಾಠ್ತು ಫಾಲ್; ತಲ್ವಾರ್‌ಧಿ ಮಾರವಾಳು ಖ್ವಾರು ತಲ್ವಾರ್‌ಧೀಸ್ ಮರ್‌ಶೆ.

53 ಮೇ ಮಾರ ಬಾನ ಬೋಲಿಲಿದೋತೊ, ಯೋ ಮನ ಮದತ್ನುಜೆ ದೇವ್ ದೂತರ್‌ನು ಭಾರ ದಂಡ್-ದಳ್‌ವಾಯಿನಿ ಝೂಂಡ್‌ನ ಮೋಕಲ್‌ಶೆ ಕರಿ ತುನ ಮಾಲುಮ್ ಕೊಯ್ತಿಕಿ ಶು?

54 ಕತೋಬಿ ಇಮ್ ಮೋಕ್‌ಲ್ಯೋತೊ, ಮನ ಅಮ್ಮು ಖ್ವಾರು ಹೋಣು ಕರಿ ವಚನ್‌ಮ ಬೋಲ್ಯೆತೆ ವಾತೆ ಕಿಮ್ ಫಾಲ್‌ಷೆ?” ಕರಿ ಬೋಲ್ಯೊ.

55 ಯೋಸ್ ವೇಳ್ತ ಯೇಸು ಝೂಂಡ್‌ಭಂದೈನ್ ಆಯಿರಲ್ಯೊಡ್‌ತೆ ಅದ್ವಿಪೋನ, “ಚೋರ್‌ನ ಧರಾನಿಫೋಣಿ ತಲ್ವಾರೆ ಅಜ್ಜು ಲಠ್ ಪಳ್ಳಿನ್, ಮನ ಧರಾನುಜೆ ಆಯಾಕಿ ಶು? ಮೇ ದನ್‌ರೋಜ್, ಮಂದಿರ್‌ಮ ಬೇಶಿನ್, ವಚನ್ ಬೋಲಿನ್ ದೇವ್‌ಕರ್‌ತೊಥೋತೆ ತದೆ ತುಮೆ ಮನ ಧರೈಕೊಯ್ತೆ.

56 ಕತೋಬಿ ಪ್ರವಾದಿ ಖ್ವಾರು ಲೀಖ್ಯೊತೆ ವಚನ್ ಪೂರಹುವಾನ ಟೀಕೆ ಅಮ್ ಹುಯು” ಕರಿ ಬೋಲ್ಯೊ.

ತದೆ ತಮಾಮ್ ಶಿಷ್ಯರ್ ಇನ ಮ್ಹಿಂದಿನ್, ನಾಶಿ ಚಲೇಗಯ.

ನ್ಯಾಹ್‌ನು ಪಂಚಾಯತ್‌ನ ಖ್ವಾಷ್ಟೆ ಯೇಸುನ ಭೀರಾಖ್ಯಾತೆ
(ಮಾರ್ಕ 14:53-65; ಲೂಕ 22:54-55,63-71; ಯೋಹಾನ
18:13-14,19-24)

57 ಯೇಸುನ ಧರ್ಮಾತ್ ಇವ್ವೆ ಇನ ಗಲ್‌ಥಯಾಜಕ್‌ನ ಕಾಯಫನ
ಘರೆ ಲೀನ್‌ಗಯು. ಹಿಜ್ಜಾ ಮೋಶೆನಿ ವಚನ್ ಶಿಕಾಡವಾಳ ಶಾಸ್ತ್ರಿಯೆ,
ಅಜ್ಜು ಶಾಣು ಖ್ವಾರು ಎಕ್ಚು ಹುಯಿನ್ ಐರ್ಮು.

58 ಪೇತ್ರ ದೂರ್‌ಥೋಸ್ ಯೇಸುನ ಪೀರೆ-ಪೀರೆ ಜಾತೊಹುಯಿನ್,
ಮಹಾಯಾಜಕ್‌ನ ಘರ್‌ನ ಖ್ವಾಷ್ಟೆನು ಬಲ್ಡತೋಡಿ ಆಯಿನ್, ಮಹಿ
ಧಕೆಲ್‌ತೊ ಆಯಿನ್, ಇನಿ ಹಾಲ್ ಶಾತ್ ಉಷೆಕರಿ ದೇಕ್ಚು ಕರಿ, ಕಾವ್ಲಿನ
ಶಿಪಾಯಿನ ಜೋಡೆ ಜೈನ್, ಬೇಶಿಗಯೊ.

59 ತದೆ ಗಲ್‌ಥಯಾಜಕ್‌ರ್ ಅಜ್ಜು ಯೆಹೂದಿ ಪಂಚಾಯತ್‌ನು
ಹಿಡಿ ಅದ್ವಿ ಶಾತ್‌ತೋಬಿ ಗಲತ್ ಸಬೂತ್ ಥೂಂಡಿನ್, ಯೇಸುನ
ಮರೈನಾಖಿದೇಣು ಕರಿ ಕರ್ಮ.

60 ಘಣು ಅದ್ವಿ ಖ್ವಾಷ್ಟೆ ಆಯಿನ್, ಯೇಸುಪರ್ ಝೂಟಿ ಸಾಕ್ಷಿಯೆ
ಬೋಲ್ಚು, ತೋಬಿ ಇವ್ವೆ ಸಾಕ್ಷಿಮ ಶಾಶ್ವಿ ಗಲತ್ ಮಳ್ಳುಕೊಯ್ಚಿ. ಖ್ವರ್ತಿಮ
ಬೇ ಅದ್ವಿ ಖ್ವಾಷ್ಟೆ ಆಯಿನ್,

61 “ದೇವ್‌ನು ಮಂದಿರ್‌ನ ರಡ್‌ಕೈ ನಾಖಿದೀನ್, ತೀನ್ ದನ್ಮ ಅನ
ಪಾಳ್ತು ಭಾಂದಾನ ಮನ ಹುವಾಸ್ ಕರಿ ಆ ಅದ್ವಿನೆ ಬೋಲ್ಚೊ” ಕರಿ
ಬೋಲ್ಚು.

62 ತದೆ ಗಲ್‌ಥಯಾಜಕ್‌ನೆ ಉರಿ ಭೀರಿನ್, ಯೇಸುನ, “ತೂ ಶಾಶ್ವಿ
ಜವಾಬ್ ಕೋ ದೇಯ್ಚಿ ಶು? ಅವ್ಣೆ ತಾರಪರ್ ಬೋಲುಕರಸ್ತೆ ಆ ಸಾಕ್ಷಿ
ಖ್ವಾಚಸ್‌ಕಿ ಶು?” ಕರಿ ಪುಲ್ಲಾಯೊ.

63 ಕತೋಬಿ ಯೇಸು ಖ್ವೊಪ್ ಥೊ. ತದೆ ಮಹಾಯಾಜಕ್‌ನೆ
ಪಾಳ್ತೊ, “ತುನ ಜಿವ್ವೊ ದೇವ್ ನಾಮ್‌ಪರ್ ಆಣ್‌ಲೀನ್, ಪುಲ್ಲಾವುಸ್,
ತೂ ದೇವ್‌ನೊ ಛಿಯ್ಚೊ ಕ್ರಿಸ್ತಸ್‌ಕಿಶು? ಹಮೂನ ಬೋಲ್” ಕರಿ
ಬೋಲ್ಚೊ.

64 ಯೇಸುನೆ ಇನ, “ತುನೇಸ್ ಬೋಲ್ಚೊನಿ; ಅತ್ರೇಸ್ ಕಾಹೆತೆ ಮೇ
ತುಮೂನ ಬೋಲುಸ್ಚಿ, ಹಂಕೇಥು ಅದ್ವಿನೊ ಛಿಯ್ಚೊ ಮಹಾನ್

ಶಕತ್‌ವಾಳಾನಿ ಖಾವಿಬಾಜುಮ ಬೆರೊರತ್ತೀತೆ ಅಜು ಆಬ್‌ನ ವಾದ್ಯಪರ್ ಬೇಶಿನ್ ಆವ್‌ಶೇತೆ ತುಮೆ ದೇಕ್‌ಶು!” ಕರಿ ಬೋಲ್ಯೊ.

⁶⁵ ತದೆ ಮಹಾಯಾಜಕ್‌ನೆ ಇನ ಲುಂಗ್‌ಗ್‌ನ ಫಾಡಿಲೀನ್, “ಆ ದೇವ್ ದೂಷಣೆ ಕರಾನಿ ವಾತೆ! ಅನೇಥಿ ಬಿಜು ಖೆವಿ ಸಾಕ್ಷಿ ಅಪ್ಪುನ ಹೋಣು? ಅನೆ ದೇವ್ ಗಾಳೆಕರಾನಿ ವಾತೆ ಬೋಲ್ಯೊತೆ ತುಮೇಸ್ ಖ್ವಮ್‌ಜ್ಯಾನಿ?”

⁶⁶ ತುಮೂನ ಕಿಮ್ ದೆಖಾವಸ್?” ಕರಿ ಬೋಲ್ಯೊ. ತದೆ ಇವ್ಣೆ
“ಆ ದೋಶಿ ಬಿಜು ಮರ್‌ವಾನ ಲ್ಹಾಯಕಸ್ ಲ್ಹಾ” ಕರಿ ಜವಾಬ್ ದಿದು.

⁶⁷ ಅಜು ಇವ್ಣೆ ಯೇಸುನ ಮ್ಹೋಡಾಪರ್ ಥೂಕಿನ್, ಇನ ಗುಖ್‌ತ್ತೊ ದಿದು; ಥೋಡು ಜಣು ಇನ ಕಲ್ಪಪರ್ ಮಾರಿನ್,

⁶⁸ “ಕ್ರಿಸ್ತ, ತುನ ಮಾರ್‌ಲ್ಯೊತೆ ಕೋಣ್? ಹಮೂನ ಪ್ರವಾದ್‌ನೆ ಬೋಲ್?” ಕರಿ ಬೋಲ್ಯೊ.

ಪೇತ್ರನ ಯೇಸು ಮಾಲುಮ್ ಕೊಯ್ಲಿ ಕರಿ ಬೋಲ್ಯೊತೆ
(ಮಾರ್ಕ 14:66-72; ಲೂಕ 22:56-62; ಯೋಹಾನ 18:15-18,25-27)

⁶⁹ ಪೇತ್ರ ಭಾರ್ ಚೌಕ್‌ಮ ಬೆರೋಥೊ, ಹಿಜ್ಜಾ ಏಕ್‌ಜಣಿ ದಾಸಿ ಇನಾಕನ ಏನ್, “ತೂಬಿ ಗಲಿಲಾಯಾನೊ ಯೇಸುನ ಜೋಡೆ ಥೋನಿ” ಕರಿ ಬೋಲಿ.

⁷⁰ ಕತೋಬಿ ಇನೆ, “ಕೊಯ್ಲಿ ತೂ ಶಾತ್ ಬೋಲುಕರಾಸ್ತಿ ಮನ ಮಾಲುಮ್ ಕೊಯ್ಲಿ” ಕರಿ ಖ್ವಾರಾನ ಖ್ವಾಮ್ಪೆ ಬೋಲ್ಯೊ.

⁷¹ ಅಜು ಯೋ ನಿಕ್ಕಿನ್, ಬಾಕಲ್‌ಭಣಿ ಚಲೆಗಯೊ. ತದೆ ಹಿಜ್ಜಾ ಥೀತೆ ಬಿಜೇಕ್ ಆಳ್‌ನೆ ಇನ ದೇಖಿನ್, ಹಿಜ್ಜಾ ಥೂತೆ ಅದ್ಮಿ ಖ್ವಾರಾನ, “ಆಬಿ ನಜರೇತ್‌ನೊ ಯೇಸುನ ಜೋಡೆ ಥೊ” ಕರಿ ಬೋಲಿ.

⁷² ಪಾಲ್ಟೊ ಪೇತ್ರನೆ, “ಕೊಯ್ಲಿ ಯೋ ಅದ್ಮಿ ಕೋಣ್ ಕರಿ ಮನ ಮಾಲುಮ್ ಕೊಯ್ಲಿ” ಕರಿ ಆಣ್‌ಲೀನ್, ಬೋಲ್ಯೊ.

⁷³ ಜರಫಡಿನ ಬಾದ್‌ಮ ಹಿಜ್ಜಾ ಭಿಯುಥೂತೆ ಅದ್ಮಿ ಖ್ವಾರು ಪೇತ್ರಕನ ಆಯಿನ್, “ಖ್ವಾಚಮಾಬಿ ತೂಬಿ ಇವ್ವಾಮ ಏಕ್‌ಜಣೊ, ಕರಿ ತೂ ವಾತೆ ಬೋಲಾಸ್ತೆ ತರಿಕಾಥಿನ್ ಮಾಲುಮ್ ಪಡಾಸ್” ಕರಿ ಬೋಲ್ಯೊ.

74 ತದೆ ಪೇತ್ರನೆ, ಇನುಯೋಸ್ ಆಣ್‌ಪ್ರಮಾಣ್‌ಲೀನ್ ಯೋ ಅದ್ವಿ ಮನ ಮಾಲುಮಸ್‌ಕೊಯ್ನಿ” ಕರಿ ಬೋಲ್ಯೊ.

ತದ್‌ನು-ತದೇಸ್ ಮುರ್‌ಗೊ ಬಾಂಗ್ ದಿದೊ.

75 ತದೆ ಪೇತ್ರನೆ, ಮುರ್‌ಗೊ ಬಾಂಗ್‌ದ್ಯವಾನ ಅಗಾಡಿ, ತೀನ್‌ಹಲ್ಲ ಮಾರಿ ಬಾರೇಮ, ಯೋ ಮನ ಮಾಲುಮ್ ಕೊಯ್ನಿ! ಕರಿ ತೂ ಬೋಲಿಶ್” ಕರಿ ಯೇಸುನೆ ಇನ ಬೋಲ್ಯೊಧೋತೆ ವಾತೆನ ಯಾದ್‌ಕರಿನ್, ಭಾರ್ ಜೈನ್, ಖಡ್‌ಕ್ಯಾಭರೀನ್ ರೋಯೊ.

27

ಯೇಸುನ ಪಿಲಾತಕನ ಲೀಗಯೊತೆ

1 ವ್ಹಾಣ್‌ಖ್ವತ್ರೇಸ್ ಖ್ವಾರಾಸ್ ಗಲ್‌ಥಯಾಜಕರ್ ಅಙ್ಲು ಶಾಣುಖ್ವಾರು ಯೇಸುನ ಮರೈನಾಖಿದೇಣು ಕರಿ ಇನಿ ವಿರೋದ್ ವಾತೆ ಕರಿಲೀನ್,

2 ಇನ ಖ್ವಂಕ್‌ಳಿಥಿ ಭಂದೈನ್, ಬುಲೈಲಿಜೈನ್, ರೋಮ್‌ನೊ ರಾಜ್ಯಪಾಲ್ ಹುಯಿರೈದ್ಲೊತೆ ಪಿಲಾತನ ಹಾತ್‌ಮ ದಿದು.

ಯೂದಾನು ಮರಣ್
(ಅಪೊ 1:18-19)

3 ಯೇಸುನ ಧೋಕೇಥಿ ಧರಿದಿದೋತೆ ಯೂದಾನೆ, ಯೇಸುನ ಮರಣ್ ದಂಡ್‌ನು ತೀರ್ಪ್ ಹುಯು ಕರಿ ದೇಖಿನ್, ಪಶ್‌ತ್ಯೆನ್, ಯೋ ಡೋಡಿಖ್ವೊರೂಪಾನು ಬಿಲ್ಲಾನ ಗಲ್‌ಥಯಾಜಕರ್ ಅಙ್ಲು ಶಾಣವ್‌ಕನ ಲೀಜೈನ್,

4 “ಶಾತ್ಪಿ ಗಲ್ಪಿಕೊಂತೆ ಅದ್ವಿನ ಧೋಕೇಥಿ ಮರೈನಾಖಿದ್ಯವಾನ ಧರಿ ದೀನ್, ಮೇ ಪಾಪ್ ಕರೈನ್” ಕರಿ ಬೋಲ್ಯೊ.

ತದೆ ಇವ್ಣೆ “ಇನ ಹಮೆ ಶಾತ್ ಕರಿಯೆ? ಯೋ ತಾರು ಮಾಪ್ಲ!” ಕರಿ ಜುವಾಬ್ ದಿದು.

5 ತದೆ ಯೂದಾನೆ ಯೋ ಪೈಶಾನ ಮಂದಿರ್‌ಮ ಫೇಕಿದಿನ್, ಹಿಙ್ಲಾಧೊ ಜೈನ್, ಟೀಪೊ ಲೀನ್, ಮರಿಗಯೊ.

6 ಗಲ್‌ಥಯಾಜಕರ್‌ನೆ ಯೋ ಪೈಶಾನ ಪಾಡಿಲೀನ್, “ಆ ಪೈಶಾ ಏಕ್ ಅದ್ವಿನ ಲೋಯಿನಖ್ವಾಜೆ ದಿದೂತೆ, ಇನಖ್ವಾಜೆ ಅನ ಮಂದಿರ್‌ನಿ

ಹುಂಡಿಮ ನಾಖಾನು ಅಪ್ಪಿನಿಯಮ್ಮ ವಿರೋದ್ ಹುಯಿರ್ದ್ಹಸ್” ಕರಿ ಬೋಲ್ಯೊ

7 ಅನಕೇಡೆಧು ಇವ್ವೆವಾತೆ ಕರಿಲೀನ್, ಯೋ ಪೈಶಾಧಿ ಪರೈದೇಖ್ವೆನು ಅದ್ಮಿಯೇನ ಮಾಟಿ ಕರಾನಖ್ವಾಜೆ ಏಕ್ “ಕುಂಭಾರ್ನ್ ಖೇತರ್” ಕರಿ ಜಮೀನ್ನ ಮೋಲ್ ಲಿದು.

8 ಅನಖ್ವಾಜೆಸ್ ಅದ್ಮಿಖ್ವಾರು ಯೋ ಖೇತರ್‌ನ ಹಂಕೆತೋಡಿ, ‘ಲ್ವೋಯಿನು ಖೇತರ್’ ಕರಿ ನಾಮ್‌ಧಿ ಚಿಕ್ರಾಸ್.

9 ಅಮ್ ಹುವಾಧಿ ಪ್ರವಾದಿ ಯೆರೆಮೀಯನೆ ಬೋಲ್ಯೋತೆ ವಾತೆ ಚಾಲಿಗೈ, ಯೋ ಶಾತ್‌ಕತೊ, ಇವ್ವೆ ಯೋ ಡೋಡಿಖ್ವೆ ರೂಪಾನು ಬಿಲ್ಲಾನ ಲೀನ್, ಆ ಇಸ್ರಾಯೇಲ್‌ಮ ಧೋಡಾನೆ ಇನ ಜಾನ್ನ ಭಾಂದ್ಯೊತೆ ಮೋಲ್” ಕರಿ ಬೋಲನುಸ್ ಯೋ ವಚನ್

10 ಪ್ರಭುನೆ ಹುಕುಮ್ ದಿದೋತೆ ಇಮ್ಮಸ್, ಇನೇಧಿ ಕುಂಭಾರ್ನ್ ಖೇತರ್‌ನ ಮೋಲ್‌ಲಿದು.

ಪಿಲಾತನೆ ಯೇಸುನ ಸವಾಲ್ ಪುಲ್ಲಾಯೊತೆ

(ಮಾರ್ಕ 15:2-5; ಲೂಕ 23:3-5; ಯೋಹಾನ 18:33-38)

11 ತದೆ ಯೇಸು ಪಿಲಾತನ ಖ್ವಾಪ್ಪೆ ಭಿಯ್ಯುಧೊತೆ ತದೆ ಇನೆ ಇನ, “ತೂ ಯೆಹೂದ್ಯರ್‌ನೊ ರಾಜಾಕಿ ಶು?” ಕರಿ ಪುಲ್ಲಾಯೊ. ಯೇಸುನೆ ಇನ,

“ತುನೇಸ್ ಬೋಲ್ಯೋನಿ” ಕರಿ ಜವಾಬ್ ದಿದೊ.

12 ಗಲಿಲಯಾಜಕರ್ ಅಜು ಶಾಣುಖ್ವಾರು ಇನಾಪರ್ ಘಣು ಗಲತ್ ಲಗಾಡುಕರ್ತುಧು, ತೋಬಿ ಯೇಸುನೆ ಶಾತ್ವಿ ಜವಾಬ್ ಕೋ ದಿದೋನಿ.

13 ತದೆ ಪಿಲಾತನೆ ಯೇಸುನ, “ಅವ್ವೆ ತಾರಾಪರ್ ಅತ್ರೆ ಗಲ್ಲಿ ಲಗಾಡುಕರಾಸ್ತೆ, ತೂ ಖ್ವಮ್‌ಜುಕರಾಕೊಯ್ತಿಕಿ ಶು?” ಕರಿ ಬೋಲ್ಯೊ.

14 ಕತೋಬಿ ಯೇಸುನೆ ಇನಿ ಏಕ್ ವಾತೆನಾಬಿ ಜವಾಬ್ ಕೋ ದಿದೋನಿ, ಅನ ದೇಖಿನ್, ಯೋ ರಾಜ್ಯಪಾಲ್‌ನ ಘಣು ಆಶ್ಚರ್ಯ ಹುಯು.

ಯೇಸುನ ಮರಣ್ ದಂಡ್ ಹುಯೊತೆ

(ಮಾರ್ಕ 15:6-15; ಲೂಕ 23:13-25; ಯೋಹಾನ 18:39—19:16)

15 ಪಸ್ಕ ಪೂಜಾನಿ ವಖ್ವತ್‌ಮ ಕೋಂಡಿ ಫಾಲಿರಾಖಾತೆ ಅದ್ವಿಮ, ಅದ್ವಿಖ್ವಾರು ಕಿನ ಬೋಲಸ್ಕಿ, ಇನ ಭಾರ್ ಮ್ವೇಲಾನು ರಾಜ್ಯಪಾಲನು ಆದತ್ ಹುಯಿರ್ದೇಥಿ.

16 ಯೋ ವಖ್ವತ್‌ಮ ಯೇಸು ಬರಬ್ಬ ಕರಿ ಏಕ್‌ಜಣಾನ ಜೇಲ್‌ಮ ಫಾಲಿರಾಖ್ವುಧು.

17 ಅದ್ವಿಖ್ವಾರು ಪಿಲಾತಕನ ಎಕ್ವ ಹುಯಿನ್ ಆವಾದಿನ್, ಇನೆ ಇವ್ವುನ, “ಮೇ ತುಮಾರಖ್ವಾಜೆ ಕಿನ ಮ್ವೇಲಿದೇಣು ಬರಬ್ಬಾನಾಕಿ, ಕ್ರಿಸ್ತ ಕರಿ ಬೋಲೈಲ್ಯವಾಳೊ ಯೇಸುನ?” ಕರಿ ಪುಲ್ಲಾಯೊ.

18 ಅದ್ವಿಖ್ವಾರು ಬಳಾಪೇಥಿ ಯೇಸುನ ಧರೀನ್, ಇನ ಹಾತ್‌ಮ ದೀರಾಖ್ವುಸ್ ಕರಿ ಪಿಲಾತನ ಮಾಲುಮ್ ಥು.

19 ಅತ್ರೇಸ್ ಕಾಹೆತೆ, ಪಿಲಾತ ನ್ಯಾವ್‌ನಿ ಖುಡ್‌ಶಿಪರ್ ಬೆರೊರ್ದವಾನಿ ವಖ್ವತ್‌ಮ ಇನಿ ಬಾವಣ್ಣೆ, “ಯೋ ಅದ್ವಿನ ಶಾಪ್ಪಿ ನಕೊ ಕರೀಶ್, ಯೋ ನೀತಿವಾಳೊ ಹುಯಿರ್ದೊಸ್, ಗಯೋತೆ ರಾತೆ ಖೋಣ್ಯಮ ಮನ ಘಣು ಖ್ವತಾಪ್ಪಿ ಹುಯು” ಕರಿ ಇನ ಬೋಲಿನ್ ಮೋಕ್ಲಿ.

20 ಕತೋಬಿ ಗಲ್‌ಡಯಾಜಕರ್ ಅಜು ಶಾಣುಖ್ವಾರು ಬರಬ್ಬನ ಮ್ವೇಲಿದೇಣು, ಯೇಸುನ ಮರೈನಾಕ್ಲ ಕರಿ ಪಿಲಾತನ ಬೋಲಿಲೇವ್ಣ ಕರಿ ಅದ್ವಿಯೇನ ಬೋಲಿದಿದು.

21 ಪಿಲಾತನೆ ಇವ್ವುನ, “ಆ ಬೇಮ ತುಮಾರಖ್ವಾಜೆ ಕಿನ ಮ್ವೇಲಿದೇಣು?” ಕರಿ ಪುಲ್ಲಾಯೊ.

ಇವ್ವೆ “ಬರಬ್ಬಾನ” ಕರಿ ಜವಾಬ್ ದಿದು.

22 ತದೆ ಪಿಲಾತನೆ, “ಇಮ್‌ಕತೊ, ಕ್ರಿಸ್ತ ಕರಿ ಬೋಲೈಲ್ಯವಾಳೊ ಯೇಸುನ ಮೇ ಶಾತ್ ಕರ್ದ್?” ಕರಿ ಇವ್ವುನ ಪುಲ್ಲಾಯೊ.

ತದೆ ಇವ್ವೆ ಖ್ವಾರಾಸ್, “ಇನ ಶಿಲ್‌ಬೇಪರ್ ಮರಾವ್!” ಕರಿ ಜವಾಬ್ ದಿದಾ.

23 ಕತೋಬಿ ಪಿಲಾತನೆ, “ಶನ? ಅನೆ ಶನಿ ಗಲ್ತಿ ಕರಿರಾಖೋಸ್?” ಕರಿ ಬೋಲ್ಯೊ ತದೆ ಇವ್ವೆ “ಇನ ಶಿಲ್‌ಬೇಪರ್ ಮರಾವ್!” ಕರಿ ಬಿಜೂಬಿ ಜೋರೇಮ್ವು ನಳ್ವೊ ತಾಣಿನ್ ಬೋಲ್ಯು.

24 ತದೆ ಪಿಲಾತನೆ ಮೇ ಕೆತ್ತು ಕರೈತೋಬಿ ಚಾಲ್‌ಷೆ ಕೊಯ್ಚಿ, ಅದ್ವಿಖ್ವಾರು ಕಲ್ವಾರ್ಗಟ್ ಕರೆಜಾಯ್ ಕರಿ ಮಾಲುಮ್ ಕರಿಲೀನ್, ಪಾಣಿ ಲೀನ್, ಅದ್ವಿನ ಖ್ವಾಪ್ಪೆ ಇನ ಹಾತ್ತ್ ಧೊಯಿಲಿನ್, “ಆ ಅದ್ವಿನ ಮರೈನಾಖನ ಮೇ ಜಿಮ್ಮೇದಾರ್ ಕಾಹೆ, ಆ ತುಮೇಸ್ ಕರುಕರಸ್ತೆ!” ಕರಿ ಬೋಲ್ಯೊ.

25 ತದೆ ಝೂಂಡ್‌ಮ ಥೂತೆ ಹಿಡಿ ಅದ್ವಿನೆ, “ಆ ಅದ್ವಿನ ಮರೈನಾಖಿದ್ಯವಾನಿ ಜಿಮ್ಮೇದಾರ್ ಹಮಾರಪರ್ ಅಜ್ಜು ಹಮಾರ ಲಡ್ವಾಪರ್ ಪಡಾದೆ!” ಕರಿ ಬೋಲ್ಯೊ.

26 ತದೆ ಪಿಲಾತನೆ ಬರಬ್ಬಾನ ಇವ್ವುನ ಮ್ಹೇಲಿದಿದೊ, ಅಜ್ಜು ಯೇಸುನ ಕೊಳ್ಳೇಡಿ ಮರೈನ್, ಶಿಲ್‌ಬೆಪರ್ ನಾಖಾನ ದಿನಾಖೊ.

ಸಿಪಾಯಿಖ್ವಾರು ಯೇಸುನಿ ನಕ್ಲೆ ಕಾಡ್ತೆ

(ಮಾರ್ಕ 15:16-20; ಯೋಹಾನ 19:2-3)

27 ಅನಕೇಡೆಥು ಪಿಲಾತನು ಸಿಪಾಯಿಖ್ವಾರು ಯೇಸುನ ರಾಜನ ಮಹೇಲ್‌ಮ ಬುಲೈಲೀಜೈನ್, ಹಿಡಿ ದಂಡ್-ದಳವಾಯಿಸ್ ಹಿಜ್ಜ ಎಕ್ಚು ಹುಯಿನ್ ಭರೈರೊಡ್ಡು.

28 ಇವ್ವೆಯೇಸುನ ಲುಂಗ್ಡಾವ್‌ನ ಕಾಡಿನಾಖಿನ್, ಲಾಲ್‌ಝುಗ್ಗಾನ ಇನ ಫೇರೈನ್,

29 ಕಾಟಾನ ವೇಲಾಥಿ ಏಕ್ ಕಿರೀಟ್‌ನ ವಣಿನ್, ಇನ ಮಾಥಪರ್ ಫಾಲ್ಯು ಅಜ್ಜು ಖಾವೊ ಹಾತ್ತ್ ಏಕ್ ಲರೊ ದೀನ್, ಇನಖ್ವಾಪ್ಪೆ ಗುಡ್‌ಫ್ಫ ಟೀಕಿನ್, “ಯೆಹೂದ್ಯರ್‌ನ ರಾಜ! ತುನ ಜಯ ಹುವಾದೆ” ಕರಿ ಬೋಲಿಲಿನ್ ನಕ್ಲೆ ಕರೈ.

30 ಇವ್ವೆ ಇನಪರ್ ಥೂಕಿನ್, ಯೋ ಲರಾನ ಛಿನ್ನೈಲಿನ್, ಇನೇಡಿ ಇನ ಮುಡ್‌ಕೈಪರ್ ಮಾರೈ.

31 ಅಮ್ ಇನಿ ನಕ್ಲೆ ಕಾಡಾನ ಬಾದ್‌ಮ, ಯೋ ಝುಗ್ಗಾನ ಕಾಡಿನ್, ಇನ ಲುಂಗ್ಡಾವ್‌ನ ಇನ ಪಾಲ್ತು ಫೇರೈನ್, ಶಿಲ್‌ಬೆಪರ್ ಮಾರಾನಖ್ವಾಜೆ ಲೀಗಯು.

ಯೇಸುನ ಶಿಲ್‌ಬೆಪರ್ ಮಾರ್ಯತೆ
(ಮಾರ್ಕ 15:21-32; ಲೂಕ 23:26-43; ಯೋಹಾನ 19:17-27)

32 ಇವ್ವೆ ಖ್ವಿಯೇರನ್ನ ಭಾರ್ ಜವ್‌ಕರಾನಿ ವಖ್ವತ್‌ಮ, ಸಿರೇನ್ ಖ್ವಿಯೇರನ್ನ ಸೀಮೋನ್ ಕರಿ ಏಕ್ ಜಣಾನ ಧರೀನ್, ಯೇಸುನಿ ಶಿಲ್‌ಬೆ ಪಾಡ್‌ಕರಿ ಶಿಪಾಯಿಖ್ವಾರು ಇನ ಜುಲಮ್ ಕರನ್.

33 ಅಜ್ಜು ಇವ್ವೆ ಗೊಲ್ಲೊಥಾ ಕರಿ ಝಗೋಪರ್ ಆಯಾ, ಗೊಲ್ಲೊಥಾ ಕತೊ, “ಖೋಪ್ಪಿನಿ ಝಗೊ” ಕರಿ.

34 ಹಿಜ್ಜಾ ಇವ್ವೆ ಇನ ಕಡು ಮಳಾಯುಹುಯು ದ್ರಾಕ್ಷಿನು ರಖ್ವನ್ ಪಿಯ್ಯಾನ ದಿದು; ಇನೆ ಲಜತ್ ದೇಖನ್ ಪಿಯಾನ ಕೊಹುಯನಿ.

35 ಅನಕೇಡೆಥು ಇವ್ವೆ ಇನ ಶಿಲ್‌ಬೆಪರ್ ನಾಖ್ವು ಅಜ್ಜು ಚೀಟ್ ನಾಖನ್ ಇನ ಲುಂಗ್ವಾವ್‌ನ ಇವ್ವಾಮ ವಾಟ ಪಾಡಿಲಿದು.

36 ಅನ ಬಾದ್‌ಮ ಇವ್ವೆ ಹಿಜ್ಜಾಸ್ ಬೇಶಿನ್, ಇನ ವಖ್ವತಿ ಕರಾಲಗ್ವು.

37 ಅತ್ರೇಸ್ ಕಾಹೆತೆ ಇವ್ವೆ ಯೇಸುಪರ್ ಲಗಾಡ್ಯತೊ ಗಲ್ಲಿನು ಲೀಖಿಹುಯು ಪಲ್ಲಾನ್, ಮುಡಕ್ಯಪರ್‌ನಿ ಉಪ್ಪರ್‌ಲಿ ಬಾಜು ಶಿಲ್‌ಬೆಪರ್ ಲಗಾಡ್ಯ; ಯೋ ಶಾತ್‌ಕತೊ, “ಆ ಯೇಸು, ಯೆಹೂದ್ಯರ್‌ನೊ ರಾಜ್” ಕರಿ.

38 ತದೆ ಬೇ ಜಣ ಚೋರ್‌ನ ಲಯಿನ್, ಏಕ್‌ಜಣಾನ ಯೇಸುನಿ ಖಾವಿ ಬಾಜೂಮ ಅಜ್ಜು ಬಿಜೇಕ್ ಜಣಾನ ಇನಿ ಡಾವಿ ಬಾಜೂಮ ಇನಿ ಜೋಡೆ ಶಿಲ್‌ಬೆಪರ್ ರಂಗಾಯು.

39 ಹಿಜ್ಜಾಕರಿ ಭಾವಾಳು ಅದ್ಮಿಖ್ವಾರು ಮುಡ್‌ಕ್ಯ ರಶ್‌ಕ್ಯೆನ್ ದೂಷಣೆ ಕರ್ತುಹುಯಿನ್,

40 “ಮಂದಿರ್‌ನ ಫೋಡಿನ, ಇನ ತೀನ್ ದನ್ಮಪಾಳ್ತು ಭಾಂದಾವಾಳ, ತಾರು ತೂಸ್ ಬಫಾಡಿಲೆ! ತೂ ದೇವ್‌ನೊ ಛಿಯ್ಯೋಸ್ ಉಶೇತೊ, ಶಿಲ್‌ಬೆಪರ್‌ಥು ಉತ್ರಿನ್, ಹೇಟ್ ಆವ್!” ಕರಿ ಬೋಲಿನ್, ಇನ ಚಿಂಫಾವ್‌ಕರ್ತೂಥು.

41 ಇಮ್ಮಸ್ ಗಲ್‌ಡಯಾಜಕರ್‌ಬಿ, ಮೋಶೆನಿ ವಚನ್ ಶಿಕಾಡವಾಳು ಶಾಸ್ತ್ರಿಖ್ವಾರು ಅಜ್ಜು ಶಾಣುಖ್ವಾರು,

42 “ಇನೆ ಬಿಜಾನಖ್ವಾರು ಬಘಾಡ್ಯೊ ಕತೋಬಿ ಇನು ಯೋಸ್ ಬಘಾಡಿಲ್ವವಾನ ಕೋ ಹೋಯ್ನಿ! ಆ ಇಸ್ರಾಯೇಲ್‌ನೊ ರಾಜಾ ಕಾಹೆಕಿ ಶು? ಆ ಹಮ್ಮೆ ಶಿಲ್‌ಬೆಪರ್‌ಥು ಉತ್ರಿನ್ ಹೇಟ್ ಆಯೋತೊ, ತದೆ ಹಮೆ ದೇಖಿನ್, ಇನಾಮ ವಿಶ್ವಾಸ್ ಕರ್ತು!

43 ಆ ದೇವ್ ಮಾನಿರಾಖೊಸ್‌ನಿ, ಅಜು ದೇವ್ ಆ ಹೋಣು ಉಶೇತೊ, ದೇವಸ್ ಇನ ಫೋಡಾವಾದೆ! ಮೇ ದೇವ್‌ನೊ ಛಿಯೊಕರಿ ಇನೇಸ್ ಬೋಲಿಲಿದೋನಿ!” ಕರಿ ಬೋಲಿನ್ ಚಿಂಫಾಯು.

44 ಇನ ಜೋಡ್ ಆಜುಬಾಜುನ ಶಿಲ್‌ಬೆಪರ್ ಮರ್ಯೆರ್ದೊಡೂತೆ ಭೇ ಚೋರ್‌ನೇಬಿ ಇಮ್ಮಸ್ ಬೋಲಿನ್, ಇನಿ ಖರ್ರಮ್‌ಕಾಡ್ತು.

ಯೇಸುನೆ ಜಾನ್ ಮ್ಹೇಲ್ಯೊತೆ

(ಮಾರ್ಕ 15:33-41; ಲೂಕ 23:44-49; ಯೋಹಾನ 19:28-30)

45 ಧೊಪಾರ್ ಹುವ್ವಾದೀನ್, ಹಿಡಿ ದೇಖ್‌ಪರ್ ಅಂಧಾರು ಡಪ್ಪೆನ್, ತೀನ್ ಘಂಟತೋಡಿ ಇಮ್ಮಸ್ ಥೂ.

46 ಖ್ವುಮಾರ್ ತೀನ್ ಘಂಟಾನ ಯೇಸು, “ಏಲಿ, ಏಲಿ, ಲಮಾ ಸಬಕ್ಕಾನಿ?” ಕತೊ, “ಮಾರೊ ದೇವ್, ಮಾರೊ ದೇವ್, ತೂ ಶನ ಮನ ಹಾತ್ ಮ್ಹಂದಿದೋತೆ?” ಕರಿ ಜೋರ್ ಆವಾಜ್‌ಥಿ ಚಿಕ್‌ರೊ.

47 ಹಿಜ್ಜಾ ಭಿಯ್ಯುಡೂತೆ ಥೋಡು ಜಣು ಅನ ಖ್ವಮ್‌ಜಿನ್, “ಆ ಎಲೀಯನ ಚಿಕ್ರುಕರಾಸ್!” ಕರಿ ಬೋಲ್ತು.

48 ತದೇಸ್ ಇವ್ವಾಮ ಏಕ್ ಜಣಾನೆ, “ಗುಂಜ್‌ನ ಪಾಡೀನ್, ಖಾಟ ರಖ್ವಾಮ ಡುಬೈನ್, ಲಠಾಕೇಡೆ ಅಟ್‌ಕೈನ್, ಯೇಸುನ ಪಿಯ್ಯಾನ ದಿದೊ.

49 ಅಜು ಥೋಡ ಜಣಾನೆ, “ಲೇರೊ! ಎಲೀಯ ಆಯಿನ್, ಅನ ಬಘಾಡಾಸ್ತಿ ಶುಕಿ?” ಕರಿ ಬೋಲ್ತು.

50 ಅನಕೇಡೆಥು ಯೇಸುನೆ ಪಾಟ್ಲೊ ಜೋರೆಮ್ಮ ಚಿತ್ರಿನ್ ಜಾನ್ ಮ್ಹೇಲ್ಯೊ.

51 ತದೆ ಯೆರೂಸಲೇಮ್ ಮಂದಿರ್‌ಮ ರಂಗೈರಾಖ್ಯುಡೂತೆ ಪಡ್‌ದೊ ಉಪ್ಪರ್‌ಥು ಧರಿನ್ ಹೇಟ್‌ತೋಡಿ ಫಾಟಿನ್, ಬೇ ಭಾಗ್ ಹುಯಿಗಯು. ಧರ್ತಿ‌ಕಾಪ್ಪು ಅಜು ಬಂಡಾ ಫುಟಿಗಯು,

52 ಮಖ್ವಾಣ್ಣನಿ ಘವಿಯೆ ನಿಕ್ಕಿಗಯು, ಅಜ್ಜು ಮರಿಗಯುಧೂತೆ ಕೈಯೆಕ್ಕಿ ದೇವ್‌ನು ಅದ್ವಿಖ್ವಾರಾನು ಶರೀರ್ ಪಾಟ್ರು ಜಿವ್ತು ಹುಯಿನ್ ಉರಿ ಆಯು.

53 ಯೇಸು ಜಿವ್ತೊಲುತಾನ ಬಾದ್‌ಮ, ಯೋ ಘವಿನ ಮ್ಹೆಂದಿನ್, ಪವಿತ್ರ ನಂಗರ್ ಹುಯಿರ್ದೊತೆ ಯೆರೂಸಲೇಮ್ಮ ಜೈನ್, ಕೈಯೆಕ್ಕಿ ಅದ್ವಿಯೇನ ದೆಖಾಯೊ.

54 ಖ್ವೊಶಿಪಾಯಿನೊ ಮೋಟಾನೆ ಅಜ್ಜು ಇನಜೋಡೆ ಯೇಸುನ ಕಾವ್ಲಿ ಕರುಕರ್ತುಧೂತೆ ಇವ್ಣೆ ಜುಮೀನ್ ಹಲ್ಯುತೆ ಅಜ್ಜು ಚಾಲ್ಯುತೆ ಖ್ವಾರಸ್ಸು ದೇಖಿನ್, ಘಣು ಡರಿನ್, “ಖ್ವಾಚಮಾಬಿ ಆ ದೇವ್‌ನೊ ಛಿಯ್ಯೊ ಹುಯಿರ್ದೊಡೊ!” ಕರಿ ಬೋಲ್ಯು.

55 ಅತ್ರೇಸ್ ಕಾಹೆತೆ ಕೈಯೆಕ್ಕಿ ಭಣಿ ತಯೇಡ ಹಿಜ್ಜಾ ದೂರ್‌ಥು ಭೀರಿನ್, ಇನ ದೇಖುಕರ್ತಿಧಿಯ್ಯೊ, ಅವ್ಣೆ ಖ್ವಾರಿ ಯೇಸುನಿ ಸೇವೆ ಕರ್ತಿಹುಯಿನ್, ಗಲಿಲಾಯಾಥು ಇನ ಪೀಲೇಸ್ ಐರ್ದೊಡಿಯ್ಯೊ.

56 ಅವ್ಣಾಮ ಮಗ್ದಲನಿ ಮರಿಯ, ಯಾಕೋಬ ಅಜ್ಜು ಯೋಸೇಫನಿ ಆಯ ಮರಿಯಬಿ, ಅಜ್ಜು ಜೆಬೆದಾಯನಿ ಬಾವಣೆಬಿ ಥೀ.

ಯೇಸುನ ಮಖ್ವಾಣ್ಣು ಕರ್ಯತೆ

(ಮಾರ್ಕ 15:42-47; ಲೂಕ 23:50-56; ಯೋಹಾನ 19:38-42)

57 ಖ್ವಾಂಜ್ ಹುವಾದಿನ್, ಅರಿಮಥಾಯ ಗಾಮ್‌ನೊ ಯೋಸೇಫ ಕರಿ ಏಕ್ಲಣೊ ಶೌಕಾರಿ ಆಯೊ, ಆಬಿ ಯೇಸುನೊ ಶಿಷ್ಯ ಹುಯಿರೋಡೊ.

58 ಅನೆ ಪಿಲಾತಕನ ಜೈನ್, ಯೇಸುನು ಶರೀರ್‌ನ ಮನ ದೆವಾಡ್ ಕರಿ ಬೋಲಿಲಿದೊ, ತದೆ ಪಿಲಾತನೆ ಯೇಸುನು ಶರೀರ್ ಯೋಸೇಫನ ದೇವ್ತುಕರಿ, ಹುಕುಮ್ ದಿದೊ.

59 ಯೋಸೇಫನೆ ಯೋ ಶರೀರ್‌ನ ಲೀನ್, ಇನ ಶುದ್ ಕೋರಥೊಳ ಲುಂಗ್ವಾಥಿ ಲಪೇಟಿನ್,

60 ಬಂಡಾಮ ಖೋಂದಿ ಬಣ್ಣಿರಾಖ್ಯೋಥೋತೆ ಇನಿ ಶೋಂತ್ ನವಿ ಘವೀನಖ್ವಾಪ್ಪೆ ಮೋಟಿ ಬಂಡಾನಿ ಚಿಪಾಟ್‌ನ ಮ್ಹೇಲಿನ್ ಯೋ ಘವಿನ ಮೂಚಿನ್, ಚಲೆಗಯೊ.

61 ಮಗ್ಗಲನಿ ಮರಿಯ ಅಚ್ಚು, ಯೋ ಬಿಜೇಕ್ ಮರಿಯ ಹಿಚ್ಚಾ ಘವೀನ ಖ್ವಾಪ್ಪೆ ಬೇರಿಥಿಯೆ.

62 ತಿನವ್ವಾಣೆ, ಕತೊ ಸಬ್ಬತ್ ದನ್ ಖತಮ್ ಹುವಾನ ಬಾದ್‌ಮ, ಗಲೆಡಯಾಜಕರ್ ಅಚ್ಚು ಫರಿಸಾಯರ್ ಪಿಲಾತಕನ ಜೈನ್,

63 “ಯಜಮಾನ್, ಯೊ ಝುಟಿಲೊ ಜವ್ತೊಥೋತೆ ತದೆ, ‘ತೀನ್ ದನ್ ಬಾದ್‌ಮ ಮೆ ಪಾಲ್ಟೊ ಜಿವ್ತೊ ಹುಯಿನ್ ಉರಿ ಐಶ್’ ಕರಿ ಬೋಲ್ಯೊತೆ ವಾತೆ ಹಮಾರ ಯಾದ್‌ಲ್ಹಾ,

64 ಇನಖ್ವಾಜೇಸ್ ತೀನ್ ದನ್‌ತೋಡಿ, ಇನಿ ಘವೀನ ಜ್ಞತನ್‌ಥಿ ವಖ್ವೆತಿ ಕರಾನಖ್ವಾಜೆ ಹುಕುಮ್ ದೇ, ನತರ್‌ಕಿ, ಇನ ಶಿಷ್ಯರ್ ಐನ್ ಇನಿ ಶರೀರ್‌ನ, ಚೋರೇಖ್ವು ಪಾಡಿಲಿಜೈನ್ ಮರಯ್ತೊಹುಯೊ ಜಿವ್ತೊ ಹುಯಿನ್ ಉರಿರಯ್ತೊ, ಕರಿ ಬೋಲೆಜಾಯ್ ತದೆ ಪಹಿಲಿ ಝುಟಿಥೀಬಿ, ಖರ್ತಿಮಾನಿ ಝುಟಿ ಘಣು ಖರಾಬ್ ಹುಯಿಜಾಶೆ” ಕರಿ ಬೋಲ್ಯು.

65 ತದೆ ಪಿಲಾತನೆ ಇವ್ವುನ; ವಖ್ವೆತಿ ಕರವಾಳನ” ಬುಲೈಲಿ “ಜಾವೊ,ಅಚ್ಚು ತುಮುನ ಹೋಣುತೆ ಇಮ್ ಜ್ಞತನ್‌ಥಿ ಘವೀನ ವಖ್ವೆತಿ ಕರೊ” ಕರಿ ಬೋಲ್ಯೊ.

66 ತದೆ ಇವ್ವೆ ಜೈನ್, ಘವಿನ ಮುದ್ರೊಮಾರಿನ್, ಶಿಪಾಯಿನ ಕಾಪ್ಪಿನ ಮ್ಹೇಲಿನ್, ಘವೀನ ಜ್ಞತನ್ ಕರಯ್.

28

ಯೇಸು ಜಿವ್ತೊ ಹುಯಿನ್ ಉರಿ ಆಯೋತೆ

(ಮಾರ್ಕ 16:1-10; ಲೂಕ 24:1-12; ಯೋಹಾನ 20:1-10)

1 ಸಬ್ಬತ್‌ನೊ ದನ್ ಹುವಾನ ಬಾದ್‌ಮ, ಐತ್‌ವಾರ್‌ನ ದನ್ನೆ ವ್ಯಾಣೇಸ್ ವೇಳಿ, ಮಗ್ಗಲನಿ ಮರಿಯ ಅಚ್ಚು ಯೋ ಬಿಜೇಕ್‌ಚ್ಚಣಿ ಮರಿಯ ಯೇಸುನು ಮಖ್ವಾಣ್ಯನಿ ಘವಿಕನ ಐಯ್.

2 ತದೆ ಎಕ್ಕದಮ್ ಜೋರೇಮ್ಮು ಜಮೀನ್ ಹಲ್ಯು; ಪ್ರಭುನೊ ಏಕ್ ದೂತ ಆಬ್‌ಪರ್‌ಥು ಉತ್ರಿ ಐನ್, ಯೋ ಘವಿನ ಮೂಚ್ಚೆರ್ದುಡೂತೆ ಬಂಡಾನ ಹಿಜ್ಜಾಡ್ಲು ಗಿರ್‌ಗಡೈನ್, ಇನಾಪರ್ ಬೇಶಿಗಯೊ.

3 ಇನು ರೂಪ್ ವಿಚ್‌ಳಿನಫೋಣಿ ಥೂ, ಇನ ಲುಂಗ್ಡ ಬರಪ್‌ನಿಫೋಣಿ ಧೋಳುಫಟ್ ಥೂ.

4 ಹಿಜ್ಜಾ ವಖ್‌ತಿ ಕರುಕರ್ತುಡೂತೆ ಶಿಪಾಯಿ ಖ್ವಾರು ಡರ್‌ಥಿ ಧರ್‌ಧರ್ ಕಾಪಿನ್ ಮರ್ಯ್ ಮುರ್ದಾನಿಫೋಣಿ ಹುಯಿಗಯು.

5 ತದೆ ಯೋ ದೇವ್‌ನೊ ದೂತನೆ ಯೋ ತಯೇಡಾವ್‌ನ, “ತುಮೆ ಡರೊನಕೊ, ಶಿಲ್‌ಬೆಪರ್ ಮಾರ್‌ಯ್‌ಡೂತೆ ಯೇಸುನ ತುಮೆ ಥೂಂಡುಕರಾಸ್ ಕರಿ ಮನ ಮಾಲುಮ್.

6 ಯೋ ಹಜ್ಜಾ ಕೊಯ್ತು; ಇನೆ ಬೋಲ್ಯೊಥೋತೆ ಇಮ್ಪ್‌ಸ್ ಮರಣ್‌ಮಾಥೊ ಜಿವ್ವೊ ಹುಯಿನ್, ಉರಿರ್ದೊಡ್. ಹಜ್ಜಾ ಆವೊ, ಯೋ ಮ್ಹುತೊಥೋತೆ ಝಗೋನ ದೇಖೊ.

7 ಹಮ್ಗೆ ಒಗ್ಗಿನ್ ಜೈನ್, ಇನ ಶಿಷ್ಯರ್‌ನ ಬೋಲ್ಯೊಕಿ, ‘ಮರಿಗಯೊಹುಯೊ ಪಾಟ್ಲೊ ಜಿವ್ವೊಹುಯಿನ್ ಉಲ್ಯೊ ಅಜು ತುಮಾರೇಥಿ ಅಗಾಡಿ ಗಲಿಲಾಯನ ವಳ್ಳೊಜಾಸ್; ಹಿಜ್ಜಾ ತುಮೆ ಇನ ದೇಕ್‌ಶು!’ ಕರಿ. ಮೇ ಬೋಲ್ಯೊತೆ ವಾತೆ ಖ್ವಾರಿ ಯಾದ್‌ರ್ದವಾದೆ” ಕರಿ ಬೋಲ್ಯೊ.

8 ತದೆ ಇವ್ಣೆಡರ್‌ಥೀಬಿ, ಘಣಿ ಮ್ಹುಶಿಥಿ ಒಗ್ಗಿನ್‌ಮ ಯೋ ಮಖ್ವಾಣ್ಣಿನಿ ಘವಿಕಂಥು ನಿಕ್ಕಿನ್, ಇನ ಶಿಷ್ಯರ್‌ನ ಬೋಲಾನಖ್ವಾಜಿ ಮಿಲಯ್ತೆ.

9 ತದೆ ಎಕ್ಕದಮ್ ಯೇಸು ಇವ್ಣುನ ದೆಖೈನ್, “ತುಮೂನ ಸಮಾಧಾನ್ ಹುವಾದೆ” ಕರಿ ಬೋಲ್ಯೊ. ಇವ್ಣೆ ಇನ ಖನ್ನೆ ಆಯಿನ್, ಇನ ಗೋಡ ಧರೀನ್, ಇನ ಆರಾದನೆ ಕರಿಯೆ.

10 ಯೇಸುನೆ ಇವ್ಣುನ, “ಡರೊ ನಕೊ, ಮಾರ ಭಯೇಕನ ಜೈನ್, ಗಲಿಲಾಯಾನ ಆವಾನ ಬೋಲೊ. ಹಿಜ್ಜಾ ಇವ್ಣೆ ಮನ ದೇಕ್‌ಶೆ” ಕರಿ ಬೋಲ್ಯೊ.

ಕಾವ್ಲಿ ಕರಾವಾಳ ಶಿಪಾಯಿನೆ ಬೋಲ್ಯಾತೆ

11 ಯೋ ತಯೇಡ ಖ್ವಾರಿ ಜಾತಿ ವಖ್ವತ್‌ಮ, ವಖ್ವತ್‌ತಿ ಕರುಕರ್ತುಫೂತೆ ಶಿಪಾಯಿಮ ಥೋಡು ಜಣು ಖ್ವಯೇರ್‌ಮ ಜೈನ್, ಚಾಲ್ಯುತೆ ಬಾರೇಮ ಖ್ವಾರೂಸ್ ಗಲ್‌ಡಯಾಜಕರ್‌ನ ಖ್ವಾಮ್ಲೆ ಬೋಲ್ಯು.

12 ಗಲ್‌ಡ ಯಾಜಕರ್ ಶಾಣಾವ್ ಜೋಡೆ ಮಳಿನ್, ವಾತೆ ಕರಿಲೀನ್, ಯೋ ಶಿಪಾಯಿಯೇನ ಇವ್ಲೆ ಘಣ ಪೈಶಾದೀನ್,

13 “ರಾತ್ ಹಮೆ ಖ್ವಾರ್‌ವಾನಿ ವಖ್ವತ್‌ಮ, ಇನ ಶಿಷ್ಯರ್ ಆಯಿನ್, ಇನ ಮುದರ್‌ನ ಚೋರೇಖ್ವ ಪಳ್ಳಿ ಗಯ ಕರಿ ಬೋಲೊ.

14 ಆ ಖಬರ್ ರಾಜ್‌ಭಾರ್ ಚಲಾವವಾಳಾನ ಕಾನ್‌ಮ ಪಡ್ಯೂತೊ, ಹಮೆ ಇನಜೋಡೆ ವಾತೆಕರಿನ್, ತುಮಾರಾಮ ಗಲ್ತಿಕೊಯ್ಲಿ ಕರಿ ಖ್ವಮ್‌ಭಾಡ್‌ಶು, ತದೆ ತುಮೂನ ಶನೋಸ್ ಡರ್ ಕೋ ರ್‌ಶೀನಿ” ಕರಿ ಬೋಲ್ಯು.

15 ಯೋ ಶಿಪಾಯಿಯೇನೆ ಪೈಶಾ ಲೀಲಿನ್, ಇವ್ವುನ ಶಾತ್ ಬೋಲಿದಿದೂಫೂಕಿ ಇಮ್ಮುಸ್ ಕರ್ಲ್ಯು. ಆ ವಾತೆ ಹಮ್ಮೆಲಗೂಬಿ ಯೆಹೂದ್ಯರ್ಮ ಪೈಲಿರ್ದೊಸ್.

ಯೇಸು ಇನ ಶಿಷ್ಯರ್‌ನ ದೆಖಾಯೊತೆ

(ಮಾರ್ಕ 16:14-18; ಲೂಕ 24:36-49; ಯೋಹಾನ 20:19-23; ಅಪೊ 1:6-8)

16 ಬಾದ್‌ಮ ಗ್ಯಾರ್‌ಜಣ ಶಿಷ್ಯರ್ ಯೇಸುನೆ ಬೋಲಿವತಾಳ್ವೊತೆ ಗಲಿಲಾಯನು ಏಕ್ ಪಹಾಡ್‌ಕನ ಗಯ.

17 ಹಿಜ್ಜಾ ಯೇಸುನ ದೇಖಿನ್, ಇನಖ್ವಾಮ್ಲೆ ಆರಾದನೆ ಕರ್ಲ್ಯು, ಕತೋಬಿ ಇವ್ವಾಮ ಥೋಡು ಜಣು ಶಕ್ ಕರ್ಲ್ಯು.

18 ಯೇಸು ಇವ್ವ ಖನ್ನೆ ಆಯಿನ್, “ಸೊರ್ಗಾಮಾಬಿ, ಧರ್ತಿಪರಬಿ ಖ್ವಾರೀಸ್ ಅದಿಕಾರ್ ಮನ ದೆವೈರ್ದೊಸ್.

19 ಇನಖ್ವಾಜೆ ತುಮೆ ಜೈನ್, ಖ್ವಾರ್ ದೇಖ್ವಾಮ ಛಾತೆ ಅಲಕ್ ಅಲಕ್ ವಾತೆ ಬೋಲಾವಳು ಅದ್ಮಿ ಖ್ವಾರಾನ ಮಾರ ಶಿಷ್ಯರ್ ಬಣಾವೊ: ಇವ್ವುನ ಬಾ, ಛಿಯೊ ಅಜು ಪವಿತ್ರಾತ್ಮನ ನಾಮ್‌ಪರ್ ಬ್ಯಾಪ್ತಿಸ್ಮ ದೆವೊ.

20 ಅಙ್ಗು ಮೇ ತುಮೂನ ಹುಕುಮ್ ದೀರಾಖ್ಯೋತೆ ಖಾರಸ್ಸ ಇವ್ಣೆ ಪಾಡಿ ಫಾಲಾನಿಫೋಣಿ ಇವ್ಣುನ ಬೋಲಿವತಾಳೊ. ಅಙ್ಗು ಯಾದ್ತ್ ರ್ವಾಡೇಕಿ ಜಗತ್‌ನು ಖರ್ತಿ ಹುವಾಲಗೂಬಿ, ಹಮೇಶ ಮೇ ತುಮಾರ ಜೋಡೆಸ್ ರ್ವೇಶ್” ಕರಿ ಬೋಲ್ಯೊ

ದೇವಿ ಖಾಚಿ ವಚನ್

The New Testament in the Vaagri Booli language of India: ದೇವಿ ಖಾಚಿ ವಚನ್ (Bible)

copyright © 2023 The Word for the World International

Language: (Vaagri Booli)

Contributor: The Word for the World International

ದೇವಿ ಖಾಚಿ ವಚನ್ ವಿ ಒಪ್ಪಂದಾನ, 2023

The New Testament in Waghri Vathe Language

The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-09

PDF generated using Haiola and XeLaTeX on 9 Jul 2025 from source files dated 9 Jul 2025

c0e4b622-a4d7-5e71-865e-40f2bf35bd06